

全 唐 诗

（第四部）

· 全唐诗 ·

第一百二十一卷

卷_1【送贺监归四明应制】

李林甫

挂冠知止足，岂独汉疏贤。入道求真侣，辞恩访列仙。
睿文含日月，宸翰动云烟。鹤驾吴乡远，遥遥南斗边。

卷_2【奉和圣制次琼岳应制】

李林甫

东幸从人望，西巡顺物回。云收二华出，天转五星来。
十月农初罢，三驱礼复开。更看琼岳上，佳气接神台。

卷_3【秋夜望月忆韩席等诸侍郎因以投赠】

李林甫

秋天碧云夜，明月悬东方。皓皓庭际色，稍稍林下光。

· 全唐诗 ·

桂华澄远近，璧彩散池塘。鸿雁飞难度，关山曲易长。
揆予秉孤直，虚薄忝文昌。握镜惭先照，持衡愧后行。
多才众君子，载笔久词场。作赋推潘岳，题诗许谢康。
当时陪宴语，今夕恨相望。愿欲接高论，清晨朝建章。

卷_4【流崖州至鬼门关作】

杨炎

一去一万里，千知千不还。崖州何处在，生度鬼门关。

卷_5【赠元载歌妓】

杨炎

雪面淡眉天上女，凤箫鸾翅欲飞去。
玉山翘翠步无尘，楚腰如柳不胜春。

卷_6【别妻王韞秀】

元载

年来谁不厌龙钟，虽在侯门似不容。
看取海山寒翠树，苦遭霜霰到秦封。

· 全唐诗 ·

卷_7【赋得云生栋梁间】

陈希烈

一片苍梧意，氤氲生栋梁。下帘山足暗，开户日添光。
偏使衣裘润，能令枕簟凉。无心伴行雨，何必梦荆王。

卷_8【奉和圣制三月三日】

陈希烈

上巳迁龙驾，中流泛羽觞。酒因朝太子，诗为乐贤王。
锦缆方舟渡，琼筵大乐张。风摇垂柳色，花发异林香。
野老歌无事，朝臣饮岁芳。皇情被群物，中外洽恩光。

卷_9【省试白云起封中】

陈希烈

千年泰山顶，云起汉王封。不作奇峰状，宁分触石容。
为霖虽易得，表圣自难逢。冉冉排空上，依依叠影重。
素光非曳练，灵贶是从龙。岂学无心出，东西任所从。

· 全唐诗 ·

卷_10【郎月行】

张渐

朗月照帘幌，清夜有馀姿。洞房怨孤枕，挟琴爱前墀。
萱草已数叶，梨花复遍枝。去岁草始荣，与君新相知。
今年花未落，谁分生别离。代情难重论，人事好乖移。
合比月华满，分同月易亏。亏月当再圆，人别星陨天。
吾欲竟此曲，意深不可传。叹息孤鸾鸟，伤心明镜前。

卷_11【晓次荆江】

宋昱

孤舟大江水，水涉无昏曙。雨暗迷津时，云生望乡处。
渔翁闲自乐，樵客纷多虑。秋色湖上山，归心日边树。
徒称竹箭美，未得枫林趣。向夕垂钓还，吾从落潮去。

卷_12【题石窟（寺魏孝文所置）】

宋昱

梵宇开金地，香龕凿铁围。影中群象动，空里众灵飞。
檐牖笼朱旭，房廊挹翠微。瑞莲生佛步，瑶树挂天衣。
邀福功虽在，兴王代久非。谁知云朔外，更睹化胡归。

· 全唐诗 ·

卷_13【樟亭观涛】

宋昱

涛来势转雄，猎猎驾长风。雷震云霓里，山飞霜雪中。
激流起平地，吹涝上侵空。翕辟乾坤异，盈虚日月同。
鲛鼉从陆起，洲浦隔阡通。跳沫喷岩翠，翻波带景红。
怒湍初抵北，却浪复归东。寂听堪增勇，晴看自发蒙。
伍生传或谬，枚叟说难穷。来信应无已，申威亦匪躬。
冲腾如决胜，回合似相攻。委质任平视，谁能涯始终。

· 全唐诗 ·

第一百二十二卷

卷_1【赠程秘书】

卢象

客自岐阳来，吐音若鸣凤。孤飞畏不偶，独立谁见用。
忽从被褐中，召入承明宫。圣人借颜色，言事无不通。
殷勤拯黎庶，感激论诸公。将相猜贾谊，图书归马融。
顾余久寂寞，一岁麒麟阁。且共歌太平，勿嗟名宦薄。

卷_2【家叔征君东溪草堂二首】

卢象

开山十馀里，青壁森相倚。欲识尧时天，东溪白云是。
雷声转幽壑，云气杳流水。涧影生龙蛇，岩端翳怪梓。
大道终不易，君恩曷能已。鹤羨无老时，龟言摄生理。
浮年笑六甲，元化潜一指。未暇扫云梯，空惭阮氏子。

今朝共游者，得性闲未归。已到仙人家，莫惊鸥鸟飞。
水深严子钓，松挂巢父衣。云气转幽寂，溪流无是非。
名理未足羨，腥臊讵所希。自惟负贞意，何岁当食薇。

· 全唐诗 ·

卷_3【乡试后自巩还田家，因谢邻友见过之作】

卢象

鸡鸣出东邑，马倦登南峦。落日见桑柘，翳然丘中寒。
邻家多旧识，投暝来相看。且问春税苦，兼陈行路难。
园场近阴壑，草木易凋残。峰晴雪犹积，涧深冰已团。
浮名知何用，岁晏不成欢。置酒共君饮，当歌聊自宽。

卷_4【青雀歌】

卢象

啾啾青雀儿，飞来飞去仰天池。逍遥饮啄安涯分，
何假扶摇九万为。

卷_5【杂诗二首】

卢象

家居五原上，征战是平生。独负山西勇，谁当塞下名。
死生辽海战，雨雪蓟门行。诸将封侯尽，论功独不成。

君家御沟上，垂柳夹朱门。列鼎会中贵，鸣珂朝至尊。
死生在片议，穷达由一言。须识苦寒士，莫矜狐白温。

· 全唐诗 ·

卷_6【赠广川马先生】

卢象

经书满腹中，吾识广川翁。年老甘无位，家贫懒发蒙。
人归洙泗学，歌盛舞雩风。愿接诸生礼，三年事马融。

卷_7【峡中作】

卢象

高唐几百里，树色接阳台。晚见江山霁，宵闻风雨来。
云从三峡起，天向数峰开。灵境信难见，轻舟那可回。

卷_8【竹里馆】

卢象

江南冰不闭，山泽气潜通。腊月闻山鸟，寒崖见蛰熊。
柳林春半合，荻笋乱无丛。回首金陵岸，依依向北风。

卷_9【永城使风】

卢象

长风起秋色，细雨含落晖。夕鸟向林去，晚帆相逐飞。

· 全唐诗 ·

虫声出乱草，水气薄行衣。一别故乡道，悠悠今始归。

卷_10【和徐侍郎丛筱咏（一作蒋涣诗）】

卢象

中禁夕沉沉，幽篁别作林。色连鸡树近，影落凤池深。
为重凌霜节，能虚应物心。年年承雨露，长对紫庭阴。

卷_11【驾幸温泉】

卢象

传闻圣主幸新丰，清跸鸣銮出禁中。细草终朝随步辇，
垂杨几处绕行宫。千官扈从骊山北，万国来朝渭水东。
此日小臣徒献赋，汉家谁复重扬雄。

卷_12【奉和张使君宴加朝散】

卢象

佐理星辰贵，分荣涣汗深。言从大夫后，用答圣人心。
骑拥轩裳客，鸾惊翰墨林。停杯歌麦秀，秉烛醉棠阴。
爽气凌秋笛，轻寒散暝砧。只应将四子，讲德谢知音。

· 全唐诗 ·

卷_13【赠张均员外】

卢象

公门世绪昌，才子冠裴王。出自平津邸，还为吏部郎。
神仙馀气色，列宿动辉光。夜直南宫静，朝趋北禁长。
时人归水镜，明主赐衣裳。翰苑飞鹦鹉，天池待凤凰。
承欢畴日顾，未纪后时伤。去去图南远，微才幸不忘。

卷_14【送祖咏】

卢象

田家宜伏腊，岁晏子言归。石路雪初下，荒村鸡共飞。
东原多烟火，北涧隐寒晖。满酌野人酒，倦闻邻女机。
胡为困樵采，几日罢朝衣。

卷_15【送綦毋潜】

卢象

夫君不得意，本自沧海来。高足未云骋，虚舟空复回。
淮南枫叶落，灞岸桃花开。出处暂为耳，沉浮安系哉。
如何天覆物，还遣世遗才。欲识秦将汉，尝闻王与裴。

· 全唐诗 ·

离筵对寒食，别雨乘春雷。会有征书到，荷衣且漫裁。

卷_16【送赵都护赴安西】

卢象

下客候旌麾，元戎复在斯。门开都护府，兵动羽林儿。
黠虏多翻覆，谋臣有别离。智同天所授，恩共日相随。
汉使开宾幕，胡笳送酒卮。风霜迎马首，雨雪事鱼丽。
上策应无战，深情属载驰。不应行万里，明主寄安危。

卷_17【追凉历下古城西北隅，此地有清泉乔木】

卢象

谢朓出华省，王祥贻佩刀。前贤真可慕，衰病意空劳。
贞悔不自卜，游随共尔曹。未能齐得丧，时复诵离骚。
闲阴七贤地，醉餐三士桃。苍苔虞舜井，乔木古城壕。
渔父偏相狎，尧年不可逃。蝉鸣秋雨霁，云白晓山高。
咫尺传双鲤，吹嘘借一毛。故人皆得路，谁肯念同袍。

卷_18【戏赠邵使君张郎】

卢象

少妇石榴裙，新妆白玉面。能迷张公子，不许时相见。

· 全唐诗 ·

卷_19【同王维过崔处士林亭】

卢象

映竹时闻转轳轳，当窗只见网蜘蛛。

主人非病常高卧，环堵蒙笼一老儒。

卷_20【寄河上段十六（一作王维诗）】

卢象

与君相识即相亲，闻道君家住孟津。

为见行舟试借问，客中时有洛阳人。

卷_21【寒食】

卢象

子推言避世，山火遂焚身。四海同寒食，千秋为一人。
深冤何用道，峻迹古无邻。魂魄山河气，风雷御宇神。
光烟榆柳灭，怨曲龙蛇新。可叹文公霸，平生负此臣。

· 全唐诗 ·

卷_22【八月十五日象自江东止田园移庄庆会，未几归汶上，小弟幼妹尤嗟其别，兼赋是诗三首（俱见王维集）】

卢象

谢病始告归，依然入桑梓。家人皆伫立，相候衡门里。
畴类皆长年，成人旧童子。上堂家庆毕，愿与亲姻迩。
论旧或馀悲，思存且相喜。田园转芜没，但有寒泉水。
衰柳日萧条，秋光清邑里。入门乍如客，休骑非便止。
中饮顾王程，离忧从此始。

两妹日长成，双鬟将及人。已能持宝瑟，自解掩罗巾。
念昔别时小，未知疏与亲。今来识离恨，掩泪方殷勤。

小弟更孩幼，归来不相识。同居虽渐惯，见人犹默默。
宛作越人言，殊乡甘水食。别此最为难，泪尽有馀忆。

卷_23【叹白发（一作王维诗）】

卢象

我年一何长，鬓发日已白。俯仰天地间，能为几时客。

惆怅故山云，裴回空日夕。何事与时人，东城复南陌。

· 全唐诗 ·

卷_24【早秋宴张郎中海亭即事（一作孟浩然诗）】

卢象

邑有弦歌宰，翔鸾狎野鸥。眷言华省旧，暂滞海池游。
郁岛藏深竹，前谿对舞楼。更闻书即事，云物是新秋。

卷_25【句】

卢象

吴越山多秀，新安江甚清。（见《河岳英灵集》）

书名会粹才偏逸，酒号屠苏味更醇。
（《赠郑虔》，见《唐语林》）

初疑轻烟淡古松，又似山开万仞峰。
（《赠怀素》，见《颜真卿序》）

· 全唐诗 ·

第一百二十三卷

卷_1【嵩山十志十首·草堂】

卢鸿一

草堂者，盖因自然之谿阜，前当墉洫；资人力之缔构，后加茅茨。将以避燥湿，成栋宇之用；昭简易，叶乾坤之德，道可容膝休闲。谷神同道，此其所贵也。及靡者居之，则妄为剪饰，失天理矣。词曰：
山为宅兮草为堂，芝兰兮药房。罗蘼芜兮拍薜荔，
茝壁兮兰砌。蘼芜薜荔兮成草堂，阴阴邃兮馥馥香，
中有人兮信宜常。读金书兮饮玉浆，童颜幽操兮不易长。

卷_2【嵩山十志十首·倒景台】

卢鸿一

天门豁兮仙台耸，杰屹崒兮零瀕涌。穷三休兮旷一观，
忽若登昆仑兮中期汗漫仙。耸天关兮倒景台，
鲨颢气兮轶嚣埃。皎皎之子兮自独立，云可朋兮霞可吸，
曾何荣辱之所及。

· 全唐诗 ·

卷_3【嵩山十志十首·樾馆】

卢鸿一

紫岩隈兮青谿侧，云松烟茑兮千古色。芳霏靡兮荫蒙茏，
幽人构馆兮在其中。霏靡蒙茏兮开樾馆，
卧风霄兮坐霞旦。粤有宾兮时戾止，樵苏不爨兮清谈已，
永岁终朝兮常若此。

卷_4【嵩山十志十首·枕烟庭】

卢鸿一

临泱泱兮背青荧，吐云烟兮合窅冥。悦欬翕兮沓幽霭，
意缥缈兮群仙会。窅冥仙会兮枕烟庭，竦魂形兮凝视听。
闻夫至诚必感兮巖，契颢气，养丹田，终仿像兮覩灵仙。

卷_5【嵩山十志十首·云锦淙】

卢鸿一

水攒冲兮石丛耸，焕云锦兮喷汹涌。苔駮荦兮草夤缘，
芳幂幂兮濞濞濞。石攒丛兮云锦淙，波连珠兮文沓绛。
有洁冥者媚此幽，漱灵液兮乐天休，实获我心兮夫何求。

· 全唐诗 ·

卷_6【嵩山十志十首·期仙磴】

卢鸿一

霏微阴壑兮气腾虹，迤逦危磴兮上凌空。
青霞杪兮紫云垂，鸾歌凤舞兮吹参差。
鸾歌凤舞兮期仙磴，鸿驾迎兮瑶华赠。山中人兮好神仙，
想像闻此兮欲升烟，铸月炼液兮伫还年。

卷_7【嵩山十志十首·涤烦矶】

卢鸿一

灵矶盘礴兮溜奔错漱，冷风兮镇冥壑。研苔滋兮泉珠洁，
一饮一憩兮气想灭。磷涟清淬兮涤烦矶，
灵仙境兮仁智归。中有琴兮徽以玉，
峨峨汤汤兮弹此曲，寄声知音兮同所欲。

卷_8【嵩山十志十首·幂翠庭】

卢鸿一

青崖阴兮月涧曲，重幽叠邃兮隐沦躅。
草树绵幂兮翠蒙茏，当其无兮庭在中。

· 全唐诗 ·

当无有用兮霁翠庭，神可谷兮道可冥。
有幽人兮张素琴，皇徽兮绿水阴，德之愔兮澹多心。

卷_9【嵩山十志十首·洞元室】

卢鸿一

岚气肃兮岩翠冥，空阴虚兮户芳迎。披蕙帐兮促萝筵，
谈空空兮核元元。蕙帐萝筵兮洞元室，秘而幽兮真可吉。
返自然兮道可冥，泽妙思兮草玄经，结幽门兮在黄庭。

卷_10【嵩山十志十首·金碧潭】

卢鸿一

水碧色兮石金光，滉熠熠兮潋滟滟。泉葩映兮烟萼临，
红灼灼，翠阴阴。翠相鲜兮金碧潭，霜天洞兮烟景涵。
有幽人兮好冥绝，炳其焕兮凝其洁，悠悠千古兮长不灭。

· 全唐诗 ·

第一百二十四卷

卷_1【书殿赐宴应制】

徐安贞

校文常近日，赐宴忽升天。酒正传杯至，饔人捧案前。
玉阶鸣溜水，清阁引归烟。共惜芸香暮，春风几万年。

卷_2【从驾温泉宫】

徐安贞

神女调温液，年年待圣人。试开临水殿，来洗属车尘。
暖气随明主，恩波浹近臣。灵威自无极，从此献千春。

卷_3【送吕向补阙西岳勒碑】

徐安贞

圣作西山颂，君其出使年。勒碑悬日月，驱传接云烟。
寒尽函关路，春归洛水边。别离能几许，朝暮玉墀前。

· 全唐诗 ·

卷_4【送丹阳采访】

徐安贞

郡县分南国，皇华出圣朝。为怜乡棹近，不道使车遥。
旧俗吴三让，遗风汉六条。愿言除疾苦，天子听歌谣。

卷_5【送王判官】

徐安贞

明月开三峡，花源出五溪。城池青壁里，烟火绿林西。
不畏王程促，惟愁仙路迷。巴东下归棹，莫待夜猿啼。

卷_6【题襄阳图】

徐安贞

画得襄阳郡，依然见昔游。岷山思驻马，汉水忆回舟。
丹壑常含霁，青林不换秋。图书空咫尺，千里意悠悠。

卷_7【程将军夫人挽诗】

徐安贞

琴瑟调双凤，和鸣不独飞。正歌春可乐，行泣露先晞。

· 全唐诗 ·

环珮声犹在，房栊梦不归。将军休沐日，谁劝著新衣。

卷_8【奉和喜雪应制】

徐安贞

两宫斋祭近登临，雨雪纷纷天昼阴。只为经寒无瑞色，
顿教正月满春林。蓬莱北上旌门暗，花萼南归马迹深。
自有三农歌帝力，还将万庾答尧心。

卷_9【闻邻家理箏】

徐安贞

北斗横天夜欲阑，愁人倚月思无端。忽闻画阁秦箏逸，
知是邻家赵女弹。曲成虚忆青蛾敛，调急遥怜玉指寒。
银锁重关听未辟，不如眠去梦中看。

卷_10【奉和圣制早度蒲津关】

徐安贞

仙掌临秦甸，虹桥辟晋关。两都分地险，一曲度河湾。
路得津门要，时称古戍闲。城花春正发，岸柳曙堪攀。

· 全唐诗 ·

后乘犹临水，前旌欲换山。长安回望日，宸御六龙还。

卷_11【奉和圣制答二相出雀鼠谷】

徐安贞

两臣初入梦，二月扈巡边。涧北寒犹在，山南春半传。
颂声先奉御，辰象复回天。云日明千里，旌旗照一川。
柳阴低鞞路，草色变新田。还望汾阳近，宸游自杳然。

卷_12【句】

徐安贞

暮雨衣犹湿，春风帆正开。（《云溪友议》）

卷_13【奉和圣制答张说南出雀鼠谷】

崔翹

硖路绕河汾，晴光拂曙氛。笳吟中岭树，仗入半峰云。
顿觉山原尽，平看邑里分。早行芳草迥，晚憩好风熏。
嘉颂推英宰，春游扈圣君。共欣承睿渥，日月照天文。

· 全唐诗 ·

卷_14【送友人使夷陵】

崔翹

猿鸣三峡里，行客旧沾裳。复道从兹去，思君不暂忘。
开襟春叶短，分手夏条长。独有幽庭桂，年年空自芳。

卷_15【郑郎中山亭】

崔翹

篆笔飞章暇，园亭染翰游。地奇人境别，事远俗尘收。
书阁山云起，琴斋涧月留。泉清鳞影见，树密鸟声幽。
杜馥熏梅雨，荷香送麦秋。无劳置驿骑，文酒可相求。

卷_16【奉和圣制答张说扈从南出雀鼠谷】

梁升卿

何意重关道，千年过圣皇。幽林承睿泽，闲客见清光。
日御仙途远，山灵寿域长。寒云入晋薄，春树隔汾香。
国佐同时雨，天文属岁阳。从来汉家盛，未若此巡方。

· 全唐诗 ·

卷_17【白云溪】

吴玢

山径入修篁，深林蔽日光。夏云生嶂远，瀑水引溪长。
秀迹逢皆胜，清芬坐转凉。回看玉樽夕，归路赏前忘。

卷_18【题奉国寺】

陆海

新秋夜何爽，露下风转凄。一磬竹林外，千灯花塔西。

卷_19【题龙门寺】

陆海

窗灯林霭里，闻磬水声中。更与龙华会，炉烟满夕风。

卷_20【句】

陆海

忽然一曲称君心，破却中人百家产。（《讽刺诗》）

· 全唐诗 ·

城外平人驱欲尽，帐中犹打袞花球。（《讽刺诗》）

卷_21【白牡丹】

裴士淹

长安年少惜春残，争认慈恩紫牡丹。
别有玉盘承露冷，无人起就月中看。

卷_22【和从叔禄愔元日早朝】

李元操

铜浑变秋节，玉律动年灰。暖暖城霞旦，隐隐禁门开。
众灵凑仙府，百神朝帝台。叶令双凫至，梁王驷马来。
戈鋌映林阙，歌管拂尘埃。保章望瑞气，尚书免火灾。
冠冕多秀士，簪裾饶上才。谁怜张仲蔚，日暮反蒿莱。

卷_23【昭君怨】

顾朝阳

莫将铅粉匣，不用镜花光。一去边城路，何情更画妆。
影销胡地月，衣尽汉宫香。妾死非关命，都缘怨断肠。

· 全唐诗 ·

卷_24【西塞山下回舟作】

陶岷

匡庐旧业是谁主，吴越新居安此生。白发数茎归未得，
青山一望计还成。鸦翻枫叶夕阳动，鹭立芦花秋水明。
从此舍舟何所诣，酒旗歌扇正相迎。

· 全唐诗 ·

第一百二十五卷

卷_1【酬诸公见过（时官未出，在辋川庄）】

王维

嗟予未丧，哀此孤生。屏居蓝田，薄地躬耕。岁晏输税，
以奉粢盛。晨往东皋，草露未晞。暮看烟火，负担来归。
我闻有客，足扫荆扉。箪食伊何，臛瓜抓枣。仰厕群贤，
皤然一老。愧无莞簟，班荆席藁。泛泛登陂，折彼荷花。
静观素鲔，俯映白沙。山鸟群飞，日隐轻霞。登车上马，
倏忽云散。雀噪荒村，鸡鸣空馆。还复幽独，重欷累叹。

卷_2【奉和圣制登降圣观与宰臣等同望应制】

王维

凤宸朝碧落，龙图耀金镜。维岳降二臣，戴天临万姓。
山川八校满，井邑三农竟。比屋皆可封，谁家不相庆。
林疏远村出，野旷寒山静。帝城云里深，渭水天边映。
佳气含风景，颂声溢歌咏。端拱能任贤，弥彰圣君圣。

· 全唐诗 ·

卷_3【奉和圣制御春明楼临右相园亭赋乐贤诗应制】

王维

复道通长乐，青门临上路。遥闻凤吹喧，闇识龙舆度。
褰旒明四目，伏槛纡三顾。小苑接侯家，飞甍映宫树。
商山原上碧，浐水林端素。银汉下天章，琼筵承湛露。
将非富人宠，信以平戎故。从来简帝心，讵得回天步。

卷_4【奉和圣制送不蒙都护兼鸿胪卿归安西应制】

王维

上卿增命服，都护扬归旆。杂虏尽朝周，诸胡皆自郤。
鸣笳瀚海曲，按节阳关外。落日下河源，寒山静秋塞。
万方氛祲息，六合乾坤大。无战是天心，天心同覆载。

卷_5【扶南曲歌词五首】

王维

翠羽流苏帐，春眠曙不开。羞从面色起，娇逐语声来。
早向昭阳殿，君王中使催。

堂上青弦动，堂前绮席陈。齐歌卢女曲，双舞洛阳人。

· 全唐诗 ·

倾国徒相看，宁知心所亲。

香气传空满，妆华影箔通。歌闻天仗外，舞出御楼中。
日暮归何处，花间长乐宫。

宫女还金屋，将眠复畏明。入春轻衣好，半夜薄妆成。
拂曙朝前殿，玉墀多珮声。

朝日照绮窗，佳人坐临镜。散黛恨犹轻，插钗嫌未正。
同心勿遽游，幸待春妆竟。

卷_6【陇西行】

王维

十里一走马，五里一扬鞭。都护军书至，匈奴围酒泉。
关山正飞雪，烽火断无烟。

卷_7【从军行】

王维

吹角动行人，喧喧行人起。笳悲马嘶乱，争渡金河水。
日暮沙漠陲，战声烟尘里。尽系名王颈，归来献天子。

· 全唐诗 ·

卷_8【早春行】

王维

紫梅发初遍，黄鸟歌犹涩。谁家折杨女，弄春如不及。
爱水看妆坐，羞人映花立。香畏风吹散，衣愁露沾湿。
玉闺青门里，日落香车入。游衍益相思，含啼向彩帷。
忆君长入梦，归晚更生疑。不及红檐燕，双栖绿草时。

卷_9【早朝】

王维

皎洁明星高，苍茫远天曙。槐雾暗不开，城鸦鸣稍去。
始闻高阁声，莫辨更衣处。银烛已成行，金门俨骅馭。

卷_10【献始兴公（时拜右拾遗）】

王维

宁栖野树林，宁饮涧水流。不用坐梁肉，崎岖见王侯。
鄙哉匹夫节，布褐将白头。任智诚则短，守任固其优。
侧闻大君子，安问党与雠。所不卖公器，动为苍生谋。
贱子跪自陈，可为帐下不。感激有公议，曲私非所求。

· 全唐诗 ·

卷_11【赠从弟司库员外綌】

王维

少年识事浅，强学干名利。徒闻跃马年，苦无出人智。
即事岂徒言，累官非不试。既寡遂性欢，恐招负时累。
清冬见远山，积雪凝苍翠。浩然出东林，发我遗世意。
惠连素清赏，夙语尘外事。欲缓携手期，流年一何驶。

卷_12【座上走笔赠薛璩慕容损】

王维

希世无高节，绝迹有卑栖。君徒视人文，吾固和天倪。
缅然万物始，及与群物齐。分地依后稷，用天信重黎。
春风何豫人，令我思东溪。草色有佳意，花枝稍含萼。
更待风景好，与君藉萋萋。

卷_13【赠李颀】

王维

闻君饵丹砂，甚有好颜色。不知从今去，几时生羽翼。
王母翳华芝，望尔昆仑侧。文螭从赤豹，万里方一息。

· 全唐诗 ·

悲哉世上人，甘此膾腥食。

卷_14【赠刘蓝田（一作卢象诗）】

王维

篱间犬迎吠，出屋候荆扉。岁晏输井税，山村人夜归。
晚田始家食，馀布成我衣。讵肯无公事，烦君问是非。

卷_15【赠房卢氏瑁】

王维

达人无不可，忘己爱苍生。岂复少十室，弦歌在两楹。
浮人日已归，但坐事农耕。桑榆郁相望，邑里多鸡鸣。
秋山一何净，苍翠临寒城。视事兼偃卧，对书不簪缨。
萧条人吏疏，鸟雀下空庭。鄙夫心所尚，晚节异平生。
将从海岳居，守静解天刑。或可累安邑，茅茨君试营。

卷_16【赠祖三咏（济州官舍作）】

王维

萧蛸挂虚牖，蟋蟀鸣前除。岁晏凉风至，君子复何如。
高馆阒无人，离居不可道。闲门寂已闭，落日照秋草。

· 全唐诗 ·

虽有近音信，千里阻河关。中复客汝颖，去年归旧山。
结交二十载，不得一日展。贫病子既深，契阔余不浅。
仲秋虽未归，暮秋以为期。良会讵几日，终日长相思。

卷_17【春夜竹亭赠钱少府归蓝田】

王维

夜静群动息，时闻隔林犬。却忆山中时，人家涧西远。
羨君明发去，采蕨轻轩冕。

卷_18【戏赠张五弟諲三首（时在常乐东园，走笔成）】

王维

吾弟东山时，心尚一何远。日高犹自卧，钟动始能饭。
领上发未梳，妆头书不卷。清川兴悠悠，空林对偃蹇。
青苔石上净，细草松下软。窗外鸟声闲，阶前虎心善。
徒然万象多，澹尔太虚缅。一知与物平，自顾为人浅。
对君忽自得，浮念不烦遣。

张弟五车书，读书仍隐居。染翰过草圣，赋诗轻子虚。
闭门二室下，隐居十年馀。宛是野人野，时从渔父渔。
秋风自萧索，五柳高且疏。望此去人世，渡水向吾庐。
岁晏同携手，只应君与予。

· 全唐诗 ·

设置守鳬兔，垂钓伺游鳞。此是安口腹，非关慕隐沦。
吾生好清净，蔬食去情尘。今子方豪荡，思为鼎食人。
我家南山下，动息自遗身。入鸟不相乱，见兽皆相亲。
云霞成伴侣，虚白侍衣巾。何事须夫子，邀予谷口真。

卷_19【胡居士卧病遗米因赠】

王维

了观四大因，根性何所有。妄计苟不生，是身孰休咎。
色声何谓客，阴界复谁守。徒言莲花目，岂恶杨枝肘。
既饱香积饭，不醉声闻酒。有无断常见，生灭幻梦受。
即病即实相，趋空定狂走。无有一法真，无有一法垢。
居士素通达，随宜善抖擞。床上无毡卧，镬中有粥否。
斋时不乞食，定应空漱口。聊持数斗米，且救浮生取。

卷_20【赠裴十迪】

王维

风景日夕佳，与君赋新诗。澹然望远空，如意方支颐。
春风动百草，兰蕙生我篱。暧暧日暖闺，田家来致词。
欣欣春还皋，淡淡水生陂。桃李虽未开，萸萸满芳枝。
请君理还策，取告将农时。

· 全唐诗 ·

卷_21【与胡居士皆病寄此诗兼示学人二首】

王维

一兴微尘念，横有朝露身。如是睹阴界，何方置我人。
碍有固为主，趣空宁舍宾。洗心讵悬解，悟道正迷津。
因爱果生病，从贪始觉贫。色声非彼妄，浮幻即吾真。
四达竟何遣，万殊安可尘。胡生但高枕，寂寞与谁邻。
战胜不谋食，理齐甘负薪。予若未始异，讎论疏与亲。

浮空徒漫漫，泛有定悠悠。无乘及乘者，所谓智人舟。
讎舍贫病域，不疲生死流。无烦君喻马，任以我为牛。
植福祠迦叶，求仁笑孔丘。何津不鼓棹，何路不摧輶。
念此闻思者，胡为多阻修。空虚花聚散，烦恼树稀稠。
灭相成无记，生心坐有求。降吴复归蜀，不到莫相尤。

卷_22【奉寄韦太守陟】

王维

荒城自萧索，万里山河空。天高秋日迥，嘹唳闻归鸿。
寒塘映衰草，高馆落疏桐。临此岁方晏，顾景咏悲翁。
故人不可见，寂寞平陵东。

· 全唐诗 ·

卷_23【林园即事寄舍弟綰（次荆州时作）】

王维

寓目一萧散，销忧冀俄顷。青草肃澄陂，白云移翠岭。
后沔通河渭，前山包鄢郢。松含风里声，花对池中影。
地多齐后疟，人带荆州瘵。徒思赤笔书，讵有丹砂井。
心悲常欲绝，发乱不能整。青簟日何长，闲门昼方静。
颓思茅檐下，弥伤好风景。

卷_24【至滑州隔河望黎阳忆丁三】

王维

隔河见桑柘，蔼蔼黎阳川。望望行渐远，孤峰没云烟。
故人不可见，河水复悠然。赖有政声远，时闻行路传。

卷_25【秋夜独坐怀内弟崔兴宗】

王维

夜静群动息，蟪蛄声悠悠。庭槐北风响，日夕方高秋。
思子整羽翰，及时当云浮。吾生将白首，岁晏思沧州。
高足在旦暮，肯为南亩俦。

· 全唐诗 ·

卷_26【和使君五郎西楼望远思归】

王维

高楼望所思，目极情未毕。枕上见千里，窗中窥万室。
悠悠长路人，暧暧远郊日。惆怅极浦外，迢递孤烟出。
能赋属上才，思归同下秩。故乡不可见，云水空如一。

卷_27【酬黎居士淅川作（昙壁上人院走笔成）】

王维

依家真个去，公定随依否。著处是莲花，无心变杨柳。
松龕藏药裹，石唇安茶臼。气味当共知，那能不携手。

卷_28【送魏郡李太守赴任】

王维

与君伯氏别，又欲与君离。君行无几日，当复隔山陂。
苍茫秦川尽，日落桃林塞。独树临关门，黄河向天外。
前经洛阳陌，宛洛故人稀。故人离别尽，淇上转骅骝。
企予悲送远，惆怅睢阳路。古木官渡平，秋城邺宫故。
想君行县日，其出从如云。遥思魏公子，复忆李将军。

· 全唐诗 ·

卷_29【送陆员外】

王维

郎署有伊人，居然古人风。天子顾河北，诏书除征东。
拜手辞上官，缓步出南宫。九河平原外，七国蓟门中。
阴风悲枯桑，古塞多飞蓬。万里不见虏，萧条胡地空。
无为费中国，更欲邀奇功。迟迟前相送，握手嗟异同。
行当封侯归，肯访商山翁。

卷_30【送宇文太守赴宣城】

王维

寥落云外山，迢递舟中赏。铙吹发西江，秋空多清响。
地迥古城芜，月明寒潮广。时赛敬亭神，复解罟师网。
何处寄相思，南风吹五两。

卷_31【送綦毋秘书弃官还江东】

王维

明时久不达，弃置与君同。天命无怨色，人生有素风。
念君拂衣去，四海将安穷。秋天万里净，日暮澄江空。

· 全唐诗 ·

清夜何悠悠，扣舷明月中。和光鱼鸟际，澹尔蒹葭丛。
无庸客昭世，衰鬓日如蓬。顽疏暗人事，僻陋远天聪。
微物纵可采，其谁为至公。余亦从此去，归耕为老农。

卷_32【奉送六舅归陆浑】

王维

伯舅吏淮泗，卓鲁方喟然。悠哉自不竞，退耕东皋田。
条桑腊月下，种杏春风前。酌醴赋归去，共知陶令贤。

卷_33【送别】

王维

下马饮君酒，问君何所之。君言不得意，归卧南山陲。
但去莫复问，白云无尽时。

卷_34【送张五归山】

王维

送君尽惆怅，复送何人归。几日同携手，一朝先拂衣。
东山有茅屋，幸为扫荆扉。当亦谢官去，岂令心事违。

· 全唐诗 ·

卷_35【齐州送祖三（一作河上送赵仙舟，又作淇上别赵仙舟）】

王维

相逢方一笑，相送还成泣。祖帐已伤离，荒城复愁入。
天寒远山净，日暮长河急。解缆君已遥，望君犹伫立。

卷_36【送缙云苗太守】

王维

手疏谢明主，腰章为长吏。方从会稽邸，更发汝南骑。
按节下松阳，清江响铙吹。露冕见三吴，方知百城贵。

卷_37【送从弟蕃游淮南】

王维

读书复骑谢，带剑游淮阴。淮阴少年辈，千里远相寻。
高义难自隐，明时宁陆沉。岛夷九州外，泉馆三山深。
席帆聊问罪，卉服尽成擒。归来见天子，拜爵赐黄金。
忽思鲈鱼鲙，复有沧洲心。天寒蒹葭渚，日落云梦林。
江城下枫叶，淮上闻秋砧。送归青门外，车马去骎骎。

· 全唐诗 ·

惆怅新丰树，空馀天际禽。

卷_38【送高適弟耽归临淮作（坐上作）】

王维

少年客淮泗，落魄居下邳。遨游向燕赵，结客过临淄。
山东诸侯国，迎送纷交驰。自尔厌游侠，闭户方垂帷。
深明戴家礼，颇学毛公诗。备知经济道，高卧陶唐时。
圣主诏天下，贤人不得遗。公吏奉纁组，安车去茅茨。
君王苍龙阙，九门十二逵。群公朝谒罢，冠剑下丹墀。
野鹤终踈踈，威凤徒参差。或问理人术，但致还山词。
天书降北阙，赐帛归东菑。都门谢亲故，行路日逶迟。
孤帆万里外，淼漫将何之。江天海陵郡，云日淮南祠。
杳冥沧洲上，荡漭无人知。纬萧或卖药，出处安能期。

卷_39【送綦毋潜落第还乡（一作送别）】

王维

圣代无隐者，英灵尽来归。遂令东山客，不得顾采薇。
既至君门远，孰云吾道非。江淮度寒食，京洛缝春衣。
置酒临长道，同心与我违。行当浮桂棹，未几拂荆扉。
远树带行客，孤村当落晖。吾谋适不用，勿谓知音稀。

· 全唐诗 ·

卷_40【送张舍人佐江州同薛璩十韵（走笔成）】

王维

束带趋承明，守官唯谒者。清晨听银蚪，薄暮辞金马。
受辞未尝易，当是方知寡。清范何风流，高文有风雅。
忽佐江上州，当自浔阳下。逆旅到三湘，长途应百舍。
香炉远峰出，石镜澄湖泻。董奉杏成林，陶潜菊盈把。
范蠡常好之，庐山我心也。送君思远道，欲以数行洒。

卷_41【送韦大夫东京留守】

王维

人外遗世虑，空端结遐心。曾是巢许浅，始知尧舜深。
苍生讵有物，黄屋如乔林。上德抚神运，冲和穆宸襟。

云雷康屯难，江海遂飞沉。天工寄人英，龙衮瞻君临。
名器苟不假，保釐固其任。素质贯方领，清景照华簪。

慷慨念王室，从容献官箴。云旗蔽三川，画角发龙吟。
晨扬天汉声，夕卷大河阴。穷人业已宁，逆虏遗之擒。

然后解金组，拂衣东山岑。给事黄门省，秋光正沉沉。

· 全唐诗 ·

壮心与身退，老病随年侵。君子从相访，重玄其可寻。

卷_42【资圣寺送甘二】

王维

浮生信如寄，薄宦夫何有。来往本无归，别离方此受。
柳色蔼春馀，槐阴清夏首。不觉御沟上，衔悲执杯酒。

卷_43【留别山中温古上人兄并示舍弟缙】

王维

解薛登天朝，去师偶时哲。岂惟山中人，兼负松上月。
宿昔同游止，致身云霞末。开轩临颖阳，卧视飞鸟没。
好依盘石饭，屡对瀑泉渴。理齐小狎隐，道胜宁外物。
舍弟官崇高，宗兄此削发。荆扉但洒扫，乘闲当过歇。

卷_44【观别者】

王维

青青杨柳陌，陌上别离人。爱子游燕赵，高堂有老亲。
不行无可养，行去百忧新。切切委兄弟，依依向四邻。

· 全唐诗 ·

都门帐饮毕，从此谢亲宾。挥涕逐前侣，含凄动征轮。
车徒望不见，时见起行尘。吾亦辞家久，看之泪满巾。

卷_45【别弟缙后登青龙寺望蓝田山】

王维

陌上新离别，苍茫四郊晦。登高不见君，故山复云外。
远树蔽行人，长天隐秋塞。心悲宦游子，何处飞征盖。

卷_46【别綦毋潜】

王维

端笏明光宫，历稔朝云陛。诏刊延阁书，高议平津邸。
适意偶轻人，虚心削繁礼。盛得江左风，弥工建安体。
高张多绝弦，截河有清济。严冬爽群木，伊洛方清泚。
渭水冰下流，潼关雪中启。荷蓑几时还，尘缨待君洗。

卷_47【晦日游大理韦卿城南别业四声依次用各六韵】

王维

与世澹无事，自然江海人。侧闻尘外游，解骖轹朱轮。

· 全唐诗 ·

平野照暄景，上天垂春云。张组竟北阜，泛舟过东邻。
故乡信高会，牢醴及佳辰。幸同击壤乐，心荷尧为君。

郊居杜陵下，永日同携手。仁里霭川阳，平原见峰首。
园庐鸣春鸠，林薄媚新柳。上卿始登席，故老前为寿。
临当游南陂，约略执杯酒。归欤绌微官，惆怅心自咎。

冬中馀雪在，墟上春流驶。风日畅怀抱，山川多秀气。
雕胡先晨炊，庖脍亦云至。高情浪海岳，浮生寄天地。
君子外簪纓，埃尘良不啻。所乐衡门中，陶然忘其贵。

高馆临澄陂，旷然荡心目。淡荡动云天，玲珑映墟曲。
鹊巢结空林，雉雊响幽谷。应接无闲暇，徘徊以踟躅。
纒组上春堤，侧弁倚乔木。弦望忽已晦，后期洲应绿。

卷_48【冬日游览】

王维

步出城东门，试骋千里目。青山横苍林，赤日团平陆。
渭北走邯郸，关东出函谷。秦地万方会，来朝九州牧。
鸡鸣咸阳中，冠盖相追逐。丞相过列侯，群公钱光禄。
相如方老病，独归茂陵宿。

· 全唐诗 ·

卷_49【华岳】

王维

西岳出浮云，积雪在太清。连天凝黛色，百里遥青冥。
白日为之寒，森沉华阴城。昔闻乾坤闭，造化生巨灵。
右足踏方止，左手推削成。天地忽开拆，大河注东溟。
遂为西峙岳，雄雄镇秦京。大君包覆载，至德被群生。
上帝伫昭告，金天思奉迎。人祇望幸久，何独禅云亭。

卷_50【同卢拾遗过韦给事东山别业二十韵，给事首春
休沐维已陪游，及乎是行亦预闻命，会无车马不果斯诺】

王维

托身侍云陛，昧旦趋华轩。遂陪鹓鸿侣，霄汉同飞翻。
君子垂惠顾，期我于田园。侧闻景龙际，亲降南面尊。
万乘驻山外，顺风祈一言。高阳多夔龙，荆山积璚璠。
盛德启前烈，大贤钟后昆。侍郎文昌宫，给事东掖垣。
谒帝俱来下，冠盖盈丘樊。闺风首邦族，庭训延乡村。
采地包山河，树井竟川原。岩端回绮槛，谷口开朱门。
阶下群峰首，云中瀑水源。鸣玉满春山，列筵先朝暾。
会舞何飒沓，击钟弥朝昏。是时阳和节，清昼犹未暄。
蔼蔼树色深，嘤嘤鸟声繁。顾己负宿诺，延颈惭芳荪。
蹇步守穷巷，高驾难攀援。素是独往客，脱冠情弥敦。

· 全唐诗 ·

卷_51【蓝田山石门精舍】

王维

落日山水好，漾舟信归风。探奇不觉远，因以缘源穷。
遥爱云木秀，初疑路不同。安知清流转，偶与前山通。
舍舟理轻策，果然惬所适。老僧四五人，逍遥荫松柏。
朝梵林未曙，夜禅山更寂。道心及牧童，世事问樵客。
暝宿长林下，焚香卧瑶席。涧芳袭人衣，山月映石壁。
再寻畏迷误，明发更登历。笑谢桃源人，花红复来觐。

卷_52【青溪（一作过青溪水作）】

王维

言入黄花川，每逐清溪水。随山将万转，趣途无百里。
声喧乱石中，色静深松里。漾漾泛菱荇，澄澄映葭苇。
我心素已闲，清川澹如此。请留盘石上，垂钓将已矣。

卷_53【崔濮阳兄季重前山兴（山西去亦对维门）】

王维

秋色有佳兴，况君池上闲。悠悠西林下，自识门前山。

· 全唐诗 ·

千里横黛色，数峰出云间。嵯峨对秦国，合沓藏荆关。
残雨斜日照，夕岚飞鸟还。故人今尚尔，叹息此颓颜。

卷_54【李处士山居】

王维

君子盈天阶，小人甘自免。方随炼金客，林上家绝巘。
背岭花未开，入云树深浅。清昼犹自眠，山鸟时一啖。

卷_55【丁寓田家有赠】

王维

君心尚栖隐，久欲傍归路。在朝每为言，解印果成趣。
晨鸡鸣邻里，群动从所务。农夫行饷田，闺妾起缝素。
开轩御衣服，散帙理章句。时吟招隐诗，或制闲居赋。
新晴望郊郭，日映桑榆暮。阴昼小苑城，微明渭川树。
揆予宅闾井，幽赏何由屡。道存终不忘，迹异难相遇。
此时惜离别，再来芳菲度。

卷_56【渭川田家】

王维

斜阳照墟落，穷巷牛羊归。野老念牧童，倚杖候荆扉。
雉雊麦苗秀，蚕眠桑叶稀。田夫荷锄至，相见语依依。

· 全唐诗 ·

即此羨闲逸，怅然吟式微。

卷_57【春中田园作】

王维

屋上春鸠鸣，村边杏花白。持斧伐远扬，荷锄覩泉脉。
归燕识故巢，旧人看新历。临觞忽不御，惆怅远行客。

卷_58【过李揖宅】

王维

闲门秋草色，终日无车马。客来深巷中，犬吠寒林下。
散发时未簪，道书行尚把。与我同心人，乐道安贫者。
一罢宜城酌，还归洛阳社。

卷_59【韦侍郎山居】

王维

幸忝君子顾，遂陪尘外踪。闲花满岩谷，瀑水映杉松。
啼鸟忽归涧，归云时抱峰。良游盛簪绂，继迹多夔龙。
讵枉青门道，胡闻长乐钟。清晨去朝谒，车马何从容。

· 全唐诗 ·

卷_60【饭覆釜山僧】

王维

晚知清净理，日与人群疏。将候远山僧，先期扫弊庐。
果从云峰里，顾我蓬蒿居。藉草饭松屑，焚香看道书。
然灯昼欲尽，鸣磬夜方初。一悟寂为乐，此日闲有馀。
思归何必深，身世犹空虚。

卷_61【谒璿上人】

王维

少年不足言，识道年已长。事往安可悔，馀生幸能养。
誓从断臂血，不复婴世网。浮名寄缨珮，空性无羁鞅。
夙承大导师，焚香此瞻仰。颓然居一室，覆载纷万象。
高柳早莺啼，长廊春雨响。床下阮家屐，窗前筇竹杖。
方将见身云，陋彼示天壤。一心在法要，愿以无生奖。

卷_62【瓜园诗】

王维

余适欲锄瓜，倚锄听叩门。鸣驺导骢马，常从夹朱轩。

· 全唐诗 ·

穷巷正传呼，故人傥相存。携手追凉风，放心望乾坤。
蔼蔼帝王州，宫观一何繁。林端出绮道，殿顶摇华幡。
素怀在青山，若值白云屯。回风城西雨，返景原上村。
前酌盈尊酒，往往闻清言。黄鹂啖深木，朱槿照中园。
犹羨松下客，石上闻清猿。

卷_63【自大散以往，深林密竹，磴道盘曲四五十里至
黄牛岭，见黄花川】

王维

危径几万转，数里将三休。回环见徒侣，隐映隔林丘。
飒飒松上雨，潺潺石中流。静言深溪里，长啸高山头。
望见南山阳，白露霭悠悠。青皋丽已净，绿树郁如浮。
曾是厌蒙密，旷然销人忧。

卷_64【新晴野望】

王维

新晴原野旷，极目无氛垢。郭门临渡头，村树连谿口。
白水明田外，碧峰出山后。农月无闲人，倾家事南亩。

· 全唐诗 ·

卷_65【宿郑州】

王维

朝与周人辞，暮投郑人宿。他乡绝俦侣，孤客亲僮仆。
宛洛望不见，秋霖晦平陆。田父草际归，村童雨中牧。
主人东皋上，时稼绕茅屋。虫思机杼悲，雀喧禾黍熟。
明当渡京水，昨晚犹金谷。此去欲何言，穷边徇微禄。

卷_66【早入荥阳界】

王维

泛舟入荥泽，兹邑乃雄藩。河曲閭閻隘，川中烟火繁。
因人见风俗，入境闻方言。秋野田畴盛，朝光市井喧。
渔商波上客，鸡犬岸旁村。前路白云外，孤帆安可论。

卷_67【渡河到清河作】

王维

泛舟大河里，积水穷天涯。天波忽开拆，郡邑千万家。
行复见城市，宛然有桑麻。回瞻旧乡国，淼漫连云霞。

· 全唐诗 ·

卷_68【苦热】

王维

赤日满天地，火云成山岳。草木尽焦卷，川泽皆竭涸。
轻纨觉衣重，密树苦阴薄。莞簟不可近，絺绤再三濯。
思出宇宙外，旷然在寥廓。长风万里来，江海荡烦浊。
却顾身为患，始知心未觉。忽入甘露门，宛然清凉乐。

卷_69【纳凉】

王维

乔木万馀株，清流贯其中。前临大川口，豁达来长风。
涟漪涵白沙，素鲋如游空。偃卧盘石上，翻涛沃微躬。
漱流复濯足，前对钓鱼翁。贪饵凡几许，徒思莲叶东。

卷_70【西施咏】

王维

艳色天下重，西施宁久微。朝仍越溪女，暮作吴宫妃。
贱日岂殊众，贵来方悟稀。邀人傅香粉，不自著罗衣。
君宠益娇态，君怜无是非。当时浣纱伴，莫得同车归。

· 全唐诗 ·

持谢邻家子，效颦安可希。

卷_71【李陵咏（时年十九）】

王维

汉家李将军，三代将门子。结发有奇策，少年成壮士。
长驱塞上儿，深入单于垒。旌旗列相向，箫鼓悲何已。
日暮沙漠陲，战声烟尘里。将令骄虏灭，岂独名王侍。
既失大军援，遂婴穹庐耻。少小蒙汉恩，何堪坐思此。
深衷欲有报，投躯未能死。引领望子卿，非君谁相理。

卷_72【济上四贤咏·崔录事】

王维

解印归田里，贤哉此丈夫。少年曾任侠，晚节更为儒。
遁迹东山下，因家沧海隅。已闻能狎鸟，余欲共乘桴。

卷_73【济上四贤咏·成文学】

王维

宝剑千金装，登君白玉堂。身为平原客，家有邯郸娼。

· 全唐诗 ·

使气公卿坐，论心游侠场。中年不得意，谢病客游梁。

卷_74【济上四贤咏·郑霍二山人（一作寄崔郑二山人）】

王维

翩翩繁华子，多出金张门。幸有先人业，早蒙明主恩。
童年且未学，肉食鹜华轩。岂乏中林士，无人荐至尊。
郑公老泉石，霍子安丘樊。卖药不二价，著书盈万言。
息阴无恶木，饮水必清源。吾贱不及议，斯人竟谁论。

卷_75【过太乙观贾生房】

王维

昔余栖遁日，之子烟霞邻。共携松叶酒，俱簪竹皮巾。
攀林遍岩洞，采药无冬春。谬以道门子，征为骖御臣。
常恐丹液就，先我紫阳宾。天促万涂尽，哀伤百虑新。
迹峻不容俗，才多反累真。泣对双泉水，还山无主人。

卷_76【燕子龕禅师】

王维

山中燕子龕，路剧羊肠恶。裂地竞盘屈，插天多峭崿。

· 全唐诗 ·

瀑泉吼而喷，怪石看欲落。伯禹访未知，五丁愁不凿。
上人无生缘，生长居紫阁。六时自撻髻，一饮常带索。
种田烧白云，斫漆响丹壑。行随拾栗猿，归对巢松鹤。
时许山神请，偶逢洞仙博。救世多慈悲，即心无行作。
周商倦积阻，蜀物多淹泊。岩腹乍旁穿，涧唇时外拓。
桥因倒树架，栅值垂藤缚。鸟道悉已平，龙宫为之涸。
跳波谁揭厉，绝壁免扪摸。山木日阴阴，结跏归旧林。
一向石门里，任君春草深。

卷_77【羽林骑闺人】

王维

秋月临高城，城中管弦思。离人堂上愁，稚子阶前戏。
出门复映户，望望青丝骑。行人过欲尽，狂夫终不至。
左右寂无言，相看共垂泪。

卷_78【偶然作六首】

王维

楚国有狂夫，茫然无心想。散发不冠带，行歌南陌上。
孔丘与之言，仁义莫能奖。未尝肯问天，何事须击壤。
复笑采薇人，胡为乃长往。

田舍有老翁，垂白衡门里。有时农事闲，斗酒呼邻里。

· 全唐诗 ·

喧聒茅檐下，或坐或复起。短褐不为薄，园葵固足美。
动则长子孙，不曾向城市。五帝与三王，古来称天子。
干戈将揖让，毕竟何者是。得意苟为乐，野田安足鄙。
且当放怀去，行行没馀齿。

日夕见太行，沉吟未能去。问君何以然，世网婴我故。
小妹日成长，兄弟未有娶。家贫禄既薄，储蓄非有素。
几回欲奋飞，踟蹰复相顾。孙登长啸台，松竹有遗处。
相去诟几许，故人在中路。爱染日已薄，禅寂日已固。
忽乎吾将行，宁俟岁云暮。

陶潜任天真，其性颇耽酒。自从弃官来，家贫不能有。
九月九日时，菊花空满手。中心窃自思，傥有人送否。
白衣携壶觞，果来遗老叟。且喜得斟酌，安问升与斗。
奋衣野田中，今日嗟无负。兀傲迷东西，蓑笠不能守。
倾倒强行行，酣歌归五柳。生事不曾问，肯愧家中妇。

赵女弹箜篌，复能邯郸舞。夫婿轻薄儿，斗鸡事齐主。
黄金买歌笑，用钱不复数。许史相经过，高门盈四牡。
客舍有儒生，昂藏出邹鲁。读书三十年，腰间无尺组。
被服圣人教，一生自穷苦。

老来懒赋诗，惟有老相随。宿世谬词客，前身应画师。
不能舍余习，偶被世人知。名字本皆是，此心还不知。

· 全唐诗 ·

卷_79【寓言二首（次首《律髓》入侠少类，作卢象《杂诗》）】

王维

朱绂谁家子，无乃金张孙。骊驹从白马，出入铜龙门。
问尔何功德，多承明主恩。斗鸡平乐馆，射雉上林园。
曲陌车骑盛，高堂珠翠繁。奈何轩冕贵，不与布衣言。

君家御沟上，垂柳夹朱门。列鼎会中贵，鸣珂朝至尊。
生死在八议，穷达由一言。须识苦寒士，莫矜狐白温。

卷_80【冬夜书怀】

王维

冬宵寒且永，夜漏宫中发。草白霭繁霜，木衰澄清月。
丽服映颓颜，朱灯照华发。汉家方尚少，顾影惭朝谒。

卷_81【送康太守】

王维

城下沧江水，江边黄鹤楼。朱阑将粉堞，江水映悠悠。

· 全唐诗 ·

铙吹发夏口，使君居上头。郭门隐枫岸，候吏趋芦洲。
何异临川郡，还劳康乐侯。

卷_82【送权二】

王维

高人不可有，清论复何深。一见如旧识，一言知道心。
明时当薄宦，解薛去中林。芳草空隐处，白云馀故岑。
韩侯久携手，河岳共幽寻。怅别千馀里，临堂鸣素琴。

卷_83【休假还旧业便使（一作卢象诗）】

王维

谢病始告归，依依入桑梓。家人皆伫立，相候衡门里。
时辈皆长年，成人旧童子。上堂嘉庆毕，顾与姻亲齿。
论旧忽馀悲，目存且相喜。田园转芜没，但有寒泉水。
衰柳日萧条，秋光清邑里。入门乍如客，休骑非便止。
中饮顾王程，离忧从此始。

卷_84【叹白发】

王维

我年一何长，鬓发日已白。俯仰天地间，能为几时客。
惆怅故山云，徘徊空日夕。何事与时人，东城复南陌。

· 全唐诗 ·

卷_85【别弟妹二首（一作卢象诗）】

王维

两妹日成长，双鬟将及人。已能持宝瑟，自解掩罗巾。
念昔别时小，未知疏与亲。今来始离恨，拭泪方殷勤。

小弟更孩幼，归来不相识。同居虽渐惯，见人犹未觅。
宛作越人语，殊甘水乡食。别此最为难，泪尽有馀忆。

卷_86【哭殷遥】

王维

人生能几何，毕竟归无形。念君等为死，万事伤人情。
慈母未及葬，一女才十龄。泱泱寒郊外，萧条闻哭声。
浮云为苍茫，飞鸟不能鸣。行人何寂寞，白日自凄清。
忆昔君在时，问我学无生。劝君苦不早，令君无所成。
故人各有赠，又不及生平。负尔非一途，恸哭返柴荆。

卷_87【故南阳夫人樊氏挽歌】

王维

石窀恩荣重，金吾车骑盛。将朝每赠言，入室还相敬。

· 全唐诗 ·

叠鼓秋城动，旌旄寒日映。不言长不归，环佩犹将听。

卷_88【夷门歌】

王维

七雄雄雌犹未分，攻城杀将何纷纷。秦兵益围邯郸急，
魏王不救平原君。公子为嬴停驷马，执辔愈恭意愈下。
亥为屠肆鼓刀人，嬴乃夷门抱关者。非但慷慨献良谋，
意气兼将身命酬。向风刎颈送公子，七十老翁何所求。

卷_89【陇头吟】

王维

长安少年游侠客，夜上戍楼看太白。陇头明月迥临关，
陇上行人夜吹笛。关西老将不胜愁，驻马听之双泪流。
身经大小百馀战，麾下偏裨万户侯。苏武才为典属国，
节旄落尽海西头。

卷_90【老将行】

王维

少年十五二十时，步行夺得胡马骑。射杀中山白额虎，

· 全唐诗 ·

肯数邺下黄须儿。一身转战三千里，一剑曾当百万师。
汉兵奋迅如霹雳，虏骑崩腾畏蒺藜。卫青不败由天幸，
李广无功缘数奇。自从弃置便衰朽，世事蹉跎成白首。
昔时飞箭无全目，今日垂杨生左肘。路傍时卖故侯瓜，
门前学种先生柳。苍茫古木连穷巷，寥落寒山对虚牖。
誓令疏勒出飞泉，不似颍川空使酒。贺兰山下阵如云，
羽檄交驰日夕闻。节使三河募年少，诏书五道出将军。
试拂铁衣如雪色，聊持宝剑动星文。愿得燕弓射天将，
耻令越甲鸣吴军。莫嫌旧日云中守，犹堪一战取功勋。

卷_91【燕支行（时年二十一）】

王维

汉家天将才且雄，来时谒帝明光宫。万乘亲推双阙下，
千官出饯五陵东。誓辞甲第金门里，身作长城玉塞中。

卫霍才堪一骑将，朝廷不数贰师功。赵魏燕韩多劲卒，
关西侠少何咆勃。报讎只是闻尝胆，饮酒不曾妨刮骨。

画戟雕戈百日寒，连旗大旆黄尘没。叠鼓遥翻瀚海波，
鸣笳乱动天山月。麒麟锦带佩吴钩，飒沓青骊跃紫骝。

拔剑已断天骄臂，归鞍共饮月支头。汉兵大呼一当百，
虏骑相看哭且愁。教战虽令赴汤火，终知上将先伐谋。

· 全唐诗 ·

卷_92【桃源行（时年十九）】

王维

渔舟逐水爱山春，两岸桃花夹去津。坐看红树不知远，
行尽青溪不见人。山口潜行始隈隩，山开旷望旋平陆。
遥看一处攒云树，近入千家散花竹。樵客初传汉姓名，
居人未改秦衣服。居人共住武陵源，还从物外起田园。
月明松下房栊静，日出云中鸡犬喧。惊闻俗客争来集，
竞引还家问都邑。平明闾巷扫花开，薄暮渔樵乘水入。
初因避地去人间，及至成仙遂不还。峡里谁知有人事，
世中遥望空云山。不疑灵境难闻见，尘心未尽思乡县。
出洞无论隔山水，辞家终拟长游衍。自谓经过旧不迷，
安知峰壑今来变。当时只记入山深，青溪几曲到云林。
春来遍是桃花水，不辨仙源何处寻。

卷_93【洛阳女儿行（时年十六，一作十八）】

王维

洛阳女儿对门居，才可容颜十五馀。良人玉勒乘骢马，
侍女金盘鲙鲤鱼。画阁朱楼尽相望，红桃绿柳垂檐向。
罗帏送上七香车，宝扇迎归九华帐。狂夫富贵在青春，
意气骄奢剧季伦。自怜碧玉亲教舞，不惜珊瑚持与人。
春窗曙灭九微火，九微片片飞花琐。戏罢曾无理曲时，

· 全唐诗 ·

妆成只是薰香坐。城中相识尽繁华，日夜经过赵李家。
谁怜越女颜如玉，贫贱江头自浣纱。

卷_94【同崔傅答贤弟】

王维

洛阳才子姑苏客，桂苑殊非故乡陌。九江枫树几回青，
一片扬州五湖白。扬州时有下江兵，兰陵镇前吹笛声。
夜火人归富春郭，秋风鹤唳石头城。周郎陆弟为俦侣，
对舞前溪歌白纈。曲几书留小史家，草堂棋赌山阴野。
衣冠若话外台臣，先数夫君席上珍。更闻台阁求三语，
遥想风流第一人。

卷_95【赠吴官】

王维

长安客舍热如煮，无个茗糜难御暑。空摇白团其谛苦，
欲向缥囊还归旅。江乡鲭鲙不寄来，秦人汤饼那堪许。
不如侬家任挑达，草屨捞虾富春渚。

· 全唐诗 ·

卷_96【故人张諲工诗善易卜兼能丹青草隶，顷以诗见赠聊获酬之】

王维

不逐城东游侠儿，隐囊纱帽坐弹棋。蜀中夫子时开卦，
洛下书生解咏诗。药阑花径衡门里，时复据梧聊隐几。
屏风误点惑孙郎，团扇草书轻内史。故园高枕度三春，
永日垂帷绝四邻。自想蔡邕今已老，更将书籍与何人。

卷_97【送崔五太守】

王维

长安厩吏来到门，朱文露网动行轩。黄花县西九折坂，
玉树宫南五丈原。褒斜谷中不容幘，唯有白云当露冕。
子午山里杜鹃啼，嘉陵水头行客饭。剑门忽断蜀川开，
万井双流满眼来。雾中远树刀州出，天际澄江巴字回。
使君年纪三十馀，少年白皙专城居。欲持画省郎官笔，
回与临邛父老书。

卷_98【寒食城东即事】

王维

清溪一道穿桃李，演漾绿蒲涵白芷。溪上人家凡几家，

· 全唐诗 ·

落花半落东流水。蹴鞠屡过飞鸟上，秋千竞出垂杨里。
少年分日作遨游，不用清明兼上巳。

卷_99【不遇咏】

王维

北阙献书寝不报，南山种田时不登。百人会中身不预，
五侯门前心不能。身投河朔饮君酒，家在茂陵平安否。
且此登山复临水，莫问春风动杨柳。今人昨人多自私，
我心不说君应知。济人然后拂衣去，肯作徒尔一男儿。

卷_【赠裴迪】

王维

不相见，不相见来久。日日泉水头，常忆同携手。
携手本同心，复叹忽分襟。相忆今如此，相思深不深。

卷_【青雀歌（与卢象、崔兴宗、裴迪、弟缙同赋）】

王维

青雀翅羽短，未能远食玉山禾。

· 全唐诗 ·

犹胜黄雀争上下，唧唧空仓复若何。

卷_【黄雀痴（杂言走笔）】

王维

黄雀痴，黄雀痴，谓言青鵪是我儿。一一口衔食，
养得成毛衣。到大啁啾解游飏，各自东西南北飞。
薄暮空巢上，羁雌独自归。凤凰九雏亦如此，
慎莫愁思憔悴损容辉。

卷_【新秦郡松树歌】

王维

青青山上松，数里不见今更逢。不见君，心相忆，
此心向君君应识。为君颜色高且闲，亭亭迥出浮云间。

卷_【榆林郡歌】

王维

山头松柏林，山下泉声伤客心。千里万里春草色，
黄河东流流不息。黄龙戍上游侠儿，愁逢汉使不相识。

· 全唐诗 ·

卷_【问寇校书双谿】

王维

君家少室西，为复少室东，别来几日今春风。
新买双谿定何似，馀生欲寄白云中。

卷_【寄崇梵僧（崇梵寺近东阿覆釜村）】

王维

崇梵僧，崇梵僧，秋归覆釜春不还。落花啼鸟纷纷乱，
涧户山窗寂寂闲。峡里谁知有人事，郡中遥望空云山。

卷_【同比部杨员外十五夜游有怀静者季】

王维

承明少休沐，建礼省文书。夜漏行人息，归鞍落日馀。
悬知三五夕，万户千门辟。夜出曙翻归，倾城满南陌。
陌头驰骋尽繁华，王孙公子五侯家。由来月明如白日，
共道春灯胜百花。聊看侍中千宝骑，强识小妇七香车。
香车宝马共喧阗，个里多情侠少年。竞向长杨柳市北，
肯过精舍竹林前。独有仙郎心寂寞，却将宴坐为行乐。
恍觉忘怀共往来，幸沾同舍甘藜藿。

· 全唐诗 ·

卷_【答张五弟】

王维

终南有茅屋，前对终南山。终年无客常闭关，
终日无心长自闲。不妨饮酒复垂钓，君但能来相往还。

卷_【雪中忆李楫】

王维

积雪满阡陌，故人不可期。
长安千门复万户，何处躑躅黄金羈。

卷_【送李睢阳（一本以前九句自为一首）】

王维

将置酒，思悲翁。使君去，出城东。麦渐渐，雉子斑。
槐阴阴，到潼关。骑连连，车迟迟。心中悲，宋又远。
周间之，南淮夷。东齐儿，碎碎织练与素丝，
游人贾客信难持。五谷前熟方可为，下车闭閤君当思。
天子当殿俨衣裳，大官尚食陈羽觞。彤庭散绶垂鸣珰，
黄纸诏书出东厢，轻纨叠绮烂生光。宗室子弟君最贤，

· 全唐诗 ·

分忧当为百辟先。布衣一言相为死，何况圣主恩如天。
鸾声哢哢鲁侯旂，明年上计朝京师。须忆今日斗酒别，
慎勿富贵忘我为。

卷_【奉和圣制天长节赐宰臣歌应制】

王维

太阳升兮照万方，开阊阖兮临玉堂，俨冕旒兮垂衣裳。
金天净兮丽三光，彤庭曙兮延八荒。德合天兮礼神遍，
灵芝生兮庆云见。唐尧后兮稷契臣，匝宇宙兮华胥人。
尽九服兮皆四邻，乾降瑞兮坤降珍。

卷_【登楼歌】

王维

聊上君兮高楼，飞甍鳞次兮在下。俯十二兮通衢，
绿槐参差兮车马。却瞻兮龙首，前眺兮宜春。
王畿郁兮千里，山河壮兮咸秦。舍人下兮青宫，
据胡床兮书空。执戟疲于下位，老夫好隐兮墙东。
亦幸有张伯英草圣兮龙腾虬跃，摆长云兮捩回风。
琥珀酒兮雕胡饭，君不御兮日将晚。秋风兮吹衣，
夕鸟兮争返。孤砧发兮东城，林薄暮兮蝉声远。
时不可兮再得，君何为兮偃蹇。

· 全唐诗 ·

卷_【双黄鹄歌送别（时为节度判官，在凉州作）】

王维

天路来兮双黄鹄，云上飞兮水上宿，抚翼和鸣整羽族。
不得已，忽分飞，家在玉京朝紫微，主人临水送将归。
悲笳嘹唳垂舞衣，宾欲散兮复相依。几往返兮极浦，
尚裴回兮落晖。岸上火兮相迎，将夜入兮边城。
鞍马归兮佳人散，怅离忧兮独含情。

卷_【赠徐中书望终南山歌】

王维

晚下兮紫微，怅尘事兮多违。驻马兮双树，望青山兮不归。

卷_【送友人归山歌二首（离骚题作山中人）】

王维

山寂寂兮无人，又苍苍兮多木。群龙兮满朝，
君何为兮空谷。文寡和兮思深，道难知兮行独。
悦石上兮流泉，与松间兮草屋。入云中兮养鸡，
上山头兮抱犊。神与枣兮如瓜，虎卖杏兮收谷。
愧不才兮妨贤，嫌既老兮贪禄。誓解印兮相从，

· 全唐诗 ·

何詹尹兮何卜。

山中人兮欲归，云冥冥兮雨霏霏。水惊波兮翠菅靡，
白鹭忽兮翻飞，君不可兮褰衣。山万重兮一云，
混天地兮不分。树掩暧兮氛氲，猿不见兮空闻。
忽山西兮夕阳，见东皋兮远村。平芜绿兮千里，
眇惆怅兮思君。

卷_【鱼山神女祠歌·迎神】

王维

坎坎击鼓，鱼山之下。吹洞箫，望极浦。女巫进，纷屡舞。
陈瑶席，湛清醑。风淅淅兮夜雨，不知神之来兮不来，
使我心兮苦复苦。

卷_【鱼山神女祠歌·送神】

王维

纷进舞兮堂前，目眷眷兮琼筵。来不言兮意不传，
作暮雨兮愁空山。悲急管兮思繁弦，神之驾兮俨欲旋。
倏云收兮雨歇，山青青兮水潺潺。

· 全唐诗 ·

卷_【白鼇涡（杂言走笔）】

王维

南山之瀑水兮，激石湔瀑似雷惊，人相对兮不闻语声。
翻涡跳沫兮苍苔湿，藓老且厚，春草为之不生。
兽不敢惊动，鸟不敢飞鸣。白鼇涡涛戏濑兮，
委身以纵横。王人之仁兮，不网不钓，得遂性以生成。

卷_【宋进马哀词】

王维

背春涉夏兮，众木蔼以繁阴。连金华与玉堂兮，
宫阁郁其沈沈。百官并入兮，何语笑之哑哑，
君独静嘿以伤心。草王言兮不得辞，我悲减思兮少时。
仆夫命驾兮，出阊阖，历通逵。陌上人兮如故，
识不识兮往来。眼中不见兮吾儿，骖紫骝兮从青骊。
低光垂彩兮，悦不知其所之。辟朱户兮望华轩，
意斯子兮候门。忽思瘞兮城南，心瞽乱兮重昏。
仰诉天之不仁兮，家唯一身，身止一子，何胤嗣之不繁，
就单鲜而又死。将清白兮遗谁，问诗礼兮已矣。
哀从中兮不可胜，岂暇料馀年兮复几。日黯黯兮颓晔，
鸟翩翩兮疾飞。邈穷天兮不返，疑有日兮来归。
静言思兮永绝，复惊叫兮沾衣。客有吊之者曰：

· 全唐诗 ·

观未始兮有物，同委蜕兮胡悲？且延陵兮未至，
况西河兮不知。学无生兮庶可，幸能听于吾师。

· 全唐诗 ·

第一百二十六卷

卷_1【奉和圣制赐史供奉曲江宴应制】

王维

侍从有邹枚，琼筵就水开。言陪柏梁宴，新下建章来。
对酒山河满，移舟草树回。天文同丽日，驻景惜行杯。

卷_2【从岐王过杨氏别业应教】

王维

杨子谈经所，淮王载酒过。兴阑啼鸟换，坐久落花多。
径转回银烛，林开散玉珂。严城时未启，前路拥笙歌。

卷_3【从岐王夜宴卫家山池应教】

王维

座客香貂满，宫娃绮幔张。涧花轻粉色，山月少灯光。

· 全唐诗 ·

积翠纱窗暗，飞泉绣户凉。还将歌舞出，归路莫愁长。

卷_4【早朝】

王维

柳暗百花明，春深五凤城。城乌睥睨晓，宫井辘轳声。
方朔金门侍，班姬玉辇迎。仍闻遣方士，东海访蓬瀛。

卷_5【同崔员外秋宵寓直】

王维

建礼高秋夜，承明候晓过。九门寒漏彻，万井曙钟多。
月迥藏珠斗，云消出绛河。更惭衰朽质，南陌共鸣珂。

卷_6【辋川闲居赠裴秀才迪】

王维

寒山转苍翠，秋水日潺湲。倚杖柴门外，临风听暮蝉。
渡头馀落日，墟里上孤烟。复值接舆醉，狂歌五柳前。

· 全唐诗 ·

卷_7【寄荆州张丞相】

王维

所思竟何在，怅望深荆门。举世无相识，终身思旧恩。
方将与农圃，艺植老丘园。目尽南飞雁，何由寄一言。

卷_8【冬晚对雪忆胡居士家（一作王劭诗，非）】

王维

寒更传晓箭，清镜览衰颜。隔牖风惊竹，开门雪满山。
洒空深巷静，积素广庭闲。借问袁安舍，翛然尚闭关。

卷_9【和尹谏议史馆山池】

王维

云馆接天居，霓裳侍玉除。春池百子外，芳树万年馀。
洞有仙人篆，山藏太史书。君恩深汉帝，且莫上空虚。

卷_10【奉和杨驸马六郎秋夜即事】

王维

高楼月似霜，秋夜郁金香。对坐弹卢女，同看舞凤凰。

· 全唐诗 ·

少儿多送酒，小玉更焚香。结束平阳骑，明朝入建章。

卷_11【酬虞部苏员外过蓝田别业不见留之作】

王维

贫居依谷口，乔木带荒村。石路枉回驾，山家谁候门。
渔舟胶冻浦，猎火烧寒原。唯有白云外，疏钟闻夜猿。

卷_12【酬比部杨员外暮宿琴台朝跻书阁率尔见赠之作
(卢照邻)】

王维

旧简拂尘看，鸣琴候月弹。桃源迷汉姓，松树有秦官。
空谷归人少，青山背日寒。羡君栖隐处，遥望白云端。

卷_13【酬严少尹徐舍人见过不遇】

王维

公门暇日少，穷巷故人稀。偶值乘篮舆，非关避白衣。
不知炊黍谷，谁解扫荆扉。君但倾茶碗，无妨骑马归。

· 全唐诗 ·

卷_14【酬张少府】

王维

晚年唯好静，万事不关心。自顾无长策，空知返旧林。
松风吹解带，山月照弹琴。君问穷通理，渔歌入浦深。

卷_15【酬贺四赠葛巾之作】

王维

野巾传惠好，兹贶重兼金。嘉此幽栖物，能齐隐吏心。
早朝方暂挂，晚沐复来簪。坐觉嚣尘远，思君共入林。

卷_16【送丘为落第归江东】

王维

怜君不得意，况复柳条春。为客黄金尽，还家白发新。
五湖三亩宅，万里一归人。知尔不能荐，羞称献纳臣。

卷_17【送李判官赴东江】

王维

闻道皇华使，方随皂盖臣。封章通左语，冠冕化文身。

· 全唐诗 ·

树色分扬子，潮声满富春。遥知辨璧吏，恩到泣珠人。

卷_18【送封太守】

王维

忽解羊头削，聊驰熊首轡。扬舲发夏口，按节向吴门。
帆映丹阳郭，枫攒赤岸村。百城多候吏，露冕一何尊。

卷_19【送严秀才还蜀】

王维

宁亲为令子，似舅即贤甥。别路经花县，还乡入锦城。
山临青塞断，江向白云平。献赋何时至，明君忆长卿。

卷_20【送张判官赴河西】

王维

单车曾出塞，报国敢邀勋。见逐张征虏，今思霍冠军。
沙平连白云，蓬卷入黄云。慷慨倚长剑，高歌一送君。

· 全唐诗 ·

卷_21【送岐州源长史归（同在崔常侍幕中，时常侍已歿）】

王维

握手一相送，心悲安可论。秋风正萧索，客散孟尝门。
故驿通槐里，长亭下槿原。征西旧旌节，从此向河源。

卷_22【送张道士归山】

王维

先生何处去，王屋访茅君。别妇留丹诀，驱鸡入白云。
人间若剩住，天上复离群。当作辽城鹤，仙歌使尔闻。

卷_23【同崔兴宗送衡岳瑗公南归】

王维

言从石菌阁，新下穆陵关。独向池阳去，白云留故山。
绽衣秋日里，洗钵古松间。一施传心法，唯将戒定还。

· 全唐诗 ·

卷_24【送钱少府还蓝田】

王维

草色日向好，桃源人去稀。手持平子赋，目送老莱衣。
每候山樱发，时同海燕归。今年寒食酒，应是返柴扉。

卷_25【送丘为往唐州】

王维

宛洛有风尘，君行多苦辛。四愁连汉水，百口寄随人。
槐色阴清昼，杨花惹暮春。朝端肯相送，天子绣衣臣。

卷_26【送元中丞转运江淮（一作钱起诗）】

王维

薄赋归天府，轻徭赖使臣。欢沾赐帛老，恩及卷绡人。
去问珠官俗，来经石碣春。东南御亭上，莫使有风尘。

卷_27【送崔九兴宗游蜀】

王维

送君从此去，转觉故人稀。徒御犹回首，田园方掩扉。

· 全唐诗 ·

出门当旅食，中路授寒衣。江汉风流地，游人何岁归。

卷_28【送崔兴宗】

王维

已恨亲皆远，谁怜友复稀。君王未西顾，游宦尽东归。
塞迥山河净，天长云树微。方同菊花节，相待洛阳扉。

卷_29【送平澹然判官】

王维

不识阳关路，新从定远侯。黄云断春色，画角起边愁。
瀚海经年到，交河出塞流。须令外国使，知饮月氏头。

卷_30【送刘司直赴安西】

王维

绝域阳关道，胡沙与塞尘。三春时有雁，万里少行人。
苜蓿随天马，葡萄逐汉臣。当令外国惧，不敢觅和亲。

· 全唐诗 ·

卷_31【送赵都督赴代州得青字】

王维

天官动将星，汉上柳条青。万里鸣刁斗，三军出井陉。
忘身辞凤阙，报国取龙庭。岂学书生辈，窗间老一经。

卷_32【送方城韦明府】

王维

遥思葭莩际，寥落楚人行。高鸟长淮水，平芜故郢城。
使车听雉乳，县鼓应鸡鸣。若见州从事，无嫌手板迎。

卷_33【送李员外贤郎】

王维

少年何处去，负米上铜梁。借问阿戎父，知为童子郎。
鱼笺请诗赋，橐布作衣裳。薏苡扶衰病，归来幸可将。

卷_34【送梓州李使君】

王维

万壑树参天，千山响杜鹃。山中一夜雨，树杪百重泉。

· 全唐诗 ·

汉女输橦布，巴人讼芋田。文翁翻教授，不敢依先贤。

卷_35【送张五諲归宣城】

王维

五湖千万里，况复五湖西。渔浦南陵郭，人家春谷谿。
欲归江淼淼，未到草萋萋。忆想兰陵镇，可宜猿更啼。

卷_36【送友人南归】

王维

万里春应尽，三江雁亦稀。连天汉水广，孤客郢城归。
郢国稻苗秀，楚人菰米肥。悬知倚门望，遥识老莱衣。

卷_37【送贺遂员外外甥】

王维

南国有归舟，荆门溯上流。苍茫葭菼外，云水与昭丘。
檣带城乌去，江连暮雨愁。猿声不可听，莫待楚山秋。

· 全唐诗 ·

卷_38【送杨长史赴果州】

王维

褒斜不容幘，之子去何之。鸟道一千里，猿声十二时。
官桥祭酒客，山木女郎祠。别后同明月，君应听子规。

卷_39【送邢桂州】

王维

铙吹喧京口，风波下洞庭。赭圻将赤岸，击汰复扬舲。
日落江湖白，潮来天地青。明珠归合浦，应逐使臣星。

卷_40【送宇文三赴河西充行军司马】

王维

横吹杂繁笳，边风卷塞沙。还闻田司马，更逐李轻车。
蒲类成秦地，莎车属汉家。当令犬戎国，朝聘学昆邪。

卷_41【送孙二】

王维

郊外谁相送，夫君道术亲。书生邹鲁客，才子洛阳人。

· 全唐诗 ·

祖席依寒草，行车起暮尘。山川何寂寞，长望泪沾巾。

卷_42【送崔三往密州覲省】

王维

南陌去悠悠，东郊不少留。同怀扇枕恋，独念倚门愁。
路绕天山雪，家临海树秋。鲁连功未报，且莫蹈沧洲。

卷_43【送孟六归襄阳（一作张子容诗）】

王维

杜门不复出，久与世情疏。以此为良策，劝君归旧庐。
醉歌田舍酒，笑读古人书。好是一生事，无劳献子虚。

卷_44【初出济州别城中故人（一作被出济州）】

王维

微官易得罪，谪去济川阴。执政方持法，明君照此心。
间阎河润上，井邑海云深。纵有归来日，各愁年鬓侵。

· 全唐诗 ·

卷_45【与卢象集朱家】

王维

主人能爱客，终日有逢迎。赏得新丰酒，复闻秦女筝。
柳条疏客舍，槐叶下秋城。语笑且为乐，吾将达此生。

卷_46【登裴秀才迪小台】

王维

端居不出户，满目望云山。落日鸟边下，秋原人外闲。
遥知远林际，不见此檐间。好客多乘月，应门莫上关。

卷_47【游李山人所居因题屋壁】

王维

世上皆如梦，狂来止自歌。问年松树老，有地竹林多。
药倩韩康卖，门容尚子过。翻嫌枕席上，无那白云何。

卷_48【过崔驸马山池】

王维

画楼吹笛妓，金碗酒家胡。锦石称贞女，青松学大夫。

· 全唐诗 ·

脱貂赏桂醕，射雁与山厨。闻道高阳会，愚公谷正愚。

卷_49【过福禅师兰若】

王维

岩壑转微径，云林隐法堂。羽人飞奏乐，天女跪焚香。
竹外峰偏曙，藤阴水更凉。欲知禅坐久，行路长春芳。

卷_50【过香积寺（一作王昌龄诗）】

王维

不知香积寺，数里入云峰。古木无人径，深山何处钟。
泉声咽危石，日色冷青松。薄暮空潭曲，安禅制毒龙。

卷_51【过感化寺昙兴上人山院（与裴迪同作）】

王维

暮持筇竹杖，相待虎谿头。催客闻山响，归房逐水流。
野花丛发好，谷鸟一声幽。夜坐空林寂，松风直似秋。

· 全唐诗 ·

卷_52【夏日过青龙寺谒操禅师（与裴迪同作）】

王维

龙钟一老翁，徐步谒禅宫。欲问义心义，遥知空病空。
山河天眼里，世界法身中。莫怪销炎热，能生大地风。

卷_53【登辨觉寺】

王维

竹径从初地，莲峰出化城。窗中三楚尽，林上九江平。
软草承趺坐，长松响梵声。空居法云外，观世得无生。

卷_54【喜祖三至留宿】

王维

门前洛阳客，下马拂征衣。不枉故人驾，平生多掩扉。
行人返深巷，积雪带馀晖。早岁同袍者，高车何处归。

卷_55【黎拾遗昕裴秀才迪见过秋夜对雨之作】

王维

促织鸣已急，轻衣行向重。寒灯坐高馆，秋雨闻疏钟。

· 全唐诗 ·

白法调狂象，玄言问老龙。何人顾蓬径，空愧求羊踪。

卷_56【慕容承携素馔见过】

王维

纱帽乌皮几，闲居懒赋诗。门看五柳识，年算六身知。
灵寿君王赐，雕胡弟子炊。空劳酒食馔，持底解人颐。

卷_57【晚春严少尹与诸公见过】

王维

松菊荒三径，图书共五车。烹葵邀上客，看竹到贫家。
鹊乳先春草，莺啼过落花。自怜黄发暮，一倍惜年华。

卷_58【郑果州相过】

王维

丽日照残春，初晴草木新。床前磨镜客，树下灌园人。
五马惊穷巷，双童逐老身。中厨办粗饭，当恕阮家贫。

· 全唐诗 ·

卷_59【山居秋暝】

王维

空山新雨后，天气晚来秋。明月松间照，清泉石上流。
竹喧归浣女，莲动下渔舟。随意春芳歇，王孙自可留。

卷_60【终南别业（一作初至山中，一作入山寄城中故人）】

王维

中岁颇好道，晚家南山陲。兴来每独往，胜事空自知。
行到水穷处，坐看云起时。偶然值林叟，谈笑无还期。

卷_61【归嵩山作】

王维

清川带长薄，车马去闲闲。流水如有意，暮禽相与还。
荒城临古渡，落日满秋山。迢递嵩高下，归来且闭关。

卷_62【归辋川作】

王维

谷口疏钟动，渔樵稍欲稀。悠然远山暮，独向白云归。

· 全唐诗 ·

菱蔓弱难定，杨花轻易飞。东皋春草色，惆怅掩柴扉。

卷_63【韦给事山居】

王维

幽寻得此地，诂有一人曾。大壑随阶转，群山入户登。
庖厨出深竹，印绶隔垂藤。即事辞轩冕，谁云病未能。

卷_64【山居即事】

王维

寂寞掩柴扉，苍茫对落晖。鹤巢松树遍，人访荜门稀。
绿竹含新粉，红莲落故衣。渡头烟火起，处处采菱归。

卷_65【终南山】

王维

太乙近天都，连山接海隅。白云回望合，青霭入看无。
分野中峰变，阴晴众壑殊。欲投人处宿，隔水问樵夫。

· 全唐诗 ·

卷_66【辋川闲居】

王维

一从归白社，不复到青门。时倚檐前树，远看原上村。
青菰临水拔，白鸟向山翻。寂寞於陵子，桔槔方灌园。

卷_67【春园即事】

王维

宿雨乘轻屐，春寒著弊袍。开畦分白水，间柳发红桃。
草际成棋局，林端举桔槔。还持鹿皮几，日暮隐蓬蒿。

卷_68【淇上田园即事】

王维

屏居淇水上，东野旷无山。日隐桑柘外，河明闾井间。
牧童望村去，猎犬随人还。静者亦何事，荆扉乘昼关。

卷_69【凉州郊外游望（时为节度判官，在凉州作）】

王维

野老才三户，边村少四邻。婆娑依里社，箫鼓赛田神。

· 全唐诗 ·

洒洒浇刍狗，焚香拜木人。女巫纷屡舞，罗袜自生尘。

卷_70【观猎】

王维

风劲角弓鸣，将军猎渭城。草枯鹰眼疾，雪尽马蹄轻。
忽过新丰市，还归细柳营。回看射雕处，千里暮云平。

卷_71【春日上方即事】

王维

好读高僧传，时看辟谷方。鸠形将刻仗，龟壳用支床。
柳色青山映，梨花夕鸟藏。北窗桃李下，闲坐但焚香。

卷_72【汉江临泛】

王维

楚塞三湘接，荆门九派通。江流天地外，山色有无中。
郡邑浮前浦，波澜动远空。襄阳好风日，留醉与山翁。

· 全唐诗 ·

卷_73【泛前陂】

王维

秋空自明迥，况复远人间。畅以沙际鹤，兼之云外山。
澄波澹将夕，清月皓方闲。此夜任孤棹，夷犹殊未还。

卷_74【登河北城楼作】

王维

井邑傳岩上，客亭云雾间。高城眺落日，极浦映苍山。
岸火孤舟宿，渔家夕鸟还。寂寥天地暮，心与广川闲。

卷_75【千塔主人】

王维

逆旅逢佳节，征帆未可前。窗临汴河水，门渡楚人船。
鸡犬散墟落，桑榆荫远田。所居人不见，枕席生云烟。

卷_76【使至塞上】

王维

单车欲问边，属国过居延。征蓬出汉塞，归雁入胡天。

· 全唐诗 ·

大漠孤烟直，长河落日圆。萧关逢候吏，都护在燕然。

卷_77【晚春归思】

王维

新妆可怜色，落日卷罗帷。炉气清珍簟，墙阴上玉墀。
春虫飞网户，暮雀隐花枝。向晚多愁思，闲窗桃李时。

卷_78【戏题示萧氏甥】

王维

怜尔解临池，渠爷未学诗。老夫何足似，弊宅倘因之。
芦笋穿荷叶，菱花冒雁儿。郗公不易胜，莫著外家欺。

卷_79【秋夜独坐（一作冬夜书怀）】

王维

独坐悲双鬓，空堂欲二更。雨中山果落，灯下草虫鸣。
白发终难变，黄金不可成。欲知除老病，唯有学无生。

· 全唐诗 ·

卷_80【待储光羲不至】

王维

重门朝已启，起坐听车声。要欲闻清佩，方将出户迎。
晚钟鸣上苑，疏雨过春城。了自不相顾，临堂空复情。

卷_81【听宫莺】

王维

春树绕宫墙，宫莺啭曙光。忽惊啼暂断，移处弄还长。
隐叶栖承露，攀花出未央。游人未应返，为此始思乡。

卷_82【杂诗】

王维

双燕初命子，五桃新作花。王昌是东舍，宋玉次西家。
小小能织绮，时时出浣纱。亲劳使君问，南陌驻香车。

卷_83【留别钱起】

王维

卑栖却得性，每与白云归。徇禄仍怀橘，看山免采薇。

· 全唐诗 ·

暮禽先去马，新月待开扉。霄汉时回首，知音青琐闱。

卷_84【留别丘为】

王维

归鞍白云外，缭绕出前山。今日又明日，自知心不闲。
亲劳簪组送，欲趁莺花还。一步一回首，迟迟向近关。

卷_85【愚公谷三首（青龙寺与黎昕戏题）】

王维

愚谷与谁去，唯将黎子同。非须一处住，不那两心空。
宁问春将夏，谁论西复东。不知吾与子，若个是愚公。

吾家愚谷里，此谷本来平。虽则行无迹，还能响应声。
不随云色暗，只待日光明。缘底名愚谷，都由愚所成。

借问愚公谷，与君聊一寻。不寻翻到谷，此谷不离心。
行处曾无险，看时岂有深。寄言尘世客，何处欲归临。

卷_86【酬慕容十一】

王维

行行西陌返，驻幰问车公。挟毂双官骑，应门五尺僮。

· 全唐诗 ·

老年如塞北，强起离墙东。为报壶丘子，来人道姓蒙。

卷_87【过始皇墓（时年十五，一作二十一）】

王维

古墓成苍岭，幽宫象紫台。星辰七曜隔，河汉九泉开。
有海人宁渡，无春雁不回。更闻松韵切，疑是大夫哀。

卷_88【恭懿太子挽歌五首】

王维

何悟藏环早，才知拜璧年。翀天王子去，对日圣君怜。
树转宫犹出，笳悲马不前。虽蒙绝驰道，京兆别开阡。

兰殿新恩切，椒宫夕临幽。白云随凤管，明月在龙楼。
人向青山哭，天临渭水愁。鸡鸣常问膳，今恨玉京留。

骑吹凌霜发，旌旗夹路陈。凯容金节护，册命玉符新。
傅母悲香褓，君家拥画轮。射熊今梦帝，秤象问何人。

苍舒留帝宠，子晋有仙才。五岁过人智，三天使鹤催。
心悲阳禄馆，目断望思台。若道长安近，何为更不来。

· 全唐诗 ·

西望昆池阔，东瞻下杜平。山朝豫章馆，树转凤凰城。
五校连旗色，千门叠鼓声。金环如有验，还向画堂生。

卷_89【故太子太师徐公挽歌四首】

王维

功德冠群英，弥纶有大名。轩皇用风后，传说是星精。
就第优遗老，来朝诏不名。留侯常辟谷，何苦不长生。

谋猷为相国，翊戴奉宸舆。剑履升前殿，貂蝉托后车。
齐侯疏土宇，汉室赖图书。僻处留田宅，仍才十顷馀。

旧里趋庭日，新年置酒辰。闻诗鸾渚客，献赋凤楼人。
北首辞明主，东堂哭大臣。犹思御朱轂，不惜污车茵。

久践中台座，终登上将坛。谁言断车骑，空忆盛衣冠。
风日咸阳惨，笳箫渭水寒。无人当便阙，应罢太师官。

卷_90【故西河郡杜太守挽歌三首】

王维

天上去西征，云中护北平。生擒白马将，连破黑雕城。
忽见刍灵苦，徒闻竹使荣。空留左氏传，谁继卜商名。

· 全唐诗 ·

返葬金符守，同归石窆妻。卷衣悲画翟，持翼待鸣鸡。
容卫都人惨，山川驷马嘶。犹闻陇上客，相对哭征西。

涂刍去国门，秘器出东园。太守留金印，夫人罢锦轩。
旌旗转衰木，箫鼓上寒原。坟树应西靡，长思魏阙恩。

卷_91【故南阳夫人樊氏挽歌】

王维

锦衣馀翟茀，绣毂罢鱼轩。淑女诗长在，夫人法尚存。
凝笳随晓旆，行哭向秋原。归去将何见，谁能返戟门。

卷_92【达奚侍郎夫人寇氏挽词二首】

王维

束带将朝日，鸣环映牖辰。能令谏明主，相劝识贤人。
遗挂空留壁，回文日覆尘。金蚕将画柳，何处更知春。

女史悲彤管，夫人罢锦轩。卜茔占二室，行哭度千门。
秋日光能淡，寒川波自翻。一朝成万古，松柏暗平原。

· 全唐诗 ·

卷_93【送孙秀才（《纪事》作王缙诗）】

王维

帝城风日好，况复建平家。玉枕双文簟，金盘五色瓜。
山中无鲁酒，松下饭胡麻。莫厌田家苦，归期远复赊。

· 全唐诗 ·

第一百二十七卷

卷_1【奉和圣制庆玄元皇帝玉像之作应制】

王维

明君梦帝先，宝命上齐天。秦后徒闻乐，周王耻卜年。
玉京移大像，金篆会群仙。承露调天供，临空敞御筵。
斗回迎寿酒，山近起炉烟。愿奉无为化，斋心学自然。

卷_2【奉和圣制与太子诸王三月三日龙池春禊应制】

王维

故事修春禊，新宫展豫游。明君移凤辇，太子出龙楼。
赋掩陈王作，杯如洛水流。金人来捧剑，画鹢去回舟。
苑树浮宫阙，天池照冕旒。宸章在云表，垂象满皇州。

卷_3【奉和圣制上巳于望春亭观禊饮应制】

王维

长乐青门外，宜春小苑东。楼开万井上，辇过百花中。

· 全唐诗 ·

画鹢移仙妓，金貂列上公。清歌邀落日，妙舞向春风。
渭水明秦甸，黄山入汉宫。君王来祓禊，灞浐亦朝宗。

卷_4【奉和圣制暮春送朝集使归郡应制】

王维

万国仰宗周，衣冠拜冕旒。玉乘迎大客，金节送诸侯。
祖席倾三省，褰帷向九州。杨花飞上路，槐色荫通沟。
来预钧天乐，归分汉主忧。宸章类河汉，垂象满中州。

卷_5【三月三日曲江侍宴应制】

王维

万乘亲斋祭，千官喜豫游。奉迎从上苑，祓禊向中流。
草树连容卫，山河对冕旒。画旗摇浦溆，春服满汀洲。
仙籟龙媒下，神皋凤辇留。从今亿万岁，天宝纪春秋。

卷_6【奉和圣制重阳节宰臣及群官上寿应制】

王维

四海方无事，三秋大有年。百生无此日，万寿愿齐天。

· 全唐诗 ·

芍药和金鼎，茱萸插玳筵。玉堂开右个，天乐动宫悬。
御柳疏秋景，城鸦拂曙烟。无穷菊花节，长奉柏梁篇。

卷_7【三月三日勤政楼侍宴应制】

王维

彩仗连宵合，琼楼拂曙通。年光三月里，宫殿百花中。
不数秦王日，谁将洛水同。酒筵嫌落絮，舞袖怯春风。
天保无为德，人欢不战功。仍临九衢宴，更达四门聪。

卷_8【奉和圣制十五夜然灯继以酺宴应制】

王维

上路笙歌满，春城漏刻长。游人多昼日，明月让灯光。
鱼钥通翔凤，龙舆出建章。九衢陈广乐，百福透名香。
仙伎来金殿，都人绕玉堂。定应偷妙舞，从此学新妆。
奉引迎三事，司仪列万方。愿将天地寿，同以献君王。

卷_9【奉和圣制幸玉真公主山庄因题石壁十韵之作应制】

王维

碧落风烟外，瑶台道路赊。如何连帝苑，别自有仙家。

· 全唐诗 ·

此地回鸾驾，绿溪转翠华。洞中开日月，窗里发云霞。
庭养冲天鹤，溪流上汉查。种田生白玉，泥灶化丹砂。
谷静泉逾响，山深日易斜。御羹和石髓，香饭进胡麻。
大道今无外，长生讵有涯。还瞻九霄上，来往五云车。

卷_10【春日直门下省早朝（时为右补阙）】

王维

骑省直明光，鸡鸣谒建章。遥闻侍中珮，闇识令君香。
玉漏随铜史，天书拜夕郎。旌旗映阊阖，歌吹满昭阳。
官舍梅初紫，宫门柳欲黄。愿将迟日意，同与圣恩长。

卷_11【和仆射晋公扈从温汤（时为右补阙）】

王维

天子幸新丰，旌旗渭水东。寒山天仗外，温谷幔城中。
奠玉群仙座，焚香太乙宫。出游逢牧马，罢猎见非熊。
上宰无为化，明时太古同。灵芝三秀紫，陈粟万箱红。
王礼尊儒教，天兵小战功。谋犹归哲匠，词赋属文宗。
司谏方无阙，陈诗且未工。长吟吉甫颂，朝夕仰清风。

· 全唐诗 ·

卷_12【和宋中丞夏日游福贤观天长寺寺即陈左相宅所施之作】

王维

已相殷王国，空馀尚父谿。钓矶开月殿，筑道出云梯。
积水浮香象，深山鸣白鸡。虚空陈伎乐，衣服制虹霓。
墨点三千界，丹飞六一泥。桃源勿遽返，再访恐君迷。

卷_13【和陈监四郎秋雨中思从弟据】

王维

袅袅秋风动，凄凄烟雨繁。声连鹄鹳观，色暗凤凰原。
细柳疏高阁，轻槐落洞门。九衢行欲断，万井寂无喧。
忽有愁霖唱，更陈多露言。平原思令弟，康乐谢贤昆。
逸兴方三接，衰颜强七奔。相如今老病，归守茂陵园。

卷_14【上张令公】

王维

珥笔趋丹陛，垂珰上玉除。步檐青琐闼，方幰昼轮车。
市阅千金字，朝闻五色书。致君光帝典，荐士满公车。

· 全唐诗 ·

伏奏回金驾，横经重石渠。从兹罢角牴，且复幸储胥。
天统知尧后，王章笑鲁初。匈奴遥俯伏，汉相俨警裾。
贾生非不遇，汲黯自堪疏。学易思求我，言诗或起予。
当从大夫后，何惜隶人馀。

卷_15【赠焦道士】

王维

海上游三岛，淮南预八公。坐知千里外，跳向一壶中。
缩地朝珠阙，行天使玉童。饮人聊割酒，送客乍分风。
天老能行气，吾师不养空。谢君徒雀跃，无可问鸿濛。

卷_16【赠东岳焦炼师】

王维

先生千岁馀，五岳遍曾居。遥识齐侯鼎，新过王母庐。
不能师孔墨，何事问长沮。玉管时来凤，铜盘即钓鱼。
竦身空里语，明目夜中书。自有还丹术，时论太素初。
频蒙露版诏，时降软轮车。山静泉逾响，松高枝转疏。
支颐问樵客，世上复何如。

卷_17【送秘书晁监还日本国】

王维

积水不可极，安知沧海东。九州何处远，万里若乘空。

· 全唐诗 ·

向国唯看日，归帆但信风。鳌身映天黑，鱼眼射波红。
乡树扶桑外，主人孤岛中。别离方异域，音信若为通。

卷_18【送祢郎中】

王维

东郊春草色，驱马去悠悠。况复乡山外，猿啼湘水流。
岛夷传露版，江馆候鸣驺。卉服为诸吏，珠官拜本州。
孤莺吟远墅，野杏发山邮。早晚方归奏，南中才忌秋。

卷_19【送李太守赴上洛】

王维

商山包楚邓，积翠蔼沉沉。驿路飞泉洒，关门落照深。
野花开古戍，行客响空林。板屋春多雨，山城昼欲阴。
丹泉通虢略，白羽抵荆岑。若见西山爽，应知黄绮心。

卷_20【送熊九赴任安阳】

王维

魏国应刘后，寂寥文雅空。漳河如旧日，之子继清风。

· 全唐诗 ·

阡陌铜台下，闾阎金虎中。送车盈灞上，轻骑出关东。
相去千馀里，西园明月同。

卷_21【山中示弟】

王维

山林吾丧我，冠带尔成人。莫学嵇康懒，且安原宪贫。
山阴多北户，泉水在东邻。缘合妄相有，性空无所亲。
安知广成子，不是老夫身。

卷_22【青龙寺昙壁上人兄院集】

王维

高处敞招提，虚空讵有倪。坐看南陌骑，下听秦城鸡。
眇眇孤烟起，芊芊远树齐。青山万井外，落日五陵西。
眼界今无染，心空安可迷。

卷_23【济州过赵叟家宴】

王维

虽与人境接，闭门成隐居。道言庄叟事，儒行鲁人馀。

· 全唐诗 ·

深巷斜晖静，闲门高柳疏。荷锄修药圃，散帙曝农书。
上客摇芳翰，中厨馈野蔬。夫君第高饮，景晏出林间。

卷_24【春过贺遂员外药园】

王维

前年槿篱故，新作药栏成。香草为君子，名花是长卿。
水穿盘石透，藤系古松生。画畏开厨走，来蒙倒屣迎。
蔗浆菰米饭，蒟酱露葵羹。颇识灌园意，於陵不自轻。

卷_25【过卢四员外宅看饭僧共题七韵】

王维

三贤异七贤，青眼慕青莲。乞饭从香积，裁衣学水田。
上人飞锡杖，檀越施金钱。趺坐檐前日，焚香竹下烟。
寒空法云地，秋色净居天。身逐因缘法，心过次第禅。
不须愁日暮，自有一灯然。

卷_26【河南严尹弟见宿弊庐访别人赋十韵】

王维

上客能论道，吾生学养蒙。贫交世情外，才子古人中。

· 全唐诗 ·

冠上方簪豸，车边已画熊。拂衣迎五马，垂手凭双童。
花醪和松屑，茶香透竹丛。薄霜澄夜月，残雪带春风。
古壁苍苔黑，寒山远烧红。眼看东候别，心事北川同。
为学轻先辈，何能访老翁。欲知今日后，不乐为车公。

卷_27【投道一师兰若宿】

王维

一公栖太白，高顶出风烟。梵流诸壑遍，花雨一峰偏。
迹为无心隐，名因立教传。鸟来远语法，客去更安禅。
昼涉松路尽，暮投兰若边。洞房隐深竹，清夜闻遥泉。
向是云霞里，今成枕席前。岂唯暂留宿，服事将穷年。

卷_28【游化感寺】

王维

翡翠香烟合，琉璃宝地平。龙宫连栋宇，虎穴傍檐楹。
谷静唯松响，山深无鸟声。琼峰当户拆，金涧透林明。
郢路云端迥，秦川雨外晴。雁王衔果献，鹿女踏花行。
抖擞辞贫里，归依宿化城。绕篱生野蕨，空馆发山樱。
香饭青菰米，嘉蔬绿笋茎。誓陪清梵末，端坐学无生。

· 全唐诗 ·

卷_29【游悟真寺（一作王缙诗）】

王维

闻道黄金地，仍开白玉田。掷山移巨石，咒岭出飞泉。
猛虎同三径，愁猿学四禅。买香然绿桂，乞火踏红莲。
草色摇霞上，松声泛月边。山河穷百二，世界接三千。
梵宇聊凭视，王城遂渺然。灞陵才出树，渭水欲连天。
远县分诸郭，孤村起白烟。望云思圣主，披雾隐群贤。
薄宦惭尸素，终身拟尚玄。谁知草庵客，曾和柏梁篇。

卷_30【与苏卢二员外期游方丈寺而苏不至，因有是作】

王维

共仰头陀行，能忘世谛情。回看双凤阙，相去一牛鸣。
法向空林说，心随宝地平。手巾花氎净，香帔稻畦成。
闻道邀同舍，相期宿化城。安知不来往，翻得似无生。

卷_31【晓行巴峡】

王维

际晓投巴峡，馀春忆帝京。晴江一女浣，朝日众鸡鸣。

· 全唐诗 ·

水国舟中市，山桥树杪行。登高万井出，眺迥二流明。
人作殊方语，莺为故国声。赖多山水趣，稍解别离情。

卷_32【清如玉壶冰（京兆府试，时年十九）】

王维

玉壶何用好，偏许素冰居。未共销丹日，还同照绮疏。
抱明中不隐，含净外疑虚。气似庭霜积，光言砌月馀。
晓凌飞鹊镜，宵映聚萤书。若向夫君比，清心尚不如。

卷_33【赋得秋日悬清光】

王维

寥廓凉天静，晶明白日秋。圆光含万象，碎影入闲流。
迥与青冥合，遥同江甸浮。昼阴殊众木，斜影下危楼。
宋玉登高怨，张衡望远愁。馀辉如可托，云路岂悠悠。

卷_34【东溪玩月（一作王昌龄诗）】

王维

月从断山口，遥吐柴门端。万木分空霁，流阴中夜攒。

· 全唐诗 ·

光连虚象白，气与风露寒。谷静秋泉响，岩深青霭残。
清灯入幽梦，破影抱空峦。恍惚琴窗里，松谿晓思难。

卷_35【田家】

王维

旧谷行将尽，良苗未可希。老年方爱粥，卒岁且无衣。
雀乳青苔井，鸡鸣白板扉。柴车驾羸牸，草屨牧豪豨。
夕雨红榴拆，新秋绿芋肥。饷田桑下憩，旁舍草中归。
住处名愚谷，何烦问是非。

卷_36【沈十四拾遗新竹生读经处同诸公之作】

王维

闲居日清静，修竹自檀栾。嫩节留馀箨，新业出旧阑。
细枝风响乱，疏影月光寒。乐府裁龙笛，渔家伐钓竿。
何如道门里，青翠拂仙坛。

卷_37【杂诗】

王维

朝因折杨柳，相见洛阳隅。楚国无如妾，秦家自有夫。

· 全唐诗 ·

对人传玉腕，映烛解罗襦。人见东方骑，皆言夫婿殊。
持谢金吾子，烦君提玉壶。

卷_38【哭褚司马】

王维

妄识皆心累，浮生定死媒。谁言老龙吉，未免伯牛灾。
故有求仙药，仍馀遁俗杯。山川秋树苦，窗户夜泉哀。
尚忆青骡去，宁知白马来。汉臣修史记，莫蔽褚生才。

卷_39【过沈居士山居哭之】

王维

杨朱来此哭，桑扈返于真。独自成千古，依然旧四邻。
闲檐喧鸟鹊，故榻满埃尘。曙月孤莺啭，空山五柳春。
野花愁对客，泉水咽迎人。善卷明时隐，黔娄在日贫。
逝川嗟尔命，丘井叹吾身。前后徒言隔，相悲讵几晨。

卷_40【哭祖六自虚（时年十八）】

王维

否极尝闻泰，嗟君独不然。悯凶才稚齿，羸疾主中年。

· 全唐诗 ·

余力文章秀，生知礼乐全。翰留天帐览，词入帝宫传。
国讶终军少，人知贾谊贤。公卿尽虚左，朋识共推先。
不恨依穷辙，终期济巨川。才雄望羔雁，寿促背貂蝉。
福善闻前录，歼良昧上玄。何辜铄鸾翮，底事碎事与。
又作^{原蜀}龙泉，鵬起长沙赋。麟终曲阜编，域中君道广。
海内我情偏，乍失疑犹见。沉思悟绝缘，生前不忍别。
死后向谁宣。为此情难尽，弥令忆更缠。本家清渭曲，
归葬旧茔边。永去长安道，徒闻京兆阡。旌车出郊甸，
乡国隐云天。定作无期别，宁同旧日旋。候门家属苦，
行路国人怜。送客哀难进，征途泥复前。赠言为挽曲，
奠席是离筵。念昔同携手，风期不暂捐。南山俱隐逸，
东洛类神仙。未省音容间，那堪生死迁。花时金谷饮，
月夜竹林眠。满地传都赋，倾朝看药船。群公咸属目，
微物敢齐肩。谬合同人旨，而将玉树连。不期先挂剑，
长恐后施鞭。为善吾无矣，知音子绝焉。琴声纵不没，
终亦继悲弦。

· 全唐诗 ·

第一百二十八卷

卷_1【奉和圣制从蓬莱向兴庆阁道中留春雨中春望之作应制】

王维

渭水自萦秦塞曲，黄山旧绕汉宫斜。銮舆迥出千门柳，
阁道回看上苑花。云里帝城双凤阙，雨中春树万人家。
为乘阳气行时令，不是宸游玩物华。

卷_2【大同殿柱产玉芝，龙池上有庆云神光照殿，百官共睹，圣恩便赐宴乐敢书即事即事】

王维

欲笑周文歌宴镐，遥轻汉武乐横汾。岂知玉殿生三秀，
讵有铜池出五云。陌上尧樽倾北斗，楼前舜乐动南薰。
共欢天意同人意，万岁千秋奉圣君。

· 全唐诗 ·

卷_3【敕赐百官樱桃（时为文部郎）】

王维

芙蓉阙下会千官，紫禁朱樱出上阑。才是寝园春荐后，
非关御苑鸟衔残。归鞍竞带青丝笼，中使频倾赤玉盘。
饱食不须愁内热，大官还有蔗浆寒。

卷_4【敕借岐王九成宫避暑应教】

王维

帝子远辞丹凤阙，天书遥借翠微宫。隔窗云雾生衣上，
卷幔山泉入镜中。林下水声喧语笑，岩间树色隐房栊。
仙家未必能胜此，何事吹笙向碧空。

卷_5【和贾舍人早朝大明宫之作】

王维

绛帟鸡人送晓筹，尚衣方进翠云裘。九天阊阖开宫殿，
万国衣冠拜冕旒。日色才临仙掌动，香烟欲傍衮龙浮。

· 全唐诗 ·

朝罢须裁五色诏，佩声归向凤池头。

卷_6【和太常韦主簿五郎温汤寓目之作】

王维

汉主离宫接露台，秦川一半夕阳开。青山尽是朱旗绕，
碧涧翻从玉殿来。新丰树里行人度，小苑城边猎骑回。
闻道甘泉能献赋，悬知独有子云才。

卷_7【苑舍人能书梵字兼达梵音，皆曲尽其妙，戏为之赠】

王维

名儒待诏满公车。才子为郎典石渠。莲花法藏心悬悟，
贝叶经文手自书。楚词共许胜扬马，梵字何人辨鲁鱼。
故旧相望在三事，愿君莫厌承明庐。

卷_8【重酬苑郎中（时为库部员外）】

王维

何幸含香奉至尊，多惭未报主人恩。草木尽能酬雨露，

· 全唐诗 ·

荣枯安敢问乾坤。仙郎有意怜同舍，丞相无私断扫门。
扬子解嘲徒自遣，冯唐已老复何论。

卷_9【酬郭给事】

王维

洞门高阁霭馀辉，桃李阴阴柳絮飞。禁里疏钟官舍晚，
省中啼鸟吏人稀。晨摇玉佩趋金殿，夕奉天书拜琐闱。
强欲从君无那老，将因卧病解朝衣。

卷_10【出塞（时为御史监察塞上作）】

王维

居延城外猎天骄，白草连山野火烧。暮云空碛时驱马，
秋日平原好射雕。护羌校尉朝乘障，破虏将军夜渡辽。
玉靶角弓珠勒马，汉家将赐霍嫖姚。

卷_11【既蒙宥罪旋复拜官，伏感圣恩窃书鄙意，兼奉
简新除使君等诸公】

王维

忽蒙汉诏还冠冕，始觉殷王解网罗。日比皇明犹自暗，

· 全唐诗 ·

天齐圣寿未云多。花迎喜气皆知笑，鸟识欢心亦解歌。
闻道百城新佩印，还来双阙共鸣珂。

卷_12【送方尊师归嵩山】

王维

仙官欲往九龙潭，旄节朱幡倚石龕。山压天中半天上，
洞穿江底出江南。瀑布杉松常带雨，夕阳苍翠忽成岚。
借问迎来双白鹤，已曾衡岳送苏耽。

卷_13【送杨少府贬郴州】

王维

明到衡山与洞庭，若为秋月听猿声。愁看北渚三湘远，
恶说南风五两轻。青草瘴时过夏口，白头浪里出湓城。
长沙不久留才子，贾谊何须吊屈平。

卷_14【过乘如禅师萧居士嵩丘兰若】

王维

无著天亲弟与兄，嵩丘兰若一峰晴。食随鸣磬巢乌下，

· 全唐诗 ·

行踏空林落叶声。进水定侵香案湿，雨花应共石床平。
深洞长松何所有，俨然天竺古先生。

卷_15【春日与裴迪过新昌里访吕逸人不遇】

王维

桃源一向绝风尘，柳市南头访隐沦。到门不敢题凡鸟，
看竹何须问主人。城上青山如屋里，东家流水入西邻。
闭户著书多岁月，种松皆老作龙鳞。

卷_16【酌酒与裴迪】

王维

酌酒与君君自宽，人情翻覆似波澜。白首相知犹按剑，
朱门先达笑弹冠。草色全经细雨湿，花枝欲动春风寒。
世事浮云何足问，不如高卧且加餐。

卷_17【辋川别业】

王维

不到东山向一年，归来才及种春田。雨中草色绿堪染，

· 全唐诗 ·

水上桃花红欲然。优娄比丘经论学，伛偻丈人乡里贤。
披衣倒屣且相见，相欢语笑衡门前。

卷_18【早秋山中作】

王维

无才不敢累明时，思向东谿守故篱。岂厌尚平婚嫁早，
却嫌陶令去官迟。草间蛩响临秋急，山里蝉声薄暮悲。
寂寞柴门人不到，空林独与白云期。

卷_19【积雨辋川庄作（一作秋归辋川庄作）】

王维

积雨空林烟火迟，蒸藜炊黍饷东菑。漠漠水田飞白鹭，
阴阴夏木啭黄鹂。山中习静观朝槿，松下清斋折露葵。
野老与人争席罢，海鸥何事更相疑。

卷_20【听百舌鸟】

王维

上兰门外草萋萋，未央宫中花里栖。亦有相随过御苑，

· 全唐诗 ·

不知若个向金堤。入春解作千般语，拂曙能先百鸟啼。
万户千门应觉晓，建章何必听鸣鸡。

卷_21【息夫人（时年二十）】

王维

莫以今时宠，难忘旧日恩。看花满眼泪，不共楚王言。

卷_22【班婕妤三首】

王维

玉窗萤影度，金殿人声绝。秋夜守罗帷，孤灯耿不灭。

宫殿生秋草，君王恩幸疏。那堪闻凤吹，门外度金舆。

怪来妆阁闭，朝下不相迎。总向春园里，花间笑语声。

卷_23【辋川集·孟城坳】

王维

新家孟城口，古木馀衰柳。来者复为谁，空悲昔人有。

· 全唐诗 ·

卷_24【辋川集·华子冈】

王维

飞鸟去不穷，连山复秋色。上下华子冈，惆怅情何极。

卷_25【辋川集·文杏馆】

王维

文杏裁为梁，香茅结为宇。不知栋里云，去作人间雨。

卷_26【辋川集·斤竹岭】

王维

檀栾映空曲，青翠漾涟漪。暗入商山路，樵人不可知。

卷_27【辋川集·鹿柴】

王维

空山不见人，但闻人语响。返景入深林，复照青苔上。

· 全唐诗 ·

卷_28【辋川集·木兰柴】

王维

秋山敛馀照，飞鸟逐前侣。彩翠时分明，夕岚无处所。

卷_29【辋川集·茱萸沍】

王维

结实红且绿，复如花更开。山中饶留客，置此芙蓉杯。

卷_30【辋川集·宫槐陌】

王维

仄径荫宫槐，幽阴多绿苔。应门但迎扫，畏有山僧来。

卷_31【辋川集·临湖亭】

王维

轻舸迎上客，悠悠湖上来。当轩对尊酒，四面芙蓉开。

· 全唐诗 ·

卷_32【辋川集·南垞】

王维

轻舟南垞去，北垞森难即。隔浦望人家，遥遥不相识。

卷_33【辋川集·欽湖】

王维

吹箫凌极浦，日暮送夫君。湖上一回首，青山卷白云。

卷_34【辋川集·柳浪】

王维

分行接绮树，倒影入清漪。不学御沟上，春风伤别离。

卷_35【辋川集·栾家濑】

王维

飒飒秋雨中，浅浅石榴泻。跳波自相溅，白鹭惊复下。

· 全唐诗 ·

卷_36【辋川集·金屑泉】

王维

日饮金屑泉，少当千馀岁。翠凤翊文螭，羽节朝玉帝。

卷_37【辋川集·白石滩】

王维

清浅白石滩，绿蒲向堪把。家住水东西，浣纱明月下。

卷_38【辋川集·北垞】

王维

北垞湖水北，杂树映朱阑。逶迤南川水，明灭青林端。

卷_39【辋川集·竹里馆】

王维

独坐幽篁里，弹琴复长啸。深林人不知，明月来相照。

· 全唐诗 ·

卷_40【辋川集·辛夷坞】

王维

木末芙蓉花，山中发红萼。涧户寂无人，纷纷开且落。

卷_41【辋川集·漆园】

王维

古人非傲吏，自阙经世务。偶寄一微官，婆娑数株树。

卷_42【辋川集·椒园】

王维

桂尊迎帝子，杜若赠佳人。椒浆奠瑶席，欲下云中君。

卷_43【皇甫岳云溪杂题五首·鸟鸣涧】

王维

人闲桂花落，夜静春山空。月出惊山鸟，时鸣春涧中。

· 全唐诗 ·

卷_44【皇甫岳云溪杂题五首·莲花坞】

王维

日日采莲去，洲长多暮归。弄篙莫溅水，畏湿红莲衣。

卷_45【皇甫岳云溪杂题五首·鸬鹚堰】

王维

乍向红莲没，复出清蒲颺。独立何褊褊，衔鱼古查上。

卷_46【皇甫岳云溪杂题五首·上平田】

王维

朝耕上平田，暮耕上平田。借问问津者，宁知沮溺贤。

卷_47【皇甫岳云溪杂题五首·萍池】

王维

春池深且广，会待轻舟回。靡靡绿萍合，垂杨扫复开。

· 全唐诗 ·

卷_48【答裴迪辋口遇雨忆终南山之作】

王维

淼淼寒流广，苍苍秋雨晦。君问终南山，心知白云外。

卷_49【山中寄诸弟妹】

王维

山中多法侣，禅诵自为群。城郭遥相望，唯应见白云。

卷_50【闻裴秀才迪吟诗因戏赠】

王维

猿吟一何苦，愁朝复悲夕。莫作巫峡声，肠断秋江客。

卷_51【赠韦穆十八】

王维

与君青眼客，共有白云心。不向东山去，日令春草深。

· 全唐诗 ·

卷_52【送别（一作山中送别，一作送友）】

王维

山中相送罢，日暮掩柴扉。春草明年绿，王孙归不归。

卷_53【临高台送黎拾遗】

王维

相送临高台，川原杳何极。日暮飞鸟还，行人去不息。

卷_54【别辋川别业】

王维

依迟动车马，惆怅出松萝。忍别青山去，其如绿水何。

卷_55【崔九弟欲往南山马上口号与别】

王维

城隅一分手，几日还相见。山中有桂花，莫待花如霰。

· 全唐诗 ·

卷_56【题友人云母障子（时年十五）】

王维

君家云母障，时向野庭开。自有山泉入，非因采画来。

卷_57【红牡丹】

王维

绿艳闲且静，红衣浅复深。花心愁欲断，春色岂知心。

卷_58【左掖梨花（一作海棠。与丘为、皇甫冉同作）】

王维

闲洒阶边草，轻随箔外风。黄莺弄不足，衔入未央宫。

卷_59【菩提寺禁口号又示裴迪】

王维

安得舍罗网，拂衣辞世喧。悠然策藜杖，归向桃花源。

· 全唐诗 ·

卷_60【杂诗三首】

王维

家住孟津河，门对孟津口。常有江南船，寄书家中否。

君自故乡来，应知故乡事。来日绮窗前，寒梅著花未。

已见寒梅发，复闻啼鸟声。心随春草生，愿随春风归。

卷_61【崔兴宗写真咏】

王维

画君年少时，如今君已老。今时新识人，知君旧时好。

卷_62【山茱萸】

王维

朱实山下开，清香寒更发。幸与丛桂花，窗前向秋月。

· 全唐诗 ·

卷_63【相思】

王维

红豆生南国，秋来发故枝。愿君多采撷，此物最相思。

卷_64【书事】

王维

轻阴阁小雨，深院昼慵开。坐看苍苔色，欲上人衣来。

卷_65【哭孟浩然（时为殿中侍御史，知南选，至襄阳有作）】

王维

故人不可见，汉水日东流。借问襄阳老，江山空蔡州。

卷_66【阙题二首】

王维

荆谿白石出，天寒红叶稀。山路元无雨，空翠湿人衣。

· 全唐诗 ·

相看不忍发，惨淡暮潮平。语罢更携手，月明洲渚生。

卷_67【田园乐七首（一作辋川六言，第六首一作皇甫曾诗）】

王维

厌见千门万户，经过北里南邻。
官府鸣珂有底，崆峒散发何人。

再见封侯万户，立谈赐璧一双。
讵胜耦耕南亩，何如高卧东窗。

采菱渡头风急，策杖林西日斜。
杏树坛边渔父，桃花源里人家。

萋萋春草秋绿，落落长松夏寒。
牛羊自归村巷，童稚不识衣冠。

山下孤烟远村，天边独树高原。
一瓢颜回陋巷，五柳先生对门。

桃红复含宿雨，柳绿更带朝烟。
花落家童未扫，莺啼山客犹眠。

酌酒会临泉水，抱琴好倚长松。

· 全唐诗 ·

南园露葵朝折，东谷黄粱夜舂。

卷_68【少年行四首】

王维

新丰美酒斗十千，咸阳游侠多少年。
相逢意气为君饮，系马高楼垂柳边。

出身仕汉羽林郎，初随骠骑战渔阳。
孰知不向边庭苦，纵死犹闻侠骨香。

一身能擘两雕弧，虏骑千重只似无。
偏坐金鞍调白羽，纷纷射杀五单于。

汉家君臣欢宴终，高议云台论战功。
天子临轩赐侯印，将军佩出明光宫。

卷_69【赠裴旻将军】

王维

腰间宝剑七星文，臂上雕弓百战勋。
见说云中擒黠虏，始知天上有将军。

· 全唐诗 ·

卷_70【九月九日忆山东兄弟（时年十七）】

王维

独在异乡为异客，每逢佳节倍思亲。
遥知兄弟登高处，遍插茱萸少一人。

卷_71【送王尊师归蜀中拜扫】

王维

大罗天上神仙客，濯锦江头花柳春。
不为碧鸡称使者，唯令白鹤报乡人。

卷_72【渭城曲（一作送元二使安西）】

王维

渭城朝雨浥轻尘，客舍青青杨柳春。
劝君更尽一杯酒，西出阳关无故人。

卷_73【齐州送祖二（一作送别）】

王维

送君南浦泪如丝，君向东州使我悲。

· 全唐诗 ·

为报故人憔悴尽，如今不似洛阳时。

卷_74【送韦评事】

王维

欲逐将军取右贤，沙场走马向居延。
遥知汉使萧关外，愁见孤城落日边。

卷_75【灵云池送从弟】

王维

金杯缓酌清歌转，画舸轻移艳舞回。
自叹鹪鷯临水别，不同鸿雁向池来。

卷_76【送沈子归江东（一作送沈子福之）】

王维

杨柳渡头行客稀，罟师荡桨向临圻。
唯有相思似春色，江南江北送君归。

· 全唐诗 ·

卷_77【与卢员外象过崔处士兴宗林亭】

王维

绿树重阴盖四邻，青苔日厚自无尘。
科头箕踞长松下，白眼看他世上人。

卷_78【寒食汜上作（一作途中口号）】

王维

广武城边逢暮春，汶阳归客泪沾巾。
落花寂寂啼山鸟，杨柳青青渡水人。

卷_79【戏题辋川别业】

王维

柳条拂地不须折，松树披云从更长。
藤花欲暗藏獐子，柏叶初齐养麝香。

卷_80【戏题盘石】

王维

可怜盘石临泉水，复有垂杨拂酒杯。

· 全唐诗 ·

若道春风不解意，何因吹送落花来。

卷_81【寄河上段十六】

王维

与君相见即相亲，闻道君家在孟津。
为见行舟试借问，客中时有洛阳人。

卷_82【菩提寺禁裴迪来相看，说逆贼等，凝碧池上作音乐，供奉人等举声便一时泪下，私成口号诵示裴迪】

王维

万户伤心生野烟，百僚何日更朝天。
秋槐叶落空宫里，凝碧池头奏管弦。

卷_83【凉州赛神（时为节度判官，在凉州作）】

王维

凉州城外少行人，百尺峰头望虏尘。
健儿击鼓吹羌笛，共赛城东越骑神。

· 全唐诗 ·

卷_84【戏嘲史寰】

王维

清风细雨湿梅花，骤马先过碧玉家。
正值楚王宫里至，门前初下七香车。

卷_85【叹白发】

王维

宿昔朱颜成暮齿，须臾白发变垂髫。
一生几许伤心事，不向空门何处销。

卷_86【伊州歌】

王维

清风明月苦相思，荡子从戎十载馀。
征人去日殷勤嘱，归雁来时数附书。

卷_87【送殷四葬（一作哭殷遥）】

王维

送君返葬石楼山，松柏苍苍宾驭还。

· 全唐诗 ·

埋骨白云长已矣，空馀流水向人间。

卷_88【疑梦】

王维

莫惊宠辱空忧喜，莫计恩雠浪苦辛。
黄帝孔丘何处问，安知不是梦中身。

卷_89【句】

王维

人家在仙掌，云气欲生衣。

· 全唐诗 ·

第一百二十九卷

卷_1【古离别】

王缙

下阶欲离别，相对映兰丛。含辞未及吐，泪落兰丛中。
高堂静秋日，罗衣飘暮风。谁能待明月，回首见床空。

卷_2【青雀歌】

王缙

林间青雀儿，来往翩翩绕一枝。
莫言不解衔环报，但问君恩今若为。

卷_3【同王昌龄裴迪游青龙寺昙壁上人兄院集和兄维】

王缙

林中空寂舍，阶下终南山。高卧一床上，回看六合间。

· 全唐诗 ·

浮云几处灭，飞鸟何时还。问义天人接，无心世界闲。
谁知大隐者，兄弟自追攀。

卷_4【别辋川别业】

王缙

山月晓仍在，林风凉不绝。殷勤如有情，惆怅令人别。

卷_5【与卢员外象过崔处士兴宗林亭】

王缙

身名不问十年馀，老大谁能更读书。
林中独酌邻家酒，门外时闻长者车。

卷_6【九日作】

王缙

莫将边地比京都，八月严霜草已枯。
今日登高樽酒里，不知能有菊花无。

· 全唐诗 ·

卷_7【送孙秀才（以下二首一作王维诗）】

王缙

帝城风日好，况复建平家。玉枕双纹簟，金盘五色瓜。
山中无鲁酒，松下饭胡麻。莫厌田家苦，归期远复赊。

卷_8【游悟真寺】

王缙

闻道黄金地，仍开白玉田。掷山移巨石，咒岭出飞泉。
猛虎同三径，愁猿学四禅。买香然绿桂，乞火蹈红莲。
草色摇霞上，松声泛月边。山河穷百二，世界接三千。
梵宇聊凭视，王城遂渺然。灞陵才出树，渭水欲连天。
远县分朱郭，孤村起白烟。望云思圣主，披雾忆群贤。
薄宦惭尸素，终身拟尚玄。谁知草庵客，曾和柏梁篇。

卷_9【青龙寺昙壁上人院集】

裴迪

灵境信为绝，法堂出尘氛。自然成高致，向下看浮云。
迢迢峰岫列，参差闾井分。林端远堞见，风末疏钟闻。

· 全唐诗 ·

吾师久禅寂，在世超人群。

卷_10【青雀歌】

裴迪

动息自适性，不曾妄与燕雀群。幸忝鹪鹩早相识，
何时提携致青云。

卷_11【游感化寺昙兴上人山院】

裴迪

不远灞陵边，安居向十年。入门穿竹径，留客听山泉。
鸟啭深林里，心闲落照前。浮名竟何益，从此愿栖禅。

卷_12【夏日过青龙寺谒操禅师】

裴迪

安禅一室内，左右竹亭幽。有法知不染，无言谁敢酬。
鸟飞争向夕，蝉噪已先秋。烦暑自兹适，清凉何所求。

· 全唐诗 ·

卷_13【春日与王右丞过新昌里访吕逸人不遇】

裴迪

恨不逢君出荷蓑，青松白屋更无他。陶令五男曾不有，
蒋生三径枉相过。芙蓉曲沼春流满，薜荔成帷晚霭多。
闻说桃源好迷客，不如高卧眇庭柯。

卷_14【辋川集二十首·孟城坳】

裴迪

结庐古城下，时登古城上。古城非畴昔，今人自来往。

卷_15【辋川集二十首·华子冈】

裴迪

落日松风起，还家草露晞。云光侵履迹，山翠拂人衣。

卷_16【辋川集二十首·文杏馆】

裴迪

迢迢文杏馆，跻攀日已屡。南岭与北湖，前看复回顾。

· 全唐诗 ·

卷_17【辋川集二十首·斤竹岭】

裴迪

明流纡且直，绿筱密复深。一径通山路，行歌望旧岑。

卷_18【辋川集二十首·鹿柴】

裴迪

日夕见寒山，便为独往客。不知深林事，但有麝麝迹。

卷_19【辋川集二十首·木兰柴】

裴迪

苍苍落日时，鸟声乱溪水。缘溪路转深，幽兴何时已。

卷_20【辋川集二十首·茱萸沍】

裴迪

飘香乱椒桂，布叶间檀栾。云日虽回照，森沉犹自寒。

· 全唐诗 ·

卷_21【辋川集二十首·宫槐陌】

裴迪

门前宫槐陌，是向欽湖道。秋来山雨多，落叶无人扫。

卷_22【辋川集二十首·临湖亭】

裴迪

当轩弥滉漾，孤月正裴回。谷口猿声发，风传入户来。

卷_23【辋川集二十首·南垞】

裴迪

孤舟信一泊，南垞湖水岸。落日下崦嵫，清波殊淼漫。

卷_24【辋川集二十首·欽湖】

裴迪

空阔湖水广，青荧天色同。舫舟一长啸，四面来清风。

· 全唐诗 ·

卷_25【辋川集二十首·柳浪】

裴迪

映池同一色，逐吹散如丝。结阴既得地，何谢陶家时。

卷_26【辋川集二十首·栾家濑】

裴迪

濑声喧极浦，沿涉向南津。泛泛鸥鳬渡，时时欲近人。

卷_27【辋川集二十首·金屑泉】

裴迪

萦渟澹不流，金碧如可拾。迎晨含素华，独往事朝汲。

卷_28【辋川集二十首·白石滩】

裴迪

跂石复临水，弄波情未极。日下川上寒，浮云澹无色。

· 全唐诗 ·

卷_29【辋川集二十首·北垞】

裴迪

南山北垞下，结宇临欽湖。每欲采樵去，扁舟出菰蒲。

卷_30【辋川集二十首·竹里馆】

裴迪

来过竹里馆，日与道相亲。出入唯山鸟，幽深无世人。

卷_31【辋川集二十首·辛夷坞】

裴迪

绿堤春草合，王孙自留玩。况有辛夷花，色与芙蓉乱。

卷_32【辋川集二十首·漆园】

裴迪

好闲早成性，果此谐宿诺。今日漆园游，还同庄叟乐。

· 全唐诗 ·

卷_33【辋川集二十首·椒园】

裴迪

丹刺冒人衣，芳香留过客。幸堪调鼎用，愿君垂采摘。

卷_34【辋口遇雨忆终南山因献王维】

裴迪

积雨晦空曲，平沙灭浮彩。辋水去悠悠，南山复何在。

卷_35【崔九欲往南山马上口号与别（一作留别王维）】

裴迪

归山深浅去，须尽丘壑美。莫学武陵人，暂游桃源里。

卷_36【与卢员外象过崔处士兴宗林亭】

裴迪

乔柯门里自成阴，散发窗中曾不簪。

· 全唐诗 ·

逍遥且喜从吾事，荣宠从来非我心。

卷_37【西塔寺陆羽茶泉】

裴迪

竟陵西塔寺，踪迹尚空虚。不独支公住，曾经陆羽居。
草堂荒产蛤，茶井冷生鱼。一汲清冷水，高风味有馀。

卷_38【同王右丞送瑗公南归】

崔兴宗

行苦神亦秀，冷然谿上松。铜瓶与竹杖，来自祝融峰。
常愿入灵岳，藏经访遗踪。南归见长老，且为说心胸。

卷_39【青雀歌】

崔兴宗

青鳬绕青林，翩翩陋体一微禽。
不应常在藩篱下，他日凌云谁见心。

· 全唐诗 ·

卷_40【和王维敕赐百官樱桃】

崔兴宗

未央朝谒正逶迤，天上樱桃锡此时。朱实初传九华殿，
繁花旧杂万年枝。未胜晏子江南橘，莫比潘家大谷梨。
闻道令人好颜色，神农本草自应知。

卷_41【留别王维】

崔兴宗

驻马欲分襟，清寒御沟上。前山景气佳，独往还惆怅。

卷_42【酬王维卢象见过林亭】

崔兴宗

穷巷空林常闭关，悠然独卧对前山。
今朝忽枉嵇生驾，倒屣开门遥解颜。

卷_43【送大理正摄御史判凉州别驾】

苑咸

天子念西疆，咨君去不遑。垂银棘庭印，持斧柏台纲。

· 全唐诗 ·

雪下天山白，泉枯塞草黄。伫闻河陇外，还继海沂康。

卷_44【酬王维】

苑咸

莲花梵字本从天，华省仙郎早悟禅。三点成伊犹有想，
一观如幻自忘筌。为文已变当时体，入用还推间气贤。
应同罗汉无名欲，故作冯唐老岁年。

卷_45【寻西山隐者不遇（一作山行寻隐者不遇）】

丘为

绝顶一茅茨，直上三十里。扣关无僮仆，窥室唯案几。
若非巾柴车，应是钓秋水。差池不相见，黽勉空仰止。
草色新雨中，松声晚窗里。及兹契幽绝，自足荡心耳。
虽无宾主意，颇得清净理。兴尽方下山，何必待之子。

卷_46【题农父庐舍】

丘为

东风何时至，已绿湖上山。湖上春已早，田家日不闲。

· 全唐诗 ·

沟塍流水处，耒耜平芜间。薄暮饭牛罢，归来还闭关。

卷_47【泛若耶谿】

丘为

结庐若耶里，左右若耶水。无日不钓鱼，有时向城市。
溪中水流急，渡口水流宽。每得樵风便，往来殊不难。
一川草长绿，四时那得辨。短褐衣妻儿，馀粮及鸡犬。
日暮鸟雀稀，稚子呼牛归。住处无邻里，柴门独掩扉。

卷_48【湖中寄王侍御】

丘为

日日湖水上，好登湖上楼。终年不向郭，过午始梳头。
尝自爱杯酒，得无相献酬。小僮能脍鲤，少妾事莲舟。
每有南浦信，仍期后月游。方春转摇荡，孤兴时淹留。
骢马真傲吏，翛然无所求。晨趋玉阶下，心许沧江流。
少别如昨日，何言经数秋。应知方外事，独往非悠悠。

卷_49【登润州城】

丘为

天末江城晚，登临客望迷。春潮平岛屿，残雨隔虹蜺。
鸟与孤帆远，烟和独树低。乡山何处是，目断广陵西。

· 全唐诗 ·

卷_50【寻庐山崔征君】

丘为

日高鸡犬静，门掩向寒塘。夜竹深茅宇，秋亭冷石床。
住山年已远，服药寿偏长。虚弃浮生者，相逢益自伤。

卷_51【留别王维（一作王维留别丘为诗）】

丘为

归鞍白云外，缭绕出前山。今日又明日，自知心不闲。
亲劳簪组送，欲趁莺花还。一步一回首，迟迟向近关。

卷_52【竹下残雪】

丘为

一点消未尽，孤月在竹阴。晴光夜转莹，寒气晓仍深。
还对读书牖，且关乘兴心。已能依此地，终不傍瑶琴。

卷_53【送阎校书之越】

丘为

南入剡中路，草云应转微。湖边好花照，山口细泉飞。

· 全唐诗 ·

此地饶古迹，世人多忘归。经年松雪在，永日世情稀。
芸阁应相望，芳时不可违。

卷_54【省试夏日可畏（一作张籍诗）】

丘为

赫赫温风扇，炎炎夏日徂。火威驰迥野，畏景烁遥途。
势矫翔阳翰，功分造化炉。禁城千品烛，黄道一轮孤。
落照频空簟，馀晖卷夕梧。如何倦游子，中路独踟蹰。

卷_55【左掖梨花（同王维、皇甫冉赋）】

丘为

冷艳全欺雪，馀香乍入衣。春风且莫定，吹向玉阶飞。

卷_56【渡汉江（一作戴叔伦诗，题作江行）】

丘为

漾舟汉江上，挂席候风生。临泛何容与，爱此江水清。
芦洲隐遥嶂，露日映孤城。自顾疏野性，难忘鸥鸟情。
聊复与时顾，暂欲解尘缨。跋涉非吾愿，虚怀浩已盈。

· 全唐诗 ·

卷_57【冬至下寄舍弟时应赴入京（杂言）】

丘为

去去知未远，依依甚初别。他乡至下心，昨夜阶前雪。
终日读书仍少孤，家贫兄弟未当途。适远才过宿舂料，
相随惟一平头奴。男儿出门事四海，立身世业文章在。
莫漫忆柴扉，驷马高车朝紫微。江南驿使不曾断，
迎前为尔非春衣。

卷_58【送晁补阙归日本国】

赵骅

西掖承休浣，东隅返故林。来称郗子学，归是越人吟。
马上秋郊远，舟中曙海阴。知君怀魏阙，万里独摇心。

· 全唐诗 ·

第一百三十卷

卷_1【古游侠呈军中诸将（一作游侠篇）】

崔颢

少年负胆气，好勇复知机。仗剑出门去，孤城逢合围。
杀人辽水上，走马渔阳归。错落金锁甲，蒙茸貂鼠衣。
还家行且猎，弓矢速如飞。地迥鹰犬疾，草深狐兔肥。
腰间带两绶，转盼生光辉。顾谓今日战，何如随建威。

卷_2【赠轻车】

崔颢

悠悠远行归，经春涉长道。幽冀桑始青，洛阳蚕欲老。
忆昨戎马地，别时心草草。烽火从北来，边城闭常早。
平生少相遇，未得展怀抱。今日杯酒间，见君交情好。

卷_3【赠王威古】

崔颢

三十羽林将，出身常事边。春风吹浅草，猎骑何翩翩。

· 全唐诗 ·

插羽两相顾，鸣弓新上弦。射麋入深谷，饮马投荒泉。
马上共倾酒，野中聊割鲜。相看未及饮，杂虏寇幽燕。
烽火去不息，胡尘高际天。长驱救东北，战解城亦全。
报国行赴难，古来皆共然。

卷_4【赠怀一上人】

崔颢

法师东南秀，世实豪家子。削发十二年，诵经峨眉里。
自此照群蒙，卓然为道雄。观生尽入妄，悟有皆成空。
净体无众染，苦心归妙宗。一朝敕书至，召入承明宫。
说法金殿里，焚香清禁中。传灯遍都邑，杖锡游王公。
天子揖妙道，群僚趋下风。我法本无著，时来出林壑。
因心得化城，随病皆与药。上启黄屋心，下除苍生缚。
一从入君门，说法无朝昏。帝作转轮王，师为持戒尊。
轩风洒甘露，佛雨生慈根。但有灭度理，而生开济恩。
复闻江海曲，好杀成风俗。帝曰我上人，为除膻腥欲。
是日发西秦，东南至蕲春。风将衡桂接，地与吴楚邻。
旧少清信士，实多渔猎人。一闻吾师至，舍网江湖滨。
作礼忏前恶，洁诚期后因。因成日既久，事济身不守。
更出淮楚间，复来荆河口。荆河马卿岑，兹地近道林。
入讲鸟常狎，坐禅兽不侵。都非缘未尽，曾是教所任。
故我一来事，永承微妙音。竹房见衣钵，松宇清身心。
早悔业至浅，晚成计可寻。善哉远公义，清净如黄金。

· 全唐诗 ·

卷_5【游天竺寺】

崔颢

晨登天竺山，山殿朝阳晓。厓泉争喷薄，江岫相萦绕。
直上孤顶高，平看众峰小。南州十二月，地暖冰雪少。
青翠满寒山，藤萝覆冬沼。花龛瀑布侧，青壁石林杪。
鸣钟集人天，施饭聚猿鸟。洗意归清净，澄心悟空了。
始知世上人，万物一何扰。

卷_6【入若耶溪】

崔颢

轻舟去何疾，已到云林境。起坐鱼鸟间，动摇山水影。
岩中响自答，溪里言弥静。事事令人幽，停桡向馀景。

卷_7【杂诗】

崔颢

可怜青铜镜，挂在白玉堂。玉堂有美女，娇弄明月光。
罗袖拂金鹊，彩屏点红妆。妆罢含情坐，春风桃李香。

· 全唐诗 ·

卷_8【结定襄郡狱效陶体】

崔颢

我在河东时，使往定襄里。定襄诸小儿，争讼纷城市。
长老莫敢言，太守不能理。谤书盈几案，文墨相填委。
牵引肆中翁，追呼田家子。我来折此狱，五听辨疑似。
小大必以情，未尝施鞭箠。是时三月暮，遍野农桑起。
里巷鸣春鸠，田园引流水。此乡多杂俗，戎夏殊音旨。
顾问边塞人，劳情曷云已。

卷_9【长安道（一作霍将军）】

崔颢

长安甲第高入云，谁家居住霍将军。日晚朝回拥宾从，
路傍揖拜何纷纷。莫言炙手手可热，须臾火尽灰亦灭。
莫言贫贱即可欺，人生富贵自有时。一朝天子赐颜色，
世上悠悠应始知。

卷_10【行路难】

崔颢

君不见建章宫中金明枝，万万长条拂地垂。

· 全唐诗 ·

二月三月花如霰，九重幽深君不见。艳彩朝含四宝宫，
香风旦入朝云殿。汉家宫女春未阑，爱此芳香朝暮看。
看来看去心不忘，攀折将安镜台上。双双素手剪不成，
两两红妆笑相向。建章昨夜起春风，一花飞落长信宫。
长信丽人见花泣，忆此珍树何嗟及。我昔初在昭阳时，
朝攀暮折登玉墀。只言岁岁长相对，不悟今朝遥相思。

卷_11【孟门行】

崔颢

黄雀衔黄花，翩翩傍檐隙。本拟报君恩，如何反弹射。
金罍美酒满座春，平原爱才多众宾。满堂尽是忠义士，
何意得有谗谀人。谗言反覆那可道，能令君心不自保。
北园新栽桃李枝，根株未固何转移。成阴结实君自取，
若问傍人那得知。

卷_12【渭城少年行】

崔颢

洛阳三月梨花飞，秦地行人春忆归。扬鞭走马城南陌，
朝逢驿使秦川客。驿使前日发章台，传道长安春早来。
棠梨宫中燕初至，葡萄馆里花正开。念此使人归更早，
三月便达长安道。长安道上春可怜，摇风荡日曲江边。

· 全唐诗 ·

万户楼台临渭水，五陵花柳满秦川。秦川寒食盛繁华，
游子春来不见家。斗鸡下杜尘初合，走马章台日半斜。
章台帝城称贵里，青楼日晚歌钟起。贵里豪家白马骄，
五陵年少不相饶。双双挟弹来金市，两两鸣鞭上渭桥。
渭城桥头酒新熟，金鞍白马谁家宿。可怜锦瑟箏琵琶，
玉壶清酒就倡家。小妇春来不解羞，娇歌一曲杨柳花。

卷_13【卢姬篇】

崔颢

卢姬少小魏王家，绿鬓红唇桃李花。魏王绮楼十二重，
水晶帘箔绣芙蓉。白玉栏干金作柱，楼上朝朝学歌舞。
前堂后堂罗袖人，南窗北窗花发春。翠幌珠帘斗丝管，
一弹一奏云欲断。君王日晚下朝归，鸣环佩玉生光辉。
人生今日得娇贵，谁道卢姬身细微。

卷_14【江畔老人愁】

崔颢

江南年少十八九，乘舟欲渡青溪口。青溪口边一老翁，
鬓眉皓白已衰朽。自言家代仕梁陈，垂朱拖紫三十人。
两朝出将复入相，五世叠鼓乘朱轮。父兄三叶皆尚主，
子女四代为妃嫔。南山赐田接御苑，北宫甲第连紫宸。

· 全唐诗 ·

直言荣华未休歇，不觉山崩海将竭。兵戈乱入建康城，
烟火连烧未央阙。衣冠士子陷锋刃，良将名臣尽埋没。
山川改易失市朝，衢路纵横填白骨。老人此时尚少年，
脱身走得投海边。罢兵岁馀未敢出，去乡三载方来旋。
蓬蒿忘却五城宅，草木不识青谿田。虽然得归到乡土，
零丁贫贱长辛苦。采樵屡入历阳山，刈稻常过新林浦。
少年欲知老人岁，岂知今年一百五。君今少壮我已衰，
我昔少年君不睹。人生贵贱各有时，莫见羸老相轻欺。
感君相问为君说，说罢不觉令人悲。

卷_15【邯郸宫人怨】

崔颢

邯郸陌上三月春，暮行逢见一妇人。自言乡里本燕赵，
少小随家西入秦。母兄怜爱无俦侣，五岁名为阿娇女。
七岁丰茸好颜色，八岁黠惠能言语。十三兄弟教诗书，
十五青楼学歌舞。我家青楼临道傍，纱窗绮幔暗闻香。
日暮笙歌君驻马，春日妆梳妾断肠。不用城南使君婿，
本求三十侍中郎。何知汉帝好容色，玉辇携登归建章。
建章宫殿不知数，万户千门深且长。百堵涂椒接青琐，
九华阁道连洞房。水晶帘箔云母扇，琉璃窗牖玳瑁床。
岁岁年年奉欢宴，娇贵荣华谁不羨。恩情莫比陈皇后，
宠爱全胜赵飞燕。瑶房侍寝世莫知，金屋更衣人不见。
谁言一朝复一日，君王弃世市朝变。宫车出葬茂陵田，
贱妾独留长信殿。一朝太子升至尊，宫中人事如掌翻。

· 全唐诗 ·

同时侍女见谗毁，后来新人莫敢言。兄弟印绶皆被夺，
昔年赏赐不复存。一旦放归旧乡里，乘车垂泪还入门。
父母愍我曾富贵，嫁与西舍金王孙。念此翻覆复何道，
百年盛衰谁能保。忆昨尚如春日花，悲今已作秋时草。
少年去去莫停鞭，人生万事由上天。非我今日独如此，
古今歇薄皆共然。

卷_16【川上女】

崔颢

川上女，晚妆鲜，日落青渚试轻楫。汀长花满正回船，
暮来浪起风转紧。自言此去横塘近，绿江无伴夜独行，
独行心绪愁无尽。

卷_17【雁门胡人歌】

崔颢

高山代郡东接燕，雁门胡人家近边。解放胡鹰逐塞鸟，
能将代马猎秋田。山头野火寒多烧，雨里孤峰湿作烟。
闻道辽西无斗战，时时醉向酒家眠。

卷_18【代闺人答轻薄少年】

崔颢

妾家近隔凤凰池，粉壁纱窗杨柳垂。本期汉代金吾婿，

· 全唐诗 ·

误嫁长安游侠儿。儿家夫婿多轻薄，借客探丸重然诺。
平明挟弹入新丰，日晚挥鞭出长乐。青丝白马冶游园，
能使行人驻马看。自矜陌上繁华盛，不念闺中花鸟阑。
花间陌上春将晚，走马斗鸡犹未返。三时出望无消息，
一去那知行近远。桃李花开覆井栏，朱楼落日卷帘看。
愁来欲奏相思曲，抱得秦筝不忍弹。

卷_19【七夕】

崔颢

长安城中月如练，家家此夜持针线。仙裙玉佩空自知，
天上人间不相见。长信深阴夜转幽，瑶阶金阁数萤流。
班姬此夕愁无限，河汉三更看斗牛。

卷_20【长门怨】

崔颢

君王宠初歇，弃妾长门宫。紫殿青苔满，高楼明月空。
夜愁生枕席，春意罢帘栊。泣尽无人问，容华落镜中。

卷_21【王家少妇（一作古意）】

崔颢

十五嫁王昌，盈盈入画堂。自矜年最少，复倚婿为郎。

· 全唐诗 ·

舞爱前谿绿，歌怜子夜长。闲来斗百草，度日不成妆。

卷_22【岐王席观妓（一作卢女曲）】

崔颢

二月春来半，宫中日渐长。柳垂金屋暖，花发玉楼香。
拂匣先临镜，调笙更炙簧。还将歌舞态，只拟奉君王。

卷_23【上巳】

崔颢

巳日帝城春，倾都祓禊晨。停车须傍水，奏乐要惊尘。
弱柳障行骑，浮桥拥看人。犹言日尚早，更向九龙津。

卷_24【赠梁州张都督】

崔颢

闻君为汉将，虏骑罢南侵。出塞清沙漠，还家拜羽林。
风霜臣节苦，岁月主恩深。为语西河使，知余报国心。

· 全唐诗 ·

卷_25【赠卢八象】

崔颢

客从巴水渡，传尔溯行舟。是日风波霁，高堂雨半收。
青山满蜀道，绿水向荆州。不作书相问，谁能慰别愁。

卷_26【题潼关楼】

崔颢

客行逢雨霁，歇马上津楼。山势雄三辅，关门扼九州。
川从陕路去，河绕华阴流。向晚登临处，风烟万里愁。

卷_27【题沈隐侯八咏楼】

崔颢

梁日东阳守，为楼望越中。绿窗明月在，青史古人空。
江静闻山狖，川长数塞鸿。登临白云晚，流恨此遗风。

· 全唐诗 ·

卷_28【晚入汴水】

崔颢

昨晚南行楚，今朝北溯河。客愁能几日，乡路渐无多。
晴景摇津树，春风起棹歌。长淮亦已尽，宁复畏潮波。

卷_29【发锦沙村】

崔颢

北上途未半，南行岁已阑。孤舟下建德，江水入新安。
海近山常雨，谿深地早寒。行行泊不可，须及子陵滩。

卷_30【送单于裴都护赴西河】

崔颢

征马去翩翩，城秋月正圆。单于莫近塞，都护欲临边。
汉驿通烟火，胡沙乏井泉。功成须献捷，未必去经年。

· 全唐诗 ·

卷_31【黄鹤楼】

崔颢

昔人已乘白云去，此地空馀黄鹤楼。黄鹤一去不复返，
白云千载空悠悠。晴川历历汉阳树，春草萋萋鹦鹉洲。
日暮乡关何处是，烟波江上使人愁。

卷_32【行经华阴】

崔颢

岧峣太华俯咸京，天外三峰削不成。武帝祠前云欲散，
仙人掌上雨初晴。河山北枕秦关险，驿树西连汉畤平。
借问路傍名利客，无如此处学长生。

卷_33【相逢行】

崔颢

妾年初二八，家住洛桥头。玉户临驰道，朱门近御沟。
使君何假问，夫婿大长秋。女弟新承宠，诸兄近拜侯。
春生百子殿，花发五城楼。出入千门里，年年乐未休。

· 全唐诗 ·

卷_34【辽西作（一作关西行）】

崔颢

燕郊芳岁晚，残雪冻边城。四月青草合，辽阳春水生。
胡人正牧马，汉将日征兵。露重宝刀湿，沙虚金鼓鸣。
寒衣著已尽，春服与谁成。寄语洛阳使，为传边塞情。

卷_35【奉和许给事夜直简诸公】

崔颢

西掖黄枢近，东曹紫禁连。地因才子拜，人用省郎迁。
夜直千门静，河明万象悬。建章宵漏急，阊阖晓钟传。
宠列貂蝉位，恩深侍从年。九重初起草，五夜即成篇。
顾己无官次，循涯但自怜。远陪兰署作，空此仰神仙。

卷_36【舟行入剡】

崔颢

鸣棹下东阳，回舟入剡乡。青山行不尽，绿水去何长。
地气秋仍湿，江风晚渐凉。山梅犹作雨，谿橘未知霜。
谢客文逾盛，林公未可忘。多惭越中好，流恨阅时芳。

· 全唐诗 ·

卷_37【澄水如鉴】

崔颢

圣贤将立喻，上善贮情深。洁白依全德，澄清有片心。
浇浮知不挠，滥浊固难侵。方寸悬高鉴，生涯讷陆沉。
对泉能自诫，如镜静相临。廉慎传家政，流芳合古今。

卷_38【长干曲四首（一作江南曲）】

崔颢

君家何处住，妾住在横塘。停船暂借问，或恐是同乡。
家临九江水，来去九江侧。同是长干人，自小不相识。
下渚多风浪，莲舟渐觉稀。那能不相待，独自逆潮归。
三江潮水急，五湖风浪涌。由来花性轻，莫畏莲舟重。

卷_39【维扬送友还苏州】

崔颢

长安南下几程途，得到邗沟吊绿芜。

· 全唐诗 ·

渚畔鲈鱼舟上钓，羡君归老向东吴。

· 全唐诗 ·

第一百三十一卷

卷_1【古意二首】

祖咏

夫差日淫放，举国求妃嫔。自谓得王宠，代间无美人。
碧罗象天阁，坐辇乘芳春。宫女数千骑，常游江水滨。
年深玉颜老，时薄花妆新。拭泪下金殿，娇多不顾身。
生前妒歌舞，死后同灰尘。冢墓令人哀，哀于铜雀台。

楚王竟何去，独自留巫山。偏使世人见，迢迢江汉间。
驻舟春谿里，誓愿拜灵颜。梦寐睹神女，金沙鸣珮环。
闲艳绝世姿，令人气力微。含笑默不语，化作朝云飞。

卷_2【渡淮河寄平一】

祖咏

天色混波涛，岸阴匝村墅。微微汉祖庙，隐隐江陵渚。
云树森已重，时明郁相拒。

· 全唐诗 ·

卷_3【归汝坟山庄留别卢象】

祖咏

淹留岁将晏，久废南山期。旧业不见弃，还山从此辞。
沔麻入南涧，刈麦向东菑。对酒鸡黍熟，闭门风雪时。
非君一延首，谁慰遥相思。

卷_4【夕次圃田店】

祖咏

前路入郑郊，尚经百馀里。马烦时欲歇，客归程未已。
落日桑柘阴，遥村烟火起。西还不遑宿，中夜渡泾水。

卷_5【田家即事】

祖咏

旧居东皋上，左右俯荒村。樵路前傍岭，田家遥对门。
欢娱始披拂，惬意在郊原。馀霁荡川雾，新秋仍昼昏。
攀条憩林麓，引水开泉源。稼穡岂云倦，桑麻今正繁。
方求静者赏，偶与潜夫论。鸡黍何必具，吾心知道尊。

· 全唐诗 ·

卷_6【扈从御宿池】

祖咏

君王既巡狩，辇道入秦京。远树低枪垒，孤峰入幔城。
寒疏清禁漏，夜警羽林兵。谁念迷方客，长怀魏阙情。

卷_7【赠苗发员外（一作李端诗）】

祖咏

宿雨朝来歇，空山天气清。盘云双鹤下，隔水一蝉鸣。
古道黄花落，平芜赤烧生。茂陵虽有病，犹得伴君行。

卷_8【答王维留宿】

祖咏

四年不相见，相见复何为。握手言未毕，却令伤别离。
升堂还驻马，酌醴便呼儿。语嘿自相对，安用傍人知。

· 全唐诗 ·

卷_9【长乐驿留别卢象裴总】

祖咏

朝来已握手，宿别更伤心。灞水行人渡，商山驿路深。
故情君且足，谪宦我难任。直道皆如此，谁能泪满襟。

卷_10【送刘高邮悦使入都】

祖咏

常闻积归思，昨夜又兼秋。乡路京华远，王程江水流。
吴歌喧两岸，楚客醉孤舟。渐觉潮初上，凄然多暮愁。

卷_11【宴吴王宅】

祖咏

吴王承国宠，列第禁城东。连夜征词客，当春试舞童。
砌分池水岸，窗度竹林风。更待西园月，金尊乐未终。

· 全唐诗 ·

卷_12【观华岳】

祖咏

西入秦关口，南瞻驿路连。彩云生阙下，松树到祠边。
作镇当官道，雄都俯大川。莲峰径上处，仿佛有神仙。

卷_13【泗上冯使君南楼作】

祖咏

井邑连淮泗，南楼向晚过。望滩沙鹭起，寻岸浴童歌。
近海云偏出，兼秋雨更多。明晨拟回棹，乡思恨风波。

卷_14【苏氏别业】

祖咏

别业居幽处，到来生隐心。南山当户牖，沔水映园林。
屋覆经冬雪，庭昏未夕阴。寥寥人境外，闲坐听春禽。

· 全唐诗 ·

卷_15【汝坟别业】

祖咏

失路农为业，移家到汝坟。独愁常废卷，多病久离群。
鸟雀垂窗柳，虹霓出涧云。山中无外事，樵唱有时闻。

卷_16【陆浑水亭】

祖咏

昼眺伊川曲，岩间霁色明。浅沙平有路，流水漫无声。
浴鸟沿波聚，潜鱼触钓惊。更怜春岸绿，幽意满前楹。

卷_17【过郑曲】

祖咏

路向荣川谷，晴来望尽通。细烟生水上，圆月在舟中。
岸势迷行客，秋声乱草虫。旅怀劳自慰，淅淅有凉风。

· 全唐诗 ·

卷_18【宿陈留李少府揆厅】

祖咏

相知有叔卿，讼简夜弥清。旅泊倦愁卧，堂空闻曙更。
风帘摇烛影，秋雨带虫声。归思那堪说，悠悠限洛城。

卷_19【题韩少府水亭】

祖咏

梅福幽栖处，佳期不忘还。鸟吟当户竹，花绕傍池山。
水气侵阶冷，松阴覆座闲。宁知武陵趣，宛在市朝间。

卷_20【题远公经台】

祖咏

兰若无人到，真僧出复稀。苔侵行道席，云湿坐禅衣。
涧鼠缘香案，山蝉噪竹扉。世间长不见，宁止暂忘归。

· 全唐诗 ·

卷_21【中峰居喜见苗发（一作李端诗）】

祖咏

自得中峰住，深林亦闭关。经秋无客到，入夜有僧还。
暗涧泉声小，荒冈树影闲。高窗不可望，星月满空山。

卷_22【江南旅情】

祖咏

楚山不可极，归路但萧条。海色晴看雨，江声夜听潮。
剑留南斗近，书寄北风遥。为报空潭橘，无媒寄洛桥。

卷_23【泊扬子津】

祖咏

才入维扬郡，乡关此路遥。林藏初过雨，风退欲归潮。
江火明沙岸，云帆碍浦桥。客衣今日薄，寒气近来饶。

· 全唐诗 ·

卷_24【晚泊金陵水亭】

祖咏

江亭当废国，秋景倍萧骚。夕照明残垒，寒潮涨古濠。
就田看鹤大，隔水见僧高。无限前朝事，醒吟易觉劳。

卷_25【七夕】

祖咏

闺女求天女，更阑意未阑。玉庭开粉席，罗袖捧金盘。
向月穿针易，临风整线难。不知谁得巧，明旦试相看。

卷_26【望蓟门】

祖咏

燕台一望客心惊，箫鼓喧喧汉将营。万里寒光生积雪，
三边曙色动危旌。沙场烽火连胡月，海畔云山拥蓟城。
少小虽非投笔吏，论功还欲请长缨。

· 全唐诗 ·

卷_27【家园夜坐寄郭微】

祖咏

前阶微雨歇，开户散窥林。月出夜方浅，水凉池更深。
馀风生竹树，清露薄衣襟。遇物遂遥叹，怀人滋远心。
依稀成梦想，影响绝徽音。谁念穷居者，明时嗟陆沉。

卷_28【酬汴州李别驾赠】

祖咏

秋风多客思，行旅厌艰辛。自洛非才子，游梁得主人。
文章参末议，荣贱岂同伦。叹逝逢三演，怀贤忆四真。
情因恩旧好，契托死生亲。所愧能投赠，清言益润身。

卷_29【清明宴司勋刘郎中别业】

祖咏

田家复近臣，行乐不违亲。霁日园林好，清明烟火新。
以文长会友，唯德自成邻。池照窗阴晚，杯香药味春。
檐前花覆地，竹外鸟窥人。何必桃源里，深居作隐沦。

· 全唐诗 ·

卷_30【汝坟秋同仙州王长史翰闻百舌鸟】

祖咏

秋天闻好鸟，惊起出帘帷。却念殊方月，能鸣已后时。
迁乔诚可早，出谷此何迟。顾影惭无对，怀群空所思。
凄凉岁欲晚，萧索燕将辞。留听未终曲，弥令心独悲。
高飞凭力致，巧啭任天姿。返覆知而静，间关断若遗。
花繁上林路，霜落汝川湄。且长凌风翮，乘春自有期。

卷_31【送丘为下第】

祖咏

沧江一身客，献赋空十年。明主岂能好，今人谁举贤。
国门税征驾，旅食谋归旋。曷日媚春水，绿蘋香客船。
无媒既不达，予亦思归田。

卷_32【赠苗发员外】

祖咏

朱户敞高扉，青槐碍落晖。八龙乘庆重，三虎递朝归。
坐竹人声绝，横琴鸟语稀。花惭潘岳貌，年称老莱衣。

· 全唐诗 ·

叶暗朱樱熟，丝长粉蝶飞。应怜鲁儒贱，空与故山违。

卷_33【寄王长史】

祖咏

汝颖俱宿好，往来托层峦。终日何寂寞，绕篱生蕙兰。

卷_34【别怨】

祖咏

送别到中流，秋船倚渡头。相看尚不远，未可即回舟。

卷_35【终南望馀雪】

祖咏

终南阴岭秀，积雪浮云端。林表明霁色，城中增暮寒。

· 全唐诗 ·

卷_36【句】

祖咏

不知叠嶂夜来雨，清晓石楠花乱流。

· 全唐诗 ·

第一百三十二卷

卷_1【湘夫人】

李颀

九疑日已暮，三湘云复愁。窅霭罗袂色，潺湲江水流。
佳期来北渚，捐佩在芳洲。

卷_2【塞下曲】

李颀

黄云雁门郡，日暮风沙里。千骑黑貂裘，皆称羽林子。
金笳吹朔雪，铁马嘶云水。帐下饮蒲萄，平生寸心是。

卷_3【古塞下曲】

李颀

行人朝走马，直指蓟城傍。蓟城通漠北，万里别吾乡。

· 全唐诗 ·

海上千烽火，沙中百战场。军书发上郡，春色度河阳。
袅袅汉宫柳，青青胡地桑。琵琶出塞曲，横笛断君肠。

卷_4【渔父歌】

李颀

白首何老人，蓑笠蔽其身。避世长不仕，钓鱼清江滨。
浦沙明濯足，山月静垂纶。寓宿湍与濑，行歌秋复春。
持竿湘岸竹，爇火芦洲薪。绿水饭香稻，青荷包紫鳞。
于中还自乐，所欲全吾真。而笑独醒者，临流多苦辛。

卷_5【东京寄万楚】

李颀

濩落久无用，隐身甘采薇。仍闻薄宦者，还事田家衣。
颍水日夜流，故人相见稀。春山不可望，黄鸟东南飞。
濯足岂长往，一樽聊可依。了然潭上月，适我胸中机。
在昔同门友，如今出处非。优游白虎殿，偃息青琐闱。
且有荐君表，当看携手归。寄书不待面，兰茝空芳菲。

· 全唐诗 ·

卷_6【寄焦炼师】

李颀

得道凡百岁，烧丹惟一身。悠悠孤峰顶，日见三花春。
白鹤翠微里，黄精幽涧滨。始知世上客，不及山中人。
仙境若在梦，朝云如可亲。何由睹颜色，挥手谢风尘。

卷_7【望鸣皋山白云寄洛阳卢主簿】

李颀

饮马伊水中，白云鸣皋上。氛氲山绝顶，行子时一望。
照日龙虎姿，攒空冰雪状。嵒嵒殊未已，崿崿忽相向。
皎皎横绿林，霏霏澹青嶂。远映村更失，孤高鹤来傍。
胜气欣有逢，仙游且难访。故人吏京剧，每事多闲放。
室画峨眉峰，心格洞庭浪。惜哉清兴里，不见予所尚。

卷_8【寄万齐融】

李颀

名高不择仕，委世随虚舟。小邑常叹屈，故乡行可游。
青枫半村户，香稻盈田畴。为政日清静，何人同海鸥。

· 全唐诗 ·

摇巾北林夕，把菊东山秋。对酒池云满，向家湖水流。
岸阴止鸣鹄，山色映潜虬。靡靡俗中理，萧萧川上幽。
昔年至吴郡，常隐临江楼。我有一书札，因之芳杜洲。

卷_9【赠张旭】

李颀

张公性嗜酒，豁达无所营。皓首穷草隶，时称太湖精。
露顶据胡床，长叫三五声。兴来洒素壁，挥笔如流星。
下舍风萧条，寒草满户庭。问家何所有，生事如浮萍。
左手持蟹螯，右手执丹经。瞪目视霄汉，不知醉与醒。
诸宾且方坐，旭日临东城。荷叶裹江鱼，白瓯贮香粳。
微禄心不屑，放神于八纮。时人不识者，即是安期生。

卷_10【赠苏明府】

李颀

苏君年几许，状貌如玉童。采药傍梁宋，共言随日翁。
常辞小县宰，一往东山东。不复有家室，悠悠人世中。
子孙皆老死，相识悲转蓬。发白还更黑，身轻行若风。
泛然无所系，心与孤云同。出入虽一杖，安然知始终。
愿闻素女事，去采山花丛。诱我为弟子，逍遥寻葛洪。

· 全唐诗 ·

卷_11【登首阳山谒夷齐庙】

李颀

古人已不见，乔木竟谁过。寂寞首阳山，白云空复多。
苍苔归地骨，皓首采薇歌。毕命无怨色，成仁其若何。
我来入遗庙，时候微清和。落日吊山鬼，回风吹女萝。
石崖向西豁，引领望黄河。千里一飞鸟，孤光东逝波。
驱车层城路，惆怅此岩阿。

卷_12【谒张果先生】

李颀

先生谷神者，甲子焉能计。自说轩辕师，于今几千岁。
寓游城郭里，浪迹希夷际。应物云无心，逢时舟不系。
餐霞断火粒，野服兼荷制。白雪净肌肤，青松养身世。
韬精殊豹隐，炼骨同蝉蜕。忽去不知谁，偶来宁有契。
二仪齐寿考，六合随休憩。彭聃犹婴孩，松期且微细。
尝闻穆天子，更忆汉皇帝。亲屈万乘尊，将穷四海裔。
车徒遍草木，锦帛招谈说。八骏空往还，三山转亏蔽。
吾君感至德，玄老欣来诣。受篆金殿开，清斋玉堂闭。
笙歌迎拜首，羽帐崇严卫。禁柳垂香炉，宫花拂仙袂。
祈年宝祚广，致福苍生惠。何必待龙髯，鼎成方取济。

· 全唐诗 ·

卷_13【光上座廊下众山五韵】

李颀

名岳在庑下，吾师居一床。每闻楞伽经，只对清翠光。
百谷聚雪色，莓苔侵屋梁。气盘古壁转，势引幽阶长。
愿游薜叶下，日见金炉香。

卷_14【九月九日刘十八东堂集】

李颀

风俗尚九日，此情安可忘。菊花辟恶酒，汤饼茱萸香。
云入授衣假，风吹闲宇凉。主人尽欢意，林景昼微茫。
清切晚砧动，东西归鸟行。淹留怅为别，日醉秋云光。

卷_15【宋少府东溪泛舟】

李颀

登岸还入舟，水禽惊笑语。晚叶低众色，湿云带残暑。
落日乘醉归，溪流复几许。

· 全唐诗 ·

卷_16【与诸公游济渎泛舟】

李颀

济水出王屋，其源来不穷。洑泉数眼沸，平地流清通。
皇帝崇祀典，诏书视三公。分官祷灵庙，奠璧沉河宫。
神应每如答，松篁气葱茏。苍螭送飞雨，赤鲤喷回风。
洒洒布瑶席，吹箫下玉童。玄冥掌阴事，祝史告年丰。
百谷趋潭底，三光悬镜中。浅深露沙石，蘋藻生虚空。
晚景临泛美，亭皋轻霭红。晴山傍舟楫，白鹭惊丝桐。
我本家颍北，开门见维嵩。焉知松峰外，又有天坛东。
左手正接_离，浩歌眄青穹。夷犹傲清吏，偃仰狎渔翁。
对此川上闲，非君谁与同。霜凝远村渚，月净蒹葭丛。
兹境信难遇，为欢殊未终。淹留怅言别，烟屿夕微濛。

卷_9【送綦毋三谒房给事】

李颀

夫子大名下，家无钟石储。惜哉湖海上，曾校蓬莱书。
外物非本意，此生空澹如。所思但乘兴，远适唯单车。
高道时坎坷，故交愿吹嘘。徒言青琐闼，不爱承明庐。
百里人户满，片言争讼疏。手持莲花经，目送飞鸟馀。
晚景南路别，炎云中伏初。此行傥不遂，归食芦洲鱼。

· 全唐诗 ·

卷_10【送刘四】

李颀

爱君少岐嶷，高视白云乡。九岁能属文，谒帝游明光。
奉诏赤墀下，拜为童子郎。尔来屡迁易，三度尉洛阳。
洛阳十二门，官寺郁相望。青槐罗四面，绿水贯中央。
听讼破秋毫，应物利干将。辞满如脱屣，立言无否臧。
岁暮风雪暗，秦中川路长。行人饮腊酒，立马带晨霜。
生事岂须问，故园寒草荒。从今署右职，莫笑在农桑。

卷_11【送裴腾】

李颀

养德为众许，森然此丈夫。放情白云外，爽气连虬须。
衡镜合知子，公心谁谓无。还令不得意，单马遂长驱。
桑野蚕忙时，怜君久踟蹰。新晴荷卷叶，孟夏雉将雏。
令弟为县尹，高城汾水隅。相将簿领闲，倚望恒峰孤。
香露团百草，紫梨分万株。归来授衣假，莫使故园芜。

卷_12【送司农崔丞】

李颀

黄鹂鸣官寺，香草色未已。同时皆省郎，而我独留此。

· 全唐诗 ·

维监太仓粟，常对府小史。清阴罗广庭，政事如流水。
奉使往长安，今承朝野欢。宰臣应记识，明主必迁官。
塞外貔将虎，池中鸳与鸾。词人洞箫赋，公子鹄鹕冠。
邑里春方晚，昆明花欲阑。行行取高位，当使路傍看。

卷_13【送崔侍御赴京】

李颀

绿槐荫长路，骏马垂青丝。柱史谒承明，翩翩将有期。
千官大朝日，奏事临赤墀。肃肃仪仗里，风生鹰隼姿。
一从登甲科，三拜皆宪司。按俗又如此，为郎何太迟。
送君暮春月，花落城南陲。惜别醉芳草，前山劳梦思。

卷_14【春送从叔游襄阳】

李颀

言别恨非一，弃置我宗英。向用五经笥，今为千里行。
裹粮顾庭草，羸马诘朝鸣。斗酒对寒食，杂花宜晚晴。
春衣采洲路，夜饮南阳城。客梦岷山晓，渔歌江水清。
楚俗少相知，远游难称情。同人应馆谷，刺史在郊迎。
只合侍丹扆，翻令辞上京。时方春欲暮，叹息向流莺。

· 全唐诗 ·

卷_15【赠别高三十五】

李颀

五十无产业，心轻百万资。屠酤亦与群，不问君是谁。
饮酒或垂钓，狂歌兼咏诗。焉知汉高士，莫识越鸱夷。
寄迹栖霞山，蓬头睢水湄。忽然辟命下，众谓趋丹墀。
沐浴著赐衣，西来马行迟。能令相府重，且有函关期。
龟勉从寸禄，旧游梁宋时。皤皤邑中叟，相候鬓如丝。
官舍柳林静，河梁杏叶滋。摘芳云景晏，把手秋蝉悲。
小县情未惬，折腰君莫辞。吾观主人意，不久召京师。

卷_16【崔五宅送刘跛入京】

李颀

行人惜寸景，系马暂留欢。昨日辞小沛，何时到长安。
乡中饮酒礼，客里行路难。清洛云鸿度，故关风日寒。
维将道可乐，不念身无官。生事东山远，田园芳岁阑。
东归余谢病，西去子加餐。宋伯非徒尔，明时正可干。
躬耕守贫贱，失计在林端。宿昔奉颜色，惭无双玉盘。

· 全唐诗 ·

卷_17【送马录事赴永阳（一作嘉）】

李颀

子为郡从事，主印清淮边。谈笑一州里，从容群吏先。
手持三尺令，遣决如流泉。太守既相许，诸公谁不然。
孤城连海树，万室带山烟。春日溪湖净，芳洲葭莼连。
炊粳蟹螯熟，下箸鲈鱼鲜。野鹤宿檐际，楚云飞面前。
听歌送离曲，且驻木兰船。赠尔八行字，当闻佳政传。

卷_18【临别送张諲入蜀】

李颀

出门便为客，惘然悲徒御。四海维一身，茫茫欲何去。
经山复历水，百恨将千虑。剑阁望梁州，是君断肠处。
孤云伤客心，落日感君深。梦里蒹葭渚，天边橘柚林。
蜀江流不测，蜀路险难寻。木有相思号，猿多愁苦音。
莫向愚山隐，愚山地非近。故乡可归来，眼见芳菲尽。

卷_19【送王昌龄】

李颀

漕水东去远，送君多暮情。淹留野寺出，向背孤山明。

· 全唐诗 ·

前望数千里，中无蒲稗生。夕阳满舟楫，但爱微波清。
举酒林月上，解衣沙鸟鸣。夜来莲花界，梦里金陵城。
叹息此离别，悠悠江海行。

卷_20【留别王卢二拾遗】

李颀

此别不可道，此心当报谁。春风灞水上，饮马桃花时。
误作好文士，只令游宦迟。留书下朝客，我有故山期。

卷_21【赠别穆元林】

李颀

貳职久辞满，藏名三十年。丹墀策频献，白首官不迁。
明主日征士，吏曹何忽贤。空怀济世业，欲棹沧浪船。
举酒洛门外，送君春海边。彼乡有令弟，小邑试烹鲜。
转浦云壑媚，涉江花岛连。绿芳暗楚水，白鸟飞吴烟。
赠赆亦奚贵，流乱期早旋。金闺会通籍，生事岂徒然。

卷_22【不调归东川别业】

李颀

寸禄言可取，托身将见遗。惭无匹夫志，悔与名山辞。

· 全唐诗 ·

绂冕谢知己，林园多后时。葛巾方濯足，蔬食但垂帷。
十室对河岸，渔樵祇在兹。青郊香杜若，白水映茅茨。
昼景彻云树，夕阴澄古逵。渚花独开晚，田鹤静飞迟。
且复乐生事，前贤为我师。清歌聊鼓楫，永日望佳期。

卷_23【晚归东园】

李颀

出郭喜见山，东行亦未远。夕阳带归路，霭霭秋稼晚。
樵者乘霁归，野夫及星饭。请谢朱轮客，垂竿不复返。

卷_24【龙门西峰晓望刘十八不至】

李颀

春台临永路，跂足望行子。片片云触峰，离离鸟渡水。
丛林远山上，霁景杂花里。不见携手人，下山采绿芷。

卷_25【裴尹东溪别业】

李颀

公才廊庙器，官亚河南守。别墅临都门，惊湍激前后。

· 全唐诗 ·

旧交与群从，十日一携手。幅巾望寒山，长啸对高柳。
清欢信可尚，散吏亦何有。岸雪清城阴，水光远林首。
闲观野人筏，或饮川上酒。幽云澹徘徊，白鹭飞左右。
庭竹垂卧内，村烟隔南阜。始知物外情，簪绂同刍狗。

卷_26【无尽上人东林禅居】

李颀

草堂每多暇，时谒山僧门。所对但群木，终朝无一言。
我心爱流水，此地临清源。含吐山上日，蔽亏松外村。
孤峰隔身世，百衲老寒暄。禅户积朝雪，花龕来暮猿。
顾余守耕稼，十载隐田园。萝筱慰春汲，岩潭恣讨论。
泄云岂知限，至道莫探元。且愿启关锁，于焉微尚存。

卷_27【题綦毋校书别业】

李颀

常称挂冠吏，昨日归沧洲。行客暮帆远，主人庭树秋。
岂伊问天命，但欲为山游。万物我何有，白云空自幽。
萧条江海上，日夕见丹丘。生事非渔钓，赏心随去留。
惜哉旷微月，欲济无轻舟。倏忽令人老，相思河水流。

· 全唐诗 ·

卷_28【题卢道士房】

李颀

秋砧响落木，共坐茅君家。惟见两童子，林前汲井华。
空坛静白日，神鼎飞丹砂。麈尾拂霜草，金铃摇霏霞。
上章人世隔，看弈桐阴斜。稽首问仙要，黄精堪饵花。

卷_29【题神力师院】

李颀

大师神杰貌，五岳森禅房。坚持日月珠，豁见沧江长。
随病拔诸苦，致身如法王。阶庭药草遍，饭食天花香。
树色向高阁，昼阴横半墙。每闻第一义，心净琉璃光。

卷_30【题僧房双桐】

李颀

青桐双拂日，傍带凌霄花。绿叶传僧磬，清阴润井华。
谁能事音律，焦尾蔡邕家。

· 全唐诗 ·

卷_31【粲公院各赋一物得初荷】

李颀

微风和众草，大叶长圆阴。晴露珠共合，夕阳花映深。
从来不著水，清净本因心。

卷_32【李兵曹壁画山水各赋得桂水帆】

李颀

片帆浮桂水，落日天涯时。飞鸟看共度，闲云相与迟。
长波无晓夜，泛泛欲何之。

卷_33【题合欢】

李颀

开花复卷叶，艳眼又惊心。蝶绕西枝露，风披东干阴。
黄衫漂细蕊，时拂女郎砧。

· 全唐诗 ·

第一百三十三卷

卷_1【古从军行】

李颀

白日登山望烽火，黄昏饮马傍交河。行人刁斗风沙暗，
公主琵琶幽怨多。野云万里无城郭，雨雪纷纷连大漠。
胡雁哀鸣夜夜飞，胡儿眼泪双双落。闻道玉门犹被遮，
应将性命逐轻车。年年战骨埋荒外，空见蒲桃入汉家。

卷_2【行路难】

李颀

汉家名臣杨德祖，四代五公享茅土。父子兄弟绾银黄，
跃马鸣珂朝建章。火浣单衣绣方领，茱萸锦带玉盘囊。
宾客填街复满座，片言出口生辉光。世人逐势争奔走，
沥胆堕肝惟恐后。当时一顾登青云，自谓生死长随君。
一朝谢病还乡里，穷巷苍苔绝知己。秋风落叶闭重门，
昨日论交竟谁是。薄俗嗟嗟难重陈，深山麋鹿可为邻。
鲁连所以蹈东海，古往今来称达人。

· 全唐诗 ·

卷_3【缓歌行】

李颀

小来托身攀贵游，倾财破产无所忧。暮拟经过石渠署，
朝将出入铜龙楼。结交杜陵轻薄子，谓言可生复可死。
一沉一浮会有时，弃我翻然如脱屣。男儿立身须自强，
十年闭户颖水阳。业就功成见明主，击钟鼎食坐华堂。
二八蛾眉梳堕马，美酒清歌曲房下。文昌宫中赐锦衣，
长安陌上退朝归。五陵宾从莫敢视，三省官僚揖者稀。
早知今日读书是，悔作从前任侠非。

卷_4【琴歌】

李颀

主人有酒欢今夕，请奏鸣琴广陵客。月照城头乌半飞，
霜凄万树风入衣。铜炉华烛烛增辉，初弹渌水后楚妃。
一声已动物皆静，四座无言星欲稀。清淮奉使千馀里，
敢告云山从此始。

卷_5【放歌行答从弟墨卿】

李颀

小来好文耻学武，世上功名不解取。虽沾寸禄已后时，

· 全唐诗 ·

徒欲出身事明主。柏梁赋诗不及宴，长楸走马谁相数。
敛迹俯眉心自甘，高歌击节声半苦。由是蹉跎一老夫，
养鸡牧豕东城隅。空歌汉代萧相国，肯事霍家冯子都。
徒尔当年声籍籍，滥作词林两京客。故人斗酒安陵桥，
黄鸟春风洛阳陌。吾家令弟才不羁，五言破的人共推。
兴来逸气如涛涌，千里长江归海时。别离短景何萧索，
佳句相思能间作。举头遥望鲁阳山，木叶纷纷向人落。

卷_6【王母歌】

李颀

武皇斋戒承华殿，端拱须臾王母见。霓旌照耀麒麟车，
羽盖淋漓孔雀扇。手指交梨遣帝食，可以长生临宇县。
头上复戴九星冠，总领玉童坐南面。欲闻要言今告汝，
帝乃焚香请此语。若能炼魄去三尸，后当见我天皇所。
顾谓侍女董双成，酒阑可奏云和笙。红霞白日俨不动，
七龙五凤纷相迎。惜哉志骄神不悦，叹息马蹄与车辙。
复道歌钟杳将暮，深宫桃李花成雪。为看青玉五枝灯，
蟠螭吐火光欲绝。

卷_7【鲛人歌】

李颀

鲛人潜织水底居，侧身上下随游鱼。轻绡文彩不可识，

· 全唐诗 ·

夜夜澄波连月色。有时寄宿来城市，海岛青冥无极已。
泣珠报恩君莫辞，今年相见明年期。始知万族无不有，
百尺深泉架户牖。鸟没空山谁复望，一望云涛堪白首。

卷_8【夏宴张兵曹东堂】

李颀

重林华屋堪避暑，况乃烹鲜会佳客。主人三十朝大夫，
满座森然见矛戟。北窗卧簟连心花，竹里蝉鸣西日斜。
羽扇摇风却珠汗，玉盆贮水割甘瓜。云峰峨峨自冰雪，
坐对芳樽不知热。醉来但挂葛巾眠，莫道明朝有离别。

卷_9【同张员外諝酬答之作】

李颀

洛中高士日沉冥，手自灌园方带经。王湛床头见周易，
长康传里好丹青。鹄冠葛屨无名位，博弈赋诗聊遣意。
清言只到卫家儿，用笔能夸钟太尉。东篱二月种兰荪，
穷巷人稀鸟雀喧。闻道郎官问生事，肯令鬓发老柴门。

· 全唐诗 ·

卷_10【欲之新乡答崔颢綦毋潜】

李颀

数年作吏家屡空，谁道黑头成老翁。男儿在世无产业，
行子出门如转蓬。吾属交欢此何夕，南家捣衣动归客。
铜炉将炙相欢饮，星宿纵横露华白。寒风卷叶度滹沱，
飞雪布地悲峨峨。孤城日落见栖鸟，马上时闻渔者歌。
明朝东路把君手，腊日辞君期岁首。自知寂寞无去思，
敢望县人致牛酒。

卷_11【答高三十五留别便呈于十一】

李颀

累荐贤良皆不就，家近陈留访耆旧。韩康虽复在人间，
王霸终思隐岩窦。清冷池水灌园蔬，万物沧江心澹如。
妻子欢同五株柳，云山老对一床书。昨日公车见三事，
明君赐衣遣为吏。怀章不使郡邸惊，待诏初从阙庭至。
散诞由来自不羁，低头授职尔何为。故园壁挂乌纱帽，
官舍尘生白接_履。寄书寂寂於陵子，蓬蒿没身胡不仕。
藜羹被褐环堵中，岁晚将贻故人耻。

· 全唐诗 ·

卷_13【送康洽入京进乐府歌】

李颀

识子十年何不遇，只爱欢游两京路。朝吟左氏娇女篇，
夜诵相如美人赋。长安春物旧相宜，小苑蒲萄花满枝。
柳色偏浓九华殿，莺声醉杀五陵儿。曳裾此日从何所，
中贵由来尽相许。白夹春衫仙吏赠，乌皮隐几台郎与。
新诗乐府唱堪愁，御妓应传鵷鹊楼。西上虽因长公主，
终须一见曲陵侯。

卷_14【送刘十（一作刘十一）】

李颀

三十不官亦不娶，时人焉识道高下。房中唯有老氏经，
枥上空馀少游马。往来嵩华与函秦，放歌一曲前山春。
西林独鹤引闲步，南涧飞泉清角巾。前年上书不得意，
归卧东窗兀然醉。诸兄相继掌青史，第五之名齐骠骑。
烹葵摘果告我行，落日夏云纵复横。闻道谢安掩口笑，
知君不免为苍生。

卷_15【送王道士还山】

李颀

嵩阳道士餐柏实，居处三花对石室。心穷伏火阳精丹，

· 全唐诗 ·

口诵淮王万毕术。自言神诀不可求，我师闻之玄圃游。
出入彤庭佩金印，承恩赫赫如王侯。双峰树下曾受业，
应传肘后长生法。吾闻仙地多后身，安知不是具茨人。
玉膏清泠瀑泉水，白云溪中日方此。后今不见数十年，
鬓发容颜只如是。先生舍我欲何归，竹杖黄裳登翠微。
当有岩前白蝙蝠，迎君日暮双来飞。

卷_16【别梁锬】

李颀

梁生倜傥心不羁，途穷气盖长安儿。回头转眄似雕鹗，
有志飞鸣人岂知。虽云四十无禄位，曾与大军掌书记。
抗辞请刃诛部曲，作色论兵犯二帅。一言不合龙额侯，
击剑拂衣从此弃。朝朝饮酒黄公垆，脱帽露顶争叫呼。
庭中犊鼻昔尝挂，怀里琅玕今在无。时人见子多落魄，
共笑狂歌非远图。忽然遣跃紫骝马，还是昂藏一丈夫。
洛阳城头晓霜白，层冰峨峨满川泽。但闻行路吟新诗，
不叹举家无担石。莫言贫贱长可欺，覆篑成山当有时。
莫言富贵长可托，木槿朝看暮还落。不见古时塞上翁，
倚伏由来任天作。去去沧波勿复陈，五湖三江愁杀人。

卷_17【送从弟游江淮兼谒鄱阳刘太守】

李颀

都门柳色朝朝新，念尔今为江上人。穆陵关带清风远，

· 全唐诗 ·

彭蠡湖连芳草春。泊舟借问西林寺，晓听猿声在山翠，
浔阳北望鸿雁回，湓水东流客心醉。须知圣代举贤良，
不使遗才滞一方。应见鄱阳虎符守，思归共指白云乡。

卷_18【双笋歌送李回兼呈刘四】

李颀

并抽新笋色渐绿，迥出空林双碧玉。春风解箨雨润根，
一枝半叶清露痕。为君当面拂云日，孤生四远何足论。
再三抱此怅为别，嵩洛故人与之说。

卷_19【送刘四赴夏县】

李颀

九霄特立红鸾姿，万仞孤生玉树枝。刘侯致身能若此，
天骨自然多叹美。声名播扬二十年，足下长途几千里。
举世皆亲丞相阁，我心独爱伊川水。脱略势利犹埃尘，
啸傲时人而已矣。新诗数岁即文雄，上书昔召蓬莱宫。
明主拜官麒麟阁，光车骏马看玉童。高人往来庐山远，
隐士往来张长公。扶南甘蔗甜如蜜，杂以荔枝龙州橘。
赤县繁词满剧曹，白云孤峰晖永日。朝持手板望飞鸟，
暮诵楞伽对空室。一朝出宰汾河间，明府下车人吏闲。
端坐讼庭更无事，开门咫尺巫咸山。男耕女织蒙惠化，

· 全唐诗 ·

麦熟雉鸣长秋稼。明年九府议功时，五辟三征当在兹。
闻道桐乡有遗老，邑中还欲置生祠。

卷_20【少室雪晴送王宁】

李颀

少室众峰几峰别，一峰晴见一峰雪。隔城半山连青松，
素色峨峨千万重。过景斜临不可道，白云欲尽难为容。
行人与我玩幽境，北风切切吹衣冷。惜别浮桥驻马时，
举头试望南山岭。

卷_21【送陈章甫】

李颀

四月南风大麦黄，枣花未落桐阴长。青山朝别暮还见，
嘶马出门思旧乡。陈侯立身何坦荡，虬须虎眉仍大颡。
腹中贮书一万卷，不肯低头在草莽。东门酤酒饮我曹，
心轻万事皆鸿毛。醉卧不知白日暮，有时空望孤云高。
长河浪头连天黑，津口停舟渡不得。郑国游人未及家，
洛阳行子空叹息。闻道故林相识多，罢官昨日今如何。

· 全唐诗 ·

卷_22【听安万善吹觱篥歌】

李颀

南山截竹为觱篥，此乐本自龟兹出。流传汉地曲转奇，
凉州胡人为我吹。傍邻闻者多叹息，远客思乡皆泪垂。
世人解听不解赏，长飙风中自来往。枯桑老柏寒飕飕，
九雏鸣凤乱啾啾。龙吟虎啸一时发，万籁百泉相与秋。
忽然更作渔阳掺，黄云萧条白日暗。变调如闻杨柳春，
上林繁花照眼新。岁夜高堂列明烛，美酒一杯声一曲。

卷_23【魏仓曹东堂怪树】

李颀

爱君双桠一树奇，千叶齐生万叶垂。长头拂石带烟雨，
独立空山人莫知。攒青蓄翠阴满屋，紫穗红英曾断目。
洛阳墨客游云间，若到麻源第三谷。

卷_24【照公院双橙】

李颀

种橙夹阶生得地，细叶隔帘见双翠。抽条向长未及肩，

· 全唐诗 ·

泉水绕根日三四。青青何必楚人家，带雨凝烟新著花。
永愿香炉洒甘露，夕阳时映东枝斜。南庭黄竹尔不敌，
借问何时堪挂锡。

卷_25【爱敬寺古藤歌】

李颀

古藤池水盘树根，左攫右拏龙虎蹲。横空直上相陵突，
丰茸离纒若无骨，风雷霹雳连黑枝，人言其下藏妖魑。
空庭落叶乍开合，十月苦寒常倒垂。忆昨花飞满空殿，
密叶吹香饭僧遍。南阶双桐一百尺，相与年年老霜霰。

卷_26【崔五六图屏风各赋一物得乌孙佩刀】

李颀

乌孙腰间佩两刀，刃可吹毛锦为带。握中枕宿穹庐室，
马上割飞翳螭塞。执之魍魉谁能前，气凛清风沙漠边。
磨用阴山一片玉，洗将胡地独流泉。主人屏风写奇状，
铁鞘金镫俨相向。回头瞪目时一看，使予心在江湖上。

卷_27【古意】

李颀

男儿事长征，少小幽燕客。赌胜马蹄下，由来轻七尺。

· 全唐诗 ·

杀人莫敢前，须如猬毛磔。黄云陇底白雪飞，
未得报恩不能归。辽东小妇年十五，惯弹琵琶解歌舞。
今为羌笛出塞声，使我三军泪如雨。

卷_28【采莲（一作放歌行）】

李颀

越溪女，越溪莲。齐菡萏，双婵娟。嬉游向何处，
采摘且同船。浩唱发容与，清波生漪涟。时逢岛屿泊，
几伴鸯鸳眠。襟袖既盈溢，馨香亦相传。薄暮归去来，
芰罗生碧烟。

卷_29【杂兴】

李颀

沉沉牛渚矶，旧说多灵怪。行人夜秉生犀烛，
洞照洪深辟滂湃。乘车驾马往复旋，赤绂朱冠何伟然。
波惊海若潜幽石，龙抱胡髯卧黑泉。水滨丈人曾有语，
物或恶之当害汝。武昌妖梦果为灾，百代英威埋鬼府。
青青兰艾本殊香，察见泉鱼固不祥。济水自清河自浊，
周公大圣接舆狂。千年魑魅逢华表，九日茱萸作佩囊。
善恶死生齐一贯，只应斗酒任苍苍。

· 全唐诗 ·

卷_30【绝缨歌】

李颀

楚王宴客章华台，章华美人善歌舞。玉颜艳艳空相向，
满堂目成不得语。红烛灭，芳酒阑，罗衣半醉春夜寒，
绝缨解带一为欢。君王赦过不之罪，暗中珠翠鸣珊珊。
宁爱贤，不爱色，青娥买死谁能识，果却一军全社稷。

卷_31【郑樱桃歌】

李颀

石季龙，僭天禄，擅雄豪，美人姓郑名樱桃。
樱桃美颜香且泽，娥娥侍寝专宫掖。后庭卷衣三万人，
翠眉清镜不得亲。宫军女骑一千匹，繁花照耀漳河春。
织成花映红纶巾，红旗掣曳卤簿新。鸣鞞走马接飞鸟，
铜驮瑟瑟随去尘。凤阳重门如意馆，百尺金梯倚银汉。
自言富贵不可量，女为公主男为王。赤花双簪珊瑚床，
盘龙斗帐琥珀光。淫昏伪位神所恶，灭石者陵终不悟。
邺城苍苍白露微，世事翻覆黄云飞。

卷_32【送刘昱】

李颀

八月寒苇花，秋江浪头白。北风吹五两，谁是浔阳客。

· 全唐诗 ·

鸬鹚山头微雨晴，扬州郭里暮潮生。行人夜宿金陵渚，
试听沙边有雁声。

卷_33【送郝判官】

李颀

楚城木叶落，夏口青山遍。鸿雁向南时，君乘使者传。
枫林带水驿，夜火明山县。千里送行人，蔡州如眼见。
江连清汉东逶迤，遥望荆云相蔽亏。应问襄阳旧风俗，
为余骑马习家池。

卷_34【送刘方平】

李颀

绮纨游上国，多作少年行。二十二词赋，惟君著美名。
童颜且白皙，佩德如瑶琼。荀氏风流盛，胡家公子清。
有才不偶谁之过，肯即藏锋事高卧。洛阳草色犹自春，
游子东归喜拜亲。漳水桥头值鸣雁，朝歌县北少行人。
别离斗酒心相许，落日青郊半微雨。请君骑马望西陵，
为我殷勤吊魏武。

· 全唐诗 ·

卷_35【听董大弹胡笳声兼寄语弄房给事】

李颀

蔡女昔造胡笳声，一弹一十有八拍。胡人落泪沾边草，
汉使断肠对归客。古戍苍苍烽火寒，大荒沉沉飞雪白。
先拂商弦后角羽，四郊秋叶惊撼撼。董夫子，通神明，
深山窃听来妖精。言迟更速皆应手，将往复旋如有情。
空山百鸟散还合，万里浮云阴且晴。嘶酸雏雁失群夜，
断绝胡儿恋母声。川为净其波，鸟亦罢其鸣。
乌孙部落家乡远，逻娑沙尘哀怨生。幽音变调忽飘洒，
长风吹林雨堕瓦。迸泉飒飒飞木末，野鹿呦呦走堂下。
长安城连东掖垣，凤凰池对青琐门。高才脱略名与利，
日夕望君抱琴至。

卷_36【弹棋歌】

李颀

崔侯善弹棋，巧妙尽于此。蓝田美玉清如砥，
白黑相分十二子。联翩百中皆造微，魏文手巾不足比。
缘边度陇未可嘉，鸟跂星悬危复斜。回飙转指速飞电，
拂四取五旋风花。坐中齐声称绝艺，仙人六博何能继。
一别常山道路遥，为余更作三五势。

· 全唐诗 ·

卷_37【送山阴姚丞携妓之任兼寄苏少府】

李颀

东风香草路，南客心容与。白皙吴王孙，青蛾柳家女。
都门数骑出，河口片帆举。夜簟眠橘洲，春衫傍枫屿。
山阴政简甚从容，到罢惟求物外踪。落日花边剡溪水，
晴烟竹里会稽峰。才子风流苏伯玉，同官晓暮应相逐。
加餐共爱鲈鱼肥，醒酒仍怜甘蔗熟。知君练思本清新，
季子如今得为邻。他日知寻始宁墅，题诗早晚寄西人。

· 全唐诗 ·

第一百三十四卷

卷_1【塞下曲】

李颀

少年学骑射，勇冠并州儿。直爱出身早，边功沙漠垂。
戎鞭腰下插，羌笛雪中吹。膂力今应尽，将军犹未知。

卷_2【寄镜湖朱处士】

李颀

澄霁晚流阔，微风吹绿蘋。鳞鳞远峰见，淡淡平湖春。
芳草日堪把，白云心所亲。何时可为乐，梦里东山人。

卷_3【宴陈十六楼（楼枕金谷）】

李颀

西楼对金谷，此地古人心。白日落庭内，黄花生涧阴。

· 全唐诗 ·

四邻见疏木，万井度寒砧。石上题诗处，千年留至今。

卷_4【送相里造入京】

李颀

子月过秦正，寒云覆洛城。嗟君未得志，犹作苦辛行。
暖酒嫌衣薄，瞻风候雨晴。春官含笑待，驱马速前程。

卷_5【送钱子入京】

李颀

夜梦还京北，乡心恨捣衣。朝逢入秦使，走马唤君归。
驿路清霜下，关门黄叶稀。还家应信宿，看子速如飞。

卷_6【送綦毋三寺中赋得纱灯】

李颀

禅室吐香炷，轻纱笼翠烟。长绳挂青竹，百尺垂红莲。
熠燿众星下，玲珑双塔前。含光待明发，此别岂徒然。

· 全唐诗 ·

卷_7【送人尉闽中】

李颀

可叹芳菲日，分为万里情。闾门折垂柳，御苑听残莺。
海戍通闽邑，江航过楚城。客心君莫问，春草是王程。

卷_8【送人归沔南】

李颀

梅花今正发，失路复何如。旧国云山在，新年风景馀。
春饶汉阳梦，日寄武陵书。可即明时老，临川莫羨鱼。

卷_9【送卢逸人】

李颀

洛阳为此别，携手更何时。不复人间见，只应海上期。
清谿入云木，白首卧茅茨。共惜卢敖去，天边望所思。

卷_10【送顾朝阳还吴】

李颀

寂寞俱不偶，裹粮空入秦。宦途已可识，归卧包山春。

· 全唐诗 ·

旧国指飞鸟，沧波愁旅人。开樽洛水上，怨别柳花新。

卷_11【送窦参军】

李颀

城南送归客，举酒对林峦。暄鸟迎风嘒，春衣度雨寒。
桃花开翠幕，柳色拂金鞍。公子何时至，无令芳草阑。

卷_12【望秦川】

李颀

秦川朝望迥，日出正东峰。远近山河净，逶迤城阙重。
秋声万户竹，寒色五陵松。客有归欤叹，凄其霜露浓。

卷_13【晚归东园】

李颀

荆扉带郊郭，稼穡满东菑。倚杖寒山暮，鸣梭秋叶时。
回云覆阴谷，返景照霜梨。澹泊真吾事，清风别自兹。

· 全唐诗 ·

卷_14【觉公院施鸟石台】

李颀

石台置香饭，斋后施诸禽。童子亦知善，众生无惧心。
苔痕苍晓露，盘势出香林。锡杖或围绕，吾师一念深。

卷_15【篱笋】

李颀

东园长新笋，映日复穿篱。进出依青嶂，攒生伴绿池。
色因林向背，行逐地高卑。但恐春将老，青青独尔为。

卷_16【达奚吏部夫人寇氏挽歌】

李颀

存殁令名传，青青松柏田。事姑称孝妇，生子继先贤。
露湿铭旌重，风吹卤簿前。阴堂从此闭，谁诵女师篇。

卷_17【寄司勋卢员外】

李颀

流澌腊月下河阳，草色新年发建章。秦地立春传太史，

· 全唐诗 ·

汉宫题柱忆仙郎。归鸿欲度千门雪，侍女新添五夜香。
早晚荐雄文似者，故人今已赋长杨。

卷_18【寄綦毋三】

李颀

新加大邑绶仍黄，近与单车去洛阳。顾眄一过丞相府，
风流三接令公香。南川粳稻花侵县，西岭云霞色满堂。
共道进贤蒙上赏，看君几岁作台郎。

卷_19【送魏万之京】

李颀

朝闻游子唱离歌，昨夜微霜初渡河。鸿雁不堪愁里听，
云山况是客中过。关城树色催寒近，御苑砧声向晚多。
莫见长安行乐处，空令岁月易蹉跎。

卷_20【送李回】

李颀

知君官属大司农，诏幸骊山职事雄。岁发金钱供御府，

· 全唐诗 ·

昼看仙液注离宫。千岩曙雪旌门上，十月寒花辇路中。
不睹声明与文物，自伤流滞去关东。

卷_21【宿莹公禅房闻梵】

李颀

花宫仙梵远微微，月隐高城钟漏稀。夜动霜林惊落叶，
晓闻天籁发清机。萧条已入寒空静，飒沓仍随秋雨飞。
始觉浮生无住著，顿令心地欲皈依。

卷_22【题璿公山池】

李颀

远公遁迹庐山岑，开士幽居祇树林。片石孤峰窥色相，
清池皓月照禅心。指挥如意天花落，坐卧闲房春草深。
此外俗尘都不染，惟馀玄度得相寻。

卷_23【题卢五旧居】

李颀

物在人亡无见期，闲庭系马不胜悲。窗前绿竹生空地，

· 全唐诗 ·

门外青山如旧时。怅望秋天鸣坠叶，巉岈枯柳宿寒鸱。
忆君泪落东流水，岁岁花开知为谁。

卷_24【赠别张兵曹】

李颀

汉家萧相国，功盖五诸侯。勋业河山重，丹青锡命优。
君为禁脔婿，争看玉人游。荀令焚香日，潘郎振藻秋。
新成鹦鹉赋，能衣鹔鹕裘。不惮轩车远，仍寻薜荔幽。
苑梨飞绛叶，伊水净寒流。雪满故关道，云遮祥凤楼。
一身轻寸禄，万物任虚舟。别后如相问，沧波双白鸥。

卷_25【宿香山寺石楼】

李颀

夜宿翠微半，高楼闻暗泉。渔舟带远火，山磬发孤烟。
衣拂云松外，门清河汉边。峰峦低枕席，世界接人天。
霭霭花出雾，辉辉星映川。东林曙莺满，惆怅欲言旋。

卷_26【圣善阁送裴迪入京】

李颀

云华满高阁，苔色上钩栏。药草空阶静，梧桐返照寒。
清吟可愈疾，携手暂同欢。坠叶和金磬，饥乌鸣露盘。

· 全唐诗 ·

伊流惜东别，灞水向西看。旧托含香署，云霄何足难。

卷_27【奉送漪叔游颍川兼谒淮阳太守】

李颀

罢吏今何适，辞家方独行。嵩阳入归梦，颍水半前程。
闻道淮阳守，东南卧理清。郡斋观政日，人马望乡情。
叠岭雪初霁，寒砧霜后鸣。临川嗟拜手，寂寞事躬耕。

卷_28【二妃庙送裴侍御使桂阳】

李颀

沅上秋草晚，苍苍尧女祠。无人见精魄，万古寒猿悲。
桂水身殁后，椒浆神降时。回云迎赤豹，骤雨飒文狸。
受命出炎海，焚香征楚词。乘骢感遗迹，一吊清川湄。

卷_29【送暨道士还玉清观】

李颀

仙宫有名籍，度世吴江滨。大道本无我，青春长与君。
中州俄已到，至理得而闻。明主降黄屋，时人看白云。

· 全唐诗 ·

空山何窈窕，三秀日氛氲。遂此留书客，超遥烟驾分。

卷_30【送刘主簿归金坛】

李颀

与子十年旧，其如离别何。宦游邻故国，归梦是沧波。
京口青山远，金陵芳草多。云帆晓容裔，江日昼清和。
县郭舟人饮，津亭渔者歌。茅山有仙洞，羡尔再经过。

卷_31【送卢少府赴延陵】

李颀

问君从宦所，何日府中趋。遥指金陵县，青山天一隅。
行人怀寸禄，小吏献新图。北固波涛险，南天风俗殊。
春江连橘柚，晚景媚菰蒲。漠漠花生渚，亭亭云过湖。
滩沙映村火，水雾敛樯乌。回首东门路，乡书不可无。

卷_32【送皇甫曾游襄阳山水兼谒韦太守】

李颀

岷山枕襄阳，滔滔江汉长。山深卧龙宅，水净斩蛟乡。

· 全唐诗 ·

元凯春秋传，昭明文选堂。风流满今古，烟岛思微茫。
白雁暮冲雪，青林寒带霜。芦花独戍晚，柑实万家香。
旧国欲兹别，轻舟眇未央。百花亭漫漫，一柱观苍苍。
按俗荆南牧，持衡吏部郎。逢君立五马，应醉习家塘。

卷_33【龙门送裴侍御监五岭选】

李颀

万里番禺地，官人继帝忧。君为柱下史，将命出东周。
歇马傍川路，张灯临石楼。棱棱静疏木，淅淅响寒流。
榔叶四荒外，梅花五岭头。明珠尉佗国，翠羽夜郎洲。
夷俗富珍产，土风资宦游。心清物不杂，弊革事无留。
举善必称最，持奸当去尤。何辞桂江远，今日用贤秋。

卷_34【送乔琳】

李颀

草绿小平津，花开伊水滨。今君不得意，孤负帝乡春。
口不言金帛，心常任屈伸。阮公惟饮酒，陶令肯羞贫。
阳羨风流地，沧江游寓人。菱歌五湖远，桂树八公邻。
青鸟迎孤棹，白云随一身。潮随秣陵上，月映石头新。
未可逃名利，应须在缙绅。汀洲芳杜色，劝尔暂垂纶。

· 全唐诗 ·

卷_35【题少府监李丞山池】

李颀

能向府亭内，置兹山与林。他人骖驪马，而我薜萝心。
雨止禁门肃，莺啼官柳深。长廊閤军器，积水背城阴。
窗外王孙草，床头中散琴。清风多仰慕，吾亦尔知音。

卷_36【长寿寺粲公院新斨井】

李颀

僧房来往久，露井每同观。白石抱新斨，苍苔依旧栏。
空瓶宛转下，长绠辘轳盘。境界因心净，泉源见底寒。
钟鸣时灌顶，对此日闲安。

卷_37【魏仓曹宅各赋一物得当轩石竹】

李颀

罗生殊众色，独为表华滋。虽杂蕙兰处，无争桃李时。
同人趋府暇，落日后庭期。密叶散红点，灵条惊紫蕤。
芳菲看不厌，采摘愿来兹。

· 全唐诗 ·

卷_38【奉送五叔入京兼寄綦毋三】

李颀

云阴带残日，怅别此何时。欲望黄山道，无由见所思。

卷_39【寄韩鹏】

李颀

为政心闲物自闲，朝看飞鸟暮飞还。
寄书河上神明宰，羡尔城头姑射山。

卷_40【百花原（一作王昌龄《出塞行》）】

李颀

百花原头望京师，黄河水流无已时。
穷秋旷野行人绝，马首东来知是谁

卷_41【遇刘五】

李颀

洛阳一别梨花新，黄鸟飞飞逢故人。

· 全唐诗 ·

携手当年共为乐，无惊蕙草惜残春。

卷_42【送崔婴赴汉阳】

李颀

中外相连弟与兄，新加小县子男名。
才年三十佩铜印，知尔弦歌汉水清。

卷_43【送五叔入京兼寄綦毋三】

李颀

吏部明年拜官后，西城必与故人期。
寄书春草年年色，莫道相逢玉女祠。

卷_44【野老曝背】

李颀

百岁老翁不种田，惟知曝背乐残年。
有时扪虱独搔首，目送归鸿篱下眠。

· 全唐诗 ·

卷_45【送东阳王太守（末缺）】

李颀

江皋杜蘅绿，芳草日迟迟。
桡楫今何去，星郎出守时。
彤襜问风俗，明主寄惻嫠。
令下不徒尔，人和当在兹。
昔年经此地，微月有佳期。
洞口桂花白，岩前春草滋。
素沙静津濑，青壁带川坻。
野鹤每孤立，林鶡常昼悲。

卷_46【咏张謏山水（末缺）】

李颀

小山破体闲支策，落日梨花照空壁。
诗堪记室妒风流，画与将军作勍敌。

卷_47【失题（末缺）】

李颀

紫极殿前朝伏奏，龙华会里日相望。
别离岁岁如流水，谁辨他乡与故乡。

· 全唐诗 ·

第一百三十五卷

卷_1【冬夜寓居寄储太祝（一作薛据诗）】

綦毋潜

自为洛阳客，夫子吾知音。尽义能下士，时人无此心。
奈何离居夜，巢鸟悲空林。愁坐至月上，复闻南邻砧。

卷_2【春泛若耶溪】

綦毋潜

幽意无断绝，此去随所偶。晚风吹行舟，花路入溪口。
际夜转西壑，隔山望南斗。潭烟飞溶溶，林月低向后。
生事且弥漫，愿为持竿叟。

卷_3【题鹤林寺】

綦毋潜

道林隐形胜，向背临层霄。松覆山殿冷，花藏谿路遥。

· 全唐诗 ·

珊珊宝幡挂，焰焰明灯烧。迟日半空谷，春风连上潮。
少凭水木兴，暂令身心调。愿谢携手客，兹山禅诵饶。

卷_4【题栖霞寺】

綦毋潜

南山势回合，灵境依此住。殿转云崖阴，僧探石泉度。
龙蛇争翕习，神鬼皆密护。万壑奔道场，群峰向双树。
天花飞不著，水月白成路。今日观身我，归心复何处。

卷_5【送储十二还庄城】

綦毋潜

西坂何缭绕，青林问子家。天寒噪野雀，日晚度城鸦。
寂历道傍树，曈曨原上霞。兹情不可说，长恨隐沦赊。

卷_6【送章彝下第】

綦毋潜

长安渭桥路，行客别时心。献赋温泉毕，无媒魏阙深。
黄莺啼就马，白日暗归林。三十名未立，君还惜寸阴。

· 全唐诗 ·

卷_7【送崔员外黔中监选】

綦毋潜

持衡出帝畿，星指夜郎飞。神女云迎马，荆门雨湿衣。
听猿收泪罢，系雁待书稀。蛮貊虽殊俗，知君肝胆微。

卷_8【送贾恒明府兼寄温张二司户】

綦毋潜

越客新安别，秦人旧国情。舟乘晚风便，月带上潮平。
花路西施石，云峰句践城。明州报两掾，相忆二毛生。

卷_9【送宋秀才】

綦毋潜

冠古积荣盛，当时数戟门。旧交丞相子，继世五侯孙。
长剑倚天外，短书盈万言。秋风一送别，江上黯消魂。

· 全唐诗 ·

卷_10【送平判官入秦（一作卢象诗）】

綦毋潜

谪远自安命，三年已忘归。同声愿执手，驿骑到门扉。
云是帝乡去，军书谒紫微。曾为金马客，向日泪沾衣。

卷_11【送郑务拜伯父】

綦毋潜

名公作逐臣，驱马拂行尘。旧国问郢子，劳歌过郢人。
一川花送客，二月柳宜春。奉料竹林兴，宽怀此别晨。

卷_12【题招隐寺绚公房】

綦毋潜

开士度人久，空岩花雾深。徒知燕坐处，不见有为心。
兰若门对壑，田家路隔林。还言证法性，归去比黄金。

· 全唐诗 ·

卷_13【宿太平观】

綦毋潜

夕到玉京寝，窅冥云汉低。魂交仙室蝶，曙听羽人鸡。
滴沥花上露，清冷松下谿。明当访真隐，挥手入无倪。

卷_14【题灵隐寺山顶禅院】

綦毋潜

招提此山顶，下界不相闻。塔影挂清汉，钟声和白云。
观空静室掩，行道众香焚。且驻西来驾，人天日未曛。

卷_15【若耶溪逢孔九】

綦毋潜

相逢此溪曲，胜托在烟霞。潭影竹间动，岩阴檐外斜。
人言上皇代，犬吠武陵家。借问淹留日，春风满若耶。

· 全唐诗 ·

卷_16【宿龙兴寺】

綦毋潜

香刹夜忘归，松青古殿扉。灯明方丈室，珠系比丘衣。
白日传心静，青莲喻法微。天花落不尽，处处鸟衔飞。

卷_17【题沈东美员外山池】

綦毋潜

仙郎偏好道，凿沼象瀛洲。鱼乐随情性，船行任去留。
秦人辨鸡犬，尧日识巢由。归客衡门外，仍怜返景幽。

卷_18【茅山洞口】

綦毋潜

华阳仙洞口，半岭拂云看。窈窕穿苔壁，差池对石坛。
方随地脉转，稍觉水晶寒。未果变金骨，归来兹路难。

· 全唐诗 ·

卷_19【过方尊师院】

綦毋潜

羽客北山寻，草堂松径深。养神宗示法，得道不知心。
洞户逢双履，寥天有一琴。更登玄圃上，仍种杏成林。

卷_20【经陆补阙隐居】

綦毋潜

不敢要君征亦起，致君全得似唐虞。说言昨叹离天听，
新象今闻入县图。琴锁坏窗风自响，鹤归乔木隐难呼。
学书弟子何人在，点检犹存谏草无。

卷_21【登天竺寺】

綦毋潜

郡有化城最，西穷叠嶂深。松门当涧口，石路在峰心。
幽见夕阳霁，高逢暮雨阴。佛身瞻绀发，宝地践黄金。
云向竹谿尽，月从花洞临。因物成真悟，遗世在兹岑。

· 全唐诗 ·

卷_22【满公房】

綦毋潜

世界莲花藏，行人香火缘。灯王照不尽，中夜寂相传。

卷_23【过融上人兰若（一作孟浩然诗）】

綦毋潜

山头禅室挂僧衣，窗外无人溪鸟飞。
黄昏半在下山路，却听钟声连翠微。

卷_24【早发上东门】

綦毋潜

十五能行西入秦，三十无家作路人。
时命不将明主合，布衣空染洛阳尘。

· 全唐诗 ·

卷_25【祇园寺】

綦毋潜

宝坊求往迹，神理驻沿洄。雁塔酬前愿，王身更后来。
加持将暝合，朗悟豁然开。两世分明见，馀生复几哉。

卷_26【送集贤学士伊阙史少府放归江东觐省（一作陶翰诗）】

綦毋潜

墨客钟张侣，材高吴越珍。千门来谒帝，驷马去荣亲。
吏邑沿清洛，乡山指白蘋。归期应不远，当及未央春。

· 全唐诗 ·

第一百三十六卷

卷_1【述韦昭应画犀牛】

储光羲

遐方献文犀，万里随南金。大邦柔远人，以之居山林。
食棘无秋冬，绝流无浅深。双角前崭崭，三蹄下駸駸。
朝贤壮其容，未能辨其音。有我衰鸟郎，新邑长鸣琴。
陛阁飞嘉声，丘甸盈仁心。闲居命国工，作绘北堂阴。
眈眈若有神，庶比来仪禽。昔有舞天庭，为君奏龙吟。

卷_2【献王威仪】

储光羲

入与真主言，有骑天马来。但有华清宫，不用神明台。
肃肃长自闲，门静无人开。

· 全唐诗 ·

卷_3【野田黄雀行】

储光羲

啧啧野田雀，不知躯体微。闲穿深蒿里，争食复争飞。
穷老一颓舍，枣多桑树稀。无枣犹可食，无桑何以衣。
萧条空仓暮，相引时来归。斜路岂不捷，渚田岂不肥。
水长路且坏，恻恻与心违。

卷_4【樵父词】

储光羲

山北饶朽木，山南多枯枝。枯枝作采薪，爨室私自知。
诘朝斫斧寻，视暮行歌归。先雪隐薜荔，迎暄卧茅茨。
清涧日濯足，乔木时曝衣。终年登险阻，不复忧安危。
荡漾与神游，莫知是与非。

卷_5【渔父词】

储光羲

泽鱼好鸣水，溪鱼好上流。渔梁不得意，下渚潜垂钓。
乱荇时碍楫，新芦复隐舟。静言念终始，安坐看沉浮。

· 全唐诗 ·

素发随风扬，远心与云游。逆浪还极浦，信潮下沧洲。
非为徇形役，所乐在行休。

卷_6【牧童词】

储光羲

不言牧田远，不道牧陂深。所念牛驯扰，不乱牧童心。
圆笠覆我首，长蓑披我襟。方将忧暑雨，亦以惧寒阴。
大牛隐层坂，小牛穿近林。同类相鼓舞，触物成讴吟。
取乐须臾间，宁问声与音。

卷_7【采莲词】

储光羲

浅渚荇花繁，深潭菱叶疏。独往方自得，耻邀淇上姝。
广江无术阡，大泽绝方隅。浪中海童语，流下鲛人居。
春雁时隐舟，新萍复满湖。采采乘日暮，不思贤与愚。

卷_8【采菱词】

储光羲

浊水菱叶肥，清水菱叶鲜。义不游浊水，志士多苦言。

· 全唐诗 ·

潮没具区薮，潦深云梦田。朝随北风去，暮逐南风旋。
浦口多渔家，相与邀我船。饭稻以终日，羹莼将永年。
方冬水物穷，又欲休山樊。尽室相随从，所贵无忧患。

卷_9【射雉词】

储光羲

曝暄理新翳，迎春射鸣雉。原田遥一色，皋陆旷千里。
遥闻呶喔声，时见双飞起。霁_霰疏蒿下，稊稂深丛里。
顾敌已忘生，争雄方决死。仁心贵勇义，岂能复伤此。
超遥下故墟，迢递回高峙。大夫昔何苦，取笑欢妻子。

卷_27【猛虎词】

储光羲

寒亦不忧雪，饥亦不食人。人肉岂不甘，所恶伤明神。
太室为我宅，孟门为我邻。百兽为我膳，五龙为我宾。
蒙马一何威，浮江一以仁。彩章耀朝日，爪牙雄武臣。
高云逐气浮，厚地随声震。君能贾馀勇，日夕长相亲。

· 全唐诗 ·

卷_28【渭桥北亭作】

储光羲

停车渭阳暮，望望入秦京。不见鹧鸪道，如闻歌吹声。
乡魂涉江水，客路指蒲城。独有故楼月，今来亭上明。

卷_29【述华清宫五首】

储光羲

上在蓬莱宫，莫若居华清。朝朝礼玄阁，日日闻体轻。
大圣不私己，精禋为群氓。

上出蓬莱时，六龙俨齐首。长道舒羽仪，彤云映前后。
天声殷宇宙，真气到林藪。

昔在轩辕朝，五城十二楼。今我神泉宫，独在骊山陬。
群方趋顺动，百辟随天游。

正月开阳和，通门缉元化。穆穆睟容归，岂为明灯夜。
高山大风起，肃肃随龙驾。

上林神君宫，此地即明庭。山开鸿濛色，天转招摇星。
三雪报大有，孰为非我灵。

· 全唐诗 ·

卷_30【杂咏五首·石子松】

储光羲

盘石青岩下，松生盘石中。冬春无异色，朝暮有清风。
五鬣何人采，西山旧两童。

卷_31【杂咏五首·架檐藤】

储光羲

得从轩墀下，殊胜松柏林。生枝逐架远，吐叶向门深。
何许答君子，檐间朝暝阴。

卷_32【杂咏五首·池边鹤】

储光羲

舞鹤傍池边，水清毛羽鲜。立如依岸雪，飞似向池泉。
江海虽言旷，无如君子前。

· 全唐诗 ·

卷_33【杂咏五首·钓鱼湾】

储光羲

垂钓绿湾春，春深杏花乱。潭清疑水浅，荷动知鱼散。
日暮待情人，维舟绿杨岸。

卷_34【杂咏五首·幽人居】

储光羲

幽人下山径，去去夹青林。滑处莓苔湿，暗中萝薜深。
春朝烟雨散，犹带浮云阴。

卷_35【题太玄观】

储光羲

门外车马喧，门里宫殿清。行即翳若木，坐即吹玉笙。
所喧既非我，真道其冥冥。

· 全唐诗 ·

卷_36【至嵩阳观，观即天皇故宅】

储光羲

真人上清室，乃在中峰前。花雾生玉井，霓裳画列仙。
念兹宫故宇，多此地新泉。松柏有清阴，薜萝亦自妍。
一闻步虚子，又话逍遥篇。忽若在云汉，风中意泠然。

卷_37【贻韦炼师】

储光羲

精思莫知日，意静如空虚。三鸟自来去，九光遥卷舒。
新池近天井，玉宇停云车。余亦苦山路，洗心祈道书。

卷_38【霁后贻马十二巽】

储光羲

高天风雨散，清气在园林。况我夜初静，当轩鸣绿琴。
云开北堂月，庭满南山阴。不见长裾者，空歌游子吟。

· 全唐诗 ·

卷_39【题陆山人楼】

储光羲

暮声杂初雁，夜色涵早秋。独见海中月，照君池上楼。
山云拂高栋，天汉入云流。不惜朝光满，其如千里游。

卷_40【献八舅东归】

储光羲

高位莫能舍，舍之世所贤。云车游日华，岂比龙楼前。
寝疾乃就枕，情感唯灵仙。帝鸿思道宗，臣彭亦长年。
天书加羽服，又许归东川。镜水涵太清，禹山朝上玄。
诚亡真混沌，玉立方婵娟。素业作仙居，子孙当自传。
门多松柏树，篋有逍遥篇。独往不可群，沧海成桑田。

卷_41【泛茅山东溪】

储光羲

清晨登仙峰，峰远行未极。江海霁初景，草木含新色。
而我任天和，此时聊动息。望乡白云里，发棹清溪侧。
松柏生深山，无心自贞直。

· 全唐诗 ·

卷_42【吃茗粥作】

储光羲

当昼暑气盛，鸟雀静不飞。念君高梧阴，复解山中衣。
数片远云度，曾不蔽炎晖。淹留膳茶粥，共我饭蕨薇。
敝庐既不远，日暮徐徐归。

卷_43【游茅山五首】

储光羲

十年别乡县，西云入皇州。此意在观国，不言空远游。
九衢平若水，利往无轻舟。北洛反初路，东江还故丘。
春山多秀木，碧涧尽清流。不见子桑扈，当从方外求。

世业传儒行，行成非不荣。其如怀独善，况以闻长生。
家近华阳洞，早年深此情。巾车云路入，理棹瑶溪行。
天地朝光满，江山春色明。王庭有轩冕，此日方知轻。

平生非作者，望古怀清芬。心以道为际，行将时不群。
兹山在人境，灵贶久传闻。远势一峰出，近形千嶂分。
冬春有茂草，朝暮多鲜云。此去亦何极，但言西日曛。

昔贤居柱下，今我去人间。良以直心旷，兼之外视闲。

· 全唐诗 ·

垂纶非钓国，好学异希颜。落日登高屿，悠然望远山。
溪流碧水去，云带清阴还。想见中林士，岩扉长不关。

名岳征仙事，清都访道书。山门入松柏，天路涵空虚。
南极见朝采，西潭闻夜渔。远心尚云宿，浪迹出林居。
为己存实际，忘形同化初。此行良已矣，不乐复何如。

卷_44【述降圣观】

储光羲

一山尽天苑，一峰开道宫。道花飞羽卫，天鸟游云空。
玉殿俯玄水，春旗摇素风。夹门小松柏，覆井新梧桐。
自昔大仙下，乃知元化功。神皇作桂馆，此意与天通。

卷_45【题眇上人禅居】

储光羲

真王清净子，燕居复行心。结宇邻居邑，寤言非远寻。
丹青丈室满，草树一庭深。秀色玄冬发，交枝白日阴。
江流映朱户，山鸟鸣香林。独住已寂寂，安知浮与沉。

· 全唐诗 ·

卷_46【过新丰道中】

储光羲

西下长乐坂，东入新丰道。雨多车马稀，道上生秋草。
太阴蔽皋陆，莫知晚与早。雷雨杳冥冥，川谷漫浩浩。
诏书植嘉木，众言桃李好。自愧无此容，归从汉阴老。

卷_47【夜到洛口入黄河】

储光羲

河洲多青草，朝暮增客愁。客愁惜朝暮，枉渚暂停舟。
中宵大川静，解缆逐归流。浦溆既清旷，沿洄非阻修。
登舸望落月，击汰悲新秋。倘遇乘槎客，永言星汉游。

卷_48【使过弹筝峡作】

储光羲

鸟雀知天雪，群飞复群鸣。原田无遗粟，日暮满空城。
达士忧世务，鄙夫念王程。晨过弹筝峡，马足凌兢行。
双壁隐灵曜，莫能知晦明。皑皑坚冰白，漫漫阴云平。
始信古人言，苦节不可贞。

· 全唐诗 ·

卷_49【泊舟贻潘少府】

储光羲

行子苦风潮，维舟未能发。宵分卷前幔，卧视清秋月。
四泽蒹葭深，中洲烟火绝。苍苍水雾起，落落疏星没。
所遇尽渔商，与言多楚越。其如念极浦，又以思明哲。
常若千里馀，况之异乡别。

卷_50【仲夏入园中东陂】

储光羲

方塘深且广，伊昔俯吾庐。环岸垂绿柳，盈泽发红蕖。
上延北原秀，下属幽人居。暑雨若混沌，清明如空虚。
此乡多隐逸，水陆见樵渔。废赏亦何贵，为欢良易摅。
且言重观国，当此赋归欤。

卷_51【效古二首】

储光羲

晨登凉风台，暮走邯郸道。曜灵何赫烈，四野无青草。
大军北集燕，天子西居镐。妇人役州县，丁男事征讨。

· 全唐诗 ·

老幼相别离，哭泣无昏早。稼穡既殄绝，川泽复枯槁。
旷哉远此忧，冥冥商山皓。

东风吹大河，河水如倒流。河洲尘沙起，有若黄云浮。
赭霞烧广泽，洪曜赫高丘。野老泣相语，无地可荫休。
翰林有客卿，独负苍生忧。中夜起踯躅，思欲献厥谋。
君门峻且深，跼足空夷犹。

卷_52【杂诗二首】

储光羲

混沌本无象，末路多是非。达士志寥廓，所在能忘机。
耕凿时未至，还山聊采薇。虎豹对我蹲，鸢鷖旁我飞。
仙人空中来，谓我勿复归。格泽为君驾，虹蜺为君衣。
西游昆仑墟，可与世人违。

秋气肃天地，太行高崔嵬。猿狖清夜吟，其声一何哀。
寂寞掩圭荜，梦寐游蓬莱。琪树远亭亭，玉堂云中开。
洪崖吹箫管，玉女飘飖来。雨师既先后，道路无纤埃。
鄙哉楚襄王，独好阳云台。

卷_53【陆著作挽歌】

储光羲

世业江湖侧，郊原休沐处。独言五日归，未道千秋去。

· 全唐诗 ·

乡亭春水绿，昌阁寒光暮。昔为昼锦游，今成逝川路。

归路秦城下，寒云惨平田。故园沧海边，绿柳覆平川。
送客异他日，还舟殊昔年。华亭有明日，长向陇头悬。

剑水千人石，荆江万里流。英英有君子，才德满中州。
明道俟良佐，惟贤初薄游。生涯一朝尽，寂寞夜台幽。

金堂策令名，仙掖居清位。鸣玉朝双阙，垂缨游两地。
朝夕既论思，春秋仍书事。何言鲁声伯，忽下琼珠泪。

令德弃人世，明朝降宠章。起居存有位，著作没为郎。
寒水落南浦，月华虚北堂。松门一长想，仿佛见清扬。

卷_54【山居贻裴十二迪】

储光羲

落叶满山砌，苍烟埋竹扉。远怀青冥士，书剑常相依。
霜卧眇兹地，琴言纷已违。衡阳今万里，南雁将何归。
出径惜松引，入舟怜钓矶。西林有明月，夜久空微微。

卷_55【秦中岁晏马舍人宅宴集】

储光羲

冬暮久无乐，西行至长安。故人处东第，清夜多新欢。

· 全唐诗 ·

广庭竹阴静，华池月色寒。知音尽词客，方见交情难。

卷_56【荐玄德公庙】

储光羲

神道本无已，成化亦自然。君居寥天上，德在玉华泉。
真游践王豫，永日迟云仙。表微在营道，明祀将祈年。
灵山俯新邑，松上生彩烟。岂知穆天子，远去瑶池边。

卷_57【上长史王公责躬】

储光羲

覆舟无伯夷，覆车无仲尼。自咎失明义，宁由贝锦诗。
松柏日已坚，桃李日以滋。顾己独暗昧，所居成蒺藜。
大贤荐时文，丑妇用蛾眉。惕惕愧不已，岂敢论其私。
方朔既有言，子建亦有诗。侧隐及先世，析薪成自悲。
灵鸟酬德辉，黄雀报仁慈。若公庶伏罪，此事安能迟。

卷_58【至岳寺即大通大照禅塔上温上人】

储光羲

秋山下映宫，宫色宜朝阳。迢递在半岭，参差非一行。

· 全唐诗 ·

燕息云满门，出游花隐房。二尊此成道，禅宇遥相望。
凤铎天中鸣，岩梯松下长。山墟响信鼓，蕙薄生蕙香。
起灭一以雪，往来亦诚亡。悲哉门弟子，要自知心长。

卷_59【终南幽居献苏侍郎三首时拜太祝未上】

储光羲

暮春天气和，登岭望层城。朝日悬清景，巍峨宫殿明。
圣君常临朝，达士复悬衡。道近无良足，归来卧山楹。
灵阶曝仙书，深室炼金英。春岩松柏秀，晨路鸱鸡鸣。
羽化既有言，无然悲不成。

中岁尚微道，始知将谷神。抗策还南山，水木自相亲。
深林开一道，青嶂成四邻。平明去采薇，日入行刈薪。
云归万壑暗，雪罢千崖春。始看玄鸟来，已见瑶华新。
寄言攀芳者，无乃后时人。

卜筑青岩里，云萝四垂阴。虚室若无人，乔木自成林。
时有清风至，侧闻樵采音。凤凰鸣南冈，望望隔层岑。
既言山路远，复道溪流深。偃佺空中游，虬龙水间吟。
何当见轻翼，为我达远心。

· 全唐诗 ·

卷_60【题应圣观】

储光羲

空中望小山，山下见馀雪。皎皎河汉女，在兹养真骨。
登门骇天书，启籥问仙诀。池光摇水雾，灯色连松月。
合砖起花台，折草成玉节。天鸡弄白羽，王母垂玄发。
北有上年宫，一路在云霓。上心方向道，时复朝金阙。

卷_61【至闲居精舍呈正上人（即天后故宫）】

储光羲

太室三招提，其趣皆不同。不同非一趣，况是天游宫。
双岭前夹门，阁道复横空。宝坊若花积，宛转不可穷。
流泉自成池，清松信饶风。秋晏景气迥，晶明丹素功。
将近隐者邻，远与西山通。大师假惠照，念以息微躬。

卷_62【酬綦毋校书梦耶溪见赠之作】

储光羲

校文在仙掖，每有沧洲心。况以北窗下，梦游清溪阴。
春看湖水漫，夜入回塘深。往往缆垂葛，出舟望前林。

· 全唐诗 ·

山人松下饭，钓客芦中吟。小隐何足贵，长年固可寻。
还车首东道，惠言若黄金。以我采薇意，传之天姥岑。

· 全唐诗 ·

第一百三十七卷

卷_1【田家即事】

储光羲

蒲叶日已长，杏花日已滋。老农要看此，贵不违天时。
迎晨起饭牛，双驾耕东菑。蚯蚓土中出，田乌随我飞。
群合乱啄噪，嗷嗷如道饥。我心多恻隐，顾此两伤悲。
拨食与田乌，日暮空筐归。亲戚更相诮，我心终不移。

卷_2【同王十三维偶然作十首】

储光羲

仲夏日中时，草木看欲焦。田家惜工力，把锄来东皋。
顾望浮云阴，往往误伤苗。归来悲困极，兄嫂共相譊。
无钱可沽酒，何以解劬劳。夜深星汉明，庭宇虚寥寥。
高柳三五株，可以独逍遥。

北山种松柏，南山种蒺藜。出入虽同趣，所向各有宜。
孔丘贵仁义，老氏好无为。我心若虚空，此道将安施。

· 全唐诗 ·

暂过伊阙间，晚晚三伏时。高阁入云中，芙蓉满清池。
要自非我室，还望南山陲。

野老本贫贱，冒暑锄瓜田。一畦未及终，树下高枕眠。
荷蓑者谁子，皤皤来息肩。不复问乡墟，相见但依然。
腹中无一物，高话羲皇年。落日临层隅，逍遥望晴川。
使妇提蚕筐，呼儿榜渔船。悠悠泛绿水，去摘浦中莲。
莲花艳且美，使我不能还。

浮云在虚空，随风复卷舒。我心方处顺，动作何忧虞。
但言婴世网，不复得闲居。迢递别东国，超遥来西都。
见人乃恭敬，曾不问贤愚。虽若不能言，中心亦难诬。
故乡满亲戚，道远情日疏。偶欲陈此意，复无南飞凫。

草木花叶生，相与命为春。当非草木意，信是故时人。
静念恻群物，何由知至真。狂歌问夫子，夫子莫能陈。
凤凰飞且鸣，容裔下天津。清净无言语，兹焉庶可亲。

黄河流向东，弱水流向西。趋舍各有异，造化安能齐。
妾本邯郸女，生长在丛台。既闻容见宠，复想玄为妻。
刻画尚风流，幸会君招携。逶迤歌舞座，婉娈芙蓉闺。
日月方向除，恩爱忽焉睽。弃置谁复道，但悲生不谐。
羡彼匹妇意，偕老常同栖。

日暮登春山，山鲜云复轻。远近看春色，踟蹰新月明。
仙人浮丘公，对月时吹笙。丹鸟飞熠熠，苍蝇乱营营。
群动汨吾真，讹言伤我情。安得如子晋，与之游太清。

· 全唐诗 ·

耿耿铜鞮宫，遥望长数里。宾客无多少，出入皆珠履。
朴儒亦何为，辛苦读旧史。不道无家舍，效他养妻子。
冽冽玄冬暮，衣裳无准拟。偶然著道书，神人养生理。
公卿时见赏，赐赉难具纪。莫问身后事，且论朝夕是。

空山暮雨来，众鸟竞栖息。斯须照夕阳，双双复抚翼。
我念天时好，东田有稼穡。浮云蔽川原，新流集沟洫。
裴回顾衡宇，僮仆邀我食。卧览床头书，睡看机中织。
想见明膏煎，中夜起唧唧。

四邻竞丰屋，我独好卑室。窈窕高台中，时闻抚新瑟。
狂飙动地起，拔木乃非一。相顾始知悲，中心忧且栗。
蚩蚩命子弟，恨不居高秩。日入宾从归，清晨冠盖出。
中庭有奇树，荣早衰复疾。此道犹不知，微言安可述。

卷_3【升天行贻卢六健】

储光羲

真人居阆风，时奏清商音。听者即王母，泠泠和瑟琴。
坐对三花枝，行随五云阴。天长昆仑小，日久蓬莱深。
上由玉华宫，下视首阳岑。神州亦清净，要自有浮沉。
恻恻苦哉行，呱呱游子吟。庐山逢若士，思欲化黄金。
雨雪没太山，谁能无归心。逍遥在云汉，可以来相寻。

· 全唐诗 ·

卷_4【田家杂兴八首】

储光羲

春至鶺鴒鸣，薄言向田墅。不能自力作，黽勉娶邻女。
既念生子孙，方思广田圃。闲时相顾笑，喜悦好禾黍。
夜夜登啸台，南望洞庭渚。百草被霜露，秋山响砧杵。
却羡故年时，中情无所取。

众人耻贫贱，相与尚膏腴。我情既浩荡，所乐在畋渔。
山泽时晦暝，归家暂闲居。满园植葵藿，绕屋树桑榆。
禽雀知我闲，翔集依我庐。所愿在优游，州县莫相呼。
日与南山老，兀然倾一壶。

逍遥阡陌上，远近无相识。落日照秋山，千岩同一色。
网罟绕深莽，鹰鹯始轻翼。猎马既如风，奔兽莫敢息。
驻旗沧海上，犒士吴宫侧。楚国有夫人，性情本贞直。
鲜禽徒自致，终岁竟不食。

田家趋垄亩，当昼掩虚关。邻里无烟火，儿童共幽闲。
桔槔悬空圃，鸡犬满桑间。时来农事隙，采药游名山。
但言所采多，不念路险艰。人生如蜉蝣，一往不可攀。
君看西王母，千载美容颜。

平生养情性，不复计忧乐。去家行卖畚，留滞南阳郭。
秋至黍苗黄，无人可刈获。稚子朝未饭，把竿逐鸟雀。

· 全唐诗 ·

忽见梁将军，乘车出宛洛。意气轶道路，光辉满墟落。
安知负薪者，咍咍笑轻薄。

楚山有高士，梁国有遗老。筑室既相邻，向田复同道。
糗糒常共饭，儿孙每更抱。忘此耕耨劳，愧彼风雨好。
蟋蟀鸣空泽，鸚鵡伤秋草。日夕寒风来，衣裳苦不早。

梧桐荫我们，薜荔网我屋。迢迢两夫妇，朝出暮还宿。
稼穡既自种，牛羊还自牧。日旰懒耕锄，登高望川陆。
空山足禽兽，墟落多乔木。白马谁家儿，联翩相驰逐。

种桑百馀树，种黍三十亩。衣食既有馀，时时会亲友。
夏来菰米饭，秋至菊花酒。孺人喜逢迎，稚子解趋走。
日暮闲园里，团团荫榆柳。酩酊乘夜归，凉风吹户牖。
清浅望河汉，低昂看北斗。数瓮犹未开，明朝能饮否。

卷_5【题辨觉精舍】

储光羲

朝随秋云阴，乃至青松林。花阁空中远，方池岩下深。
竹风乱天语，溪响成龙吟。试问真君子，游山非世心。

· 全唐诗 ·

卷_6【题慎言法师故房】

储光羲

精庐不住子，自有无生乡。过客知何道，裴回雁子堂。
浮云归故岭，落月还西方。日夕虚空里，时时闻异香。

卷_7【石瓮寺】

储光羲

遥山起真宇，西向尽花林。下见宫殿小，上看廊庑深。
苑花落池水，天语闻松音。君子又知我，焚香期化心。

卷_8【题崔山人别业】

储光羲

南阳隐居者，筑室丹溪源。溪冷惧秋晏，室寒欣景暾。
山鸡鸣菌阁，水雾入衡门。东岭或舒啸，北窗时讨论。
封君渭阳竹，逸士汉阴园。何必崆峒上，独为尧所尊。

· 全唐诗 ·

卷_9【行次田家澳梁作】

储光羲

田家俯长道，邀我避炎氛。当暑日方昼，高天无片云。
桑间禾黍气，柳下牛羊群。野雀栖空屋，晨昏不复闻。
前登澳梁坂，极望温泉分。逆旅方三舍，西山犹未曛。

卷_10【昭圣观】

储光羲

主家隐溪口，微路入花源。数日朝青阁，彩云独在门。
双楼夹一殿，玉女侍玄元。扶檐尽蟠木，步檐多画繡。
新松引天籁，小柏绕山樊。坐弄竹阴远，行随溪水喧。
石池辨春色，林兽知人言。未逐凤凰去，真宫在此原。

卷_11【题辛道士房】

储光羲

全神不言命，所尚道家流。迨此远南楚，遂令思北游。
先生秀衡岳，玉立居玄丘。门带江山静，房随瑶草幽。
逍遥三花发，罔象五云浮。自有太清纪，曾垂华发忧。

· 全唐诗 ·

大年方橐籥，小智即蜉蝣。七日赤龙至，莫令余独留。

卷_12【登秦岭作，时陷贼归国】

储光羲

朝出猛兽林，躩踞登高峰。僮仆履云雾，随我行太空。
羲和舒灵晖，倏忽西极通。回首望泾渭，隐隐如长虹。
九逵合苍莽，五陵遥瞳矇。鹿游大明殿，雾湿华清宫。
网罗蠹蠹时，顾齿熊罴锋。失途走江汉，不能有其功。
气逐招摇星，魂随阊阖风。惟言宇宙清，复使车书同。
林木被繁霜，合沓连山红。鹏鹗励羽翼，俯视荆棘丛。
誓将食鷃鵲，然后归崆峒。

卷_13【晦日任桥池亭】

储光羲

温泉作天邑，直北开新洲。未有菰蒲生，即闻鳧雁游。
六亭在高岸，数岛居中流。晦日望清波，相与期泛游。
西道苦转轂，北堤疲行舟。清冷水木阴，才可适我忧。

· 全唐诗 ·

卷_14【望幸亭】

储光羲

五年一巡狩，西幸过东畿。周国易居守，周人多怨思。
君王敷惠政，程作贵从时。大厦非一木，沉沉临九逵。
庆云宿飞栋，嘉树罗青墀。疏屏宜朝享，方塘堪水嬉。
云中仰华盖，桁下望春旗。天意知如此，星言归洛师。

卷_15【哥舒大夫颂德】

储光羲

天纪启真命，君生臣亦生。乃知赤帝子，复有苍龙精。
神武建皇极，文昌开将星。超超渭滨器，落落山西名。
画阁入受脤，凿门出扞城。戎人昧正朔，我有轩辕兵。
陇路起丰镐，关云随旆旌。河湟训兵甲，义勇方横行。
韩魏多锐士，蹶张在幕庭。大非四决轧，石堡高峥嵘。
攻伐若振槁，孰云非神明。嘉谋即天意，骤胜由师贞。
枯草被西陆，烈风昏太清。戢戈旄头落，牧马昆仑平。
宾从俨冠盖，封山纪天声。来朝芙蓉阙，鸣玉飘华缨。
直道济时宪，天邦遂轻刑。抗书报知己，松柏亦以荣。
嘉命列上第，德辉照天京。在车持简墨，粲粲皆词英。
顾我抢榆者，莫能翔青冥。游燕非骐驎，踟躅思长鸣。

· 全唐诗 ·

卷_16【安宜园林献高使君】

储光羲

直道已三出，幸从江上回。新居茅茨迥，起见秋云开。
十里次舟楫，二桥交往来。楚言满邻里，雁叫喧池台。
鱼鳖乐仁政，浮沉亦至哉。小山宜大隐，要自望蓬莱。

卷_17【秋庭贻马九】

储光羲

伊昔好观国，自乡西入秦。往复万馀里，相逢皆众人。
大君幸东岳，世哲扈时巡。予亦从此去，闲居清洛滨。
稍稍寒木直，彩彩阳华新。迭宕孔文举，风流石季伦。
妙年一相得，白首定相亲。重此虚宾馆，欢言冬及春。
哲兄盛文史，出入驰高轨。令德本同人，深心重知己。
绛衣朝圣主，纱帐延才子。伯淮与季江，清濬各孤峙。
群芳趋泛爱，万物通情理。而我信空虚，提携过杞梓。
夫君美声德，直道期终始。孰谓忽离居，优游郑东里。
东里近王城，山连路亦平。何言相去远，闲言独凄清。
万里鸿雁度，四邻砧杵鸣。其如久离别，重以霜风惊。

· 全唐诗 ·

卷_18【河中望鸟滩作贻吕四郎中】

储光羲

河流有深曲，舟子莫能知。弭棹临沙屿，微吟西日驰。
平明春色霁，两岸好风吹。去去川途尽，悠悠亲友离。
汉宫成羽翼，伊水弄参差。为惜淮南子，如何攀桂枝。

卷_19【秦中初霁献给事二首】

储光羲

渭水收暮雨，处处多新泽。宫苑傍山明，云林带天碧。
君子耸高驾，英声邈今昔。锵佩出中台，影纓入仙掖。
夙心幸清鉴，晚志欣良觌。鸣盗非足征，愿言同下客。

南国久为思，西都尝作宾。云开天地色，日照山河春。
善听在知己，扬光唯达人。妙年弄柔翰，弱冠偶良晨。
擢第文昌阁，还家沧海滨。寸心何所望，东掖有贤臣。

卷_20【晚次东亭献郑州宋使君文】

储光羲

自初宾上国，乃到邹人乡。曾点与曾子，俱升阙里堂。

· 全唐诗 ·

武皇恢大略，逸翮思寥廓。三居清宪台，两拜文昌阁。
为道既贞信，处名犹謇谔。铁柱励风威，锦轴含光辉。
夜闻持简立，朝看伏奏归。洞门清佩响，广路玉珂飞。
骧首入丹掖，抁空趋太微。丝纶逢圣主，出入飘华组。
愔愔宿帝梧，侃侃居文府。海内语三独，朝端谋六户。
善计在弘羊，清严归仲举。侍郎跨方朔，中丞蔑周处。
天眷择循良，惟贤降宠章。分符指聊摄，为政本农桑。
籍籍歌五袴，祁祁颂千箱。随车微雨洒，逐扇清风飏。
既以迁列国，复兹邻帝乡。褰帷乃仍旧，坐啸非更张。
居敬物无扰，履端人自康。薄游出京邑，引领东南望。
林晚鸟雀噪，田秋稼穡黄。成皋天地险，广武征战场。
道丧苦兵赋，时来开井疆。霏霏渠门色，旖旎制岩光。
徒念京索近，独悲溱洧长。大明潜照耀，淑慝自昭彰。
昔岁幸西土，今兹归洛阳。同焉知郑伯，当辅我周王。

卷_21【秋次霸亭寄申大】

储光羲

橘柚植寒陵，芙蓉蒂修坂。无言不得意，得意何由展。
况我行且徒，而君往犹蹇。既伤人事近，复言天道远。
薄暮入空亭，中夜不能饭。南听鸿雁尽，西见招摇转。
千门汉王宫，百里周王苑。杲杲初景出，油油鲜云卷。
会朝幸岁正，校猎从新獮。念君久京国，双涕如露泫。
无人荐子云，太息竟谁辨。

· 全唐诗 ·

卷_22【舟中别武金坛】

储光羲

曰予轻皎洁，坦率宾混元。忽乃异群萃，高歌信陵门。
信陵好宾客，清夜开华轩。月光丽池阁，野气浮林园。
偶坐烂明星，归志潜崩奔。漾舟清潭里，慰我别离魂。
落日下西山，左右惨无言。萧条风雨散，窅霭江湖昏。
秋荷尚幽郁，暮鸟复翩翻。纸笔亦何为，写我心中冤。

卷_23【巩城东庄道中作】

储光羲

北陵散寒鸟，西山照初日。婉娈晋阳京，踟蹰野人室。
南轩草间去，后乘林中出。霭霭长路暖，迟迟狭路归。
蜉蝣时蔽月，枳棘复伤衣。城上东风起，河边早雁飞。
夏王纪冬令，殷人乃正月。涯口度新云，山阴留故雪。
幸逢耆耋话，馀待亲邻别。总辔出丛薄，歇鞍登峻隅。
春源既荡潏，伏战亦睢盱。未获遵平道，徒言信薄夫。

卷_24【赴冯翊作】

储光羲

本自江海人，且无寥廓志。大明耀天宇，霭霭风雨被。

· 全唐诗 ·

迢递别荆吴，飘飘涉沂泗。广川俟舟楫，峻坂伤骐驎。
蹭蹬失归道，崎岖从下位。西出太华阴，北走少梁地。
葱茏墟落色，泱泱关河气。耻从侠烈游，甘为刀笔吏。
宝剑茱萸匣，岂忘知音贵。大道且泛然，沉浮未云异。

卷_25【晚霁中园喜赦作】

储光羲

五月黄梅时，阴气蔽远迩。浓云连晦朔，菰菜生邻里。
落日烧霞明，农夫知雨止。几悲衽席湿，长叹垣墙毁。
曩朗天宇开，家族跃以喜。涣汗发大号，坤元更资始。
散衣出中园，小径尚滑履。池光摇万象，倏忽灭复起。
嘉树如我心，欣欣岂云已。

卷_26【观范阳递俘】

储光羲

北河旄星陨，鬼方獯林胡。群师舞弓矢，电发归燕墟。
皇皇轩辕君，赞赞皋陶谟。方思壮军实，远近递生俘。
车马践大逵，合沓成深渠。牧人过橐驼，校正引騊駼。
烈风朝送寒，云雪霭天隅。草木同一色，谁能辨荣枯。
四履封元戎，百金酬勇夫。大邦武功爵，固与炎皇殊。

· 全唐诗 ·

卷_27【次天元十载华阴发兵，作时有郎官点发】

储光羲

鬼方生猓狁，时寇卢龙营。帝念霍嫫姚，诏发咸林兵。
天星下文阁，简师临我城。三陌观勇夫，五饵谋长缨。
雷野大车发，震云灵鼓鸣。太华色莽苍，清渭风交横。
胡马悲雨雪，诗人歌旆旌。阏氏为女奴，单于作边氓。
神皇麒麟阁，大将不书名。

卷_28【送丘健至州敕放作时任下邳县】

储光羲

太史登观台，天街耀旄头。大君忽霆震，诏爵冠军侯。
南必梁孙源，西将圉昆丘。河陇征击卒，虎符到我州。
朝集咸林城，师言乱啁啾。杀气变木德，凜凜如高秋。
元戎启神皇，庙堂发嘉谋。息兵业稼穡，归马复休牛。
和风开阴雪，大耀中天流。欢声殷河岳，涵荡非烟浮。
邦牧新下车，德礼彼毗沬。乾坤日交泰，吾亦遂优游。

卷_29【登商丘】

储光羲

河水日夜流，客心多殷忧。维梢历宋国，结缆登商丘。

· 全唐诗 ·

汉皇封子弟，周室命诸侯。摇摇世祀怨，伤古复兼秋。
鸣鸿念极浦，征旅慕前俦。太息梁王苑，时非牧马游。

卷_30【群鸦咏】

储光羲

新宫骊山阴，龙袞时出豫。朝阳照羽仪，清吹肃逵路。
群鸦随天车，夜满新丰树。所思在腐馀，不复忧霜露。
河低宫阁深，灯影鼓钟曙。缤纷集寒枝，矫翼时相顾。
冢宰收琳琅，侍臣尽鸳鹭。高举摩太清，永绝矜缴惧。
兹禽亦翱翔，不以微小故。

卷_31【尚书省受誓诫贻太庙裴丞】

储光羲

皇家有恒宪，斋祭崇明祀。严车伊洛间，受誓文昌里。
沉沉云阁见，稍稍城乌起。曙色照衣冠，虚庭鸣剑履。
裴回念私觐，怅望临清汜。点翰欲何言，相思从此始。

卷_32【夏日寻蓝田唐丞登高宴集】

储光羲

东望春明门，驾言聊出游。南行小径尽，绿竹临清流。

· 全唐诗 ·

君出罢六安，居此澹忘忧。园林与城市，闾里随人幽。
披颜辟衡闱，置酒登崇丘。山河临咫尺，宇宙穷寸眸。
是时春载阳，佳气满皇州。宫殿碧云里，鸳鸯初命俦。
良辰方在兹，志士安得休。成名苟有地，何必东陵侯。

卷_33【田家即事答崔二东皋作四首】

储光羲

玄鸟双双飞，杏林初发花。煦妪命僮仆，可以树桑麻。
清旦理犁锄，日入未还家。

有客山中至，言传故人讯。荡漾敷远情，飘飘吐清韵。
猗欤春皋上，无乃成秋兴。

念别求须臾，忽至嚶鸣时。菜田烧故草，初树养新枝。
所寓非幽深，梦寐相追随。

依依亲陇亩，寂寂无邻里。不闻鸡犬音，日见和风起。
赖君遗掞藻，忧来散能弭。

· 全唐诗 ·

第一百三十八卷

卷_1【敬酬陈掾亲家翁秋夜有赠】

储光羲

大姬配胡公，位乃三恪宾。盛德百代祀，斯言良不泯。
敬仲为齐卿，当国名益震。仲举登宰辅，太丘荣缙绅。
武皇受瑶图，爵土封其新。繁祉既骤集，裔孙生贤臣。
特达逾珪璋，节操方松筠。云汉一矫翼，天池三振鳞。
曳裾朝赤墀，酌醴侍紫宸。大君锡车马，时复过平津。
言则广台阶，道亦资天均。清秋忽高兴，震藻若有神。
曜曜趋宫廷，洸洸迈徐陈。镐京既赐第，门巷交朱轮。
方将袭伊皋，永以崇夏殷。宗党无远近，敬恭依仁人。
雪尽宇宙暄，雁归沧海春。沉吟白华颂，帝閤降丝纶。
驿骑及芜城，相逢在郊野。别离旷南北，谴谪罹苦辛。
昼游还荆吴，迷方客咸秦。惟贤惠重义，男女期嘉姻。
梧桐生朝阳，鸚鵡鸣萧晨。岂不畏时暮，坎壈无与邻。
中夜凉风来，顾我阙音尘。琼瑶不遐弃，寤寐如日新。

· 全唐诗 ·

卷_2【苏十三瞻登玉泉寺峰入寺中见赠作】

储光羲

庆门叠华组，盛列钟英彦。贞信发天姿，文明叶邦选。
为情贵深远，作德齐隐见。别业在春山，怀归出芳甸。
逖听多时友，招邀及浮贱。朝沿霸水穷，暮瞩蓝田遍。
百花照阡陌，万木森乡县。涧净绿萝深，岩暄新鸟转。
依然造华薄，豁尔开灵院。淹留火禁辰，愉乐弦歌宴。
肃肃列樽俎，锵锵引缨弁。天籁激微风，阳光轹奔箭。
以兹小人腹，不胜君子馔。是日既低迷，中宵方眊眩。
枕上思独往，胸中理交战。碧云暗雨来，旧原芳色变。
欢然自此绝，心赏何由见。鸿濛已笑云，列缺仍挥电。
忽与去人远，俄逢归者便。想像玉泉宫，依稀明月殿。
峰峦若登陟，水木以游衍。息心幸自忘，点翰仍留眷。
恨无荆文璧，以答丹青绚。

卷_3【酬李处士山中见赠】

储光羲

厥初游太学，相与极周旋。含采共朝暮，知言同古先。
孟阳题剑阁，子云献甘泉。斯须旷千里，婉婉将十年。
今来艳阳月，好鸟鸣翩翩。同声既求友，不肖亦怀贤。
引领迟芳信，果枉瑶华篇。成颂非其德，高文徒自妍。

· 全唐诗 ·

声尘邈超越，比兴起孤绝。始信郢中人，乃能歌白雪。
跂予北堂夜，摇笔酬明哲。绿竹动清风，层轩静华月。
想像南山下，恬然谢朝列。犹恐鶗鴂鸣，坐看芳草歇。
邀以青松色，同之白华洁。永愿登龙门，相将持此节。

卷_4【同诸公秋日游昆明池思古】

储光羲

仆人理车骑，西出金光逵。苍苍白帝郊，我将游灵池。
太阴连晦朔，雨与天根违。凄风披田原，横污益山陂。
农畯尽颠沛，顾望稼穡悲。皇灵恻群眚，神政张天维。
坤纪戮屏翳，元纲扶逶迤。回塘清沧流，大曜悬金晖。
秋色浮浑沌，清光随涟漪。豫章尽莓苔，柳杞成枯枝。
骤闻汉天子，征彼西南夷。伐棘开洪渊，秉旄训我师。
震云灵鼙鼓，照水蛟龙旂。锐士千万人，猛气如熊羆。
刑罚一以正，干戈自有仪。坐作河汉倾，进退楼船飞。
羽发鸿雁落，桡动芙蓉披。峨峨三云宫，肃肃振旅归。
恶德忽小丑，器用穷地赀。上兵贵伐谋，此道不能为。
吁哉蒸人苦，始曰征伐非。穆穆轩辕朝，耀德守方陲。
君臣日安闲，远近无怨思。石鲸既蹭蹬，女牛亦流离。
獭獭游渚隅，葭芦生漭湄。坎埴四十里，填游今已微。
江伯方翱翔，天吴亟往来。桑榆惨无色，伫立暮霏霏。
老幼樵木还，宾从回鞶鞿。帝梦鲜鱼索，明月当报时。

· 全唐诗 ·

卷_5【同诸公登慈恩寺塔】

储光羲

金祠起真宇，直上青云垂。地静我亦闲，登之秋清时。
苍芜宜春苑，片碧昆明池。谁道天汉高，逍遥方在兹。
虚形宾太极，携手行翠微。雷雨傍杳冥，鬼神中躩踞。
灵变在倏忽，莫能穷天涯。冠上阖闾开，履下鸿雁飞。
宫室低迢迢，群山小参差。俯仰宇宙空，庶随了义归。
崩岩非大厦，久居亦以危。

卷_6【同诸公秋霁曲江俯见南山】

储光羲

天静终南高，俯映江水明。有若蓬莱下，浅深见澄瀛。
群峰悬中流，石壁如瑶琼。鱼龙隐苍翠，鸟兽游清泠。
菰蒲林下秋，薜荔波中轻。山戛浴兰趾，水若居云屏。
岚气浮渚宫，孤光随曜灵。阴阴豫章馆，宛宛百花亭。
大君及群臣，宴乐方嚶鸣。吾党二三子，萧辰怡性情。
逍遥沧洲时，乃在长安城。

卷_7【同诸公送李云南伐蛮】

储光羲

昆明滨滇池，蠢尔敢逆常。天星耀鉞钺，吊彼西南方。

· 全唐诗 ·

冢宰统元戎，太守齿军行。囊括千万里，矢谟在庙堂。
耀耀金虎符，一息到炎荒。蒐兵自交趾，芟舍出泸阳。
群山高崭岩，凌越如鸟翔。封豕骤跼伏，巨象遥披攘。
回溪深天渊，揭厉逾舟梁。玄武扫孤蜮，蛟龙除方良。
雷霆随神兵，礧礧动穹苍。斩伐若草木，系纆同犬羊。
馀丑隐弭河，啁啾乱行藏。君子恶薄险，王师耻重伤。
广车设置梁，太白收光芒。边吏静县道，新书行纪纲。
剑关掉鞅归，武弁朝建章。龙楼加命服，獬豸拥秋霜。
邦人颂灵旗，侧听何洋洋。京观在七德，休哉我神皇。

卷_8【奉和韦判官献侍郎叔除河东采访使】

储光羲

天卿小冢宰，道大名亦大。丑正在权臣，建旗千里外。
楚山俯江汉，汴水连谯沛。两持方伯珪，再转诸侯盖。
恬淡轻黜陟，优游邈千载。乾象变台衡，群贤尽交泰。
聿徕股肱郡，河岳即襟带。盛德滋冀方，仁风清汾浍。
四封尽高足，相府轺车最。超超青云器，婉婉竹林会。
贱士敢知言，成颂文明代。燕雀依大厦，期之保贞悔。

卷_9【同王十三维哭殷遥】

储光羲

生理无不尽，念君在中年。游道虽未深，举世莫能贤。

· 全唐诗 ·

筮仕苦贫贱，为客少田园。膏腴不可求，乃在许西偏。
四邻尽桑柘，咫尺开墙垣。内艰未及虞，形影随化迁。
茅茨俯苫盖，双殡两楹间。时闻孤女号，迥出陌与阡。
慈乌乱飞鸣，猛兽亦以跼。故人王夫子，静念无生篇。
哀乐久已绝，闻之将泫然。太阳蔽空虚，雨雪浮苍山。
迢递亲灵柩，顾予悲绝弦。处顺与安时，及此乃空言。

卷_10【贻丁主簿仙芝别】

储光羲

赫赫明天子，翘翘群秀才。昭昭皇宇广，隐隐云门开。
摇曳君初起，联翩予复来。兹年不得意，相命游灵台。
骅骝多逸气，琳琅有清响。联行击水飞，独影凌虚上。
关河施芳听，江海徼新赏。敛衽归故山，敷言播天壤。
云峰虽有异，楚越幸相亲。既别复游处，道深情更殷。
下愚忝闻见，上德犹逡迍。偃仰东城曲，楼迟依水滨。
脱巾从会府，结绶归海裔。亲知送河门，邦族迎江澨。
夫子安恬淡，他人怅迢递。飞舲既眇然，洲渚徒亏蔽。
人谋固无准，天德谅难知。高名处下位，逸翮栖卑枝。
去去水中沚，摇摇天一涯。蓬壶不可见，来泛跃龙池。

卷_11【京口送别王四谊】

储光羲

江上枫林秋，江中秋水流。清晨惜分袂，秋日尚同舟。

· 全唐诗 ·

落潮洗鱼浦，倾荷枕驿楼。明年菊花熟，洛东泛觴游。

卷_12【同房宪部应旋】

储光羲

衡山法王子，慧见息诸苦。落发自南州，燕居在西土。
养正不因晦，得中宁患旅。旷然长虚闲，即理寄行补。
四句了自性，一音亦非取。橘柚故园枝，随人植庭户。
我地少安住，念天时启处。宪卿文昌归，愉悦来晤语。
车骑践香草，仆人沐花雨。长风散繁云，万里静天宇。
起灭信易觉，清真知有所。逍遥高殿阴，六月无炎暑。
微言发新偈，粲粲如悬圃。直心视惠光，在此大法鼓。

卷_13【奉别长史庾公太守徐公应召】

储光羲

烈风起江汉，白浪忽如山。方伯骤勤王，杞人亦忧天。
豐镐顷霾晦，云龙召我贤。车骑北艰苦，骸惶西溯沿。
水灵静湍濑，猛兽趋后先。龙楼开新阳，万里出云间。
宇宙既焜耀，崇德济巨川。受命在神宗，振兵犹轩辕。
煌煌逾涿鹿，穆穆更坤元。明王朝太阶，远迓望嘉言。
游子淡何思，江湖将永年。

· 全唐诗 ·

卷_14【狱中贻姚张薛李郑柳诸公】

储光羲

直道时莫亲，起羞见谗口。舆人是非怪，西子言有咎。
诬善不足悲，失听一何丑。大来敢遐望，小往且虚受。
中夜囹圄深，初秋縲绁久。疏萤出暗草，朔风鸣衰柳。
河汉低在户，蟪蛄垂向牖。雁声远天末，凉气生霁后。
负户愁读书，剑光忿冲斗。哀哀害神理，恻恻伤慈母。
妻子垂涕泣，家僮日奔走。书词苦人吏，馈食劳交友。
寒服犹未成，繁霜渐将厚。吉凶问詹尹，倚伏信北叟。
鬼哭知己冤，鸟言诚所诱。诸公深惠爱，朝夕相左右。
束湿虽欲操，钩金庶无负。伤罗念摇翩，跼足思骧首。
瑾瑜颇匿瑕，邦国方含垢。眷言出深阱，永日常携手。

卷_15【贻鼓吹李丞，时信安王北伐，李公王之所器者也】

储光羲

北伐昧天造，王师示有征。辕门统元律，帝室命宗英。
灵威方首事，仗钺按边城。膏雨被春草，黄云浮太清。
文儒托后乘，武旅趋前旌。出车发西洛，营军临北平。
曰予深固陋，志气颇纵横。尝思骠骑幕，愿逐嫖姚兵。
惟贤美无度，海内依扬声。河间旧相许，车骑日逢迎。

· 全唐诗 ·

折节下谋士，深心论客卿。忠言虽未列，庶以知君诚。

卷_16【贻王侍御出台掾丹阳】

储光羲

高高琅琊台，台下生菌簕。照车十二乘，光彩不足谕。
既当少微星，复隐高山雾。金丘华阳下，仙伯养晦处。
茅茨对三峰，梧桐开一路。神溪绕皋陆，樵牧自成趣。
时登青冥游，若从天江度。墟里献薇蕨，群公致衣缕。
深沉复清净，偃仰视太素。猛兽识宾仆，赭霞知早暮。
峨峨云龙开，忽有方伯遇。达人无不可，壮志且驰骛。
融泄长鸡鸣，缤纷大鵬翥。赤墀高削岗，一见如三顾。
礼服正邦祀，刑冠肃王度。三辰明昭代，光启玄元祚。
章台收杞梓，太液满鹓鹭。丰泽耀纯仁，八方晏黔庶。
沉沉阊阖起，殷殷蓬莱曙。旌戟俨成行，鸡人传发煦。
翔翼一如鹖，百辟莫不惧。清庙奉烝尝，灵山扈銮辂。
天街时蹴踘，直指宴棗栢。四月纯阳初，雷雨始奋豫，
逆星孛皇极，鈇钺静天步。豐镐舒曜灵，干戈藏武库。
析柵增广运，直道有好恶。回迹清宪台，传骑东南去。
列城异畴昔，近饒寡徒御。缠绵西关道，婉孌新丰树。
伊洛不敢息，淮河任沿溯。乡亭茱萸津，先后非疏附。
炎时方怵惕，有若践霜露。惆怅长岑长，寂寞梁王傅。
纷吾家延州，结友在童孺。岑阳沐天德，邦邑持民务。
踟躕望朝阴，如何复沦误。牙旷三千里，击轅非所慕。
秋涛联沧溟，舟楫凑北固。江汜日绵眇，朝夕空寐寤。

· 全唐诗 ·

中洞松栝新，东皋阡陌故。馀辉方焜耀，可以欢邑聚。
南华在濠上，谁辩魏王瓠。登陟芙蓉楼，为我时一赋。

卷_17【贻刘高士别】

储光羲

夙驾出东城，城傍早霞散。初日照龙阙，峨峨在天半。
壮哉丽百常，美矣崇两观。俯视趋朝客，簪珥何璀璨。
而我送将归，裴回霸陵岸。北云去吴越，南雁离江汉。
伊昔蹈丘园，翩翩理文翰。高谈闵仲叔，逸气刘公干。
每言竹柏贞，尝轻朝市玩。山昼猿狖静，溪曛鱼鸟乱。
宁止卧崆峒，直云期汗漫。圣君既理历，族士咸炳焕。
矫首来天池，振羽泛漪澜。元淑命不达，伯鸾吟可叹。
东去姑苏台，乃过陟阳馆。舍辔函关道，浮舟沧海畔。
耳目旷暄凉，怀抱盈悲惋。沉沉青岁晚，霭霭秋云换。
自言永遁栖，无复从羁绊。挥手谢知己，知己莫能赞。

卷_18【山中贻崔六琪华】

储光羲

恍惚登高岭，裴回看落日。遥想仲长园，如亲幼安室。
春渚菖蒲登，山中拨谷鸣。相思不道远，太息未知情。
意君来此地，时复疏林薄。中夜扫闲门，迎晨闭菌阁。

· 全唐诗 ·

屣履清池上，家童奉信归。忧随落花散，目送归云飞。
故交在天末，心知复千里。无人暂往来，独作中林士。

卷_19【贻余处士】

储光羲

故园至新浦，遥复未百里。北望是他邦，纷吾即游士。
潮来津门启，罢楫信流水。客意乃成欢，舟人亦相喜。
迟迟菱荇上，泛泛菰蒲里。渐闻商旅喧，犹见凫鹭起。
市亭忽云构，方物如山峙。吴王昔丧元，隋帝又灭祀。
停舫一以眺，太息兴亡理。秋苑故池田，宫门新柳杞。
我行苦炎月，乃及清昊始。此地日逢迎，终思隐君子。
莫言异舒卷，形音在心耳。

卷_20【刘先生闲居】

储光羲

高第后归道，乃居玉华宫。逍遥人间世，不异浮丘公。
甘寝何秉羽，出门忽从戎。方将游昆仑，又欲小崆峒。
进退既在我，归来长安中。焚香东海君，侍坐西山童。
善行无辙迹，吾亦安能穷。但见神色闲，中心如虚空。
期之比天老，真德辅帝鸿。

· 全唐诗 ·

卷_21【京口题崇上人山亭】

储光羲

清旦历香岩，岩径纡复直。花林开宿雾，游目清霄极。
分明窗户中，远近山川色。金沙童子戏，香饭诸天食。
叫叫海鸿声，轩轩江燕翼。寄言清净者，閤閤徒自踣。

卷_22【朝邑蔡主簿期不会二首】

储光羲

下位日趋走，久之宾会疏。空迟偶词赋，所愧比园庐。
朝念池上酌，暮逢林下书。方将固封守，暂欲混畋渔。
衰柳隐长路，秋云满太虚。遥遥望左右，日入未回车。

日入清风至，知君在西偏。车舆既成列，宾仆复能贤。
迢递下墟坂，逍遥看井田。苍山起暮雨，极浦浮长烟。
服义大如志，交欢数尽年。宁言十馀里，不见空来还。

卷_23【巩城南河作寄徐三景晖】

储光羲

初年雨候迟，巩洛河流小。摇摇芳草岸，屡见春山晓。

· 全唐诗 ·

清露洗云林，轻波戏鱼鸟。唯言故人远，不念乡川眇。
舟楫去濛回，湍湫行奔峭。寄书千里路，莫道南鸿少。

卷_24【贻阎处士防卜居终南】

储光羲

春风摇杂树，言别还江汜。坚冰生绿潭，又客三千里。
兆梦唯颜色，悬情乃文史。涤耳贵清言，披欢迟玉趾。
秦城疑旧庐，伫立问焉如。稚子跪而说，还山将隐居。
竹林既深远，松宇复清虚。迹迴事多逸，心安趣有馀。
石门动高韵，草堂新著书。鸞飞久超绝，蹇足空踌躇。
犹有昔时意，望君当照车。驱车当六国，何以须潜默。
圣主常征贤，群公每举德。此时方独往，身志将何欲。
愿谢山中人，回车首归躅。

卷_25【新丰作贻殷四校书】

储光羲

汉皇思旧邑，秦地作新丰。南出华阳路，西分长乐宫。
安知天地久，不与昔年同。鸡犬暮声合，城池秋霁空。
纷吾从此去，望极咸阳中。不见芸香阁，徒思文雅雄。

· 全唐诗 ·

卷_26【华阳作贻祖三咏】

储光羲

朝行敷水上，暮出华山东。高馆宿初静，长亭秋转空。
日余久沦泊，重此闻霜风。淅沥入溪树，飕飕惊夕鸿。

凄然望伊洛，如见息阳宫。旧识无高位，新知尽固穷。
夫君独轻举，远近善文雄。岂念千里驾，崎岖秦塞中。

卷_27【贻袁三拾遗谪作】

储光羲

倾盖洛之滨，依然心事亲。龙门何以峻，曾是好词人。
珥笔朝文陛，含章讽紫宸。帝城多壮观，被服长如春。

天子俭为德，而能清约身。公卿尽虚位，天下自趣尘。
如君物望美，令德声何已。高帝黜儒生，文皇谪才子。

朝廷非不盛，谴谪良难恃。路出大江阴，川行碧峰里。
斯言徒自玷，白玉岂为滓。希声尽众人，深识唯知己。

知己怨生离，悠悠天一涯。寸心因梦断，孤愤为年移。
花满芙蓉阙，春深朝夕池。空令千万里，长望白云垂。

· 全唐诗 ·

卷_28【洛中贻朝校书衡，朝即日本人也】

储光羲

万国朝天中，东隅道最长。吾生美无度，高驾仕春坊。
出入蓬山里，逍遥伊水傍。伯鸾游太学，中夜一相望。
落日悬高殿，秋风入洞房。屡言相去远，不觉生朝光。

卷_29【贻崔太祝】

储光羲

天都分礼阁，肃肃临清渠。春山照前屏，高槐荫内除。
惟贤尚廩禄，弟去兄来居。文雅更骧首，风流信有馀。
中年幸从事，乃遇两吹嘘。何以知君子，交情复淡如。

卷_30【贻王处士子文】

储光羲

春草生洞渚，春风入上林。春皋有黄鹤，抚翮未扬音。
王屋尝嘉遁，伊川复陆沉。张弦鸛鸡弄，闭室蓬蒿深。
避地歌三乐，游山赋九吟。大君思左右，无乃化黄金。

· 全唐诗 ·

卷_31【献华阴罗丞别】

储光羲

华山薄游者，玄发当青春。道德同仙吏，尊卑即丈人。
县城俯京路，获见官舍里。淹留琼树枝，谗浪春泉水。
昔余在天目，总角奉游从。寒暑递来往，今复莲花峰。
别情无远近，道别方愁予。孰想古人言，乃知悲风雨。

卷_32【闲居】

储光羲

薄游何所愧，所愧在闲居。亲故不来往，中园时读书。
步栏滴馀雪，春塘抽新蒲。梧桐渐覆井，时鸟自相呼。
悠然念故乡，乃在天一隅。安得如浮云，来往方须臾。

卷_33【送恂上人还吴】

储光羲

洛城本天邑，洛水即天池。君王既行幸，法子复来仪。
虚室香花满，清川杨柳垂。乘闲道归去，远意谁能知。

· 全唐诗 ·

卷_34【送周十一】

储光羲

秋风陨群木，众草下严霜。复问子何如，自言之帝乡。
岂无亲所爱，将欲济时康。握手别征驾，返悲岐路长。

卷_35【新丰主人】

储光羲

新丰主人新酒熟，旧客还归旧堂宿。满酌香含北砌花，
盈尊色泛南轩竹。云散天高秋月明，东家少女解秦箏。
醉来忘却巴陵道，梦中疑是洛阳城。

卷_36【登戏马台作】

储光羲

君不见宋公仗钺诛燕后，英雄踊跃争趋走。
小会衣冠吕梁壑，大征甲卒碣碣口。天门神武树元勋，
九日茱萸飨六军。泛泛楼船游极浦，摇摇歌吹动浮云。
居人满目市朝变，霸业犹存齐楚甸。泗水南流桐柏川，
沂山北走琅琊县。沧海沉沉晨雾开，彭城烈烈秋风来。

· 全唐诗 ·

少年自古未得意，日暮萧条登古台。

卷_37【贻从军行】

储光羲

取胜小非用，来朝明光殿。东平不足先，梦出凤林间。
梦还沧海阙，万里尽阴色。岂为我离别。
马上吹笛起寒风，道傍舞剑飞春雪。男儿悬弧非一日，
君去成高节。

卷_38【酬李壶关奉使行县忆诸公】

储光羲

青枫江上沧浪吟，白月宫中鸂鶒林。非有净清心，
同道同房若断金。离居忽有云山意，清韵遥转舟楫事。
去时能忆竹园游，来时莫忘桃园记。

卷_39【蔷薇】

储光羲

袅袅长数寻，青青不作林。一茎独秀当庭心，

· 全唐诗 ·

数枝分作满庭阴。春日迟迟欲将半，庭影离离正堪玩。
枝上莺娇不畏人，叶底蛾飞自相乱。秦家女儿爱芳菲，
画眉相伴采葳蕤。高处红须欲就手，低边绿刺已牵衣。
蒲萄架上朝光满，杨柳园中暝鸟飞。连袂踏歌从此去，
风吹香气逐人归。

卷_40【同张侍御宴北楼】

储光羲

今之太守古诸侯，出入双旌垂七旒。朝览干戈时听讼，
暮延宾客复登楼。西山漠漠岷嶓色，北渚沉沉江汉流。
良宵清净方高会，绣服光辉联皂盖。鱼龙恍惚阶墀下，
云雾杳冥窗户外。水灵慷慨行泣珠，游女飘飘思解佩。
苍苍低月半遥城，落落疏星满太清。不分开襟悲楚奏，
愿言吹笛退胡兵。轩后青丘埋猨狴，周王白羽扫欃枪。
期君武节朝龙阙，余亦翱翔归玉京。

· 全唐诗 ·

第一百三十九卷

卷_1【临江亭五咏】

储光羲

晋家南作帝，京镇北为关。江水中分地，城楼下带山。
金陵事已往，青盖理无还。落日空亭上，愁看龙尾湾。

山横小苑前，路尽大江边。此地兴王业，无如宋主贤。
潮生建业水，风散广陵烟。直望清波里，只言别有天。

城头落暮晖，城外捣秋衣。江水青云挹，芦花白雪飞。
南州王气疾，东国海风微。借问商歌客，年年何处归。

古木啸寒禽，层城带夕阴。梁园多绿柳，楚岸尽枫林。
山际空为险，江流长自深。平生何以恨，天地本无心。

京山千里过，孤愤望中来。江势将天合，城门向水开。
落霞明楚岸，夕露湿吴台。去去无相识，陈皇安在哉。

· 全唐诗 ·

卷_2【饯张七琚任宗城即环之季也，同产八人俱以才名知】

储光羲

他日曾游魏，魏家馀趾存。可怜宫殿所，但见桑榆繁。
此去拜新职，为荣近故园。高阳八才子，况复在君门。

卷_3【留别安庆李太守】

储光羲

明牧念行子，又言悲解携。初筵方落日，醉止到鸣鸡。
过客来自北，大军居在西。丘家如讨逆，敢以庶盘溪。

卷_4【洛阳东门送别】

储光羲

东城别故人，腊月迟芳辰。不惜孤舟去，其如两地春。
花明洛阳苑，水绿小平津。是日不相见，莺声徒自新。

· 全唐诗 ·

卷_5【汉阳即事】

储光羲

楚国千里远，孰知方寸违。春游欢有客，夕寝赋无衣。
江水带冰绿，桃花随雨飞。九歌有深意，捐佩乃言归。

卷_6【泊江潭贻马校书】

储光羲

明月挂青天，遥遥如目前。故人游画阁，却望似云边。
水宿依渔父，歌声好采莲。采莲江上曲，今夕为君传。

卷_7【送沈校书吴中搜书】

储光羲

郊外亭皋远，野中岐路分。苑门临渭水，山翠杂春云。
秦阁多遗典，吴台访阙文。君王思校理，莫滞清江滨。

· 全唐诗 ·

卷_8【寒夜江口泊舟】

储光羲

寒潮信未起，出浦缆孤舟。一夜苦风浪，自然增旅愁。
吴山迟海月，楚火照江流。欲有知音者，异乡谁可求。

卷_9【苑外至龙兴院作】

储光羲

朝游天苑外，忽见法筵开。山势当空出，云阴满地来。
疏钟清月殿，幽梵静花台。日暮香林下，飘飘仙步回。

卷_10【题虬上人房】

储光羲

禅宫分两地，释子一为心。入道无来去，清言见古今。
江寒池水绿，山暝竹园深。别有中天月，遥遥散夕阴。

· 全唐诗 ·

卷_11【咏山泉（一作题山中流泉）】

储光羲

山中有流水，借问不知名。映地为天色，飞空作雨声。
转来深涧满，分出小池平。恬澹无人见，年年长自清。

卷_12【贻主客吕郎中（即皇太子赞谕）】

储光羲

上士既开天，中朝为得贤。青云方羽翼，画省比神仙。
委佩云霄里，含香日月前。君王傥借问，客有上林篇。

卷_13【京口留别徐大补阙赵二零陵】

储光羲

皇州月初晓，处处鼓钟喧。树出蓬莱殿，城开阖闾门。
近臣朝琐闼，词客向文园。独有三川路，空伤游子魂。

· 全唐诗 ·

卷_14【答王十三维】

储光羲

门生故来往，知欲命浮觴。忽奉朝青阁，回车入上阳。
落花满春水，疏柳映新塘。是日归来暮，劳君奏雅章。

卷_15【奉和中书徐侍郎中书省玩白云寄颖阳赵大】

储光羲

青阙朝初退，白云遥在天。非关取雷雨，故欲伴神仙。
泛滟陂池曲，飘飘琐闥前。犹多远山意，幸入侍臣篇。

卷_16【和张太祝冬祭马步】

储光羲

故坛何肃肃，中野自无喧。烈火见陈信，颺言闻永存。
房星隐曙色，朔风动寒原。今日歌天马，非关征大宛。

· 全唐诗 ·

卷_17【祭风伯坛应张太祝作】

储光羲

圣主御青春，纶言命使臣。将修风伯祀，更福太平人。
帘幕宵联事，坛场晓降神。帝心矜动物，非为属车人。

卷_18【寻徐山人遇马舍人】

储光羲

泊舟伊川右，正见野人归。日暮春山绿，我心清且微。
岩声风雨度，水气云霞飞。复有金门客，来参萝薜衣。

卷_19【夜观妓】

储光羲

白雪宜新舞，清宵召楚妃。娇童携锦荐，侍女整罗衣。
花映垂鬟转，香迎步履飞。徐徐敛长袖，双烛送将归。

· 全唐诗 ·

卷_20【洛桥送别】

储光羲

河桥送客舟，河水正安流。远见轻桡动，遥怜故国游。
海禽逢早雁，江月值新秋。一听南津曲，分明散别愁。

卷_21【秦中送人覲省】

储光羲

二月清江外，遥遥饯故人。南山晴有雪，东陌霁无尘。
骑别章台晚，舟行洛水春。知君梁苑去，日见白华新。

卷_22【洛中送人还江东】

储光羲

洛城春雨霁，相送下江乡。树绿天津道，山明伊水阳。
孤舟从此去，客思一何长。直望清波里，唯馀落日光。

· 全唐诗 ·

卷_23【送姚六昆客任会稽何大蹇任孟县】

储光羲

越城临渤解，晋国在河汾。仙绶两乡意，青郊一路分。
野棠春未发，田雀暮成群。他日思吴会，尝因西北云。

卷_24【洛潭送人覲省】

储光羲

清洛带芝田，东流入大川。舟轻水复急，别望杳如仙。
细草生春岸，明霞散早天。送君唯一曲，当是白华篇。

卷_25【送人随大夫和蕃】

储光羲

西方有六国，国国愿来宾。圣主今无外，怀柔遣使臣。
大夫开幕府，才子作行人。解剑聊相送，边城二月春。

· 全唐诗 ·

卷_26【仲夏饯魏四河北覲叔】

储光羲

落日临御沟，送君还北州。树凉征马去，路暝归人愁。
吴岳夏云尽，渭河秋水流。东篱摘芳菊，想见竹林游。

卷_27【送人寻裴斐】

储光羲

柱史回清宪，谪居临汉川。迟君千里驾，方外赏云泉。
路断因春水，山深隔暝烟。湘江见游女，寄摘一枝莲。

卷_28【陇头水送别】

储光羲

相送陇山头，东西陇水流。从来心胆盛，今日为君愁。
暗雪迷征路，寒云隐戍楼。唯馀旌旆影，相逐去悠悠。

· 全唐诗 ·

卷_29【送王上人还襄阳】

储光羲

朝看法云散，知有至人还。送客临伊水，行车出故关。
天花满南国，精舍在空山。虽复时来去，中心长日闲。

卷_30【官庄池观竞渡】

储光羲

落日吹箫管，清池发棹歌。船争先后渡，岸激去来波。
水叶藏鱼鸟，林花间绮罗。踟蹰仙女处，犹似望天河。

卷_31【重寄虬上人】

储光羲

一作云峰别，三看花柳朝。青山隔远路，明月空长霄。
鹄浴西江雨，鸡鸣东海潮。此情劳梦寐，况道双林遥。

· 全唐诗 ·

卷_32【蓝上茅茨期王维补阙】

储光羲

山中人不见，云去夕阳过。浅濑寒鱼少，丛兰秋蝶多。
老年疏世事，幽性乐天和。酒熟思才子，溪头望玉珂。

卷_33【大酺得长字韵时任安宜尉】

储光羲

大道启元命，时人居太康。中朝发玄泽，下国被天光。
明诏始端午，初筵当履霜。鼓鼙迎爽气，羽籥映新阳。
太守即悬圃，淮夷成葆疆。小臣惭下位，拜手颂灵长。

卷_34【同张侍御鼎和京兆萧兵曹华岁晚南园】

储光羲

公府传休沐，私庭效陆沉。方知从大隐，非复在幽林。
阙下忠贞志，人间孝友心。既将冠盖雅，仍与薜萝深。
寒变中园柳，春归上苑禽。池涵青草色，山带白云阴。
潘岳闲居赋，钟期流水琴。一经当自足，何用遗黄金。

· 全唐诗 ·

卷_35【奉酬张五丈垂赠】

储光羲

彩服去江汜，白云生大梁。星辰动异色，羔雁成新行。
日望天朝近，时忧郢路长。情言间藹轴，惠念及沧浪。
松柏以之茂，江湖亦自忘。贾生方吊屈，岂敢比南昌。

卷_36【秦中守岁】

储光羲

众星已穷次，青帝方行春。永感易成戚，离居难重陈。
阖门守初夜，燎火到清晨。或念无生法，多伤未出尘。
广庭日将晏，虚室自为宾。愿以桑榆末，常逢甲子新。

卷_37【献高使君大酺作】

储光羲

肃穆郊禋毕，工歌赏事并。三朝遵湛露，一道洽仁明。
布德言皆应，无为物自成。花添罗绮色，莺乱管弦声。
独有同高唱，空陪乐太平。

· 全唐诗 ·

卷_38【荥阳马氏二子】

储光羲

圣君封太岳，十月建行旂。辇路开千里，寒云霁九天。
故人多侍从，二子留伊川。河兗冰初合，关城月屡圆。
暝过荥水上，闻说郑卿贤。材蔽行人右，名居东里先。
制岩开别业，桑柘亦依然。待至金园侧，相将居一廛。

卷_39【观竞渡】

储光羲

大夫沉楚水，千祀国人哀。习棹江流长，迎神雨雾开。
标随绿云动，船逆清波来。下怖鱼龙起，上惊鳧雁回。
能令秋大有，鼓吹远相催。

卷_40【太学贻张筠】

储光羲

璧池忝门子，俄顷变炎凉。绿竹深虚馆，清流响洞房。
园林在建业，新友去咸阳。中夜鼓钟静，初秋漏刻长。
浮云开太室，华盖上明堂。空此远相望，劳歌还自伤。

· 全唐诗 ·

卷_41【田家即事】

储光羲

桑柘悠悠水蘸堤，晚风晴景不妨犁。
高机犹织卧蚕子，下坂饥逢饷饁妻。

杏色满林羊酪熟，麦凉浮垄雉媒低。
生时乐死皆由命，事在皇天志不迷。

卷_42【洛阳道五首献吕四郎中】

储光羲

洛水春冰开，洛城春水绿。朝看大道上，落花乱马足。

剧孟不知名，千金买宝剑。出入平津邸，自言娇且艳。

大道直如发，春日佳气多。五陵贵公子，双双鸣玉珂。

春风二月时，道傍柳堪把。上枝覆官阁，下枝覆车马。

洛水照千门，千门碧空里。少年不得志，走马游新市。

· 全唐诗 ·

卷_43【同武平一员外游湖】

储光羲

竹吹留歌扇，莲香入舞衣。前溪多曲渚，乘兴莫先归。

卷_44【长安道】

储光羲

鸣鞭过酒肆，袷服游倡门。百万一时尽，含情无片言。

西行一千里，暝色生寒树。暗闻歌吹声，知是长安路。

卷_45【江南曲四首】

储光羲

绿江深见底，高浪直翻空。惯是湖边住，舟轻不畏风。

逐流牵荇叶，缘岸摘芦苗。为惜鸳鸯鸟，轻轻动画桡。

日暮长江里，相邀归渡头。落花如有意，来去逐船流。

· 全唐诗 ·

隔江看树色，沿月听歌声。不是长干住，那从此路行。

卷_46【关山月】

储光羲

一雁过连营，繁霜覆古城。胡笳在何处，半夜起边声。

卷_47【玉真公主山居】

储光羲

山北天泉苑，山西凤女家。不言沁园好，独隐武陵花。

卷_48【沧浪峡（一作储嗣宗诗）】

储光羲

沧浪临古道，道上若成尘。自有沧浪峡，谁为无事人。

· 全唐诗 ·

卷_49【奉真观】

储光羲

真门迥向北，驰道直向西。
为与天光近，云色成虹霓。

卷_50【明妃曲四首】

储光羲

西行陇上泣胡天，南向云中指渭川。
毳幕夜来时宛转，何由得似汉王边。

胡王知妾不胜悲，乐府皆传汉国辞。
朝来马上箜篌引，稍似宫中闲夜时。

日暮惊沙乱雪飞，傍人相劝易罗衣。
强来前殿看歌舞，共待单于夜猎归。

彩骑双双引宝车，羌笛两两奏胡笳。
若为别得横桥路，莫隐宫中玉树花。

· 全唐诗 ·

卷_51【同武平一员外游湖五首时武貶金坛令】

储光羲

红荷碧筱夜相鲜，皂盖兰桡浮翠筵。
舟中对舞邯郸曲，月下双弹卢女弦。

青林碧屿暗相期，缓楫挥觥欲赋诗。
借问高歌凡几转，河低月落五更时。

朝来仙阁听弦歌，暝入花亭见绮罗。
池边命酒怜风月，浦口回船惜芰荷。

朦胧竹影蔽岩扉，淡荡荷风飘舞衣。
舟寻绿水宵将半，月隐青林人未归。

花潭竹屿傍幽蹊，画楫浮空入夜溪。
芰荷覆水船难进，歌舞留人月易低。

卷_52【题茅山华阳洞】

储光羲

华阳洞口片云飞，细雨濛濛欲湿衣。
玉箫遍满仙坛上，应是茅家兄弟归。

· 全唐诗 ·

卷_53【寄孙山人】

储光羲

新林二月孤舟还，水满清江花满山。
借问故园隐君子，时时来往住人间。

· 全唐诗 ·

第一百四十卷

卷_1【变行路难】

王昌龄

向晚横吹悲，风动马嘶合。前驱引旗节，千里阵云匝。
单于下阴山，砂砾空飒飒。封侯取一战，岂复念闺阁。

卷_2【塞下曲四首】

王昌龄

蝉鸣空桑林，八月萧关道。出塞入塞寒，处处黄芦草。
从来幽并客，皆共尘沙老。莫学游侠儿，矜夸紫骝好。

饮马渡秋水，水寒风似刀。平沙日未没，黯黯见临洮。
昔日长城战，咸言意气高。黄尘足今古，白骨乱蓬蒿。

奉诏甘泉宫，总征天下兵。朝廷备礼出，郡国豫郊迎。
纷纷几万人，去者无全生。臣愿节宫厩，分以赐边城。

· 全唐诗 ·

边头何惨惨，已葬霍将军。部曲皆相吊，燕南代北闻。
功勋多被黜，兵马亦寻分。更遣黄龙戍，唯当哭塞云。

卷_3【塞上曲】

王昌龄

秋风夜渡河，吹却雁门桑。遥见胡地猎，鞞马宿严霜。
五道分兵去，孤军百战场。功多翻下狱，士卒但心伤。

卷_4【从军行二首】

王昌龄

向夕临大荒，朔风轸归虑。平沙万里馀，飞鸟宿何处。
虏骑猎长原，翩翩傍河去。边声摇白草，海气生黄雾。
百战苦风尘，十年履霜露。虽投定远笔，未坐将军树。
早知行路难，悔不理章句。

秋草马蹄轻，角弓持弦急。去为龙城战，正值胡兵袭。
军气横大荒，战酣日将入。长风金鼓动，白露铁衣湿。
四起愁边声，南庭时伫立。断蓬孤自转，寒雁飞相及。
万里云沙涨，平原冰霰涩。惟闻汉使还，独向刀环泣。

· 全唐诗 ·

卷_5【少年行二首】

王昌龄

西陵侠少年，送客短长亭。青槐夹两道，白马如流星。
闻道羽书急，单于寇井陉。气高轻赴难，谁顾燕山铭。

走马远相寻，西楼下夕阴。结交期一剑，留意赠千金。
高阁歌声远，重门柳色深。夜阑须尽饮，莫负百年心。

卷_6【长歌行】

王昌龄

旷野饶悲风，飏飏黄蒿草。系马倚白杨，谁知我怀抱。
所是同袍者，相逢尽衰老。北登汉家陵，南望长安道。
下有枯树根，上有鼯鼠窠。高皇子孙尽，千载无人过。
宝玉频发掘，精灵其奈何。人生须达命，有酒且长歌。

卷_7【悲哉行】

王昌龄

勿听白头吟，人间易忧怨。若非沧浪子，安得从所愿。

· 全唐诗 ·

北上太行山，临风阅吹万。长云数千里，倏忽还肤寸。
观其微灭时，精意莫能论。百年不容息，是处生意蔓。
始悟海上人，辞君永飞遁。

卷_8【古意】

王昌龄

桃花四面发，桃叶一枝开。欲暮黄鹂啭，伤心玉镜台。
清筝向明月，半夜春风来。

卷_9【放歌行】

王昌龄

南渡洛阳津，西望十二楼。明堂坐天子，月朔朝诸侯。
清乐动千门，皇风被九州。庆云从东来，泱泱抱日流。

升平贵论道，文墨将何求。有诏征草泽，微诚将献谋。
冠冕如星罗，拜揖曹与周。望尘非吾事，入赋且迟留。

幸蒙国士识，因脱负薪裘。今者放歌行，以慰梁甫愁。
但营数斗禄，奉养每丰羞。若得金膏遂，飞云亦可俦。

· 全唐诗 ·

卷_10【越女（《乐府诗集》作《采莲曲》）】

王昌龄

越女作桂舟，还将桂为楫。湖上水渺漫，清江不可涉。
摘取芙蓉花，莫摘芙蓉叶。将归问夫婿，颜色何如妾。

卷_11【郑县宿陶太公馆中赠冯六元二】

王昌龄

儒有轻王侯，脱略当世务。本家蓝田下，非为渔弋故。
无何困躬耕，且欲驰永路。幽居与君近，出谷同所鹜。
昨日辞石门，五年变秋露。云龙未相感，干谒亦已屡。
子为黄绶羁，余忝蓬山顾。京门望西岳，百里见郊树。
飞雨祠上来，霭然关中暮。驱车郑城宿，秉烛论往素。
山月出华阴，开此河渚雾。清光比故人，豁达展心晤。
冯公尚戢翼，元子仍跼步。拂衣易为高，沦迹难有趣。
张范善终始，吾等岂不慕。罢酒当凉风，屈伸备冥数。

卷_12【听弹风入松阕赠杨补阙】

王昌龄

商风入我弦，夜竹深有露。弦悲与林寂，清景不可度。

· 全唐诗 ·

寥落幽居心，飕飕青松树。松风吹草白，溪水寒日暮。
声意去复还，九变待一顾。空山多雨雪，独立君始悟。

卷_13【缙氏尉沈兴宗置酒南溪留赠】

王昌龄

林色与溪古，深篁引幽翠。山尊在渔舟，棹月情已醉。
始穷清源口，壑绝人境异。春泉滴空崖，萌草拆阴地。

久之风榛寂，远闻樵声至。海雁时独飞，永然沧洲意。
古时青冥客，灭迹沦一尉。吾子踌躇心，岂其纷埃事。

缙峰信所克，济北余乃遂。齐物意已会，息肩理犹未。
卷舒形性表，脱略贤哲议。仲月期角巾，饭僧嵩阳寺。

卷_14【为张僊赠阎使臣】

王昌龄

哀哀献玉人，楚国同悲辛。泣尽继以血，何由辨其真。
赖承琢磨惠，复使光辉新。犹畏谗口疾，弃之如埃尘。

· 全唐诗 ·

卷_15【赠史昭】

王昌龄

东林月未升，廓落星与汉。是夕鸿始来，斋中起长叹。
怀哉望南浦，眇然夜将半。但有秋水声，愁使心神乱。
握中何为赠，瑶草已衰散。海鳞未化时，各在天一岸。

卷_16【秋山寄陈说言】

王昌龄

岩间寒事早，众山木已黄。北风何萧萧，兹夕露为霜。
感激未能寐，中宵时慨慷。黄虫初悲鸣，玄鸟去我梁。
独卧时易晚，离群情更伤。思君若不及，鸿雁今南翔。

卷_17【出郴山口至叠石湾野人室中寄张十一】

王昌龄

楸楠无冬春，柯叶连峰稠。阴壁下苍黑，烟含清江楼。
景开独沿曳，响答随兴酬。旦夕望吾友，如何迅孤舟。
叠沙积为岗，崩剥雨露幽。石脉尽横亘，潜潭何时流。
既见万古色，颇尽一物由。永与世人远，气还草木收。

· 全唐诗 ·

盈缩理无馀，今往何必忧。郴土群山高，耆老如中州。
孰云议舛降，岂是娱宦游。阴火昔所伏，丹砂将尔谋。
昨临苏耽井，复向衡阳求。同疚来相依，脱身当有筹。
数月乃离居，风湍成阻修。野人善竹器，童子能溪讴。
寒月波荡漾，羁鸿去悠悠。

卷_18【宿灞上寄侍御玙弟】

王昌龄

独饮灞上亭，寒山青门外。长云骤落日，桑枣寂已晦。
古人驱驰者，宿此凡几代。佐邑由东南，岂不知进退。
吾宗秉全璞，楚得璆琳最。茅山就一征，柏署起三载。
道契非物理，神交无留碍。知我沧溟心，脱略腐儒辈。
孟冬銮舆出，阳谷群臣会。半夜驰道喧，五侯拥轩盖。
是时燕齐客，献术蓬瀛内。甚悦我皇心，得与王母对。
贱臣欲干谒，稽首期殒碎。哲弟感我情，问易穷否泰。
良马足尚踠，宝刀光未淬。昨闻羽书飞，兵气连朔塞。
诸将多失律，庙堂始追悔。安能召书生，愿得论要害。
戎夷非草木，侵逐使狼狈。虽有屠城功，亦有降虏辈。
兵粮如山积，恩泽如雨霏。羸卒不可兴，碣地无足爱。
若用匹夫策，坐令军围溃。不费黄金资，宁求白璧赉。
明主忧既远，边事亦可大。荷宠务推诚，离言深慷慨。
霜摇直指草，烛引明光珮。公论日夕阻，朝廷蹉跎会。
孤城海门月，万里流光带。不应百尺松，空老钟山霭。

· 全唐诗 ·

卷_19【次汝中寄河南陈赞府】

王昌龄

汝山方联延，伊水才明灭。遥见入楚云，又此空馆月。
纷然驰梦想，不谓远离别。京邑多欢娱，衡湘暂沿越。
明湖春草遍，秋桂白花发。岂惟长思君，日夕在魏阙。

卷_20【同从弟销南斋玩月忆山阴崔少府】

王昌龄

高卧南斋时，开帷月初吐。清辉淡水木，演漾在窗户。
苒苒几盈虚，澄澄变今古。美人清江畔，是夜越吟苦。
千里其如何，微风吹兰杜。

卷_21【代扶风主人答】

王昌龄

杀气凝不流，风悲日彩寒。浮埃起四远，游子弥不欢。
依然宿扶风，沽酒聊自宽。寸心亦未理，长铗谁能弹。
主人就我饮，对我还慨叹。便泣数行泪，因歌行路难。
十五役边地，三回讨楼兰。连年不解甲，积日无所餐。

· 全唐诗 ·

将军降匈奴，国使没桑干。去时三十万，独自还长安。
不信沙场苦，君看刀箭瘢。乡亲悉零落，冢墓亦摧残。
仰攀青松枝，恸绝伤心肝。禽兽悲不去，路傍谁忍看。
幸逢休明代，寰宇静波澜。老马思伏枥，长鸣力已殫。
少年与运会，何事发悲端。天子初封禅，贤良刷羽翰。
三边悉如此，否泰亦须观。

卷_22【酬鸿胪裴主簿雨后北楼见赠（一作高适诗）】

王昌龄

暮霞照新晴，归云犹相逐。有怀晨昏暇，想见登眺目。
问礼侍彤襜，题诗访茅屋。高楼多古今，陈事满陵谷。
地久微子封，台馀孝王筑。裴回顾霄汉，豁达俯川陆。
远水对孤城，长天向乔木。公门何清静，列戟森已肃。
不叹携手稀，常思著鞭速。终当拂羽翰，轻举随鸿鹄。

卷_23【送任五之桂林】

王昌龄

楚客醉孤舟，越水将引棹。山为两乡别，月带千里貌。
羁谴同缁纶，僻幽闻虎豹。桂林寒色在，苦节知所效。

· 全唐诗 ·

卷_24【山中别庞十】

王昌龄

幽娟松筱径，月出寒蝉鸣。散发卧其下，谁知孤隐情。
吟时白云合，钓处玄潭清。琼树方杳霭，凤兮保其贞。

卷_25【留别伊阙张少府郭大都尉】

王昌龄

迁客就一醉，主人空金罍。江湖青山底，欲去仍裴回。
郭侯未相识，策马伊川来。把手相劝勉，不应老尘埃。
孟阳逢山旧，仙馆留清才。日晚劝趣别，风长云逐开。
幸随板舆远，负谴何忧哉。唯有仗忠信，音书报云雷。

卷_26【送韦十二兵曹】

王昌龄

县职如长缨，终日检我身。平明趋郡府，不得展故人。
故人念江湖，富贵如埃尘。迹在戎府掾，心游天台春。
独立浦边鹤，白云长相亲。南风忽至吴，分散还入秦。
寒夜天光白，海净月色真。对坐论岁暮，弦悲岂无因。

· 全唐诗 ·

平生驰驱分，非谓杯酒仁。出处两不合，忠贞何由伸。
看君孤舟去，且欲歌垂纶。

卷_27【东京府县诸公与綦毋潜李颀相送至白马寺宿】

王昌龄

鞍马上东门，裴回入孤舟。贤豪相追送，即棹千里流。
赤岸落日在，空波微烟收。薄宦忘机括，醉来即淹留。
月明见古寺，林外登高楼。南风开长廊，夏夜如凉秋。
江月照吴县，西归梦中游。

卷_28【送东林廉上人归庐山】

王昌龄

石溪流已乱，苔径人渐微。日暮东林下，山僧还独归。
昔为庐峰意，况与远公违。道性深寂寞，世情多是非。
会寻名山去，岂复望清辉。

卷_29【留别武陵袁丞】

王昌龄

皇恩暂迁谪，待罪逢知己。从此武陵溪，孤舟二千里。

· 全唐诗 ·

桃花遗古岸，金涧流春水。谁识马将军，忠贞抱生死。

卷_30【别刘谓】

王昌龄

天地寒更雨，苍茫楚城阴。一尊广陵酒，十载衡阳心。
倚仗不可料，悲欢岂易寻。相逢成远别，后会何如今。
身在江海上，云连京国深。行当务功业，策马何骎骎。

卷_31【岳阳别李十七越宾】

王昌龄

相逢楚水寒，舟在洞庭驿。具陈江波事，不异沦弃迹。
杉上秋雨声，悲切蒹葭夕。弹琴收馀响，来送千里客。
平明孤帆心，岁晚济代策。时在身未充，潇湘不盈画。
湖小洲渚联，澹淡烟景碧。鱼鳖自有性，龟龙无能易。
谴黜同所安，风土任所适。闭门观玄化，携手遗损益。

卷_32【留别岑参兄弟】

王昌龄

江城建业楼，山尽沧海头。副职守兹县，东南棹孤舟。

· 全唐诗 ·

长安故人宅，秣马经前秋。便以风雪暮，还为纵饮留。
貂蝉七叶贵，鸿鹄万里游。何必念钟鼎，所在烹肥牛。
为君啸一曲，且莫弹箜篌。徒见枯者艳，谁言直如钩。
岑家双琼树，腾光难为俦。谁言青门悲，俯期吴山幽。
日西石门峤，月吐金陵洲。追随探灵怪，岂不骄王侯。

卷_33【送刘沅虚归取宏词解】

王昌龄

太清闻海鹤，游子引乡眊。声随羽仪远，势与归云便。
青桂春再荣，白云暮来变。迁飞在礼仪，岂复泪如霰。

卷_34【巴陵别刘处士】

王昌龄

刘生隐岳阳，心远洞庭水。偃帆入山郭，一宿楚云里。
竹映秋馆深，月寒江风起。烟波桂阳接，日夕数千里。
袅袅清夜猿，孤舟坐如此。湘中有来雁，雨雪候音旨。

· 全唐诗 ·

卷_35【宿裴氏山庄】

王昌龄

苍苍竹林暮，吾亦知所投。静坐山斋月，清溪闻远流。
西峰下微雨，向晓白云收。遂解尘中组，终南春可游。

卷_36【淇上酬薛据兼寄郭微（一作高适诗）】

王昌龄

自从别京华，我心乃萧索。十年守章句，万里空寥落。
北上登蓟门，茫茫见沙漠。倚剑对风尘，慨然思卫霍。
拂衣去燕赵，驱马怅不乐。天长沧洲路，日暮邯郸郭。
酒肆或淹留，渔泽屡栖泊。独行备艰难，孰辞干鼎镬。
皇情念淳古，时俗何浮薄。理道须任贤，安人在求瘼。
故交负奇才，逸气包謇谔。隐轸经济策，纵横建安作。
才望忽先鸣，风期无宿诺。飘飘芳州县，迢递限言谑。
东驰眇贝丘，西顾弥虢略。淇水徒自深，浮云不堪托。
吾谋适可用，天道岂辽廓。不然买山田，一身与耕凿。

· 全唐诗 ·

第一百四十一卷

卷_1【咏史】

王昌龄

荷畚至洛阳，杖策游北门。天下尽兵甲，豺狼满中原。
明夷方遘患，顾我徒崩奔。自惭菲薄才，误蒙国士恩。
位重任亦重，时危志弥敦。西北未及终，东南不可吞。
进则耻保躬，退乃为触藩。叹息嵩山老，而后知其尊。

卷_2【杂兴】

王昌龄

握中铜匕首，粉锉楚山铁。义士频报雠，杀人不曾缺。
可悲燕丹事，终被狼虎灭。一举无两全，荆轲遂为血。
诚知匹夫勇，何取万人杰。无道吞诸侯，坐见九州裂。

卷_3【秋兴】

王昌龄

日暮西北堂，凉风洗修木。著书在南窗，门馆常肃肃。

· 全唐诗 ·

苔草延古意，视听转幽独。或问余所营，刈黍就寒谷。

卷_4【斋心】

王昌龄

女萝覆石壁，溪水幽濛濛。紫葛蔓黄花，娟娟寒露中。
朝饮花上露，夜卧松下风。云英化为水，光采与我同。
日月荡精魄，寥寥天宇空。

卷_5【独游】

王昌龄

林卧情每闲，独游景常晏。时从灞陵下，垂钓往南涧。
手携双鲤鱼，目送千里雁。悟彼飞有适，知此罹忧患。
放之清冷泉，因得省疏慢。永怀青岑客，回首白云间。
神超物无违，岂系名与宦。

卷_6【香积寺礼拜万回平等二圣僧塔】

王昌龄

真无御化来，借有乘化归。如彼双塔内，孰能知是非。

· 全唐诗 ·

愚也骇苍生，圣哉为帝师。当为时世出，不由天地资。
万回主此方，平等性无违。今我一礼心，亿劫同不移。
肃肃松柏下，诸天来有时。

卷_7【就道士问周易参同契】

王昌龄

仙人骑白鹿，发短耳何长。时余采菖蒲，忽见嵩之阳。
稽首求丹经，乃出怀中方。披读了不悟，归来问嵇康。
嗟余无道骨，发我入太行。

卷_8【诸宫游招隐寺】

王昌龄

山馆人已空，青萝换风雨。自从永明世，月向龙宫吐。
凿井长幽泉，白云今如古。应真坐松柏，锡杖挂窗户。
口云七十馀，能救诸有苦。回指岩树花，如闻道场鼓。
金色身坏灭，真如性无主。僚友同一心，清光遣谁取。

卷_9【宴南亭】

王昌龄

寒江映村林，亭上纳鲜洁。楚客共闲饮，静坐金管阕。
酣竟日入山，暝来云归穴。城楼空杳霭，猿鸟备清切。

· 全唐诗 ·

物状如丝纶，上心为予决。访君东溪事，早晚樵路绝。

卷_10【何九于客舍集】

王昌龄

客有住桂阳，亦如巢林鸟。壘觴且终宴，功业会未了。
山月空霁时，江明高楼晓。门前泊舟楫，行次入松筱。
此意投赠君，沧波风袅袅。

卷_11【洛阳尉刘晏与府掾诸公茶集天宫寺岸道上人房】

王昌龄

良友呼我宿，月明悬天宫。道安风尘外，洒扫青林中。
削去府县理，豁然神机空。自从三湘还，始得今夕同。
旧居太行北，远宦沧溟东。各有四方事，白云处处通。

卷_12【观江淮名胜图】

王昌龄

刻意吟云山，尤知隐沦妙。远公何为者，再诣临海峤。

· 全唐诗 ·

而我高其风，披图得遗照。援毫无逃境，遂展千里眺。
淡扫荆门烟，明标赤城烧。青葱林间岭，隐见淮海徼。
但指香炉顶，无闻白猿啸。沙门既云灭，独往岂殊调。
感对怀拂衣，胡宁事渔钓。安期始遗舄，千古谢荣耀。
投迹庶可齐，沧浪有孤棹。

卷_13【灞上闲居】

王昌龄

鸿都有归客，偃卧滋阳村。轩冕无枉顾，清川照我门。
空林网夕阳，寒鸟赴荒园。廓落时得意，怀哉莫与言。
庭前有孤鹤，欲啄常翩翻。为我衔素书，吊彼颜与原。
二君既不朽，所以慰其魂。

卷_14【风凉原上作】

王昌龄

阴岑宿云归，烟雾湿松柏。风凄日初晓，下岭望川泽。
远山无晦明，秋水千里白。佳气盘未央，圣人在凝碧。
关门阻天下，信是帝王宅。海内方晏然，庙堂有奇策。
时贞守全运，罢去游说客。予忝兰台人，幽寻免贻责。

· 全唐诗 ·

卷_15【裴六书堂】

王昌龄

闲堂闭空阴，竹林但清响。窗下长啸客，区中无遗想。
经纶精微言，兼济当独往。

卷_16【江上闻笛】

王昌龄

横笛怨江月，扁舟何处寻。声长楚山外，曲绕胡关深。
相去万余里，遥传此夜心。寥寥浦溆寒，响尽惟幽林。
不知谁家子，复奏邯郸音。水客皆拥棹，空霜遂盈襟。
羸马望北走，迁人悲越吟。何当边草白，旌节陇城阴。

卷_17【太湖秋夕】

王昌龄

水宿烟雨寒，洞庭霜落微。月明移舟去，夜静魂梦归。
暗觉海风度，萧萧闻雁飞。

· 全唐诗 ·

卷_18【赵十四兄见访】

王昌龄

客来舒长簟，开阁延清风。但有无弦琴，共君尽尊中。
晚来常读易，顷者欲还嵩。世事何须道，黄精且养蒙。
嵇康殊寡识，张翰独知终。忽忆鲈鱼鲙，扁舟往江东。

卷_19【过华阴】

王昌龄

云起太华山，云山互明灭。东峰始含景，了了见松雪。
羈人感幽栖，窅映转奇绝。欣然忘所疲，永望吟不辍。
信宿百馀里，出关玩新月。何意昨来心，遇物遂迁别。
人生屡如此，何以肆愉悦。

卷_20【九江口作】

王昌龄

湔湔江势阔，雨开浔阳秋。驿门是高岸，望尽黄芦洲。
水与五溪合，心期万里游。明时无弃才，谪去随孤舟。
鸂鸟立寒木，丈夫佩吴钩。何当报君恩，却系单于头。

· 全唐诗 ·

卷_21【大梁途中作】

王昌龄

快快步长道，客行渺无端。郊原欲下雪，天地棱棱寒。
当时每酣醉，不觉行路难。今日无酒钱，凄惶向谁叹。

卷_22【途中作】

王昌龄

游人愁岁晏，早起遵王畿。坠叶吹未晓，疏林月微微。
惊禽栖不定，寒兽相因依。叹此霜露下，复闻鸿雁飞。
渺然江南意，惜与中途违。羁旅悲壮发，别离念征衣。
永图岂劳止，明节期所归。宁厌楚山曲，无人长掩扉。

卷_23【山行入泾州】

王昌龄

倦此山路长，停骖问宾御。林峦信回惑，白日落何处。
徙倚望长风，滔滔引归虑。微雨随云收，濛濛傍山去。
西临有边邑，北走尽亭戍。泾水横白烟，州城隐寒树。
所嗟异风俗，已自少情趣。岂伊怀土多，触目忻所遇。

· 全唐诗 ·

卷_24【小敷谷龙潭祠作】

王昌龄

崖谷喷疾流，地中有雷集。百泉势相荡，巨石皆却立。
跳波沸峥嵘，深处不可挹。昏为蛟龙怒，清见云雨入。
灵怪崇偏祠，废兴自兹邑。沉淫顷多昧，檐宇遂不葺。
吾闻被明典，盛德惟世及。生人载山川，血食报原隰。
岂伊骇微险，将以循甿揖。飞振吕梁，忠信亦我习。
波流浸已广，悔吝在所汲。溪水有清源，褰裳靡沾湿。

卷_25【段宥厅孤桐】

王昌龄

凤凰所宿处，月映孤桐寒。槁叶零落尽，空柯苍翠残。
虚心谁能见，直影非无端。响发调尚苦，清商劳一弹。

卷_26【琴】

王昌龄

孤桐秘虚鸣，朴素传幽真。仿佛弦指外，遂见初古人。
意远风雪苦，时来江山春。高宴未终曲，谁能辨经纶。

· 全唐诗 ·

卷_27【初日】

王昌龄

初日净金闺，先照床前暖。斜光入罗幕，稍稍亲丝管。
云发不能梳，杨花更吹满。

卷_28【失题】

王昌龄

奸雄乃得志，遂使群心摇。赤风荡中原，烈火无遗巢。
一人计不用，万里空萧条。

卷_29【赠宇文中丞（本畅当诗）】

王昌龄

仆本濩落人，辱当州郡使。量力颇及早，谢归今即已。
萧萧若凌虚，衿带顷消靡。车服卒然来，涔阳作游子。
郁郁寡开颜，默默独行李。忽逢平生友，一笑方在此。
秋清宁风日，楚思浩云水。为语弋林者，冥冥鸿远矣。

· 全唐诗 ·

卷_30【箜篌引】

王昌龄

卢谿郡南夜泊舟，夜闻两岸羌戎讴，其时月黑猿啾啾。
微雨沾衣令人愁，有一迁客登高楼，不言不寐弹箜篌。
弹作蓟门桑叶秋，风沙飒飒青冢头，将军铁骢汗血流。
深入匈奴战未休，黄旗一点兵马收，乱杀胡人积如丘。
疮病驱来配边州，仍披漠北羔羊裘，颜色饥枯掩面羞。
眼眶泪滴深两眸，思还本乡食牦牛，欲语不得指咽喉。
或有强壮能咿嚶，意说被他边将雠，五世属藩汉主留。
碧毛毡帐河曲游，橐驼五万部落稠，敕赐飞凤金兜鍪。
为君百战如过筹，静扫阴山无鸟投，家藏铁券特承优。
黄金千斤不称求，九族分离作楚囚，深溪寂寞弦苦幽。
草木悲感声飕飕，仆本东山为国忧，明光殿前论九畴。
簏读兵书尽冥搜，为君掌上施权谋，洞晓山川无与俦。
紫宸诏发远怀柔，摇笔飞霜如夺钩，鬼神不得知其由。
怜爱苍生比蚍蜉，朔河屯兵须渐抽，尽遣降来拜御沟。
便令海内休戈矛，何用班超定远侯，史臣书之得已不。

卷_31【乌栖曲】

王昌龄

白马逐朱车，黄昏入狭邪。柳树乌争宿，

· 全唐诗 ·

争枝未得飞上屋。东房少妇婿从军，每听乌啼知夜分。

卷_32【城傍曲】

王昌龄

秋风鸣桑条，草白狐兔骄。邯郸饮来酒未消，
城北原平掣皂雕。射杀空营两腾虎，回身却月佩弓弰。

卷_33【行路难】

王昌龄

双丝作纆系银瓶，百尺寒泉辘轳上。悬丝一绝不可望，
似妾倾心在君掌。人生意气好迁捐，只重狂花不重贤。
宴罢调筝奏离鹤，回娇转盼泣君前。君不见，眼前事，
岂保须臾心勿异。西山日下雨足稀，侧有浮云无所寄。
但愿莫忘前者言，锉骨黄尘亦无愧。行路难，劝君酒，
莫辞烦，美酒千钟犹可尽，心中片愧何可论。
一闻汉主思故剑，使妾长嗟万古魂。

卷_34【奉赠张荆州】

王昌龄

祝融之峰紫云衔，翠如何其雪崭岩。邑西有路缘石壁，
我欲从之卧穹嵌。鱼有心兮脱网罟，江无人兮鸣枫杉。

· 全唐诗 ·

王君飞舄仍未去，苏耽宅中意遥缅。

· 全唐诗 ·

第一百四十二卷

卷_1【驾出长安（一作宋之问诗）】

王昌龄

圣德超千古，皇风扇九围。天回万象出，驾动六龙飞。
淑气来黄道，祥云覆紫微。太平多扈从，文物有光辉。

卷_2【驾幸河东】

王昌龄

晋水千庐合，汾桥万国从。开唐天业盛，入沛圣恩浓。
下辇回三象，题碑任六龙。睿明悬日月，千岁此时逢。

卷_3【胡笳曲】

王昌龄

城南虏已合，一夜几重围。自有金笳引，能沾出塞衣。

· 全唐诗 ·

听临关月苦，清入海风微。三奏高楼晓，胡人掩涕归。

卷_4【潞府客亭寄崔凤童】

王昌龄

萧条郡城闭，旅馆空寒烟。秋月对愁客，山钟摇暮天。
新知偶相访，斗酒情依然。一宿阻长会，清风徒满川。

卷_5【和振上人秋夜怀士会】

王昌龄

白露伤草木，山风吹夜寒。遥林梦亲友，高兴发云端。
郭外秋声急，城边月色残。瑶琴多远思，更为客中弹。

卷_6【送李擢游江东】

王昌龄

清洛日夜涨，微风引孤舟。离肠便千里，远梦生江楼。
楚国橙橘暗，吴门烟雨愁。东南具今古，归望山云秋。

· 全唐诗 ·

卷_7【沙苑南渡头】

王昌龄

秋雾连云白，归心浦溆悬。津人空守缆，村馆复临川。
篷隔苍茫雨，波连演漾田。孤舟未得济，入梦在何年。

卷_8【客广陵】

王昌龄

楼头广陵近，九月在南徐。秋色明海县，寒烟生里闾。
夜帆归楚客，昨日度江书。为问易名叟，垂纶不见鱼。

卷_9【静法师东斋】

王昌龄

筑室在人境，遂得真隐情。春尽草木变，雨来池馆清。
琴书全雅道，视听已无生。闭户脱三界，白云自虚盈。

卷_10【素上人影塔】

王昌龄

物化同枯木，希夷明月珠。本来生灭尽，何者是虚无。

· 全唐诗 ·

一坐看如故，千龄独向隅。至人非别有，方外不应殊。

卷_11【遇薛明府谒聪上人】

王昌龄

欣逢柏梁故，共谒聪公禅。石室无人到，绳床见虎眠。
阴崖常抱雪，枯涧为生泉。出处虽云异，同欢在法筵。

卷_12【谒焦炼师】

王昌龄

中峰青苔壁，一点云生时。岂意石堂里，得逢焦炼师。
炉香净琴案，松影闲瑶墀。拜受长年药，翩翩西海期。

卷_13【宿京江口期刘沓虚不至】

王昌龄

霜天起长望，残月生海门。风静夜潮满，城高寒气昏。
故人何寂寞，久已乖清言。明发不能寐，徒盈江上尊。

· 全唐诗 ·

卷_14【寒食即事】

王昌龄

晋阳寒食地，风俗旧来传。雨灭龙蛇火，春生鸿雁天。
泣多流水涨，歌发舞云旋。西见之推庙，空为人所怜。

卷_15【九日登高】

王昌龄

青山远近带皇州，霁景重阳上北楼。雨歇亭皋仙菊润，
霜飞天苑御梨秋。茱萸插鬓花宜寿，翡翠横钗舞作愁。
谩说陶潜篱下醉，何曾得见此风流。

卷_16【万岁楼】

王昌龄

江上巍巍万岁楼，不知经历几千秋。年年喜见山长在，
日日悲看水独流。猿狖何曾离暮岭，鸬鹚空自泛寒洲。
谁堪登望云烟里，向晚茫茫发旅愁。

· 全唐诗 ·

卷_17【夏月花萼楼酺宴应制】

王昌龄

土德三元正，尧心万国同。汾阴备冬礼，长乐应和风。
赐庆垂天泽，流欢旧渚宫。楼台生海上，箫鼓出天中。
雾晓筵初接，宵长曲未终。雨随青幕合，月照舞罗空。
玉陛分朝列，文章发圣聪。愚臣忝书赋，歌咏颂丝桐。

卷_18【送欧阳会稽之任】

王昌龄

怀禄贵心赏，东流山水长。官移会稽郡，地迤上虞乡。
缓带屏纷杂，渔舟临讼堂。逶迤回溪趣，猿啸飞鸟行。
万室霁朝雨，千峰迎夕阳。辉辉远洲映，暧暧澄湖光。
白发有高士，青春期上皇。应须枉车歇，为我访荷裳。

卷_19【同王维集青龙寺昙壁上人兄院五韵】

王昌龄

本来清净所，竹树引幽阴。檐外含山翠，人间出世心。
圆通无有象，圣境不能侵。真是吾兄法，何妨友弟深。

· 全唐诗 ·

天香自然会，灵异识钟音。

卷_20【东溪玩月（一作王维诗）】

王昌龄

月从断山口，遥吐柴门端。万木分空霁，流阴中夜攒。
光连虚象白，气与风露寒。谷静秋泉响，岩深青霭残。
澄清入幽梦，破影抱空峦。恍惚琴窗里，松溪晓思难。

· 全唐诗 ·

第一百四十三卷

卷_1【朝来曲】

王昌龄

月昃鸣珂动，花连绣户春。盘龙玉台镜，唯待画眉人。

卷_2【从军行】

王昌龄

大将军出战，白日暗榆关。三面黄金甲，单于破胆还。

卷_3【答武陵田太守】

王昌龄

仗剑行千里，微躯感一言。曾为大梁客，不负信陵恩。

· 全唐诗 ·

卷_4【题灞池二首】

王昌龄

腰镰欲何之，东园刈秋韭。世事不复论，悲歌和樵叟。

开门望长川，薄暮见渔者。借问白头翁，垂纶几年也。

卷_5【题僧房】

王昌龄

棕榈花满院，苔藓入闲房。彼此名言绝，空中闻异香。

卷_6【击磬老人】

王昌龄

双峰褐衣久，一磬白眉长。谁识野人意，徒看春草芳。

卷_7【送胡大】

王昌龄

荆门不堪别，况乃潇湘秋。何处遥望君，江边明月楼。

· 全唐诗 ·

卷_8【送郭司仓】

王昌龄

映门淮水绿，留骑主人心。明月随良掾，春潮夜夜深。

卷_9【送李十五】

王昌龄

怨别秦楚深，江中秋云起。天长杳无隔，月影在寒水。

卷_10【送张四】

王昌龄

枫林已愁暮，楚水复堪悲。别后冷山月，清猿无断时。

卷_11【武陵田太守席送司马卢谿】

王昌龄

诸侯分楚郡，饮饯五谿春。山水清晖远，俱怜一逐臣。

· 全唐诗 ·

卷_12【送谭八之桂林】

王昌龄

客心仍在楚，江馆复临湘。别意猿鸟外，天寒桂水长。

卷_13【送刘十五之郡】

王昌龄

平明江雾寒，客马江上发。扁舟事洛阳，窅窅含楚月。

卷_14【从军行七首】

王昌龄

烽火城西百尺楼，黄昏独上海风秋。
更吹羌笛关山月，无那金闺万里愁。

琵琶起舞换新声，总是关山旧别情。
撩乱边愁听不尽，高高秋月照长城。

关城榆叶早疏黄，日暮云沙古战场。
表请回军掩尘骨，莫教兵士哭龙荒。

· 全唐诗 ·

青海长云暗雪山，孤城遥望玉门关。
黄沙百战穿金甲，不破楼兰终不还。

大漠风尘日色昏，红旗半卷出辕门。
前军夜战洮河北，已报生擒吐谷浑。

胡瓶落膊紫薄汗，碎叶城西秋月团。
明敕星驰封宝剑，辞君一夜取楼兰。

玉门山嶂几千重，山北山南总是烽。
人依远戍须看火，马踏深山不见踪。

卷_15【出塞二首】

王昌龄

秦时明月汉时关，万里长征人未还。
但使龙城飞将在，不教胡马度阴山。

骝马新跨白玉鞍，战罢沙场月色寒。
城头铁鼓声犹振，匣里金刀血未干。

卷_16【采莲曲二首】

王昌龄

吴姬越艳楚王妃，争弄莲舟水湿衣。

· 全唐诗 ·

来时浦口花迎入，采罢江头月送归。

荷叶罗裙一色裁，芙蓉向脸两边开。
乱入池中看不见，闻歌始觉有人来。

卷_17【殿前曲二首】

王昌龄

贵人妆梳殿前催，香风吹入殿后来。
仗引笙歌大宛马，白莲花发照池台。

胡部笙歌西殿头，梨园弟子和凉州。
新声一段高楼月，圣主千秋乐未休。

卷_18【春宫曲（唐人绝句作殿前曲）】

王昌龄

昨夜风开露井桃，未央前殿月轮高。
平阳歌舞新承宠，帘外春寒赐锦袍。

卷_19【西宫春怨】

王昌龄

西宫夜静百花香，欲卷珠帘春恨长。

· 全唐诗 ·

斜抱云和深见月，朦胧树色隐昭阳。

卷_20【西宫秋怨】

王昌龄

芙蓉不及美人妆，水殿风来珠翠香。
谁分含啼掩秋扇，空悬明月待君王。

卷_21【长信秋词五首】

王昌龄

金井梧桐秋叶黄，珠帘不卷夜来霜。
熏笼玉枕无颜色，卧听南宫清漏长。

高殿秋砧响夜阑，霜深犹忆御衣寒。
银灯青琐裁缝歇，还向金城明主看。

奉帚平明金殿开，且将团扇暂裴回。
玉颜不及寒鸦色，犹带昭阳日影来。

真成薄命久寻思，梦见君王觉后疑。
火照西宫知夜饮，分明复道奉恩时。

· 全唐诗 ·

长信宫中秋月明，昭阳殿下捣衣声。
白露堂中细草迹，红罗帐里不胜情。

卷_22【青楼曲二首】

王昌龄

白马金鞍从武皇，旌旗十万宿长杨。
楼头小妇鸣箜篌，遥见飞尘入建章。

驰道杨花满御沟，红妆缦绶上青楼。
金章紫绶千馀骑，夫婿朝回初拜侯。

卷_23【青楼怨】

王昌龄

香帟风动花入楼，高调鸣箜缓夜愁。
肠断关山不解说，依依残月下帘钩。

卷_24【浣纱女】

王昌龄

钱塘江畔是谁家，江上女儿全胜花。

· 全唐诗 ·

吴王在时不得出，今日公然来浣纱。

卷_25【闺怨】

王昌龄

闺中少妇不曾愁，春日凝妆上翠楼。
忽见陌头杨柳色，悔教夫婿觅封侯。

卷_26【甘泉歌】

王昌龄

乘輿执玉已登坛，细草沾衣春殿寒。
昨夜云生拜初月，万年甘露水晶盘。

卷_27【萧驸马宅花烛】

王昌龄

青鸾飞入合欢宫，紫凤衔花出禁中。
可怜今夜千门里，银汉星回一道通。

· 全唐诗 ·

卷_28【观猎】

王昌龄

角鹰初下秋草稀，铁骢抛鞚去如飞。
少年猎得平原兔，马后横捎意气归。

卷_29【寄穆侍御出幽州】

王昌龄

一从恩谴度潇湘，塞北江南万里长。
莫道蓟门书信少，雁飞犹得到衡阳。

卷_30【寄陶副使】

王昌龄

闻道将军破海门，如何远谪渡湘沅。
春来明主封西岳，自有还君紫绶恩。

卷_31【至南陵答皇甫岳】

王昌龄

与君同病复漂沦，昨夜宣城别故人。

· 全唐诗 ·

明主恩深非岁久，长江还共五溪滨。

卷_32【西江寄越弟】

王昌龄

南浦逢君岭外还，沅溪更远洞庭山。
尧时恩泽如春雨，梦里相逢同入关。

卷_33【李四仓曹宅夜饮】

王昌龄

霜天留后故情欢，银烛金炉夜不寒。
欲问吴江别来意，青山明月梦中看。

卷_34【宴春源】

王昌龄

源向春城花几重，江明深翠引诸峰。
与君醉失松溪路，山馆寥寥传暝钟。

· 全唐诗 ·

卷_35【龙标野宴】

王昌龄

沅溪夏晚足凉风，春酒相携就竹丛。
莫道弦歌愁远谪，青山明月不曾空。

卷_36【听流人水调子】

王昌龄

孤舟微月对枫林，分付鸣笳与客心。
岭色千重万重雨，断弦收与泪痕深。

卷_37【梁苑】

王昌龄

梁园秋竹古时烟，城外风悲欲暮天。
万乘旌旗何处去，平台宾客有谁怜。

卷_38【武陵龙兴观黄道士房问易因题】

王昌龄

斋心问易太阳宫，八卦真形一气中。

· 全唐诗 ·

仙老言馀鹤飞去，玉清坛上雨濛濛。

卷_39【送魏二】

王昌龄

醉别江楼橘柚香，江风引雨入舟凉。
忆君遥在潇湘月，愁听清猿梦里长。

卷_40【别李浦之京】

王昌龄

故园今在灞陵西，江畔逢君醉不迷。
小弟邻庄尚渔猎，一封书寄数行啼。

卷_41【送狄宗亨】

王昌龄

秋在水清山暮蝉，洛阳树色鸣皋烟。
送君归去愁不尽，又惜空度凉风天。

· 全唐诗 ·

卷_42【送薛大赴安陆】

王昌龄

津头云雨暗湘山，迁客离忧楚地颜。
遥送扁舟安陆郡，天边何处穆陵关。

卷_43【芙蓉楼送辛渐二首】

王昌龄

寒雨连天夜入湖，平明送客楚山孤。
洛阳亲友如相问，一片冰心在玉壶。

丹阳城南秋海阴，丹阳城北楚云深。
高楼送客不能醉，寂寂寒江明月心。

卷_44【重别李评事】

王昌龄

莫道秋江离别难，舟船明日是长安。
吴姬缓舞留君醉，随意青枫白露寒。

· 全唐诗 ·

卷_45【别陶副使归南海】

王昌龄

南越归人梦海楼，广陵新月海亭秋。
宝刀留赠长相忆，当取戈船万户侯。

卷_46【送人归江夏】

王昌龄

寒江绿水楚云深，莫道离忧迁远心。
晓夕双帆归鄂渚，愁将孤月梦中寻。

卷_47【送李五】

王昌龄

玉碗金罍倾送君，江西日入起黄云。
扁舟乘月暂来去，谁道沧浪吴楚分。

· 全唐诗 ·

卷_48【送十五舅】

王昌龄

深林秋水近日空，归棹演漾清阴中。
夕浦离觞意何已，草根寒露悲鸣虫。

卷_49【留别郭八】

王昌龄

长亭驻马未能前，井邑苍茫含暮烟。
醉别何须更惆怅，回头不语但垂鞭。

卷_50【送窦七】

王昌龄

清江月色傍林秋，波上荧荧望一舟。
鄂渚轻帆须早发，江边明月为君留。

· 全唐诗 ·

卷_51【巴陵送李十二】

王昌龄

摇曳巴陵洲渚分，清江传语便风闻。
山长不见秋城色，日暮蒹葭空水云。

卷_52【送裴图南】

王昌龄

黄河渡头归问津，离家几日茱萸新。
漫道闺中飞破镜，犹看陌上别行人。

卷_53【留别司马太守】

王昌龄

辰阳太守念王孙，远谪沅溪何可论。
黄鹤青云当一举，明珠吐著报君恩。

· 全唐诗 ·

卷_54【卢溪主人】

王昌龄

武陵溪口驻扁舟，溪水随君向北流。
行到荆门上三峡，莫将孤月对猿愁。

卷_55【送程六】

王昌龄

冬夜伤离在五溪，青鱼雪落鲙橙齑。
武冈前路看斜月，片片舟中云向西。

卷_56【送朱越】

王昌龄

远别舟中蒋山暮，君行举首燕城路。
蓟门秋月隐黄云，期向金陵醉江树。

· 全唐诗 ·

卷_57【别辛渐】

王昌龄

别馆萧条风雨寒，扁舟月色渡江看。
酒酣不识关西道，却望春江云尚残。

卷_58【送柴侍御】

王昌龄

流水通波接武冈，送君不觉有离伤。
青山一道同云雨，明月何曾是两乡。

卷_59【送万大归长沙】

王昌龄

桂阳秋水长沙县，楚竹离声为君变。
青山隐隐孤舟微，白鹤双飞忽相见。

· 全唐诗 ·

卷_60【送吴十九往沅陵】

王昌龄

沅江流水到辰阳，溪口逢君驿路长。
远谪谁知望雷雨，明年春水共还乡。

卷_61【别皇甫五】

王昌龄

溱浦潭阳隔楚山，离尊不用起愁颜。
明祠灵响期昭应，天泽俱从此路还。

卷_62【送崔参军往龙溪】

王昌龄

龙溪只在龙标上，秋月孤山两相向。
谴谪离心是丈夫，鸿恩共待春江涨。

· 全唐诗 ·

卷_63【送郑判官】

王昌龄

东楚吴山驿树微，
轺车衔命奉恩辉。
英僚携出新丰酒，
半道遥看骢马归。

卷_64【送姚司法归吴】

王昌龄

吴掾留觞楚郡心，
洞庭秋雨海门阴。
但令意远扁舟近，
不道沧江百丈深。

卷_65【送高三之桂林】

王昌龄

留君夜饮对潇湘，
从此归舟客梦长。
岭上梅花侵雪暗，
归时还拂桂花香。

· 全唐诗 ·

卷_66【旅望（一作出塞行）】

王昌龄

白花原头望京师，黄河水流无尽时。
穷秋旷野行人绝，马首东来知是谁。

卷_67【题朱炼师山房】

王昌龄

叩齿焚香出世尘，斋坛鸣磬步虚人。
百花仙酝能留客，一饭胡麻度几春。

卷_68【武陵开元观黄炼师院三首】

王昌龄

松间白发黄尊师，童子烧香禹步时。
欲访桃源入溪路，忽闻鸡犬使人疑。

先贤盛说桃花源，尘忝何堪武陵郡。
闻道秦时避地人，至今不与人通问。

· 全唐诗 ·

山观空虚清静门，从官役吏扰尘喧。
暂因问俗到真境，便欲投诚依道源。

卷_69【河上老人歌（一作河上歌）】

王昌龄

河上老人坐古槎，合丹只用青莲花。
至今八十如四十，口道沧溟是我家。

卷_70【春怨】

王昌龄

音书杜绝白狼西，桃李无颜黄鸟啼。
寒雁春深归去尽，出门肠断草萋萋。

卷_71【句】

王昌龄

朝荐抱良策，独倚江城楼。（《述情》，《诗式》）

昨从金陵邑，远谪沅溪滨。（《沅志》）

· 全唐诗 ·

娟魄已三孕。（以下《海录碎事》）。

驾幸温泉日，严霜子月初。

长亭酒未醒，千里风动地。（以下《河岳英灵集》）

苍荻寒沧江，石头岸边饮。

天仗森森练雪凝，身骑铁骢自臂鹰。

· 全唐诗 ·

第一百四十四卷

卷_1【送陆擢】

常建

圣代多才俊，陆生何考槃。南山高松树，不合空摧残。
九月湖上别，北风秋雨寒。殷勤叹孤凤，早食金琅玕。

卷_2【送李十一尉临溪】

常建

泠泠花下琴，君唱渡江吟。天际一帆影，预悬离别心。
以言神仙尉，因致瑶华音。回轸抚商调，越溪澄碧林。

卷_3【江上琴兴】

常建

江上调玉琴，一弦清一心。泠泠七弦遍，万木澄幽阴。

· 全唐诗 ·

能使江月白，又令江水深。始知梧桐枝，可以傲黄金。

卷_4【湖中晚霁】

常建

湖广舟自轻，江天欲澄霁。是时清楚望，气色犹霾曀。
踟蹰金霞白，波上日初丽。烟虹落镜中，树木生天际。
杳杳涯欲辨，蒙蒙云复闭。言乘星汉明，又睹寰瀛势。
微兴从此惬，悠然不知岁。试歌沧浪清，遂觉乾坤细。
岂念客衣薄，将期永投袂。迟回渔父间，一雁声嘹唳。

卷_5【宿王昌龄隐居】

常建

清溪深不测，隐处唯孤云。松际露微月，清光犹为君。
茅亭宿花影，药院滋苔纹。余亦谢时去，西山鸾鹤群。

卷_6【送楚十少府】

常建

微风吹霜气，寒影明前除。落日未能别，萧萧林木虚。

· 全唐诗 ·

愁烟闭千里，仙尉其何如。因送别鹤操，赠之双鲤鱼。
鲤鱼在金盘，别鹤哀有馀。心事则如此，请君开素书。

卷_7【张山人弹琴】

常建

君去芳草绿，西峰弹玉琴。岂惟丘中赏，兼得清烦襟。
朝从山口还，出岭闻清音。了然云霞气，照见天地心。
玄鹤下澄空，翩翩舞松林。改弦扣商声，又听飞龙吟。
稍觉此身妄，渐知仙事深。其将炼金鼎，永矣投吾簪。

卷_8【白湖寺后溪宿云门】

常建

落日山水清，乱流鸣淙淙。旧蒲雨抽节，新花水对窗。
溪中日已没，归鸟多为双。杉松引直路，出谷临前湖。
洲渚晚色静，又观花与蒲。入溪复登岭，草浅寒流速。
圆月明高峰，春山因独宿。松阴澄初夜，曙色分远目。
日出城南隅，青青媚川陆。乱花覆东郭，碧气销长林。
四郊一清影，千里归寸心。前瞻王程促，却恋云门深。
毕景有馀兴，到家弹玉琴。

· 全唐诗 ·

卷_9【闲斋卧病行药至山馆稍次湖亭二首】

常建

旬时结阴霖，帘外初白日。斋沐清病容，心魂畏虚室。
闲梅照前户，明镜悲旧质。同袍四五人，何不来问疾。

行药至石壁，东风变萌芽。主人门外绿，小隐湖中花。
时物堪独往，春帆宜别家。辞君向沧海，烂熳从天涯。

卷_10【塞上曲】

常建

翩翩云中使，来问太原卒。百战苦不归，刀头怨明月。
塞云随阵落，寒日傍城没。城下有寡妻，哀哀哭枯骨。

卷_11【仙谷遇毛女意知是秦宫人】

常建

溪口水石浅，泠泠明药丛。入溪双峰峻，松栝疏幽风。
垂岭枝袅袅，翳泉花濛濛。夤缘斋人目，路尽心弥通。
盘石横阳崖，前流殊未穷。回潭清云影，瀾漫长天空。

· 全唐诗 ·

水边一神女，千岁为玉童。羽毛经汉代，珠翠逃秦宫。
目覩神已寓，鹤飞言未终。祈君青云秘，愿谒黄仙翁。
尝以耕玉田，龙鸣西顶中。金梯与天接，几日来相逢。

卷_12【梦太白西峰】

常建

梦寐升九崖，杳霭逢元君。遗我太白峰，寥寥辞垢氛。
结宇在星汉，宴林闭氤氲。檐楹覆馀翠，巾舄生片云。
时往溪水间，孤亭昼仍曛。松峰引天影，石濑清霞文。
恬目缓舟趣，霁心投鸟群。春风又摇棹，潭岛花纷纷。

卷_13【鄂渚招王昌龄张僊】

常建

刈芦旷野中，沙土飞黄云。天晦无精光，茫茫悲远君。
楚山隔湘水，湖畔落日曛。春雁又北飞，音书固难闻。
谪居未为叹，谗枉何由分。午日逐蛟龙，宜为吊冤文。
翻覆古共然，名宦安足云。贫士任枯槁，捕鱼清江滨。
有时荷锄犁，旷野自耕耘。不然春山隐，溪涧花氤氲。
山鹿自有场，贤达亦顾群。二贤归去来，世上徒纷纷。

· 全唐诗 ·

卷_14【春词二首（乐府诗题作陌上桑）】

常建

苑苑黄柳丝，濛濛杂花垂。日高红妆卧，倚对春光迟。
宁知傍淇水，骖褭黄金羈。

翳翳陌上桑，南枝交北堂。美人金梯出，素手自提筐。
非但畏蚕饥，盈盈娇路傍。

卷_15【晦日马镫曲稍次中流作】

常建

夜寒宿芦苇，晓色明西林。初日在川上，便澄游子心。
秦天无纤翳，郊野浮春阴。波静随钓鱼，舟小绿水深。
出浦见千里，旷然谐远寻。扣船应渔父，因唱沧浪吟。

卷_16【古意】

常建

牧马古道傍，道傍多古墓。萧条愁杀人，蝉鸣白杨树。
回头望京邑，合沓生尘雾。富贵安可常，归来保贞素。

· 全唐诗 ·

卷_17【宿五度溪仙人得道处】

常建

五度溪上花，生根依两崖。二月寻片云，愿宿秦人家。
上见悬崖崩，下见白水湍。仙人弹棋处，石上青萝盘。
无处求玉童，翳翳唯林峦。前溪遇新月，聊取玉琴弹。

卷_18【西山】

常建

一身为轻舟，落日西山际。常随去帆影，远接长天势。
物象归馀清，林峦分夕丽。亭亭碧流暗，日入孤霞继。
渚日远阴映，湖云尚明霁。林昏楚色来，岸远荆门闭。
至夜转清迥，萧萧北风厉。沙边雁鹭泊，宿处蒹葭蔽。
圆月逗前浦，孤琴又摇曳。泠然夜遂深，白露沾人袂。

卷_19【春词】

常建

阶下草犹短，墙头梨花白。织女高楼上，停梭顾行客。
问君在何所，青鸟舒锦翮。

· 全唐诗 ·

卷_20【赠三侍御】

常建

高山临大泽，正月芦花干。阳色薰两崖，不改青松寒。
士贤守孤贞，古来皆共难。明君错甚才，台上飞三鸾。
操与霜雪明，量与江海宽。束身视天涯，安能穷波澜。
孤鹤在枳棘，一枝非所安。逸翮望绝霄，见欲凌云端。
层台何其高，山石流洪湍。固知非天池，鸣跃同所欢。
谁念独枯槁，四十长江干。责躬贵知己，效拙从一官。
折翮悲高风，苦饥候朝餐。湖月映大海，天空何漫漫。
托身未知所，谋道庶不刊。吟彼乔木诗，一夕常三叹。

卷_21【第三峰】

常建

西山第三顶，茅宇依双松。杳杳欲至天，云梯升几重。
莹魄澄玉虚，以求鸾鹤踪。逶迤非天人，执节乘赤龙。
旁映白日光，缥缈轻霞容。孤辉上烟雾，馀影明心胸。
愿与黄麒麟，欲飞而莫从。因寂清万象，轻云自中峰。
山暝学栖鸟，月来随暗蛩。寻空静馀响，袅袅云溪钟。

· 全唐诗 ·

卷_22【古兴】

常建

汉上逢老翁，江口为僵尸。白发沾黄泥，遗骸集乌鸱。
机巧自此忘，精魄今何之。风吹钓竿折，鱼跃安能施。
白水明汀洲，菰蒲冒深陂。唯留扁舟影，系在长江湄。
突兀枯松枝，悠扬女萝丝。托身难凭依，生死焉相知。
遍观今时人，举世皆尔为。将军死重围，汉卒犹争驰。
百马同一衔，万轮同一规。名与身孰亲，君子宜固思。

卷_23【高楼夜弹箏】

常建

高楼百馀尺，直上江水平。明月照人苦，开帘弹玉箏。
山高猿狖急，天静鸿雁鸣。曲度犹未终，东峰霞半生。

卷_24【客有自燕而归哀其老而赠之】

常建

羸马朝自燕，一身为二连。忆亲拜孤冢，移葬双陵前。
幽愿从此毕，剑心因获全。孟冬寒气盛，抚辔告言旋。

· 全唐诗 ·

碣石海北门，馀寇惟朝鲜。离离一寒骑，袅袅驰白天。
生别皆自取，况为士卒先。寸心渔阳兴，落日旌竿悬。

卷_25【白龙窟泛舟寄天台学道者】

常建

夕映翠山深，馀晖在龙窟。扁舟沧浪意，澹澹花影没。
西浮入天色，南望对云阙。因忆莓苔峰，初阳濯玄发。
泉萝两幽映，松鹤间清越。碧海莹子神，玉膏泽人骨。
忽然为枯木，微兴遂如兀。应寂中有天，明心外无物。
环回从所泛，夜静犹不歇。澹然意无限，身与波上月。

卷_26【张天师草堂】

常建

灵溪宴清宇，傍倚枯松根。花药绕方丈，瀑泉飞至门。
四气闭炎热，两崖改明昏。夜深月暂皎，亭午朝始暾。
信是天人居，幽幽寂无喧。万壑应鸣磬，诸峰接一魂。
遂登仙子谷，因醉田生樽。时节开玉书，眇映飞天言。
心化便无影，目精焉累烦。忽而与霄汉，寥落空南轩。

· 全唐诗 ·

卷_27【古意三首】

常建

二妃方访舜，万里南方悬。远道隔江汉，孤舟无岁年。
不知苍梧处，气尽呼青天。愁泪变楚竹，蛾眉丧湘川。
后人立为庙，累世称其贤。过客设祠祭，狐狸来坐边。
怀古未忍还，猿吟彻空山。

明月照高阁，彩女褰罗幕。歌舞临碧云，箫声沸珠箔。
青鸾临南海，天上双白鹤。万里齐翼飞，意求君门乐。
玉霄九重闭，金锁夜不开。两翅自无力，愁鸣云外来。
态深入空贵，世屈无良媒。俯仰顾中禁，东飞白玉台。

楚王竟何去，独自留巫山。偏使世人见，迢迢江汉间。
驻舟春溪里，皆愿拜灵颜。寤寐见神女，金沙鸣珮环。
闲艳绝世姿，令人气力微。含笑竟不语，化作朝云飞。

卷_28【渔浦】

常建

春至百草绿，陂泽闻鶉鹒。别家投钓翁，今世沧浪情。
沅罔为缁袍，折麻为长纓。荣誉失本真，怪人浮此生。
碧水月自阔，安流净而平。扁舟与天际，独往谁能名。

· 全唐诗 ·

卷_29【空灵山应田叟】

常建

湖南无村落，山舍多黄茆。淳朴如太古，其人居鸟巢。
牧童唱巴歌，野老亦献嘲。泊舟问溪口，言语皆哑咬。
土俗不尚农，岂暇论肥硇。莫徭射禽兽，浮客烹鱼鲛。
余亦罾置人，获麋今尚苞。敬君中国来，愿以充其庖。
日入闻虎斗，空山满咆哮。怀人虽共安，异域终难交。
白水可洗心，采薇可为肴。曳策背落日，江风鸣稍稍。

卷_30【太公哀晚遇】

常建

日出渭流白，文王畋猎时。钓翁在芦苇，川泽无熊羆。
诏书起遗贤，匹马令致辞。因称江海人，臣老筋力衰。
迟迟诣天车，快快悟灵龟。兵马更不猎，君臣皆共怡。
同车至咸阳，心影无磷缁。四牡玉墀下，一言为帝师。
王侯拥朱门，轩盖曜长逵。古来荣华人，遭遇谁知之。
落日悬桑榆，光景有顿亏。倏忽天地人，虽贵将何为。

· 全唐诗 ·

卷_31【昭君墓】

常建

汉宫岂不死，异域伤独没。万里驮黄金，蛾眉为枯骨。
回车夜出塞，立马皆不发。共恨丹青人，坟上哭明月。

卷_32【吊王将军墓】

常建

嫖姚北伐时，深入强千里。战馀落日黄，军败鼓声死。
尝闻汉飞将，可夺单于垒。今与山鬼邻，残兵哭辽水。

卷_33【古意】

常建

井底玉冰洞地明，琥珀辘轳青丝索。仙人骑凤披彩霞，
挽上银瓶照天阁。黄金作身双飞龙，口衔明月喷芙蓉。
一时渡海望不见，晓上青楼十二重。

· 全唐诗 ·

卷_34【古兴】

常建

辘轳井上双梧桐，飞鸟衔花日将没。深闺女儿莫愁年，
玉指泠泠怨金碧。石榴裙裾蛱蝶飞，见人不语颦蛾眉。
青丝素丝红绿丝，织成锦衾当为谁。

卷_35【张公子行（一作古意）】

常建

日出乘钓舟，袅袅持钓竿。涉淇傍荷花，骢马闲金鞍。
侠客白云中，腰间悬辘轳。出门事嫖姚，为君西击胡。
胡兵汉骑相驰逐，转战孤军西海北。百尺旌竿沉黑云，
边笳落日不堪闻。

卷_36【题破山寺后禅院】

常建

清晨入古寺，初日照高林。竹径通幽处，禅房花木深。
山光悦鸟性，潭影空人心。万籁此都寂，但馀钟磬音。

· 全唐诗 ·

卷_37【送李大都护】

常建

单于虽不战，都护事边深。君执幕中秘，能为高士心。
海头近初月，碛里多愁阴。西望郭犹子，将分泪满襟。

卷_38【潭州留别】

常建

贤达不相识，偶然交已深。宿帆谒郡佐，怅别依禅林。
湘水流入海，楚云千里心。望君杉松夜，山月清猿吟。

卷_39【听琴秋夜赠寇尊师】

常建

琴当秋夜听，况是洞中人。一指指应法，一声声爽神。
寒虫临砌急，清吹袅灯频。何必钟期耳，高闲自可亲。

· 全唐诗 ·

卷_40【泊舟盱眙】

常建

泊舟淮水次，霜降夕流清。夜久潮侵岸，天寒月近城。
平沙依雁宿，候馆听鸡鸣。乡国云霄外，谁堪羁旅情。

卷_41【江行】

常建

平湖四无际，此夜泛孤舟。明月异方意，吴歌令客愁。
乡园碧云外，兄弟渚江头。万里无归信，伤心看斗牛。

卷_42【燕居】

常建

青苔常满路，流水复入林。远与市朝隔，日闻鸡犬深。
寥寥丘中想，渺渺湖上心。啸傲转无欲，不知成陆沉。

· 全唐诗 ·

卷_43【送宇文六】

常建

花映垂杨汉水清，微风林里一枝轻。
即今江北还如此，愁杀江南离别情。

卷_44【落第长安】

常建

家园好在尚留秦，耻作明时失路人。
恐逢故里莺花笑，且向长安度一春。

卷_45【塞下】

常建

铁马胡裘出汉营，分麾百道救龙城。
左贤未遁旌竿折，过在将军不在兵。

· 全唐诗 ·

卷_46【题法院】

常建

胜景门闲对远山，竹深松老半含烟。
皓月殿中三度磬，水晶宫里一僧禅。

卷_47【岭猿】

常建

杳杳袅袅清且切，鹧鸪飞处又斜阳。
相思岭上相思泪，不到三声合断肠。

卷_48【三日寻李九庄】

常建

雨歇杨林东渡头，永和三日荡轻舟。
故人家在桃花岸，直到门前溪水流。

· 全唐诗 ·

卷_49【塞下曲四首】

常建

玉帛朝回望帝乡，乌孙归去不称王。
天涯静处无征战，兵气销为日月光。

北海阴风动地来，明君祠上望龙堆。
髑髅皆是长城卒，日暮沙场飞作灰。

龙斗雌雄势已分，山崩鬼哭恨将军。
黄河直北千馀里，冤气苍茫成黑云。

因嫁单于怨在边，蛾眉万古葬胡天。
汉家此去三千里，青冢常无草木烟。

卷_50【戏题湖上】

常建

湖上老人坐矶头，湖里桃花水却流。
竹竿袅袅波无际，不知何者吞吾钩。

· 全唐诗 ·

卷_51【吴故宫】

常建

越女歌长君且听，芙蓉香满水边城。
岂知一日终非主，犹自如今有怨声。

· 全唐诗 ·

第一百四十五卷

卷_1【从军行】

杜顗

秋草马蹄轻，角弓持弦急。去为龙城候，正值胡兵袭。
军气横大荒，战酣日将入。长风金鼓动，白露铁衣湿。
四起愁边声，南辕时伫立。断蓬孤自转，寒雁飞相及。
万里云沙涨，平川冰霰溢。夜闻汉使归，独向刀环泣。

卷_2【故绛行】

杜顗

君不见铜鞮观，数里城池已芜漫。君不见茺祁宫，
几重台榭亦微濠。介马兵车全盛时，歌童舞女妖艳姿。
一代繁华皆共绝，九原唯望冢累累。

· 全唐诗 ·

卷_3【少年行三首】

李嶷

十八羽林郎，戎衣侍汉王。臂鹰金殿侧，挟弹玉舆傍。
驰道春风起，陪游出建章。

侍猎长杨下，承恩更射飞。尘生马影灭，箭落雁行稀。
薄暮随天仗，联翩入琐闱。

玉剑膝边横，金杯马上倾。朝游茂陵道，夜宿凤凰城。
豪吏多猜忌，无劳问姓名。

卷_4【淮南秋夜呈周侃（一作呈同僚）】

李嶷

天净河汉高，夜闲砧杵发。清秋忽如此，离恨应难歇。
风乱池上萍，露光竹间月。与君共游处，勿作他乡别。

卷_5【林园秋夜作】

李嶷

林卧避残暑，白云长在天。赏心既如此，对酒非徒然。

· 全唐诗 ·

月色遍秋露，竹声兼夜泉。凉风怀袖里，兹意与谁传。

卷_6【读前汉外戚传】

李嶷

人录尚书事，家临御路傍。凿池通渭水，避暑借明光。
印绶妻封邑，轩车子拜郎。宠因宫掖里，势极必先亡。

卷_7【春怨】

崔巨

夜尽梦初惊，纱窗早雾明。晓妆脂粉薄，春服绮罗轻。
妾有今朝恨，君无旧日情。愁来理弦管，皆是断肠声。

卷_8【古歌二首】

蒋维翰

美人怨何深，含情倚金阁。不嚬复不语，红泪双双落。

美人闭红烛，独坐裁新锦。频放剪刀声，夜寒知未寝。

· 全唐诗 ·

卷_9【春夜裁缝】

蒋维翰

珠箔因风起，飞蛾入最能。不教人夜作，方便杀明灯。

卷_10【春女怨】

蒋维翰

白玉堂前一树梅，今朝忽见数花开。
儿家门户寻常闭，春色因何入得来。

卷_11【怨歌】

蒋维翰

百尺珠楼临狭斜，新妆能唱美人车。
皆言贱妾红颜好，要自狂夫不忆家。

卷_12【小山歌】

万楚

人说淮南有小山，淮王昔日此登仙。城中鸡犬皆飞去，

· 全唐诗 ·

山上坛场今宛然。世人贵身不贵寿，共笑华阳洞天口。
不知金石变长年，谩在人间恋携手。君能举帆至淮南，
家住盱眙余先谙。桐柏乱流平入海，茱萸一曲沸成潭。
忆记来时魂悄悄，想见仙山众峰小。今日长歌思不堪，
君行为报三青鸟。

卷_13【题江潮庄壁】

万楚

田家喜秋熟，岁晏林叶稀。禾黍积场圃，楂梨垂户扉。
野闲犬时吠，日暮牛自归。时复落花酒，茅斋堪解衣。

卷_14【咏帘】

万楚

玳瑁昔称华，玲珑薄绛纱。钩衔门势曲，节乱水纹斜。
日弄长飞鸟，风摇不卷花。自当分内外，非是为骄奢。

卷_15【茱萸女】

万楚

山阴柳家女，九日采茱萸。复得东邻伴，双为陌上姝。

· 全唐诗 ·

插枝著高髻，结子置长裾。作性常迟缓，非关诧丈夫。
平明折林樾，日入返城隅。侠客要罗袖，行人挑短书。
蛾眉自有主，年少莫踟蹰。

卷_16【五日观妓】

万楚

西施谩道浣春纱，碧玉今时斗丽华。眉黛夺将萱草色，
红裙妒杀石榴花。新歌一曲令人艳，醉舞双眸敛鬓斜。
谁道五丝能续命，却令今日死君家。

卷_17【骢马】

万楚

金络青骢白玉鞍，长鞭紫陌野游盘。朝驱东道尘恒灭，
暮到河源日未阑。汗血每随边地苦，蹄伤不憖陇阴寒。
君能一饮长城窟，为报天山行路难。

卷_18【题情人药栏】

万楚

敛眉语芳草，何许太无情。正见离人别，春心相向生。

· 全唐诗 ·

卷_19【河上逢落花】

万楚

河水浮落花，花流东不息。应见浣纱人，为道长相忆。

卷_20【宁王山池】

范朝

水势临阶转，峰形对路开。槎从天上得，石是海边来。
瑞草分丛种，祥花间色栽。旧传词赋客，唯见有邹枚。

卷_21【题石瓮寺】

范朝

胜境宜长望，迟春好散愁。关连四塞起，河带八川流。
复磴承香阁，重岩映彩楼。为临温液近，偏美圣君游。

卷_22【田家】

杨颜

小园足生事，寻胜日倾壶。蒔蔬利于鬻，才青摘已无。
四邻依野竹，日夕采其枯。田家心适时，春色遍桑榆。

· 全唐诗 ·

卷_23【后庭怨】

王諲

君不见红闺少女端正时，夭夭桃李仙容姿。
幸得君王怜巧笑，披香殿里荐蛾眉。蛾眉双双人共进，
常恐妾身从此摈。甄妃为妒出层宫，班女因猜下长信。
长信宫门闭不开，昭阳歌吹风送来。梦中魂魄犹言是，
觉后精神尚未回。念君娇爱无终始，使妾长啼后庭里。
独立每看斜日尽，孤眠直至残灯死。秋日闻虫翡翠帘，
春晴照面鸳鸯水。红颜旧来花不胜，白发如今雪相似。
传闻纨扇恩未歇，预想蛾眉上初月。如君贵伪不贵真，
还同弃妾逐新人。借问南山松叶意，何如北砌槿花新。

卷_24【夜坐看搗箏】

王諲

调箏夜坐灯光里，却挂罗帷露纤指。朱弦一一声不同，
玉柱连连影相似。不知何处学新声，曲曲弹来未睹名。
应是石家金谷里，流传未满洛阳城。

卷_25【长信怨】

王諲

飞燕倚身轻，争人巧笑名。生君弃妾意，增妾怨君情。

· 全唐诗 ·

日落昭阳壁，秋来长信城。寥寥金殿里，歌吹夜无声。

卷_26【闺情】

王諲

日暮裁缝歇，深嫌气力微。才能收箧笥，懒起下帘帷。
怨坐空然烛，愁眠不解衣。昨来频梦见，夫婿莫应知。

卷_27【十五夜观灯】

王諲

暂得金吾夜，通看火树春。停车傍明月，走马入红尘。
妓杂歌偏胜，场移舞更新。应须尽记取，说向不来人。

卷_28【除夜（一作史青诗）】

王諲

今岁今宵尽，明年明日催。寒随一夜去，春逐五更来。
气色空中改，容颜暗里回。风光人不觉，已著后园梅。

· 全唐诗 ·

卷_29【闻漏】

王岳灵

建礼含香处，重城待漏臣。徐闻传凤诏，晓唱辨鸡人。
银箭残将尽，铜壶漏更新。催筹当午夜，移刻及三辰。
杳杳从天远，泠泠出禁频。直疑残漏曙，肃肃对钩陈。

卷_30【送沈芳谒李观察求仕进】

周万

往日长安路，欢游不惜年。为贪卢女曲，用尽沈郎钱。
身老方投刺，途穷始著鞭。犹闻有知己，此去不徒然。

· 全唐诗 ·

第一百四十六卷

卷_1【古塞下曲】

陶翰

进军飞狐北，穷寇势将变。日落沙尘昏，背河更一战。

骕马黄金勒，雕弓白羽箭。射杀左贤王，归奏未央殿。

欲言塞下事，天子不召见。东出咸阳门，哀哀泪如霰。

卷_2【燕歌行】

陶翰

请君留楚调，听我吟燕歌。家在辽水头，边风意气多。

出身为汉将，正值戎未和。雪中凌天山，冰上渡交河。

大小百馀战，封侯竟蹉跎。归来灞陵下，故旧无相过。

雄剑委尘匣，空门垂雀罗。玉簪还赵女，宝瑟付齐娥。

昔日不为乐，时哉今奈何。

· 全唐诗 ·

卷_3【望太华赠卢司仓】

陶翰

行吏到西华，乃观三峰壮。削成元气中，杰出天河上。
如有飞动色，不知青冥状。巨灵安在哉，厥迹犹可望。
方此顾行旅，未由饬仙装。葱茏记星坛，明灭数云嶂。
良友垂真契，宿心所微尚。敢投归山吟，霞径一相访。

卷_4【赠郑员外】

陶翰

骢马拂绣裳，按兵辽水阳。西分雁门骑，北逐楼烦王。
闻道五军集，相邀百战场。风沙暗天起，虏骑森已行。
儒服揖诸将，雄谋吞大荒。金门来见谒，朱绂生辉光。
数年侍御史，稍迁尚书郎。人生志气立，所贵功业昌。
何必守章句，终年事铅黄。同时献赋客，尚在东陵傍。

卷_5【赠房侍御（时房公在新安）】

陶翰

志士固不羁，与道常周旋。进则天下仰，已之能晏然。

· 全唐诗 ·

褐衣东府召，执简南台先。雄义每特立，犯颜岂图全。
谪居东南远，逸气吟芳荃。适会寥廓趣，清波更夤缘。
扁舟入五湖，发缆洞庭前。浩荡临海曲，迢遥济江壖。
征奇忽忘返，遇兴将弥年。乃悟范生智，足明渔父贤。
郡临新安渚，佳赏此城偏。日夕对层岫，云霞映晴川。
闲居恋秋色，偃卧含贞坚。倚伏聊自化，行藏互推迁。
君其振羽翮，岁晏将冲天。

卷_6【晚出伊阙寄河南裴中丞】

陶翰

退无偃息资，进无当代策。冉冉时将暮，坐为周南客。
前登阙塞门，永眺伊城陌。长川黯已空，千里寒气白。
家本渭水西，异日同所适。秉志师禽尚，微言祖庄易。
一辞林壑间，共系风尘役。交朋忽先进，天道何纷剧。
岂念嘉遁时，依依偶沮溺。

卷_7【送朱大出关】

陶翰

楚客西上书，十年不得意。平生相知者，晚节心各异。
长揖五侯门，拂衣谢中贵。丈夫多别离，各有四方事。
拔剑因高歌，萧萧北风至。故人有斗酒，是夜共君醉。

· 全唐诗 ·

努力强加餐，当年莫相弃。

卷_8【宿天竺寺】

陶翰

松柏乱岩口，山西微径通。天开一峰见，宫阙生虚空。
正殿倚霞壁，千楼标石丛。夜来猿鸟静，钟梵响云中。
岑翠映湖月，泉声乱溪风。心超诸境外，了与悬解同。
明发唯改视，朝日长崖东。湖色浓荡漾，海光渐瞳朦。
葛仙迹尚在，许氏道犹崇。独往古来事，幽怀期二公。

卷_9【出萧关怀古】

陶翰

驱马击长剑，行役至萧关。悠悠五原上，永眺关河前。
北虏三十万，此中常控弦。秦城亘宇宙，汉帝理旌旃。
刁斗鸣不息，羽书日夜传。五军计莫就，三策议空全。
大漠横万里，萧条绝人烟。孤城当瀚海，落日照祁连。
怆矣苦寒奏，怀哉式微篇。更悲秦楼月，夜夜出胡天。

· 全唐诗 ·

卷_10【南楚怀古】

陶翰

南国久芜漫，我来空郁陶。君看章华宫，处处生黄蒿。
但见陵与谷，岂知贤与豪。精魂托古木，宝玉捐江皋。
倚棹下晴景，回舟随晚涛。碧云暮寥落，湖上秋天高。
往事那堪问，此心徒自劳。独馀湘水上，千载闻离骚。

卷_11【经杀子谷】

陶翰

扶苏秦帝子，举代称其贤。百万犹在握，可争天下权。
束身就一剑，壮志皆弃捐。塞下有遗迹，千龄人共传。
疏芜尽荒草，寂历空寒烟。到此尽垂泪，非我独潸然。

卷_12【早过临淮】

陶翰

夜来三渚风，晨过临淮岛。湖中海气白，城上楚云早。
鳞鳞鱼浦帆，潋潋芦洲草。川路日浩荡，怒焉心如捣。
且言任倚伏，何暇念枯槁。范子名屡移，蘧公志常保。

· 全唐诗 ·

古人去已久，此理今难道。

卷_13【乘潮至渔浦作】

陶翰

舫棹乘早潮，潮来如风雨。樟台忽已隐，界峰莫及睹。
崩腾心为失，浩荡目无主。赍恨浪始闻，漾漾入鱼浦。
云景共澄霁，江山相吞吐。伟哉造化工，此事从终古。
流沫诚足诚，商歌调易若。颇因忠信全，客心犹栩栩。

卷_14【秋山夕兴】

陶翰

山月松筱下，月明山景鲜。聊为高秋酌，复此清夜弦。
晤语方获志，栖心亦弥年。尚言兴未逸，更理逍遥篇。

卷_15【送集贤学士伊阙史少府敕放归江东觐省（一作
綦毋潜诗）】

陶翰

墨客钟张侣，材高吴越珍。千门来谒帝，驷马去荣亲。

· 全唐诗 ·

吏邑沿清洛，乡山指白蘋。归期应不远，当及未央春。

卷_16【送金卿归新罗】

陶翰

奉义朝中国，殊恩及远臣。乡心遥渡海，客路再经春。
落日谁同望，孤舟独可亲。拂波衔木鸟，偶宿泣珠人。
礼乐夷风变，衣冠汉制新。青云已干吕，知汝重来宾。

卷_17【柳陌听早莺】

陶翰

忽来枝上啭，还似谷中声。乍使香闺静，偏伤远客情。
间关难辨处，断续若频惊。玉勒留将久，青楼梦不成。
千门候晓发，万井报春生。徒有知音赏，惭非皋鹤鸣。

· 全唐诗 ·

第一百四十七卷

卷_1【逢雪宿芙蓉山主人】

刘长卿

日暮苍山远，天寒白屋贫。柴门闻犬吠，风雪夜归人。

卷_2【送张起、崔载华之闽中】

刘长卿

朝无寒士达，家在旧山贫。相送天涯里，怜君更远人。

卷_3【赠秦系征君】

刘长卿

群公谁让位，五柳独知贫。惆怅青山路，烟霞老此人。

· 全唐诗 ·

卷_4【秦系顷以家事获谤，因出旧山，每荷观察崔公见知，欲归未遂，感其流寓，诗以赠之】

刘长卿

初迷武陵路，复出孟尝门。回首江南岸，青山与旧恩。

卷_5【夜中对雪赠秦系，时秦初与谢氏离婚，谢氏在越】

刘长卿

月明花满地，君自忆山阴。谁遣因风起，纷纷乱此心。

卷_6【湘妃】

刘长卿

帝子不可见，秋风来暮思。婣娟湘江月，千载空蛾眉。

卷_7【斑竹】

刘长卿

苍梧千载后，斑竹对湘沅。欲识湘妃怨，枝枝满泪痕。

· 全唐诗 ·

卷_8【春草宫怀古】

刘长卿

君王不可见，芳草旧宫春。犹带罗裙色，青青向楚人。

卷_9【正朝览镜作】

刘长卿

憔悴逢新岁，茅扉见旧春。朝来明镜里，不忍白头人。

卷_10【瓜洲道中送李端公南渡后，归扬州道中寄】

刘长卿

片帆何处去，匹马独归迟。惆怅江南北，青山欲暮时。

卷_11【送张十八归桐庐】

刘长卿

归人乘野艇，带月过江村。正落寒潮水，相随夜到门。

· 全唐诗 ·

卷_12【过白鹤观寻岑秀才不遇】

刘长卿

不知方外客，何事锁空房。应向桃源里，教他唤阮郎。

卷_13【听弹琴】

刘长卿

泠泠七丝上，静听松风寒。古调虽自爱，今人多不弹。

卷_14【游南园，偶见在阴墙下葵，因以成咏】

刘长卿

此地常无日，青青独在阴。太阳偏不及，非是未倾心。

卷_15【入百丈涧见桃花晚开】

刘长卿

百丈深涧里，过时花欲妍。应缘地势下，遂使春风偏。

· 全唐诗 ·

卷_16【送子婿崔真甫、李穆往扬州四首】

刘长卿

渡口发梅花，山中动泉脉。芜城春草生，君作扬州客。
半逻莺满树，新年人独远。落花逐流水，共到茱萸湾。
雁还空渚在，人去落潮翻。临水独挥手，残阳归掩门。
狎鸟携稚子，钓鱼终老身。殷勤嘱归客，莫话桃源人。

卷_17【寄龙山道士许法棱】

刘长卿

悠悠白云里，独住青山客。林下昼焚香，桂花同寂寂。

卷_18【送方外上人】

刘长卿

孤云将野鹤，岂向人间住。莫买沃洲山，时人已知处。

· 全唐诗 ·

卷_19【送灵澈上人】

刘长卿

苍苍竹林寺，杳杳钟声晚。荷笠带夕阳，青山独归远。

卷_20【茱萸湾北答崔载华问】

刘长卿

荒凉野店绝，迢递人烟远。苍苍古木中，多是隋家苑。

卷_21【赴楚州次自田途中阻浅，问张南史】

刘长卿

楚城今近远，积霭寒塘暮。水浅舟且迟，淮潮至何处。

卷_22【江中对月】

刘长卿

空洲夕烟敛，望月秋江里。历历沙上人，月中孤渡水。

· 全唐诗 ·

卷_23【碧涧别墅喜皇甫侍御相访】

刘长卿

荒村带返照，落叶乱纷纷。古路无行客，寒山独见君。
野桥经雨断，涧水向田分。不为怜同病，何人到白云。

卷_24【初到碧涧招明契上人】

刘长卿

渐老知身累，初寒曝背眠。白云留永日，黄叶减馀年。
猿护窗前树，泉浇谷后田。沃洲能共隐，不用道林钱。

卷_25【送少微上人游天台】

刘长卿

石桥人不到，独往更迢迢。乞食山家少，寻钟野路遥。
松门风自扫，瀑布雪难消。秋夜闻清梵，馀音逐海潮。

· 全唐诗 ·

卷_26【却归睦州至七里滩下作】

刘长卿

南归犹谪宦，独上子陵滩。江树临洲晚，沙禽对水寒。
山开斜照在，石浅乱流难。惆怅梅花发，年年此地看。

卷_27【对酒寄严维】

刘长卿

陋巷喜阳和，衰颜对酒歌。懒从华发乱，闲任白云多。
郡简容垂钓，家贫学弄梭。门前七里濑，早晚子陵过。

卷_28【新年作】

刘长卿

乡心新岁切，天畔独潸然。老至居人下，春归在客先。
岭猿同旦暮，江柳共风烟。已似长沙傅，从今又几年。

· 全唐诗 ·

卷_29【朱放自杭州与故里相使君立碑回，因以奉简，
吏部杨侍郎制文】

刘长卿

片石羊公后，凄凉江水滨。好辞千古事，堕泪万家人。
鵬集占书久，鸾回刻篆新。不堪相顾恨，文字日生尘。

卷_30【送宣尊师醮毕归越】

刘长卿

吹箫江上晚，惆怅别茅君。踏火能飞雪，登刀入白云。
晨香长日在，夜磬满山闻。挥手桐溪路，无情水亦分。

卷_31【送裴使君赴荆南充行军司马】

刘长卿

盛府南门寄，前程积水中。月明临夏口，山晚望巴东。
故节辞江郡，寒笳发渚宫。汉川风景好，遥羨逐羊公。

· 全唐诗 ·

卷_32【送裴郎中贬吉州】

刘长卿

乱军交白刃，一骑出黄尘。汉节同归阙，江帆共逐臣。
猿愁歧路晚，梅作异方春。知己鄴侯在，应怜脱粟人。

卷_33【酬皇甫侍御见寄，时前相国姑臧公初临郡】

刘长卿

离别江南北，汀洲叶再黄。路遥云共水，砧迥月如霜。
岁俭依仁政，年衰忆故乡。伫看宣室召，汉法倚张纲。

卷_34【月下呈章秀才（八元）】

刘长卿

自古悲摇落，谁人奈此何。夜蛩偏傍枕，寒鸟数移柯。
向老三年谪，当秋百感多。家贫惟好月，空愧子猷过。

· 全唐诗 ·

卷_35【酬张夏】

刘长卿

几岁依穷海，颓年惜故阴。剑寒空有气，松老欲无心。
玩雪劳相访，看山正独吟。孤舟且莫去，前路水云深。

卷_36【送李使君贬连州】

刘长卿

独过长沙去，谁堪此路愁。秋风散千骑，寒雨泊孤舟。
贾谊辞明主，萧何识故侯。汉廷当自召，湘水但空流。

卷_37【秋夜北山精舍观体如师梵】

刘长卿

焚香奏仙呗，向夕遍空山。清切兼秋远，威仪对月闲。
静分岩响答，散逐海潮还。幸得风吹去，随人到世间。

· 全唐诗 ·

卷_38【酬张夏雪夜赴州访别途中苦寒作】

刘长卿

扁舟乘兴客，不惮苦寒行。晚暮相依分，江潮欲别情。
水声冰下咽，砂路雪中平。旧剑锋芒尽，应嫌赠脱轻。

卷_39【寻洪尊师不遇】

刘长卿

古木无人地，来寻羽客家。道书堆玉案，仙帔叠青霞。
鹤老难知岁，梅寒未作花。山中不相见，何处化丹砂。

卷_40【喜鲍禅师自龙山至】

刘长卿

故居何日下，春草欲芊芊。犹对山中月，谁听石上泉。
猿声知后夜，花发见流年。杖锡闲来往，无心到处禅。

· 全唐诗 ·

卷_41【送方外上人之常州依萧使君】

刘长卿

宰臣思得度，鸥鸟恋为群。远客回飞锡，空山卧白云。
夕阳孤艇去，秋水两溪分。归共临川史，同翻贝叶文。

卷_42【宿北山禅寺兰若】

刘长卿

上方鸣夕磬，林下一僧还。密行传人少，禅心对虎闲。
青松临古路，白月满寒山。旧识窗前桂，经霜更待攀。

卷_43【赴新安别梁侍郎】

刘长卿

新安君莫问，此路水云深。江海无行迹，孤舟何处寻。
青山空向泪，白月岂知心。纵有馀生在，终伤老病侵。

· 全唐诗 ·

卷_44【江州留别薛六、柳八二员外】

刘长卿

江海相逢少，东南别处长。独行风袅袅，相去水茫茫。
白首辞同舍，青山背故乡。离心与潮信，每日到浔阳。

卷_45【和州留别穆郎中】

刘长卿

播迁悲远道，摇落感衰容。今日犹多难，何年更此逢。
世交黄叶散，乡路白云重。明发看烟树，唯闻江北钟。

卷_46【和州送人归复郢】

刘长卿

因家汉水曲，相送掩柴扉。故郢生秋草，寒江澹落晖。
绿林行客少，赤壁住人稀。独过浔阳去，潮归人不归。

· 全唐诗 ·

卷_47【送金昌宗归钱塘】

刘长卿

新家浙江上，独泛落潮归。秋水照华发，凉风生褐衣。
柴门嘶马少，藜杖拜人稀。惟有陶潜柳，萧条对掩扉。

卷_48【酬张夏别后道中见寄】

刘长卿

离群方岁晏，谪宦在天涯。暮雪同行少，寒潮欲上迟。
海鸥知吏傲，砂鹤见人衰。只畏生秋草，西归亦未期。

卷_49【新安奉送穆谕德归朝，赋得行字】

刘长卿

九重宣室召，万里建溪行。事直皇天在，归迟白发生。
用材身复起，睹圣眼犹明。离别寒江上，潺湲若有情。

· 全唐诗 ·

卷_50【偶然作】

刘长卿

野寺长依止，田家或往还。老农开古地，夕鸟入寒山。
书剑身同废，烟霞吏共闲。岂能将白发，扶杖出人间。

卷_51【送州人孙沅自本州却归句章新营所居】

刘长卿

故里归成客，新家去未安。诗书满蜗舍，征税及渔竿。
火种山田薄，星居海岛寒。怜君不得已，步步别离难。

卷_52【送李员外使还苏州，兼呈前袁州李使君，赋得长字。袁州即员外之从兄】

刘长卿

别离共成怨，衰老更难忘。夜月留同舍，秋风在远乡。
朱弦徐向烛，白发强临觞。归献西陵作，谁知此路长。

· 全唐诗 ·

卷_53【酬李员外从崔录事载华宿三河戍先见寄】

刘长卿

寒江鸣石濑，归客夜初分。人语空山答，猿声独戍闻。
迟来朝及暮，愁去水连云。岁晚心谁在，青山见此君。

卷_54【见秦系离婚后出山居作】

刘长卿

岂知偕老重，垂老绝良姻。郗氏诚难负，朱家自愧贫。
绽衣留欲故，织锦罢经春。何况蘼芜绿，空山不见人。

卷_55【酬秦系】

刘长卿

鹤书犹未至，那出白云来。旧路经年别，寒潮每日回。
家空归海燕，人老发江梅。最忆门前柳，闲居手自栽。

· 全唐诗 ·

卷_56【岁日作】

刘长卿

建寅回北斗，看历占春风。律变沧江外，年加白发中。
春衣试稚子，寿酒劝衰翁。今日阳和发，荣枯岂不同。

卷_57【题元录事开元所居】

刘长卿

幽居萝薜情，高卧纪纲行。鸟散秋鹰下，人闲春草生。
冒风归野寺，收印出山城。今日新安郡，因君水更清。

卷_58【送崔载华、张起之闽中】

刘长卿

不识闽中路，遥知别后心。猿声入岭切，鸟道问人深。
旅食过夷落，方言会越音。西征开幕府，早晚用陈琳。

· 全唐诗 ·

卷_59【送张司直赴岭南谒张尚书】

刘长卿

番禺万里路，远客片帆过。盛府依横海，荒祠拜伏波。
人经秋瘴变，鸟坠火云多。诚惮炎洲里，无如一顾何。

卷_60【寄会稽公徐侍郎（公时在王傅）】

刘长卿

摇落淮南叶，秋风想越吟。邹枚入梁苑，逸少在山阴。
老鹤无衰貌，寒松有本心。圣朝难税驾，惆怅白云深。

卷_61【送朱山人放越州，贼退后归山阴别业】

刘长卿

越州初罢战，江上送归桡。南渡无来客，西陵自落潮。
空城垂故柳，旧业废春苗。闾里相逢少，莺花共寂寥。

· 全唐诗 ·

卷_62【秋夜肃公房喜普门上人自阳羨山至】

刘长卿

山栖久不见，林下偶同游。早晚来香积，何人住沃洲。
寒禽惊后夜，古木带高秋。却入千峰去，孤云不可留。

卷_63【送李秘书却赴南中】

刘长卿

却到番禺日，应伤昔所依。炎洲百口住，故国几人归。
路识梅花在，家存棣萼稀。独逢回雁去，犹作旧行飞。

卷_64【过前安宜张明府郊居】

刘长卿

寂寥东郭外，白首一先生。解印孤琴在，移家五柳成。
夕阳临水钓，春雨向田耕。终日空林下，何人识此情。

· 全唐诗 ·

卷_65【使回次杨柳过元八所居】

刘长卿

君家杨柳渡，来往落帆过。绿竹经寒在，青山欲暮多。
薜萝诚可恋，婚嫁复如何。无奈闲门外，渔翁夜夜歌。

卷_66【送李侍御贬郴州】

刘长卿

洞庭波渺渺，君去吊灵均。几路三湘水，全家万里人。
听猿明月夜，看柳故年春。忆想汀洲畔，伤心向白蘋。

卷_67【寄普门上人】

刘长卿

白云幽卧处，不向世人传。闻在千峰里，心知独夜禅。
辛勤羞薄禄，依止爱闲田。惆怅王孙草，青青又一年。

· 全唐诗 ·

卷_68【逢郴州使，因寄郑协律】

刘长卿

相思楚天外，梦寐楚猿吟。更落淮南叶，难为江上心。
衡阳问人远，湘水向君深。欲逐孤帆去，茫茫何处寻。

卷_69【岳阳馆中望洞庭湖】

刘长卿

万古巴丘戍，平湖此望长。问人何淼淼，愁暮更苍苍。
叠浪浮元气，中流没太阳。孤舟有归客，早晚达潇湘。

卷_70【巡去岳阳却归鄂州使院，留别郑洵侍御，侍御
先曾谪居此州】

刘长卿

何事长沙谪，相逢楚水秋。暮帆归夏口，寒雨对巴丘。
帝子椒浆奠，骚人木叶愁。惟怜万里外，离别洞庭头。

· 全唐诗 ·

卷_71【夏口送屈突司直使湖南】

刘长卿

共悲来夏口，何事更南征。雾露行人少，潇湘春草生。
莺啼何处梦，猿啸若为声。风月新年好，悠悠远客情。

卷_72【代边将有怀】

刘长卿

少年辞魏阙，白首向沙场。瘦马恋秋草，征人思故乡。
暮笳吹塞月，晓甲带胡霜。自到云中郡，于今百战强。

卷_73【雨中过员稷巴陵山居赠别】

刘长卿

怜君洞庭上，白发向人垂。积雨悲幽独，长江对别离。
牛羊归故道，猿鸟聚寒枝。明发遥相望，云山不可知。

· 全唐诗 ·

卷_74【送李中丞之襄州】

刘长卿

流落征南将，曾驱十万师。罢归无旧业，老去恋明时。
独立三朝识，轻生一剑知。茫茫汉江上，日暮复何之。

卷_75【奉使至申州，伤经陷没】

刘长卿

举目伤芜没，何年此战争。归人失旧里，老将守孤城。
废戍山烟出，荒田野火行。独怜湫水上，时乱亦能清。

卷_76【穆陵关北逢人归渔阳】

刘长卿

逢君穆陵路，匹马向桑干。楚国苍山古，幽州白日寒。
城池百战后，耆旧几家残。处处蓬蒿遍，归人掩泪看。

· 全唐诗 ·

卷_77【安州道中经浐水有怀】

刘长卿

征途逢浐水，忽似到秦川。借问朝天处，犹看落日边。
映沙晴漾漾，出涧夜溅溅。欲寄西归恨，微波不可传。

卷_78【步登夏口古城作】

刘长卿

平芜连古堞，远客此沾衣。高树朝光上，空城秋气归。
微明汉水极，摇落楚人稀。但见荒郊外，寒鸦暮暮飞。

卷_79【赠别卢司直之闽中】

刘长卿

尔来多不见，此去又何之。华发同今日，流芳似旧时。
洲长春色遍，汉广夕阳迟。岁岁王孙草，空怜无处期。

· 全唐诗 ·

卷_80【酬郭夏人日长沙感怀见赠】

刘长卿

旧俗欢犹在，怜君恨独深。新年向国泪，今日倚门心。
岁去随湘水，春生近桂林。流莺且莫弄，江畔正行吟。

卷_81【赴巴南书情寄故人】

刘长卿

南过三湘去，巴人此路偏。谪居秋瘴里，归处夕阳边。
直道天何在，愁容镜亦怜。裁书欲谁诉，无泪可潸然。

卷_82【馀干旅舍】

刘长卿

摇落暮天迥，青枫霜叶稀。孤城向水闭，独鸟背人飞。
渡口月初上，邻家渔未归。乡心正欲绝，何处捣寒衣。

· 全唐诗 ·

卷_83【登思禅寺上方题修竹茂松】

刘长卿

上方幽且暮，台殿隐蒙笼。远磬秋山里，清猿古木中。
众溪连竹路，诸岭共松风。傥许栖林下，甘成白首翁。

卷_84【恩敕重推使牒追赴苏州，次前溪馆作】

刘长卿

渐入云峰里，愁看驿路闲。乱鸦投落日，疲马向空山。
且喜怜非罪，何心恋末班。天南一万里，谁料得生还。

卷_85【北归次秋浦界清溪馆】

刘长卿

万里猿啼断，孤村客暂依。雁过彭蠡暮，人向宛陵稀。
旧路青山在，馀生白首归。渐知行近北，不见鹧鸪飞。

· 全唐诗 ·

卷_86【谪官后却归故村，将过虎丘，怅然有作】

刘长卿

万事依然在，无如岁月何。邑人怜白发，庭树长新柯。
故老相逢少，同官不见多。唯馀旧山路，惆怅枉帆过。

卷_87【重推后却赴岭外待进止，寄元侍郎】

刘长卿

却访巴人路，难期国土恩。白云从出岫，黄叶已辞根。
大造功何薄，长年气尚冤。空令数行泪，来往落湘沅。

卷_88【秋杪江亭有作（一作秋杪干越亭）】

刘长卿

寂寞江亭下，江枫秋气斑。世情何处澹，湘水向人闲。
寒渚一孤雁，夕阳千万山。扁舟如落叶，此去未知还。

· 全唐诗 ·

卷_89【送郑司直归上都】

刘长卿

岁岁逢离别，蹉跎江海滨。宦游成楚老，乡思逐秦人。
马首归何日，莺啼又一春。因君报情旧，闲慢欲垂纶。

卷_90【送灵澈上人归嵩阳兰若】

刘长卿

南地随缘久，东林几岁空。暮山门独掩，春草路难通。
作梵连松韵，焚香入桂丛。唯将旧瓶钵，却寄白云中。

卷_91【却赴南邑留别苏台知己】

刘长卿

又过梅岭上，岁岁此枝寒。落日孤舟去，青山万里看。
猿声湘水静，草色洞庭宽。已料生涯事，唯应把钓竿。

· 全唐诗 ·

卷_92【和灵一上人新泉】

刘长卿

东林一泉出，复与远公期。石浅寒流处，山空夜落时。
梦闲闻细响，虑澹对清漪。动静皆无意，唯应达者知。

卷_93【送李挚赴延陵令】

刘长卿

清风季子邑，想见下车时。向水弹琴静，看山采菊迟。
明君加印绶，廉使托茆茨。旦暮华阳洞，云峰若有期。

卷_94【奉送裴员外赴上都】

刘长卿

彤襜江上远，万里诏书催。独过浔阳去，空怜潮信回。
离心秋草绿，挥手暮帆开。想见秦城路，人看五马来。

· 全唐诗 ·

卷_95【长沙桓王墓下别李纾、张南史】

刘长卿

长沙千载后，春草独萋萋。流水朝将暮，行人东复西。
碑苔几字灭，山木万株齐。伫立伤今古，相看惜解携。

卷_96【送侯御赴黔中充判官】

刘长卿

不识黔中路，今看遣使臣。猿啼万里客，鸟似五湖人。
地远官无法，山深俗岂淳。须令荒徼外，亦解惧埋轮。

卷_97【秋日登吴公台上寺远眺，寺即陈将吴明彻战场】

刘长卿

古台摇落后，秋日望乡心。野寺人来少，云峰水隔深。
夕阳依旧垒，寒磬满空林。惆怅南朝事，长江独至今。

· 全唐诗 ·

卷_98【淮上送梁二，恩命追赴上都】

刘长卿

贾生年最少，儒行汉庭闻。拜手卷黄纸，回身谢白云。
故关无去客，春草独随君。淼淼长淮水，东西自此分。

卷_99【送崔升归上都】

刘长卿

旧寺寻遗绪，归心逐去尘。早莺何处客，古木几家人。
白发经多难，沧洲欲暮春。临期数行泪，为尔一沾巾。

卷_【过李将军南郑林园观妓】

刘长卿

郊原风日好，百舌弄何频。小妇秦家女，将军天上人。
鸦归长郭暮，草映大堤春。客散垂杨下，通桥车马尘。

· 全唐诗 ·

卷_【送严侍御充东畿观察判官】

刘长卿

洛阳征战后，君去问凋残。云月临南至，风霜向北寒。
故园经乱久，古木隔林看。谁访江城客，年年守一官。

卷_【送王端公入奏上都】

刘长卿

旧国无家访，临歧亦羡归。途经百战后，客过二陵稀。
秋草通征骑，寒城背落晖。行当蒙顾问，吴楚岁频饥。

卷_【送营田判官郑侍御赴上都】

刘长卿

上国三千里，西还及岁芳。故山经乱在，春日送归长。
晓奏趋双阙，秋成报万箱。幸论开济力，已实海陵仓。

· 全唐诗 ·

卷_【送李校书赴东浙幕府（校书工于翰墨）】

刘长卿

方从大夫后，南去会稽行。淼淼沧江外，青青春草生。
芸香辞乱事，梅吹听军声。应访王家宅，空怜江水平。

卷_【清明后登城眺望】

刘长卿

风景清明后，云山睥睨前。百花如旧日，万井出新烟。
草色无空地，江流合远天。长安在何处，遥指夕阳边。

卷_【陪王明府泛舟】

刘长卿

花县弹琴暇，樵风载酒时。山含秋色近，鸟度夕阳迟。
出没舂成浪，蒙笼竹亚枝。云峰逐人意，来去解相随。

· 全唐诗 ·

卷_【送度支留后若侍御之歙州，便赴信州省覲】

刘长卿

国用忧钱谷，朝推此任难。即山榆荚变，降雨稻花残。
林响朝登岭，江喧夜过滩。遥知骢马色，应待倚门看。

卷_【馀干夜宴奉饯前苏州韦使君新除婺州作】

刘长卿

复拜东阳郡，遥驰北阙心。行春五马急，向夜一猿深。
山过康郎近，星看婺女临。幸容栖托分，犹恋旧棠阴。

卷_【晚次苦竹馆，却忆干越旧游】

刘长卿

匹马风尘色，千峰旦暮时。遥看落日尽，独向远山迟。
故驿花临道，荒村竹映篱。谁怜却回首，步步恋南枝。

· 全唐诗 ·

卷_【送李二十四移家之江州】

刘长卿

烟尘犹满目，歧路易沾衣。逋客多南渡，征鸿自北飞。
九江春草绿，千里暮潮归。别后难相访，全家隐钓矶。

卷_【送卢判官南湖】

刘长卿

漾舟仍载酒，愧尔意相宽。草色南湖绿，松声小署寒。
水禽前后起，花屿往来看。已作沧洲调，无心恋一官。

卷_【送张栩扶侍之睦州（此公旧任建德令）】

刘长卿

遥忆新安旧，扁舟复却还。浅深看水石，来往逐云山。
入县馀花在，过门故柳闲。东征随子去，皆隐薜萝间。

· 全唐诗 ·

卷_【集梁耿开元寺所居院】

刘长卿

到君幽卧处，为我扫莓苔。花雨晴天落，松风终日来。
路经深竹过，门向远山开。岂得长高枕，中朝正用才。

卷_【赠西邻卢少府】

刘长卿

篱落能相近，渔樵偶复同。苔封三径绝，溪向数家通。
犬吠寒烟里，鸦鸣夕照中。时因杖藜次，相访竹林东。

卷_【游休禅师双峰寺】

刘长卿

双扉碧峰际，遥向夕阳开。飞锡方独往，孤云何事来。
寒潭映白月，秋雨上青苔。相送东郊外，羞看骢马回。

· 全唐诗 ·

卷_【廨中见桃花南枝已开，北枝未发，因寄杜副端】

刘长卿

何意同根本，开花每后时。应缘去日远，独自发春迟。
结实恩难忘，无言恨岂知。年光不可待，空羡向南枝。

卷_【奉送卢员外之饶州】

刘长卿

天书万里至，旌旆上江飞。日向鄱阳近，应看吴岫微。
暮帆何处落，潮水背人归。风土无劳问，南枝黄叶稀。

卷_【送处士归州，因寄林山人】

刘长卿

陵阳不可见，独往复如何。旧邑云山里，扁舟来去过。
鸟声春谷静，草色太湖多。傥宿荆溪夜，相思渔者歌。

· 全唐诗 ·

卷_【移使鄂州，次岷阳馆怀旧居】

刘长卿

多惭恩未报，敢问路何长。万里通秋雁，千峰共夕阳。
旧游成远道，此去更违乡。草露深山里，朝朝落客裳。

卷_【送齐郎中赴海州】

刘长卿

华省占星动，孤城望日遥。直庐收旧草，行县及新苗。
沧海天连水，青山暮与朝。闾阎几家散，应待下车招。

卷_【重阳日鄂城楼送屈突司直】

刘长卿

登高复送远，惆怅洞庭秋。风景同前古，云山满上游。
苍苍来暮雨，淼淼逐寒流。今日关中事，萧何共尔忧。

· 全唐诗 ·

卷_【更被奏留淮南，送从弟罢使江东】

刘长卿

又作淮南客，还悲木叶声。寒潮落瓜步，秋色上芜城。
王事何时尽，沧洲羡尔行。青山将绿水，惆怅不胜情。

卷_【经漂母墓】

刘长卿

昔贤怀一饭，兹事已千秋。古墓樵人识，前朝楚水流。
渚蘋行客荐，山木杜鹃愁。春草茫茫绿，王孙旧此游。

卷_【送李端公赴东都】

刘长卿

轩辕征战后，江海别离长。远客归何处，平芜满故乡。
夕阳帆杳杳，旧里树苍苍。惆怅蓬山下，琼枝不可忘。

· 全唐诗 ·

卷_【送王员外归朝】

刘长卿

往来无尽目，离别要逢春。海内罹多事，天涯见近臣。
芳时万里客，乡路独归人。魏阙心常在，随君亦向秦。

卷_【送蒋侍御入秦】

刘长卿

朝见及芳菲，恩荣出紫微。晚光临仗奏，春色共西归。
楚客移家老，秦人访旧稀。因君乡里去，为扫故园扉。

卷_【洞庭驿逢郴州使还，寄李汤司马】

刘长卿

洞庭秋水阔，南望过衡峰。远客潇湘里，归人何处逢。
孤云飞不定，落叶去无踪。莫使沧浪叟，长歌笑尔容。

· 全唐诗 ·

卷_【送舍弟之鄱阳居】

刘长卿

鄱阳寄家处，自别掩柴扉。故里人何在，沧波孤客稀。
湖山春草遍，云木夕阳微。南去逢回雁，应怜相背飞。

卷_【送裴二十端公使岭南】

刘长卿

苍梧万里路，空见白云来。远国知何在，怜君去未回。
桂林无叶落，梅岭自花开。陆贾千年后，谁看朝汉台。

卷_【过桃花夫人庙（即息夫人）】

刘长卿

寂寞应千岁，桃花想一枝。路人看古木，江月向空祠。
云雨飞何处，山川是旧时。独怜春草色，犹似忆佳期。

· 全唐诗 ·

卷_【鄂渚送池州程使君】

刘长卿

萧萧五马动，欲别谢临川。落日芜湖色，空山梅冶烟。
江湖通廨舍，楚老拜戈船。风化东南满，行舟来去传。

卷_【送友人西上】

刘长卿

羁心不自解，有别会沾衣。春草连天积，五陵远客归。
十年经转战，几处便芳菲。想见函关路，行人去亦稀。

卷_【送梁郎中赴吉州】

刘长卿

遥想庐陵郡，还听叔度歌。旧官移上象，新令布中和。
看竹经霜少，闻猿带雨多。但愁征拜日，无奈借留何。

· 全唐诗 ·

卷_【过湖南羊处士别业】

刘长卿

杜门成白首，湖上寄生涯。秋草芜三径，寒塘独一家。
鸟归村落尽，水向县城斜。自有东篱菊，年年解作花。

卷_【送河南元判官赴河南勾当苗税充百官俸钱】

刘长卿

春草长河曲，离心共渺然。方收汉家俸，独向汶阳田。
鸟雀空城在，榛芜旧路迁。山东征战苦，几处有人烟。

卷_【夏中崔中丞宅见海红摇落一花独开】

刘长卿

何事一花残，闲庭百草阑。绿滋经雨发，红艳隔林看。
竟日馀香在，过时独秀难。共怜芳意晚，秋露未须团。

· 全唐诗 ·

卷_【使还至菱陂驿渡浈水作】

刘长卿

清川已再涉，疲马共西还。何事行人倦，终年流水闲。
孤烟飞广泽，一鸟向空山。愁入云峰里，苍苍闭古关。

卷_【送齐郎中典括州】

刘长卿

星象移何处，旌麾独向东。劝耕沧海畔，听讼白云中。
树色双溪合，猿声万岭同。石门康乐住，几里枉帆通。

卷_【过隐空和尚故居】

刘长卿

自从飞锡去，人到沃洲稀。林下期何在，山中春独归。
踏花寻旧径，映竹掩空扉。寥落东峰上，犹堪静者依。

· 全唐诗 ·

卷_【过萧尚书故居见李花，感而成咏】

刘长卿

手植已芳菲，心伤故径微。往年啼鸟至，今日主人非。
满地谁当扫，随风岂复归。空怜旧阴在，门客共沾衣。

卷_【送袁处士】

刘长卿

闲田北川下，静者去躬耕。万里空江蒨，孤舟过郢城。
种荷依野水，移柳待山莺。出处安能问，浮云岂有情。

卷_【酬李侍御登岳阳见寄】

刘长卿

想见孤舟去，无由此路寻。暮帆遥在眼，春色独何心。
绿水潇湘阔，青山鄠杜深。谁当北风至，为尔一开襟。

· 全唐诗 ·

卷_【喜晴】

刘长卿

晓日西风转，秋天万里明。湖天一种色，林鸟百般声。
霁景浮云满，游丝映水轻。今朝江上客，凡慰几人情。

· 全唐诗 ·

第一百四十八卷

卷_1【夏口送徐郎中归朝】

刘长卿

星象南宫远，风流上客稀。九重思晓奏，万里见春归。
棹发空江响，城孤落日晖。离心与杨柳，临水更依依。

卷_2【鄂渚听杜别驾弹胡琴】

刘长卿

文姬留此曲，千载一知音。不解胡人语，空留楚客心。
声随边草动，意入陇云深。何事长江上，萧萧出塞吟。

卷_3【过鹦鹉洲王处士别业】

刘长卿

白首此为渔，青山对结庐。问人寻野笋，留客馈家蔬。

· 全唐诗 ·

古柳依沙发，春苗带雨锄。共怜芳杜色，终日伴闲居。

卷_4【寄万州崔使君（令钦）】

刘长卿

时艰方用武，儒者任浮沈。摇落秋江暮，怜君巴峡深。
丘门多白首，蜀郡满青襟。自解书生咏，愁猿莫夜吟。

卷_5【送马秀才移家京洛便赴举】

刘长卿

自从为楚客，不复扫荆扉。剑共丹诚在，书随白发归。
旧游经乱静，后进识君稀。空把相如赋，何人荐礼闱。

卷_6【送南特进赴归行营】

刘长卿

闻道军书至，扬鞭不问家。虏云连白草，汉月到黄沙。
汗马河源饮，烧羌陇坻遮。翩翩新结束，去逐李轻车。

· 全唐诗 ·

卷_7【送道标上人归南岳】

刘长卿

悠然倚孤棹，却忆卧中林。江草将归远，湘山独往深。
白云留不住，绿水去无心。衡岳千峰乱，禅房何处寻。

卷_8【送梁侍御巡永州】

刘长卿

萧萧江雨暮，客散野亭空。忧国天涯去，思乡岁暮同。
到时猿未断，回处水应穷。莫望零陵路，千峰万木中。

卷_9【岁夜喜魏万成、郭夏雪中相寻】

刘长卿

新年欲变柳，旧客共沾衣。岁夜犹难尽，乡春又独归。
寒灯映虚牖，暮雪掩闲扉。且莫乘船去，平生相访稀。

· 全唐诗 ·

卷_10【送蔡侍御赴上都】

刘长卿

迟迟立骖马，久客恋潇湘。明日谁同路，新年独到乡。
孤烟向驿远，积雪去关长。秦地看春色，南枝不可忘。

卷_11【晦日陪辛大夫宴南亭】

刘长卿

月晦逢休浣，年光逐宴移。早莺留客醉，春日为人迟。
萸草全无叶，梅花遍压枝。政闲风景好，莫比岷山时。

卷_12【送独孤判官赴岭】

刘长卿

伏波初树羽，待尔静川鳞。岭海看飞鸟，天涯问远人。
苍梧云里夕，青草嶂中春。遥想文身国，迎舟拜使臣。

· 全唐诗 ·

卷_13【长沙馆中与郭夏对雨】

刘长卿

长沙积雨晦，深巷绝人幽。润上春衣冷，声连暮角愁。
云横全楚地，树暗古湘洲。杳蔼江天外，空堂生百忧。

卷_14【陪辛大夫西亭宴观妓】

刘长卿

歌舞怜迟日，旄麾映早春。莺窥陇西将，花对洛阳人。
醉罢知何事，恩深忘此身。任他行雨去，归路裊香尘。

卷_15【题魏万成江亭】

刘长卿

萧条方岁晏，牢落对空洲。才出时人右，家贫湘水头。
苍山隐暮雪，白鸟没寒流。不是莲花府，冥冥不可求。

· 全唐诗 ·

卷_16【春过裴虬郊园（时裴不在，因以寄之）】

刘长卿

郊原春欲暮，桃杏落纷纷。何处随芳草，留家寄白云。
听莺情念友，看竹恨无君。长啸高台上，南风冀尔闻。

卷_17【送韦赞善使岭南】

刘长卿

欲逐楼船将，方安卉服夷。炎洲经瘴远，春水上泷迟。
岁贡随重译，年芳遍四时。番禺静无事，空咏饮泉诗。

卷_18【送乔判官赴福州】

刘长卿

扬帆向何处，插羽逐征东。夷落人烟迥，王程鸟路通。
江流回涧底，山色聚闽中。君去凋残后，应怜百越空。

· 全唐诗 ·

卷_19【送李补阙之上都】

刘长卿

独归西掖去，难接后尘游。向日三千里，朝天十二楼。
路看新柳夕，家对旧山秋。惆怅离心远，沧江空自流。

卷_20【送袁明府之任】

刘长卿

既有亲人术，还逢试吏年。蓬蒿千里闭，村树几家全。
雪覆淮南道，春生颍谷烟。何时当莅政，相府待闻天。

卷_21【海盐官舍早春】

刘长卿

小邑沧洲吏，新年白首翁。一官如远客，万事极飘蓬。
柳色孤城里，莺声细雨中。羁心早已乱，何事更春风。

· 全唐诗 ·

卷_22【南湖送徐二十七西上】

刘长卿

家在横塘曲，那能万里违。门临秋水掩，帆带夕阳飞。
傲俗宜纱帽，干时倚布衣。独将湖上月，相逐去还归。

卷_23【曲阿对月别岑况、徐说】

刘长卿

金陵已芜没，函谷复烟尘。犹见南朝月，还随上国人。
白云心自远，沧海意相亲。何事须成别，汀洲欲暮春。

卷_24【送李侍御贬鄱阳】

刘长卿

回车仍昨日，谪去已秋风。干越知何处，云山只向东。
暮天江色里，田鹤稻花中。却见鄱阳吏，犹应旧马骢。

· 全唐诗 ·

卷_25【送路少府使东京便应制举】

刘长卿

故人西奉使，胡骑正纷纷。旧国无来信，春江独送君。
五言凌白雪，六翮向青云。谁念沧洲吏，忘机鸥鸟群。

卷_26【松江独宿】

刘长卿

洞庭初下叶，孤客不胜愁。明月天涯夜，青山江上秋。
一官成白首，万里寄沧洲。久被浮名系，能无愧海鸥。

卷_27【寻白石山真禅师旧草堂】

刘长卿

惆怅云山暮，闲门独不开。何时飞杖锡，终日闭苍苔。
隔岭春犹在，无人燕亦来。谁堪暝投处，空复一猿哀。

· 全唐诗 ·

卷_28【送行军张司马罢使回】

刘长卿

时危身赴敌，事往任浮沈。末路三江去，当时百战心。
春风吴苑绿，古木剡山深。千里沧波上，孤舟不可寻。

卷_29【喜李翰自越至】

刘长卿

南浮沧海上，万里到吴台。久别长相忆，孤舟何处来。
春风催客醉，江月向人开。羡尔无羁束，沙鸥独不猜。

卷_30【罪所留系寄张十四】

刘长卿

不见君来久，冤深意未传。冶长空得罪，夷甫岂言钱。
直道天何在，愁容镜亦怜。因书欲自诉，无泪可潸然。

· 全唐诗 ·

卷_31【送勤照和尚往睢阳赴太守请】

刘长卿

燃灯传七祖，杖锡为诸侯。来去云无意，东西水自流。
青山春满目，白日夜随舟。知到梁园下，苍生赖此游。

卷_32【长门怨】

刘长卿

何事长门闭，珠帘只自垂。月移深殿早，春向后宫迟。
蕙草生闲地，梨花发旧枝。芳菲自恩幸，看著被风吹。

卷_33【过横山顾山人草堂】

刘长卿

只见山相掩，谁言路尚通。人来千嶂外，犬吠百花中。
细草香飘雨，垂杨闲卧风。却寻樵径去，惆怅绿溪东。

· 全唐诗 ·

卷_34【送李校书适越谒杜中丞】

刘长卿

江风处处尽，旦暮水空波。摇落行人去，云山向越多。
陈蕃悬榻待，谢客枉帆过。相见耶溪路，逶迤入薜萝。

卷_35【秋夜雨中，诸公过灵光寺所居】

刘长卿

晤语青莲舍，重门闭夕阴。向人寒烛静，带雨夜钟沈。
流水从他事，孤云任此心。不能捐斗粟，终日愧瑶琴。

卷_36【西庭夜燕，喜评事兄拜会】

刘长卿

犹是南州吏，江城又一春。隔帘湖上月，对酒眼中人。
棘寺初衔命，梅仙已误身。无心羨荣禄，唯待却垂纶。

· 全唐诗 ·

卷_37【寻南溪常山道人隐居】

刘长卿

一路经行处，莓苔见履痕。白云依静渚，春草闭闲门。
过雨看松色，随山到水源。溪花与禅意，相对亦忘言。

卷_38【扬州雨中张十宅观妓（一作张谓诗）】

刘长卿

夜色带春烟，灯花拂更燃。残妆添石黛，艳舞落金钿。
掩笑频欹扇，迎歌乍动弦。不知巫峡雨，何事海西边。

卷_39【赴宣州使院，夜宴寂上人房，留辞前苏州韦使君】

刘长卿

白云乖始愿，沧海有微波。恋旧争趋府，临危欲负戈。
春归花殿暗，秋傍竹房多。耐可机心息，其如羽檄何。

· 全唐诗 ·

卷_40【送薛承矩秩满北游】

刘长卿

匹马向何处，北游殊未还。寒云带飞雪，日暮雁门关。
一路傍汾水，数州看晋山。知君喜初服，只爱此身闲。

卷_41【饯别王十一南游】

刘长卿

望君烟水阔，挥手泪沾巾。飞鸟没何处，青山空向人。
长江一帆远，落日五湖春。谁见汀洲上，相思愁白蘋。

卷_42【送严维尉诸暨（严即越州人）】

刘长卿

爱尔文章远，还家印绶荣。退公兼色养，临下带乡情。
乔木映官舍，春山宜县城。应怜钓台石，闲却为浮名。

· 全唐诗 ·

卷_43【送李七之笮水谒张相公】

刘长卿

惆怅青春晚，殷勤浊酒垆。后时长剑涩，斜日片帆孤。
东阁邀才子，南昌老腐儒。梁园旧相识，谁忆卧江湖。

卷_44【送崔处士先适越】

刘长卿

山阴好云物，此去又春风。越鸟闻花里，曹娥想镜中。
小江潮易满，万井水皆通。徒羡扁舟客，微官事不同。

卷_45【奉陪使君西庭送淮西魏判官（得山字）】

刘长卿

羽檄催归恨，春风醉别颜。能邀五马送，自逐一星还。
破竹从军乐，看花听讼闲。遥知用兵处，多在八公山。

· 全唐诗 ·

卷_46【狱中见壁画佛】

刘长卿

不谓衔冤处，而能窥大悲。独栖丛棘下，还见雨花时。
地狭青莲小，城高白日迟。幸亲方便力，犹畏毒龙欺。

卷_47【送许拾遗还京】

刘长卿

万里辞三殿，金陵到旧居。文星出西掖，卿月在南徐。
故里惊朝服，高堂捧诏书。暂容乘驷马，谁许恋鲈鱼。

卷_48【送张七判官还京觐省】

刘长卿

春兰方可采，此去叶初齐。函谷莺声里，秦山马首西。
庭闱新柏署，门馆旧桃蹊。春色长安道，相随入禁闺。

· 全唐诗 ·

卷_49【送孙莹京监擢第归蜀觐省】

刘长卿

适贺一枝新，旋惊万里分。礼闈称独步，太学许能文。
征马望春草，行人看暮云。遥知倚门处，江树正氛氲。

卷_50【送史九赴任宁陵，兼呈单父史八时监察五兄初入台】

刘长卿

趋府弟联兄，看君此去荣。春随千里道，河带万家城。
绣服棠花映，青袍草色迎。梁园修竹在，持赠结交情。

卷_51【卧病喜田九见寄】

刘长卿

卧来能几日，春事已依然。不解谢公意，翻令静者便。
庭阴残旧雪，柳色带新年。寂寞深村里，唯君相访偏。

· 全唐诗 ·

卷_52【重过宣峰寺山房，寄灵一上人】

刘长卿

西陵潮信满，岛屿入中流。越客依风水，相思南渡头。
寒光生极浦，暮雪映沧洲。何事扬帆去，空惊海上鸥。

卷_53【云门寺访灵一上人】

刘长卿

所思劳日夕，惆怅去西东。禅客知何在，春山到处同。
独行残雪里，相见白云中。请近东林寺，穷年事远公。

卷_54【送陆羽之茅山，寄李延陵】

刘长卿

延陵衰草遍，有路问茅山。鸡犬驱将去，烟霞拟不还。
新家彭泽县，旧国穆陵关。处处逃名姓，无名亦是闲。

· 全唐诗 ·

卷_55【寄灵一上人初还云门（一作皇甫曾诗）】

刘长卿

寒霜白云里，法侣自相携。竹径通城下，松风隔水西。
方同沃洲去，不作武陵迷。仿佛知心处，高峰是会稽。

卷_56【寄灵一上人（一作皇甫冉诗，一作郎士元诗）】

刘长卿

高僧本姓竺，开士旧名林。一去春山里，千峰不可寻。
新年芳草遍，终日白云深。欲徇微官去，悬知讶此心。

卷_57【送韩司直】

刘长卿

游吴还入越，来往任风波。复送王孙去，其如春草何。
岸明残雪在，潮满夕阳多。季子杨柳庙，停舟试一过。

· 全唐诗 ·

卷_58【酬李郎中夜登苏州城楼见寄】

刘长卿

辛勤万里道，萧索九秋残。日照闽中夜，天凝海上寒。
客程无地远，主意在人安。遥寄登楼作，空知行路难。

卷_59【送人游越（一作郎士元诗）】

刘长卿

未习风波事，初为吴越游。露沾湖色晓，月照海门秋。
梅市门何在，兰亭水尚流。西陵待潮处，落日满扁舟。

卷_60【赠普门上人】

刘长卿

支公身欲老，长在沃洲多。惠力堪传教，禅心久伏魔。
山云随坐夏，江草伴头陀。借问回心后，贤愚去几何。

· 全唐诗 ·

卷_61【送康判官往新安（一作皇甫冉诗）】

刘长卿

不向新安去，那知江路长。猿声近庐霍，水色胜潇湘。
驿路收残雨，渔家带夕阳。何须愁旅泊，使者有辉光。

卷_62【送顾长】

刘长卿

由来山水客，复道向新安。半是乘槎便，全非行路难。
晨装林月在，野饭浦沙寒。严子千年后，何人钓旧滩。

卷_63【九日登李明府北楼】

刘长卿

九日登高望，苍苍远树低。人烟湖草里，山翠县楼西。
霜降鸿声切，秋深客思迷。无劳白衣酒，陶令自相携。

· 全唐诗 ·

卷_64【同诸公登楼】

刘长卿

秋草行将暮，登楼客思惊。千家同霁色，一雁报寒声。
北望无乡信，东游滞客行。今君佩铜墨，还有越乡情。

卷_65【送友人南游】

刘长卿

不愁寻水远，自爱逐连山。虽在春风里，犹从芳草间。
去程何用计，胜事且相关。旅逸同群鸟，悠悠往复还。

卷_66【送裴二十一】

刘长卿

多病长无事，开筵暂送君。正愁帆带雨，莫望水连云。
客思闲偏极，川程远更分。不须论早晚，惆怅又离群。

· 全唐诗 ·

卷_67【送张判官罢使东归】

刘长卿

白首辞知己，沧洲忆旧居。落潮回野艇，积雪卧官庐。
范叔寒犹在，周王岁欲除。春山数亩地，归去带经鉏。

卷_68【早春】

刘长卿

微雨夜来歇，江南春色回。本惊时不住，还恐老相催。
人好千场醉，花无百日开。岂堪沧海畔，为客十年来。

卷_69【送青苗郑判官归江西】

刘长卿

三苗馀古地，五稼满秋田。来问周公税，归输汉俸钱。
江城寒背日，湓水暮连天。南楚凋残后，疲民赖尔怜。

· 全唐诗 ·

卷_70【过包尊师山院】

刘长卿

卖药曾相识，吹箫此复闻。杏花谁是主，桂树独留君。
漱玉临丹井，围棋访白云。道经今为写，不虑惜鹅群。

卷_71【故女道士婉仪太原郭氏挽歌词】

刘长卿

作范宫闱睦，归真道艺超。驭风仙路远，背日帝宫遥。
鸾殿空留处，霓裳已罢朝。淮王哀不尽，松柏但萧萧。

宫禁恩长隔，神仙道已分。人间惊早露，天上失朝云。
逝水年无限，佳城日易曛。箫声将薤曲，哀断不堪闻。

卷_72【少年行】

刘长卿

射飞夸侍猎，行乐爱联镳。荐枕青蛾艳，鸣鞭白马骄。
曲房珠翠合，深巷管弦调。日晚春风里，衣香满路飘。

· 全唐诗 ·

卷_73【归弋阳山居，留别卢、邵二侍御】

刘长卿

渺渺归何处，沿流附客船。久依鄱水住，频税越人田。
偶俗机偏少，安闲性所便。只应君少惯，又欲寄林泉。

卷_74【赴江西，湖上赠皇甫曾之宣州】

刘长卿

莫恨扁舟去，川途我更遥。东西潮渺渺，离别雨萧萧。
流水通春谷，青山过板桥。天涯有来客，迟尔访渔樵。

卷_75【湘中纪行十首·湘妃庙】

刘长卿

荒祠古木暗，寂寂此江滨。未作湘南雨，知为何处云。
苔痕断珠履，草色带罗裙。莫唱迎仙曲，空山不可闻。

· 全唐诗 ·

卷_76【湘中纪行十首·斑竹岩】

刘长卿

苍梧在何处，斑竹自成林。点点留残泪，枝枝寄此心。
寒山响易满，秋水影偏深。欲觅樵人路，蒙笼不可寻。

卷_77【湘中纪行十首·洞山阳（一作洞阳山）】

刘长卿

旧日仙成处，荒林客到稀。白云将犬去，芳草任人归。
空谷无行径，深山少落晖。桃园几家住，谁为扫荆扉。

卷_78【湘中纪行十首·云母溪】

刘长卿

云母映溪水，溪流知几春。深藏武陵客，时过洞庭人。
白发惭皎镜，清光媚瀛沦。寥寥古松下，岁晚挂头巾。

· 全唐诗 ·

卷_79【湘中纪行十首·赤沙湖】

刘长卿

茫茫葭菼外，一望一沾衣。秋水连天阔，沅阳何处归。
沙鸥积暮雪，川日动寒晖。楚客来相问，孤舟泊钓矶。

卷_80【湘中纪行十首·秋云岭】

刘长卿

山色无定姿，如烟复如黛。孤峰夕阳后，翠岭秋天外。
云起遥蔽亏，江回频向背。不知今远近，到处犹相对。

卷_81【湘中纪行十首·花石潭】

刘长卿

江枫日摇落，转爱寒潭静。水色淡如空，山光复相映。
人闲流更慢，鱼戏波难定。楚客往来多，偏知白鸥性。

· 全唐诗 ·

卷_82【湘中纪行十首·石围峰（一作石菌山）】

刘长卿

前山带秋色，独往秋江晚。叠嶂入云多，孤峰去人远。
夤缘不可到，苍翠空在眼。渡口问渔家，桃源路深浅。

卷_83【湘中纪行十首·浮石濑】

刘长卿

秋月照潇湘，月明闻荡桨。石横晚濑急，水落寒沙广。
众岭猿啸重，空江人语响。清晖朝复暮，如待扁舟赏。

卷_84【湘中纪行十首·横龙渡】

刘长卿

空传古岸下，曾见蛟龙去。秋水晚沈沈，犹疑在深处。
乱声沙上石，倒影云中树。独见一扁舟，樵人往来渡。

· 全唐诗 ·

卷_85【杂咏八首上礼部李侍郎·幽琴】

刘长卿

月色满轩白，琴声宜夜阑。飏飏青丝上，静听松风寒。
古调虽自爱，今人多不弹。向君投此曲，所贵知音难。

卷_86【杂咏八首上礼部李侍郎·晚桃】

刘长卿

四月深涧底，桃花方欲然。宁知地势下，遂使春风偏。
此意颇堪惜，无言谁为传。过时君未赏，空媚幽林前。

卷_87【杂咏八首上礼部李侍郎·疲马】

刘长卿

玄黄一疲马，筋力尽胡尘。骧首北风夕，徘徊鸣向人。
谁怜弃置久，却与驽骀亲。犹恋长城外，青青寒草春。

· 全唐诗 ·

卷_88【杂咏八首上礼部李侍郎·春镜】

刘长卿

宝镜凌曙开，含虚净如水。独悬秦台上，万象清光里。
岂虑高鉴偏，但防流尘委。不知娉婷色，回照今何似。

卷_89【杂咏八首上礼部李侍郎·古剑】

刘长卿

龙泉闲古匣，苔藓沦此地。何意久藏锋，翻令世人弃。
铁衣今正涩，宝刃犹可试。倘遇拂拭恩，应知剸犀利。

卷_90【杂咏八首上礼部李侍郎·旧井】

刘长卿

旧井依旧城，寒水深洞彻。下看百馀尺，一镜光不灭。
素绠久未垂，清凉尚含洁。岂能无汲引，长讶君恩绝。

· 全唐诗 ·

卷_91【杂咏八首上礼部李侍郎·白鹭】

刘长卿

亭亭常独立，川上时延颈。秋水寒白毛，夕阳吊孤影。
幽姿闲自媚，逸翮思一骋。如有长风吹，青云在俄顷。

卷_92【杂咏八首上礼部李侍郎·寒缸】

刘长卿

向夕灯稍进，空堂弥寂寞。光寒对愁人，时复一花落。
但恐明见累，何愁暗难托。恋君秋夜永，无使兰膏薄。

卷_93【寄李侍御】

刘长卿

旧国人未归，芳洲草还碧。年年湖上亭，怅望江南客。
骢马入关西，白云独何适。相思烟水外，唯有心不隔。

· 全唐诗 ·

卷_94【晚泊湘江怀故人】

刘长卿

天涯片云去，遥指帝乡忆。惆怅增暮情，潇湘复秋色。
扁舟宿何处，落日羨归翼。万里无故人，江鸥不相识。

卷_95【过邬三湖上书斋】

刘长卿

何事东南客，忘机一钓竿。酒香开瓮老，湖色对门寒。
向郭青山送，临池白鸟看。见君能浪迹，予亦厌微官。

卷_96【从军六首】

刘长卿

回看虏骑合，城下汉兵稀。白刃两相向，黄云愁不飞。
手中无尺铁，徒欲突重围。

· 全唐诗 ·

目极雁门道，青青边草春。一身事征战，匹马同苦辛。
末路成白首，功归天下人。

倚剑白日暮，望乡登戍楼。北风吹羌笛，此夜关山愁。
回首不无意，潞河空自流。

黄沙一万里，白首无人怜。报国剑已折，归乡身幸全。
单于古台下，边色寒苍然。

落日更萧条，北风动枯草。将军追虏骑，夜失阴山道。
战败仍树勋，韩彭但空老。

草枯秋塞上，望见渔阳郭。胡马嘶一声，汉兵泪双落。
谁为吮疮者，此事今人薄。

卷_97【龙门八咏·阙口】

刘长卿

秋山日摇落，秋水急波澜。独见鱼龙气，长令烟雨寒。
谁穷造化力，空向两崖看。

卷_98【龙门八咏·水东渡】

刘长卿

山叶傍崖赤，千峰秋色多。夜泉发清响，寒渚生微波。

· 全唐诗 ·

稍见沙上月，归人争渡河。

卷_99【龙门八咏·福公塔】

刘长卿

寂寞对伊水，经行长未还。东流自朝暮，千载空云山。
谁见白鸥鸟，无心洲渚间。

卷_【龙门八咏·远公龕】

刘长卿

松路向精舍，花龕归老僧。闲云随锡杖，落日低金绳。
入夜翠微里，千峰明一灯。

卷_【龙门八咏·石楼】

刘长卿

隐隐见花阁，隔河映青林。水田秋雁下，山寺夜钟深。
寂寞群动息，风泉清道心。

· 全唐诗 ·

卷_【龙门八咏·下山】

刘长卿

谁识往来意，孤云长自闲。风寒未渡水，日暮更看山。
木落众峰出，龙宫苍翠间。

卷_【龙门八咏·水西渡】

刘长卿

伊水摇镜光，纤鳞如不隔。千龛道傍古，一鸟沙上白。
何事还山云，能留向城客。

卷_【龙门八咏·渡水】

刘长卿

日暮下山来，千山暮钟发。不知波上棹，还弄山中月。
伊水连白云，东南远明灭。

· 全唐诗 ·

卷_【月下听砧】

刘长卿

夜静掩寒城，清砧发何处。声声捣秋月，肠断卢龙戍。
未得寄征人，愁霜复愁露。

卷_【送丘为赴上都（一作送皇甫曾）】

刘长卿

帝乡何处是，歧路空垂泣。楚思愁暮多，川程带潮急。
潮归人不归，独向空塘立。

卷_【题大理黄主簿湖上高斋】

刘长卿

闭门湖水畔，自与白鸥亲。竟日窗中岫，终年林下人。
俗轻儒服弊，家厌法官贫。多雨茅檐夜，空洲草径春。
桃源君莫爱，且作汉朝臣。

· 全唐诗 ·

卷_【平蕃曲三首】

刘长卿

吹角报蕃营，回军欲洗兵。已教青海外，自筑汉家城。

渺渺戍烟孤，茫茫塞草枯。陇头那用闭，万里不防胡。

绝漠大军还，平沙独戍闲。空留一片石，万古在燕山。

卷_【送郑说之歙州谒薛侍郎】

刘长卿

漂泊来千里，讴谣满百城。汉家尊太守，鲁国重诸生。

俗变人难理，江传水至清。船经危石住，路入乱山行。

老得沧州趣，春伤白首情。尝闻马南郡，门下有康成。

卷_【题独孤使君湖上林亭】

刘长卿

出树倚朱阑，吹铙引上官。老农持锄拜，时稼卷帘看。

水对登龙净，山当建隼寒。夕阳湖草动，秋色渚田宽。

· 全唐诗 ·

渤海人无事，荆州客独安。谢公何足比，来往石门难。

卷_【酬滁州李十六使君见赠】

刘长卿

满镜悲华发，空山寄此身。白云家自有，黄卷业长贫。
懒任垂竿老，狂因酿黍春。桃花迷圣代，桂树狎幽人。
幢盖方临郡，柴荆忝作邻。但愁千骑至，石路却生尘。

卷_【送严维赴河南充严中丞幕府】

刘长卿

久别耶溪客，来乘使者轩。用才荣入幕，扶病喜同樽。
山屐留何处，江帆去独翻。暮情辞镜水，秋梦识云门。
莲府开花萼，桃园寄子孙。何当举严助，遍沐汉朝恩。

卷_【酬包谏议佶见寄之什】

刘长卿

佐郡愧顽疏，殊方亲里闾。家贫寒未度，身老岁将除。
过雪山僧至，依阳野客舒。药陈随远宦，梅发对幽居。

· 全唐诗 ·

落日栖鹑鸟，行人遗鲤鱼。高文不可和，空愧学相如。

卷_【栖霞寺东峰寻南齐明征君故居】

刘长卿

山人今不见，山鸟自相从。长啸辞明主，终身卧此峰。
泉源通石径，涧户掩尘容。古墓依寒草，前朝寄老松。
片云生断壁，万壑遍疏钟。惆怅空归去，犹疑林下逢。

卷_【奉和赵给事使君，留赠李婺州舍人，兼谢舍人别驾之什】

刘长卿

便道访情亲，东方千骑尘。禁深分直夜，地远独行春。
绛阙辞明主，沧洲识近臣。云山随候吏，鸡犬逐归人。
庭顾婆娑老，邦传蔽芾新。玄晖翻佐理，闻到郡斋频。

卷_【行营酬吕侍御，时尚书问罪襄阳，军次汉东境上，侍御以州邻寇贼，复有水火迫于征税诗以见谕】

刘长卿

不敢淮南卧，来趋汉将营。受辞瞻左钺，扶疾往前旌。

· 全唐诗 ·

井税鹑衣乐，壶浆鹤发迎。水归馀断岸，烽至掩孤城。
晚日归千骑，秋风合五兵。孔璋才素健，早晚檄书成。

卷_【登迁仁楼，酬子婿李穆】

刘长卿

临风敞丽谯，落日听吹铙。归路空回首，新章已在腰。
非才受官谤，无政作人谣。俭岁安三户，馀年寄六条。
春芜生楚国，古树过隋朝。赖有东床客，池塘免寂寥。

卷_【别李氏女子】

刘长卿

念尔嫁犹近，稚年那别亲。临歧方教诲，所贵和六姻。
俯首戴荆钗，欲拜凄且嚬。本来儒家子，莫耻梁鸿贫。
汉川若可涉，水清石磷磷。天涯远乡妇，月下孤舟人。

卷_【长沙早春雪后临湘水，呈同游诸子】

刘长卿

汀洲暖渐渌，烟景淡相和。举目方如此，归心岂奈何。

· 全唐诗 ·

日华浮野雪，春色染湘波。北渚生芳草，东风变旧柯。
江山古思远，猿鸟暮情多。君问渔人意，沧浪自有歌。

卷_【自道林寺西入石路至麓山寺，过法崇禅师故居】

刘长卿

山僧候谷口，石路拂莓苔。深入泉源去，遥从树杪回。
香随青霭散，钟过白云来。野雪空斋掩，山风古殿开。
桂寒知自发，松老问谁栽。惆怅湘江水，何人更渡杯。

卷_【和袁郎中破贼后军行过剡中山水，谨上太尉
(即李光弼)】

刘长卿

剡路除荆棘，王师罢鼓鼙。农归沧海畔，围解赤城西。
赦罪春阳发，收兵太白低。远峰来马首，横笛入猿啼。
兰渚催新幄，桃源识故蹊。已闻开阁待，谁许卧东溪。

· 全唐诗 ·

卷_【送郑十二还庐山别业】

刘长卿

浔阳数亩宅，归卧掩柴关。谷口何人待，门前秋草闲。
忘机卖药罢，无语杖藜还。旧笋成寒竹，空斋向暮山。
水流经舍下，云去到人间。桂树花应发，因行寄一攀。

卷_【至饶州寻陶十七不在寄赠】

刘长卿

谪宦投东道，逢君已北辕。孤蓬向何处，五柳不开门。
去国空回首，怀贤欲诉冤。梅枝横岭峤，竹路过湘源。
月下高秋雁，天南独夜猿。离心与流水，万里共朝昏。

卷_【奉陪郑中丞自宣州解印，与诸侄宴馀干后溪】

刘长卿

迹远亲鱼鸟，功成厌鼓鼙。林中阮生集，池上谢公题。
户牖垂藤合，藩篱插槿齐。夕阳山向背，春草水东西。
度雨诸峰出，看花几路迷。何劳问秦汉，更入武陵溪。

· 全唐诗 ·

第一百四十九卷

卷_1【同诸公袁郎中宴筵喜加章服】

刘长卿

手诏来筵上，腰金向粉闱。勋名传旧阁，蹈舞著新衣。
白社同游在，沧洲此会稀。寒笳发后殿，秋草送西归。
世难常摧敌，时闲已息机。鲁连功可让，千载一相挥。

卷_2【毗陵送邹结先赴河南充判官】

刘长卿

王事相逢少，云山奈别何。芳年临水怨，瓜步上潮过。
客路方经楚，乡心共渡河。凋残春草在，离乱故城多。
罢战逢时泰，轻徭伫俗和。东西此分手，惆怅恨烟波。

卷_3【送徐大夫赴广州】

刘长卿

上将坛场拜，南荒羽檄招。远人来百越，元老事三朝。

· 全唐诗 ·

雾绕龙山暗，山连象郡遥。路分江淼淼，军动马萧萧。
画角知秋气，楼船逐暮潮。当令输贡赋，不使外夷骄。

卷_4【九日题蔡国公主楼】

刘长卿

主第人何在，重阳客暂寻。水馀龙镜色，云罢凤箫音。
暗牖藏昏晓，苍苔换古今。晴山卷幔出，秋草闭门深。
篱菊仍新吐，庭槐尚旧阴。年年画梁燕，来去岂无心。

卷_5【送荀八过山阴旧县，兼寄剡中诸官】

刘长卿

访旧山阴县，扁舟到海涯。故林嗟满岁，春草忆佳期。
晚景千峰乱，晴江一鸟迟。桂香留客处，枫暗泊舟时。
旧石曹娥篆，空山夏禹祠。剡溪多隐吏，君去道相思。

卷_6【奉饯元侍郎加豫章采访兼赐章服（时初停节度）】

刘长卿

任重兼乌府，时平偃豹韬。澄清湘水变，分别楚山高。

· 全唐诗 ·

花对彤檐发，霜和白雪操。黄金装旧马，青草换新袍。
岭暗猿啼月，江寒鹭映涛。豫章生宇下，无使翳蓬蒿。

卷_7【奉饒郎中四兄罢餘杭太守，承恩加侍御史充行
军司马，赴汝南行营】

刘长卿

星使三江上，天波万里通。权分金节重，恩借铁冠雄。
梅吹前军发，棠阴旧府空。残春锦障外，初日羽旗东。
岸柳遮浮鹢，江花隔避骢。离心在何处，芳草满吴宫。

卷_8【送贾侍御克复后入京】

刘长卿

对酒心不乐，见君动行舟。回看暮帆隐，独向空江愁。
晴云淡初夜，春塘深慢流。温颜风霜霁，喜气烟尘收。
驰駟数千里，朝天十二楼。因之报亲爱，白发生沧洲。

卷_9【会稽王处士草堂壁画衡霍诸山】

刘长卿

粉壁衡霍近，群峰如可攀。能令堂上客，见尽湖南山。

· 全唐诗 ·

青翠数千仞，飞来方丈间。归云无处灭，去鸟何时还。
胜事日相对，主人常独闲。稍看林壑晚，佳气生重关。

卷_10【惠福寺与陈留诸官茶会（得西字）】

刘长卿

到此机事遣，自嫌尘网迷。因知万法幻，尽与浮云齐。
疏竹映高枕，空花随杖藜。香飘诸天外，日隐双林西。
傲吏方见狎，真僧幸相携。能令归客意，不复还东溪。

卷_11【金陵西泊舟临江楼】

刘长卿

萧条金陵郭，旧是帝王州。日暮望乡处，云边江树秋。
楚云不可托，楚水只堪愁。行客千万里，沧波朝暮流。
迢迢洛阳梦，独卧清川楼。异乡共如此，孤帆难久游。

卷_12【题灵祐上人法华院木兰花（其树岭南，移植此地）】

刘长卿

庭种南中树，年华几度新。已依初地长，独发旧园春。

· 全唐诗 ·

映日成华盖，摇风散锦茵。色空荣落处，香醉往来人。
菡萏千灯遍，芳菲一雨均。高柯倘为楫，渡海有良因。

卷_13【宿严维宅送包佶（一作皇甫冉诗）】

刘长卿

江湖同避地，分首自依依。尽室今为客，惊秋空念归。
岁储无别墅，寒服羡邻机。草色村桥晚，蝉声江树稀。
夜深宜共醉，时难忍相违。何事随阳雁，汀洲忽背飞。

卷_14【送从弟贬袁州（一作皇甫冉诗，题作送从弟豫
贬远州）】

刘长卿

何事成迁客，思归不见乡。游吴经万里，吊屈向三湘。
水与荆巫接，山通鄢郢长。名羞黄绶系，身是白眉郎。
独结南枝恨，应思北雁行。忧来沽楚酒，老鬓莫凝霜。

卷_15【无锡东郭送友人游越】

刘长卿

客路风霜晓，郊原春兴馀。平芜不可望，游子去何如。

· 全唐诗 ·

烟水乘湖阔，云山适越初。旧都怀作赋，古穴觅藏书。
碑缺曹娥宅，林荒逸少居。江湖无限意，非独为樵渔。

卷_16【送邵州判官往南（一作皇甫冉诗）】

刘长卿

看君发原隰，驷牡志皇皇。始罢沧江令，还随粉署郎。
海沂军未息，河兗岁仍荒。征税人全少，榛芜虏近亡。
新知行宋远，相望隔淮长。早晚裁书寄，银钩伫八行。

卷_17【出丰县界寄韩明府】

刘长卿

回首古原上，未能辞旧乡。西风收暮雨，隐隐分芒砀。
贤友此为邑，令名满徐方。音容想在眼，暂若升琴堂。
疲马顾春草，行人看夕阳。自非传尺素，谁为论中肠。

卷_18【别陈留诸官】

刘长卿

恋此东道主，能令西上迟。徘徊暮郊别，惆怅秋风时。

· 全唐诗 ·

上国邈千里，夷门难再期。行人望落日，归马嘶空陂。
不愧宝刀赠，维怀琼树枝。音尘尚未接，梦寐徒相思。

卷_19【观李凑所画美人障子】

刘长卿

爱尔含天姿，丹青有殊智。无间已得象，象外更生意。
西子不可见，千载无重还。空令浣沙态，犹在含毫间。
一笑岂易得，双蛾如有情。窗风不举袖，但觉罗衣轻。
华堂翠幕春风来，内阁金屏曙色开。此中一见乱人目，
只疑行到云阳台。

卷_20【送史判官奏事之灵武，兼寄巴西亲故】

刘长卿

中州日纷梗，天地何时泰。独有西归心，遥悬夕阳外。
故人奉章奏，此去论利害。阳雁南渡江，征骖去相背。
因君欲寄远，何处问亲爱。空使沧洲人，相思减衣带。

卷_21【自鄱阳还，道中寄褚征君】

刘长卿

南风日夜起，万里孤帆漾。元气连洞庭，夕阳落波上。

· 全唐诗 ·

故人烟水隔，复此遥相望。江信久寂寥，楚云独惆怅。
爱君清川口，弄月时棹唱。白首无子孙，一生自疏旷。

卷_22【石梁湖有寄（一作怀陆兼）】

刘长卿

故人千里道，沧波一年别。夜上明月楼，相思楚天阔。
潇潇清秋暮，裊裊凉风发。湖色淡不流，沙鸥远还灭。
烟波日已远，音问日已绝。岁晏空含情，江皋绿芳歇。

卷_23【送沈少府之任淮南】

刘长卿

惜君滞南楚，枳棘徒栖凤。独与千里帆，春风远相送。
此行山水好，时物亦应众。一鸟飞长淮，百花满云梦。
相期丹霄路，遥听清风颂。勿为州县卑，时来自为用。

卷_24【严子濂东送马处直归苏】

刘长卿

望君舟已远，落日潮未退。目送沧海帆，人行白云外。

· 全唐诗 ·

江中远回首，波上生微霭。秋色姑苏台，寒流子陵濑。
相送苦易散，动别知难会。从此日相思，空令减衣带。

卷_25【宿怀仁县南湖，寄东海荀处士】

刘长卿

向夕敛微雨，晴开湖上天。离人正惆怅，新月愁婵娟。
伫立白沙曲，相思沧海边。浮云自来去，此意谁能传。
一水不相见，千峰随客船。寒塘起孤雁，夜色分盐田。
时复一延首，忆君如眼前。

卷_26【初至洞庭，怀灞陵别业】

刘长卿

长安邈千里，日夕怀双阙。已是洞庭人，犹看灞陵月。
谁堪去乡意，亲戚想天末。昨夜梦中归，烟波觉来阔。
江皋见芳草，孤客心欲绝。岂讶青春来，但伤经时别。
长天不可望，鸟与浮云没。

卷_27【题萧郎中开元寺新构幽寂亭】

刘长卿

康乐爱山水，赏心千载同。结茅依翠微，伐木开蒙笼。

· 全唐诗 ·

孤峰倚青霄，一径去不穷。候客石苔上，礼僧云树中。
旷然见沧洲，自远来清风。五马留谷口，双旌薄烟虹。
沉沉众香积，眇眇诸天空。独往应未遂，苍生思谢公。

卷_28【同姜濬题裴式微馀干东斋】

刘长卿

世事终成梦，生涯欲半过。白云心已矣，沧海意如何。
藜杖全吾道，榴花养太和。春风骑马醉，江月钓鱼歌。
散帙看虫蠹，开门见雀罗。远山终日在，芳草傍人多。
吏体庄生傲，方言楚俗讹。屈平君莫吊，肠断洞庭波。

卷_29【赠元容州】

刘长卿

拥旌临合浦，上印卧长沙。海徼长无戍，湘山独种畬。
政传通岁贡，才惜过年华。万里依孤剑，千峰寄一家。
累征期旦暮，未起恋烟霞。避世歌芝草，休官醉菊花。
旧游如梦里，此别是天涯。何事沧波上，飘飘逐海槎。

· 全唐诗 ·

卷_30【夏口送长宁杨明府归荆南，因寄幕府诸公】

刘长卿

关西杨太尉，千载德犹闻。白日俱终老，清风独至君。
身承远祖遗，才出众人群。举世贪荆玉，全家恋楚云。
向烟帆杳杳，临水叶纷纷。草覆昭丘绿，江从夏口分。
高名光盛府，异姓宠殊勋。百越今无事，南征欲罢军。

卷_31【奉和杜相公新移长兴宅，呈元相公】

刘长卿

间世生贤宰，同心奉至尊。功高开北第，机静灌中园。
入并蝉冠影，归分骑士喧。窗闻汉宫漏，家识杜陵源。
献替常焚藁，优闲独对萱。花香逐荀令，草色对王孙。
有地先开阁，何人不扫门。江湖难自退，明主托元元。

卷_32【湖南使还，留辞辛大夫】

刘长卿

王师劳近甸，兵食仰诸侯。天子无南顾，元勋在上游。
大才生间气，盛业拯横流。风景随摇笔，山川入运筹。

· 全唐诗 ·

羽觞交饯席，旄节对归舟。莺识春深恨，猿知日去愁。
别离花寂寂，南北水悠悠。唯有家兼国，终身共所忧。

卷_33【泛曲阿后湖，简同游诸公】

刘长卿

元气浮积水，沉沉深不流。春风万顷绿，映带至徐州。
为客难适意，逢君方暂游。夤缘白蘋际，日暮沧浪舟。
渡口微月进，林西残雨收。水云去仍湿，沙鹤鸣相留。
且习子陵隐，能忘生事忧。此中深有意，非为钓鱼钩。

卷_34【北游酬孟云卿见寄】

刘长卿

忽忽忘前事，事愿能相乖。衣马日羸弊，谁辨行与才。
善道居贫贱，洁服蒙尘埃。行行无定止，懔坎难归来。
慈母忧疾疹，室家念栖莱。幸君夙姻亲，深见中外怀。
俟子惜时节，怅望临高台。

· 全唐诗 ·

卷_35【冬夜宿扬州开元寺烈公房，送李侍御之江东】

刘长卿

迁客投百越，穷阴淮海凝。中原驰困兽，万里栖饥鹰。
寂寂连宇下，爱君心自弘。空堂来霜气，永夜清明灯。
发后望烟水，相思劳寝兴。暮帆背楚郭，江色浮金陵。
此去尔何恨，近名予未能。炉峰若便道，为访东林僧。

卷_36【南楚怀古】

刘长卿

南国久芜没，我来空郁陶。君看章华宫，处处生蓬蒿。
但见陵与谷，岂知贤与豪。精魂托古木，宝剑捐江皋。
倚棹下晴景，回舟随晚涛。碧云暮寥落，湖上秋天高。
往事那堪问，此心徒自劳。独馀湘水上，千载闻离骚。

卷_37【上湖田馆南楼忆朱宴】

刘长卿

漂泊日复日，洞庭今更秋。白云如有意，万里望孤舟。
何事爱成别，空令登此楼。天光映波动，月影随江流。

· 全唐诗 ·

鹤唳静寒渚，猿啼深夜洲。归期诚已促，清景仍相留。
顷者慕独往，尔来悲远游。风波自此去，桂水空离忧。

卷_38【送姚八之句容旧任，便归江南】

刘长卿

故人还水国，春色动离忧。碧草千万里，沧江朝暮流。
桃花迷旧路，萍叶荡归舟。远戍看京口，空城问石头。
折芳佳丽地，望月西南楼。猿鸟共孤屿，烟波连数州。
谁家过楚老，何处恋江鸥。尺素能相报，湖山若个忧。

卷_39【睢阳赠李司仓】

刘长卿

白露变时候，蛩声暮啾啾。飘飘洛阳客，惆怅梁园秋。
只为乏生计，尔来成远游。一身不家食，万事从人求。
且喜接馀论，足堪资小留。寒城落日后，砧杵令人愁。
归路岁时尽，长河朝夕流。非君深意愿，谁复能相忧。

· 全唐诗 ·

卷_40【杪秋洞庭中，怀亡道士谢太虚】

刘长卿

漂泊日复日，洞庭今更秋。青枫亦何意，此夜催人愁。
惆怅客中月，徘徊江上楼。心知楚天远，目送沧波流。
羽客久已殁，微言无处求。空馀白云在，容与随孤舟。
千里杳难望，一身当独游。故园复何许，江海徒迟留。

卷_41【同郭参谋咏崔仆射淮南节度使厅前竹】

刘长卿

昔种梁王苑，今移汉将坛。蒙笼低冕过，青翠卷帘看。
得地移根远，经霜抱节难。开花成凤实，嫩笋长鱼竿。
蔼蔼军容静，萧萧郡宇宽。细音和角暮，疏影上门寒。
湘浦何年变，山阳几处残。不知轩屏侧，岁晚对袁安。

卷_42【硖石遇雨，宴前主簿从兄子英宅】

刘长卿

县城苍翠里，客路两崖开。硖石云漠漠，东风吹雨来。
吾兄此为吏，薄宦知无媒。方寸抱秦镜，声名传楚材。

· 全唐诗 ·

折腰五斗间，黽勉随尘埃。秩满少馀俸，家贫仍散财。
谁言次东道，暂预倾金罍。虽欲少留此，其如归限催。

卷_43【江中晚钓，寄荆南一二相识】

刘长卿

楚郭微雨收，荆门遥在目。漾舟水云里，日暮春江绿。
霁华静洲渚，暝色连松竹。月出波上时，人归渡头宿。
一身已无累，万事更何欲。渔父自夷犹，白鸥不羁束。
既怜沧浪水，复爱沧浪曲。不见眼中人，相思心断续。

卷_44【九日岳阳待黄遂、张涣】

刘长卿

别君颇已久，离念与时积。楚水空浮烟，江楼望归客。
徘徊正伫想，仿佛如暂觌。心目徒自亲，风波尚相隔。
青林泊舟处，猿鸟愁孤驿。遥见郭外山，苍然雨中夕。
季鹰久疏旷，叔度早畴昔。反棹来何迟，黄花候君摘。

· 全唐诗 ·

卷_45【题王少府尧山隐处，简陆鄱阳】

刘长卿

故人沧洲吏，深与世情薄。解印二十年，委身在丘壑。
买田楚山下，妻子自耕凿。群动心有营，孤云本无著。
因收溪上钓，遂接林中酌。对酒春日长，山村杏花落。
陆生鄱阳令，独步建谿作。早晚休此官，随君永栖托。

卷_46【晚次湖口有怀】

刘长卿

霭然空水合，目极平江暮。南望天无涯，孤帆落何处。
顷为衡湘客，颇见湖山趣。朝气和楚云，夕阳映江树。
帝乡劳想望，万里心来去。白发生扁舟，沧波满归路。
秋风今已至，日夜雁南度。木叶辞洞庭，纷纷落无数。

卷_47【陪元侍御游支硎山寺】

刘长卿

支公去已久，寂寞龙华会。古木闭空山，苍然暮相对。
林峦非一状，水石有馀态。密竹藏晦明，群峰争向背。

· 全唐诗 ·

峰峰带落日，步步入青霭。香气空翠中，猿声暮云外。
留连南台客，想像西方内。因逐溪水还，观心两无碍。

卷_48【桂阳西州晚泊古桥村住人】

刘长卿

洛阳别离久，江上心可得。惆怅增暮情，潇湘复秋色。
故山隔何处，落日羨归翼。沧海空自流，白鸥不相识。
悲蛩满荆渚，辍棹徒沾臆。行客念寒衣，主人愁夜织。
帝乡片云去，遥寄千里忆。南路随天长，征帆杳无极。

卷_49【夕次檐石湖，梦洛阳亲故】

刘长卿

天涯望不尽，日暮愁独去。万里云海空，孤帆向何处。
寄身烟波里，颇得湖山趣。江气和楚云，秋声乱枫树。
如何异乡县，日复怀亲故。遥与洛阳人，相逢梦中路。
不堪明月里，更值清秋暮。倚棹对沧波，归心共谁语。

· 全唐诗 ·

卷_50【按覆后归睦州，赠苗侍御】

刘长卿

地远心难达，天高谤易成。羊肠留覆辙，虎口脱馀生。
直氏偷金枉，于家决狱明。一言知己重，片议杀身轻。
日下人谁忆，天涯客独行。年光销蹇步，秋气入衰情。
建德知何在，长江问去程。孤舟百口渡，万里一猿声。
落日开乡路，空山向郡城。岂令冤气积，千古在长平。

卷_51【奉寄婺州李使君舍人】

刘长卿

建隼罢鸣珂，初传来暮歌。渔樵识太古，草树得阳和。
东道诸生从，南依远客过。天清婺女出，土厚绛人多。
永日空相望，流年复几何。崖开当夕照，叶去逐寒波。
眼暗经难受，身闲剑懒磨。似鹄占贾谊，上马试廉颇。
穷分安藜藿，衰容胜薜萝。只应随越鸟，南翥托高柯。

卷_52【哭魏兼遂】

刘长卿

古今俱此去，修短竟谁分。樽酒空如在，弦琴肯重闻。

· 全唐诗 ·

一门同逝水，万事共浮云。旧馆何人宅，空山远客坟。
艰危贫且共，少小秀而文。独行依穷巷，全身出乱军。
岁时长寂寞，烟月自氛氲。垄树随人古，山门对日曛。
泛舟悲向子，留剑赠徐君。来去云阳路，伤心江水滨。

卷_53【负谪后登干越亭作】

刘长卿

天南愁望绝，亭上柳条新。落日独归鸟，孤舟何处人。
生涯投越徼，世业陷胡尘。杳杳钟陵暮，悠悠鄱水春。
秦台悲白首，楚泽怨青蘋。草色迷征路，莺声伤逐臣。
独醒空取笑，直道不容身。得罪风霜苦，全生天地仁。
青山数行泪，沧海一穷鳞。牢落机心尽，惟怜鸥鸟亲。

卷_54【留题李明府霁溪水堂】

刘长卿

寥寥此堂上，幽意复谁论。落日无王事，青山在县门。
云峰向高枕，渔钓入前轩。晚竹疏帘影，春苔双履痕。
荷香随坐卧，湖色映晨昏。虚牖闲生白，鸣琴静对言。
暮禽飞上下，春水带清浑。远岸谁家柳，孤烟何处村。
谪居投瘴疠，离思过湘沅。从此扁舟去，谁堪江浦猿。

· 全唐诗 ·

卷_55【入白沙渚，黄缘二十五里至石窟山下，怀天台
陆山人】

刘长卿

远屿霭将夕，玩幽行自迟。归人不计日，流水闲相随。
辍棹古崖口，扪萝春景迟。偶因回舟次，宁与前山期。
对此瑶草色，怀君琼树枝。浮云去寂寞，白鸟相因依。
何事爱高隐，但令劳远思。穷年卧海峤，永望愁天涯。
吾亦从此去，扁舟何所之。迢迢江上帆，千里东风吹。

卷_56【禅智寺上方怀演和尚，寺即和尚所创】

刘长卿

绝巘东林寺，高僧惠远公。买园隋苑下，持钵楚城中。
斗极千灯近，烟波万井通。远山低月殿，寒木露花宫。
绀宇焚香净，沧洲摆雾空。雁来秋色里，曙起早潮东。
飞锡今何在，苍生待发蒙。白云翻送客，庭树自辞风。
舍筏追开士，回舟狎钓翁。平生江海意，惟共白鸥同。

卷_57【贾侍郎自会稽使回，篇什盈卷，兼蒙见寄一首，
与余有挂冠之期，因书数事，率成十韵】

刘长卿

江上逢星使，南来自会稽。惊年一叶落，按俗五花嘶。

· 全唐诗 ·

上国悲芜梗，中原动鼓鼙。报恩看铁剑，衔命出金闺。
风物催归绪，云峰发咏题。天长百越外，潮上小江西。
鸟道通闽岭，山光落剡溪。暮帆千里思，秋夜一猿啼。
柏树荣新垄，桃源忆故蹊。若能为休去，行复草萋萋。

卷_58【秋日夏口涉汉阳，献李相公】

刘长卿

日望衡门处，心知汉水滨。偶乘青雀舫，还在白鸥群。
间气生灵秀，先朝翼戴勋。藏弓身已退，焚藁事难闻。
旧业成青草，全家寄白云。松萝长稚子，风景逐新文。
山带寒城出，江依古岸分。楚歌悲远客，羌笛怨孤军。
鼎罢调梅久，门看种药勤。十年犹去国，黄叶又纷纷。

卷_59【归沛县道中晚泊留侯城】

刘长卿

访古此城下，子房安在哉。白云去不反，危堞空崔嵬。
伊昔楚汉时，颇闻经济才。运筹风尘下，能使天地开。
蔓草日已积，长松日已摧。功名满青史，祠庙唯苍苔。
百里暮程远，孤舟川上回。进帆东风便，转岸前山来。
楚水澹相引，沙鸥闲不猜。扣舷从此去，延首仍裴回。

· 全唐诗 ·

卷_60【关门望华山】

刘长卿

客路瞻太华，三峰高际天。夏云亘百里，合沓遥相连。
雷雨飞半腹，太阳在其巅。翠微关上近，瀑布林梢悬。
爱此众容秀，能令西望偏。徘徊忘暝色，泱泱成阴烟。
曾是朝百灵，亦闻会群仙。琼浆岂易挹，毛女非空传。
仿佛仍伫想，幽期如眼前。金天有青庙，松柏隐苍然。

卷_61【奉陪萧使君入鲍达洞寻灵山寺】

刘长卿

山居秋更鲜，秋江相映碧。独临沧洲路，如待挂帆客。
遂使康乐侯，披榛著双屐。入云开岭道，永日寻泉脉。
古寺隐青冥，空中寒磬夕。苍苔绝行径，飞鸟无去迹。
树杪下归人，水声过幽石。任情趣逾远，移步奇屡易。
萝木静蒙蒙，风烟深寂寂。徘徊未能去，畏共桃源隔。

卷_62【孙权故城下怀古，兼送友人归建业】

刘长卿

雄图争割据，神器终不守。上下武昌城，长江竟何有。

· 全唐诗 ·

古来壮台榭，事往悲陵阜。寥落几家人，犹依数株柳。
威灵绝想像，芜没空林藪。野径春草中，郊扉夕阳后。
逢君从此去，背楚方东走。烟际指金陵，潮时过湓口。
行人已何在，临水徒挥手。惆怅不能归，孤帆没云久。

卷_63【宿双峰寺，寄卢七、李十六】

刘长卿

寥寥禅诵处，满室虫丝结。独与山中人，无心生复灭。
徘徊双峰下，惆怅双峰月。杳杳暮猿深，苍苍古松列。
玩奇不可尽，渐远更幽绝。林暗僧独归，石寒泉且咽。
竹房响轻吹，萝径阴馀雪。卧涧晓何迟，背岩春未发。
此游诚多趣，独往共谁阅。得意空自归，非君岂能说。

卷_64【京口怀洛阳旧居，兼寄广陵二三知己】

刘长卿

川阔悲无梁，蔼然沧波夕。天涯一飞鸟，日暮南徐客。
气混京口云，潮吞海门石。孤帆候风进，夜色带江白。
一水阻佳期，相望空脉脉。那堪岁芳尽，更使春梦积。
故国胡尘飞，远山楚云隔。家人想何在，庭草为谁碧。
惆怅空伤情，沧浪有馀迹。严陵七里滩，携手同所适。

· 全唐诗 ·

卷_65【登扬州栖灵寺塔】

刘长卿

北塔凌空虚，雄观压川泽。亭亭楚云外，千里看不隔。
遥对黄金台，浮辉乱相射。盘梯接元气，半壁栖夜魄。
稍登诸劫尽，若骋排霄翮。向是沧洲人，已为青云客。
雨飞千栱霁，日在万家夕。鸟处高却低，天涯远如迫。
江流入空翠，海峤现微碧。向暮期下来，谁堪复行役。

卷_66【湖上遇郑田】

刘长卿

故人青云器，何意常窘迫。三十犹布衣，怜君头已白。
谁言此相见，暂得话畴昔。旧业今已芜，还乡返为客。
扁舟伊独往，斗酒君自适。沧洲不可涯，孤帆去无迹。
杯中忽复醉，湖上生月魄。湛湛江色寒，濛濛水云夕。
风波易迢递，千里如咫尺。回首人已遥，南看楚天隔。

卷_67【雨中登沛县楼，赠表兄郭少府】

刘长卿

楚泽秋更远，云雷有时作。晚陂带残雨，白水昏漠漠。

· 全唐诗 ·

伫立收烟氛，洗然静寥廓。卷帘高楼上，万里看日落。
为客频改弦，辞家尚如昨。故山今不见，此鸟那可托。
小邑务常闲，吾兄宦何薄。高标青云器，独立沧江鹤。
惠爱原上情，殷勤丘中诺。何当遂良愿，归卧青山郭。

卷_68【灞东晚晴，简同行薛弃、朱训】

刘长卿

客心豁初霁，霁色暝玄灞。西向看夕阳，曈曚映桑柘。
二贤诚逸足，千里陪征驾。古树积道傍，人烟杜陵下。
伊余在羁束，且复随造化。好道当有心，营生苦无暇。
高贤幸兹偶，英达穷王霸。迢递客王程，裴回主人夜。
一薰知异质，片玉谁齐价。同结丘中缘，尘埃自兹谢。

卷_69【对雨，赠济阴马少府，考城蒋少府，兼献成武五兄，南华二兄】

刘长卿

繁云兼家思，弥望连济北。日暮微雨中，州城带秋色。
萧条主人静，落叶飞不息。乡梦寒更频，虫声夜相逼。
二贤纵横器，久滞徒劳职。笑语和风骚，雍容事文墨。
吾兄即时彦，前路良未测。秋水百丈清，寒松一枝直。
此心欲引托，谁为生羽翼。且复顿归鞍，杯中雪胸臆。

· 全唐诗 ·

卷_70【李侍御河北使回，至东京相访】

刘长卿

故人南台秀，夙擅中朝美。拥传从北来，飞霜日千里。
贫居幸相访，顾我柴门里。却讶绣衣人，仍交布衣士。
王程遽尔迫，别恋从此始。浊酒未暇斟，清文颇垂示。
回瞻骢马速，但见行尘起。日暮汀洲寒，春风渡流水。
草色官道边，桃花御沟里。天涯一鸟夕，惆怅知何已。

卷_71【吴中闻潼关失守，因奉寄淮南萧判官】

刘长卿

一雁飞吴天，羁人伤暮律。松江风袅袅，波上片帆疾。
木落姑苏台，霜收洞庭橘。萧条长洲外，唯见寒山出。
胡马嘶秦云，汉兵乱相失。关中因窃据，天下共忧栗。
南楚有琼枝，相思怨瑶瑟。一身寄沧洲，万里看白日。
赴敌甘负戈，论兵勇投笔。临风但攘臂，择木将委质。
不如归远山，云卧饭松栗。

卷_72【哭张员外继（公及夫人相次没于洪州）】

刘长卿

恸哭钟陵下，东流与别离。二星来不返，双剑没相随。

· 全唐诗 ·

独继先贤传，谁刊有道碑。故园荒岷曲，旅棹寄天涯。
白简曾连拜，沧洲每共思。抚孤怜齿稚，叹逝顾身衰。
泉壤成终古，云山若在时。秋风邻笛发，寒日寝门悲。
世难愁归路，家贫缓葬期。旧宾伤未散，夕临咽常迟。
自此辞张邵，何由见戴逵。独闻山吏部，流涕访孤儿。

卷_73【登东海龙兴寺高顶望海，简演公】

刘长卿

胸山压海口，永望开禅宫。元气远相合，太阳生其中。
豁然万里馀，独为百川雄。白波走雷电，黑雾藏鱼龙。
变化非一状，晴明分众容。烟开秦帝桥，隐隐横残虹。
蓬岛如在眼，羽人那可逢。偶闻真僧言，甚与静者同。
幽意颇相惬，赏心殊未穷。花间午时梵，云外春山钟。
谁念遽成别，自怜归所从。他时相忆处，惆怅西南峰。

卷_74【奉送从兄罢官之淮南】

刘长卿

何事浮溟渤，元戎弃莫邪。渔竿吾道在，鸥鸟世情赊。
玄发他乡换，沧洲此路遐。溯沿随桂楫，醒醉任松华。
离别谁堪道，艰危更可嗟。兵锋摇海内，王命隔天涯。
钟漏移长乐，衣冠接永嘉。还当拂氛祲，那复卧云霞。

· 全唐诗 ·

溪路漫冈转，夕阳归鸟斜。万艘江县郭，一树海人家。
挥袂看朱绂，扬帆指白沙。春风独回首，愁思极如麻。

卷_75【落第，赠杨侍御兼拜员外仍充安大夫判官赴范阳】

刘长卿

职副旌旄重，才兼识量通。使车遥肃物，边策远和戎。
掷地金声著，从军宝剑雄。官成稽古力，名达济时功。
肃穆乌台上，雍容粉署中。含香初待漏，持简旧生风。
黠吏偏惊隼，贪夫辄避骢。且知荣已隔，谁谓道仍同。
念旧追连茹，谋生任转蓬。泣连三献玉，疮惧再伤弓。
恋土函关外，瞻尘灞水东。他时书一札，犹冀问途穷。

卷_76【初贬南巴至鄱阳，题李嘉祐江亭】

刘长卿

巴峽南行远，长江万里随。不才甘谪去，流水亦何之。
地远明君弃，天高酷吏欺。清山独往路，芳草未归时。
流落还相见，悲欢话所思。猜嫌伤蕙苳，愁暮向江篱。
柳色迎高坞，荷衣照下帷。水云初起重，暮鸟远来迟。
白首看长剑，沧洲寄钓丝。沙鸥惊小吏，湖月上高枝。
稚子能吴语，新文怨楚辞。怜君不得意，川谷自逶迤。

· 全唐诗 ·

卷_77【自紫阳观至华阳洞，宿侯尊师草堂，简同游李延年】

刘长卿

石门媚烟景，句曲盘江甸。南向佳气浓，数峰遥隐见。
渐临华阳口，云路入葱蒨。七曜悬洞宫，五云抱仙殿。
银函竟谁发，金液徒堪荐。千载空桃花，秦人深不见。
东溪喜相遇，贞白如会面。青鸟来去闲，红霞朝夕变。
一从换仙骨，万里乘飞电。萝月延步虚，松花醉闲宴。
幽人即长往，茂宰应交战。明发归琴堂，知君懒为县。

· 全唐诗 ·

第一百五十卷

卷_1【奉使新安，自桐庐县经严陵钓台，宿七里滩下，
寄使院诸公】

刘长卿

悠然钓台下，怀古时一望。江水自潺湲，行人独惆怅。
新安从此始，桂楫方荡漾。回转百里间，青山千万状。
连岸去不断，对岭遥相向。夹岸黛色愁，沈沈绿波上。
夕阳留古木，水鸟拂寒浪。月下扣舷声，烟中采菱唱。
犹怜负羁束，未暇依清旷。牵役徒自劳，近名非所向。
何时故山里，却醉松花酿。回首唯白云，孤舟复谁访。

卷_2【题虎丘寺】

刘长卿

青林虎丘寺，林际翠微路。仰见山僧来，遥从飞鸟处。
兹峰沦宝玉，千载唯丘墓。埋剑人空传，凿山龙已去。
扪萝披翳荟，路转夕阳遽。虎啸崖谷寒，猿鸣杉松暮。
裴回北楼上，江海穷一顾。日映千里帆，鸦归万家树。

· 全唐诗 ·

暂因愜所适，果得损外虑。庭暗栖闲云，檐香滴甘露。
久迷空寂理，多为繁华故。永欲投死生，馀生岂能误。

卷_3【奉饯郑中丞罢浙西节度还京】

刘长卿

天上移将星，元戎罢龙节。三军含怨慕，横吹声断绝。
五马嘶城隅，万人卧车辙。沧洲浮云暮，杳杳去帆发。
回首不问家，归心遥向阙。烟波限吴楚，日夕事淮越。
吊影失所依，侧身随下列。孤蓬飞不定，长剑光未灭。
绿绮为谁弹，绿芳堪自擷。怅然江南春，独此湖上月。
千里怀去思，百忧变华发。颂声满江海，今古流不竭。

卷_4【送裴四判官赴河西军试】

刘长卿

吏道岂易愜，如君谁与俦。逢时将骋骥，临事无全牛。
鲍叔幸相知，田苏颇同游。英姿挺孤秀，清论含古流。
出塞佐持简，辞家拥鸣驺。宪台贵公举，幕府资良筹。
武士伫明试，皇华难久留。阳关望天尽，洮水令人愁。
万里看一鸟，旷然烟霞收。晚花对古戍，春雪含边州。
道路难暂隔，音尘那可求。他时相望处，明月西南楼。

· 全唐诗 ·

卷_5【旅次丹阳郡，遇康侍御宣慰召募，兼别岑单父】

刘长卿

客心暮千里，回首烟花繁。楚水渡归梦，春江连故园。
羁人怀上国，骄虏窥中原。胡马暂为害，汉臣多负恩。
羽书昼夜飞，海内风尘昏。双鬓日已白，孤舟心且论。
绣衣从此来，汗马宣王言。忧愤激忠勇，悲欢动黎元。
南徐争赴难，发卒如云屯。倚剑看太白，洗兵临海门。
故人亦沧洲，少别堪伤魂。积翠下京口，归潮落山根。
如何天外帆，又此波上尊。空使忆君处，莺声催泪痕。

卷_6【客舍赠别韦九建赴任河南韦，十七造赴任郑县，
就便覲省】

刘长卿

与子颇畴昔，常时仰英髦。弟兄尽公器，诗赋凌风骚。
顷者游上国，独能光选曹。香名冠二陆，精鉴逢山涛。
且副倚门望，莫辞趋府劳。桃花照彩服，草色连青袍。
征马临素浍，离人倾浊醪。华山微雨霁，祠上残云高。
而我倦栖屑，别君良郁陶。春风亦未已，旅思空滔滔。
拙分甘弃置，穷居长蓬蒿。人生未鹄化，物议如鸿毛。
迢递两乡别，殷勤一宝刀。清琴有古调，更向何人操。

· 全唐诗 ·

卷_7【送元八游汝南】

刘长卿

元生实奇迈，幸此论畴昔。刀笔素推高，锋芒久无敌。
纵横济时意，跌宕过人迹。破产供酒钱，盈门皆食客。
田园顷失计，资用深相迫。生事诚可忧，严装远何适。
世情薄恩义，俗态轻穷厄。四海金虽多，其如向人惜。
迢递朗陵道，怅望都门夕。向别伊水南，行看楚云隔。
繁蝉动高柳，匹马嘶平泽。潢潦今正深，陂湖未澄碧。
人生不得已，自可甘形役。勿复尊前酒，离居剩凄戚。

卷_8【奉和李大夫同吕评事太行苦热行，兼寄院中诸公，仍呈王员外】

刘长卿

迢递太行路，自古称险恶。千骑俨欲前，群峰望如削。
火云从中出，仰视飞鸟落。汗马卧高原，危旌倚长薄。
清风竟不至，赤日方煎铄。石枯山木焦，鳞穷水泉涸。
九重今旰食，万里传明略。诸将候轩车，元凶愁鼎镬。
何劳短兵接，自有长纆缚。通越事岂难，渡泸功未博。
朝辞羊肠阪，夕望贝丘郭。漳水斜绕营，常山遥入幕。
永怀姑苏下，遥寄建安作。白雪和难成，沧波意空托。
陈琳书记好，王粲从军乐。早晚归汉廷，随公上麟阁。

· 全唐诗 ·

卷_9【洛阳主簿叔知和驿承恩赴选伏辞一首】

刘长卿

仲父王佐材，屈身仇香位。一从理京剧，万事皆容易。
则知无不可，通变有馀地。器宇溟渤宽，文锋镢铎利。
憧憧洛阳道，日夕皇华使。二载出江亭，一心奉王事。
功成良可录，道在知无愧。天府留香名，铨闱就明试。
赋诗皆旧友，攀轂多新吏。彩服辞高堂，青袍拥征骑。
此行季春月，时物正鲜媚。官柳阴相连，桃花色如醉。
长安想在目，前路遥仿佛。落日看华山，关门逼青翠。
行襜稍已隔，结恋无能慰。谁念尊酒间，裴回竹林意。

卷_10【题冤句宋少府厅留别】

刘长卿

宋侯人之秀，独步南曹吏。世上无此才，天生一公器。
尚甘黄绶屈，未适青云意。洞澈万顷陂，昂藏千里骥。
从宦闻苦节，应物推高谊。薄俸不自资，倾家共人费。
顾予倦栖托，终日忧穷匮。开口即有求，私心岂无愧。
幸逢东道主，因辍西征骑。对话堪息机，披文欲忘味。
壶觞招过客，几案无留事。绿树映层城，苍苔覆闲地。
一言重然诺，累夕陪宴慰。何意秋风来，飒然动归思。
留欢殊自惬，去念能为累。草色愁别时，槐花落行次。

· 全唐诗 ·

临期仍把手，此会良不易。他日琼树枝，相思劳梦寐。

卷_11【罢摄官后将还旧居，留辞李侍御】

刘长卿

江海今为客，风波失所依。白云心已负，黄绶计仍非。
累辱群公荐，频沾一尉微。去缘焚玉石，来为采葑菲。
州县名何在，渔樵事亦违。故山桃李月，初服薜萝衣。
熊轼分朝寄，龙韬解贼围。风谣传吏体，云物助兵威。
白雪飘辞律，青春发礼闈。引军横吹动，援翰捷书挥。
草映翻营绿，花临檄羽飞。全吴争转战，狂虏怯知机。
忆昨趋金节，临时废玉徽。俗流应不厌，静者或相讥。
世难慵干谒，时闲喜放归。潘郎悲白发，谢客爱清辉。
樗散材因弃，交亲迹已稀。独愁看五柳，无事掩双扉。
世累多行路，生涯向钓矶。榜连溪水碧，家羡渚田肥。
旅食伤飘梗，岩栖忆采薇。悠然独归去，回首望旌旗。

卷_12【赠别于群投笔赴安西】

刘长卿

风流一才子，经史仍满腹。心镜万象生，文锋众人服。
顷游灵台下，频弃荆山玉。蹭蹬空数年，裴回冀微禄。
竭来投笔砚，长揖谢亲族。且欲图变通，安能守拘束。

· 全唐诗 ·

本持乡曲誉，肯料泥涂辱。谁谓命迍邅，还令计反覆。
西戎今未弭，胡骑屯山谷。坐恃龙豹韬，全轻蜂虿毒。
拂衣从此去，拥传一何速。元帅许提携，他人伫瞻瞩。
出门寡俦侣，矧乃无僮仆。黠虏时相逢，黄沙暮愁宿。
萧条远回首，万里如在目。汉境天西穷，胡山海边绿。
想闻羌笛处，泪尽关山曲。地阔鸟飞迟，风寒马毛缩。
边愁殊浩荡，离思空断续。塞上归限赊，尊前别期促。
知君志不小，一举凌鸿鹄。且愿乐从军，功名在殊俗。

卷_13【送薛据宰涉县（自永乐主簿陟状，寻复选受此官）】

刘长卿

故人河山秀，独立风神异。人许白眉长，天资青云器。
雄辞变文名，高价喧时议。下笔盈万言，皆合古人意。
一从负能名，数载犹卑位。宝剑诚可用，烹鲜是虚弃。
昔闻在河上，高卧自无事。几案终日闲，蒲鞭使人畏。
顷因岁月满，方谢风尘吏。颂德有舆人，荐贤逢八使。
栖鸾往已屈，驯雀今可嗣。此道如不移，云霄坐应致。
县前漳水绿，郭外晋山翠。日得谢客游，时堪陶令醉。
前期今尚远，握手空宴慰。驿路疏柳长，春城百花媚。
裴回白日隐，暝色含天地。一鸟向灞陵，孤云送行骑。
夫君多述作，而我常讽味。赖有琼瑶资，能宽别离思。
槐阴覆堂殿，苔色上阶砌。鸟倦自归飞，云闲独容依。
既将慕幽绝，兼欲看定慧。遇物忘世缘，还家懒生计。

· 全唐诗 ·

无生妄已息，有妄心可制。心境常虚明，时人自沦翳。

卷_14【早春赠别赵居士还江左，时长卿下第归嵩阳旧居】

刘长卿

见君风尘里，意出风尘外。自有沧洲期，含情十馀载。
深居凤城曲，日预龙华会。果得僧家缘，能遗俗人态。
一身今已适，万物知何爱。悟法电已空，看心水无碍。
且将穷妙理，兼欲寻胜概。何独谢客游，当为远公辈。
放舟驰楚郭，负杖辞秦塞。目送南飞云，令人想吴会。
遥思旧游处，仿佛疑相对。夜火金陵城，春烟石头濑。
沧波极天末，万里明如带。一片孤客帆，飘然向青霭。
楚天合江气，云色常霏霭。隐见湖中山，相连数州内。
君行意可得，全与时人背。归路随枫林，还乡念蕲菜。
顾予尚羁束，何幸承眄睐。素愿徒自勤，清机本难逮。
累幸忝宾荐，末路逢沙汰。濩落名不成，裴回意空大。
逢时虽贵达，守道甘易退。逆旅乡梦频，春风客心碎。
别君日已远，离念无明晦。予亦返柴荆，山田事耕耒。

卷_21【夜宴洛阳程九主簿宅，送杨三山人往天台寻智者禅师隐居】

刘长卿

东林问逋客，何处栖幽偏。满腹万馀卷，息机三十年。

· 全唐诗 ·

志图良已久，鬓发空苍然。调啸寄疏旷，形骸如弃捐。
本家关西族，别业嵩阳田。云卧能独往，山栖幸周旋。
垂竿不在鱼，卖药不为钱。藜杖闲倚壁，松花常醉眠。
顷辞青溪隐，来访赤县仙。南亩自甘贱，中朝唯爱贤。
仍空世谛法，远结天台缘。魏阙从此去，沧洲知所便。
主人琼枝秀，宠别瑶华篇。落日扫尘榻，春风吹客船。
此行颇自适，物外谁能牵。弄棹白蘋里，挂帆飞鸟边。
落潮见孤屿，彻底观澄涟。雁过湖上月，猿声峰际天。
群峰趋海峤，千里黛相连。遥倚赤城上，瞳瞳初日圆。
昔闻智公隐，此地常安禅。千载已如梦，一灯今尚传。
云龕闭遗影，石窟无人烟。古寺暗乔木，春崖鸣细泉。
流尘既寂寞，缅想增婵娟。山鸟怨庭树，门人思步莲。
夷犹怀永路，怅望临清川。渔人来梦里，沙鸥飞眼前。
独游岂易惬，群动多相缠。羡尔五湖夜，往来闲扣舷。

卷_22【瓜洲驿奉饯张侍御公拜膳部郎中，却复宪台充
贺兰大夫留后，使之岭南，时侍御先在淮南幕府】

刘长卿

太华高标峻，青阳淑气盘。属辞倾渤澥，称价掩琅玕。
杨叶频推中，芸香早拜官。后来惭辙迹，先达仰门阑。
佐剧劳黄绶，提纲疾素餐。风生趋府步，笔偃触邪冠。
骨鲠知难屈，锋芒岂易干。伫将调玉铉，翻自落金丸。
异议那容直，专权本畏弹。寸心宁有负，三黜竟无端。
适喜鸿私降，旋惊羽檄攒。国怜朝市易，人怨虎狼残。

· 全唐诗 ·

天地龙初见，风尘虏未殚。随川归少海，就日背长安。
副相荣分寄，输忠义不刊。击胡驰汗马，迁蜀扈鸣銮。
月罢名卿署，星悬上将坛。三军摇旆出，百越画图观。
茅茹能相引，泥沙肯再蟠。兼荣知任重，交辟许才难。
劲直随台柏，芳香动省兰。璧从全赵去，鹏自北溟抟。
星象衔新宠，风霜带旧寒。是非生倚伏，荣辱系悲欢。
畴昔偏殊眄，屯蒙独永叹。不才成拥肿，失计似邯郸。
江国伤移律，家山忆考槃。一为鸥鸟误，三见露华团。
回首青云里，应怜浊水澜。愧将生事托，羞向鬓毛看。
知己伤愆素，他人自好丹。乡春连楚越，旅宿寄风湍。
世路东流水，沧江一钓竿。松声伯禹穴，草色子陵滩。
度岭情何遽，临流兴未阑。梅花分路远，扬子上潮宽。
梦想怀依倚，烟波限渺漫。且愁无去雁，宁冀少回鸾。
极浦春帆迥，空郊晚骑单。独怜南渡月，今夕送归鞍。

卷_23【至德三年春正月，时谪蒙差摄海盐令，闻王师
收二京，因书事寄上浙西节度李侍郎中丞行营五十韵】

刘长卿

天上胡星孛，人间反气横。风尘生汗马，河洛纵长鲸。
本谓才非据，谁知祸已萌。食参将可待，诛错辄为名。
万里兵锋接，三时羽檄惊。负恩殊鸟兽，流毒遍黎氓。
朝市成芜没，干戈起战争。人心悬反覆，天道暂虚盈。
略地侵中土，传烽到上京。王师陷魑魅，帝座逼欃枪。
渭水嘶胡马，秦山泣汉兵。关原驰万骑，烟火乱千甍。

· 全唐诗 ·

凤驾瞻西幸，龙楼议北征。自将行破竹，谁学去吹笙。
白日重轮庆，玄穹再造荣。鬼神潜释愤，夷狄远输诚。
海内戎衣卷，关中贼垒平。山川随转战，草木困横行。
区宇神功立，讴歌帝业成。天回万象庆，龙见五云迎。
小苑春犹在，长安日更明。星辰归正位，雷雨发残生。
文物登前古，箫韶下太清。未央新柳色，长乐旧钟声。
八使推邦彦，中司案国程。苍生属伊吕，明主仗韩彭。
凶丑将除蔓，奸豪已负荆。世危看柱石，时难识忠贞。
薄伐征貔虎，长驱拥旆旌。吴山依重镇，江月带行营。
金石悬词律，烟云动笔精。运筹初减灶，调鼎未和羹。
北虏传初解，东人望已倾。池塘催谢客，花木待春卿。
昔忝登龙首，能伤困骥鸣。艰难悲伏剑，提握喜悬衡。
巴曲谁堪听，秦台自有情。遂令辞短褐，仍欲请长缨。
久客田园废，初官印绶轻。榛芜上国路，苔藓北山楹。
懒慢羞趋府，驱驰忆退耕。榴花无暇醉，蓬发带愁萦。
地僻方言异，身微俗虑并。家怜双鲤断，才愧小鳞烹。
沧海今犹滞，青阳岁又更。洲香生杜若，溪暖戏鸬鹚。
烟水宜春候，褰关值晚晴。潮声来万井，山色映孤城。
旅梦亲乔木，归心乱早莺。倘无知己在，今已访蓬瀛。

卷_24【寻张逸人山居】

刘长卿

危石才通鸟道，空山更有人家。
桃源定在深处，涧水浮来落花。

· 全唐诗 ·

卷_25【发越州赴润州使院，留别鲍侍御】

刘长卿

对水看山别离，孤舟日暮行迟。
江南江北春草，独向金陵去时。

卷_26【送陆澧还吴中（一作李嘉祐诗）】

刘长卿

瓜步寒潮送客，杨柳暮雨沾衣。
故山南望何处，秋草连天独归。

卷_27【苕溪酬梁耿别后见寄】

刘长卿

清川永路何极，落日孤舟解携。鸟向平芜远近，
人随流水东西。白云千里万里，明月前溪后溪。
惆怅长沙谪去，江潭芳草萋萋。

· 全唐诗 ·

卷_28【蛇浦桥下重送严维】

刘长卿

秋风飒飒鸣条，风月相和寂寥。黄叶一离一别，
青山暮暮朝朝。寒江渐出高岸，古木犹依断桥。
明日行人已远，空馀泪滴回潮。

卷_29【七里滩重送】

刘长卿

秋江渺渺水空波，越客孤舟欲榜歌。
手折衰杨悲老大，故人零落已无多。

卷_30【家园瓜熟，是故萧相公所遗瓜种，凄然感旧，
因赋此诗】

刘长卿

事去人亡迹自留，黄花绿蒂不胜愁。
谁能更向青门外，秋草茫茫觅故侯。

· 全唐诗 ·

卷_31【重送裴郎中贬吉州】

刘长卿

猿啼客散暮江头，人自伤心水自流。
同作逐臣君更远，青山万里一孤舟。

卷_32【寻盛禅师兰若】

刘长卿

秋草黄花覆古阡，隔林何处起人烟。
山僧独在山中老，唯有寒松见少年。

卷_33【寄许尊师】

刘长卿

独上云梯入翠微，蒙蒙烟雪映岩扉。
世人知在中峰里，遥礼青山恨不归。

· 全唐诗 ·

卷_34【酬李穆见寄】

刘长卿

孤舟相访至天涯，万转云山路更赊。
欲扫柴门迎远客，青苔黄叶满贫家。

卷_35【送王司马秩满西归】

刘长卿

汉主何时放逐臣，江边几度送归人。
同官岁岁先辞满，唯有青山伴老身。

卷_36【寄别朱拾遗】

刘长卿

天书远召沧浪客，几度临歧病未能。
江海茫茫春欲遍，行人一骑发金陵。

· 全唐诗 ·

卷_37【会赦后酬主簿所问】

刘长卿

江南海北长相忆，浅水深山独掩扉。
重见太平身已老，桃源久住不能归。

卷_38【赠秦系】

刘长卿

向风长啸戴纱巾，野鹤由来不可亲。
明日东归变名姓，五湖烟水觅何人。

卷_39【酬灵彻公相招】

刘长卿

石涧泉声久不闻，独临长路雪纷纷。
如今渐欲生黄发，愿脱头冠与白云。

· 全唐诗 ·

卷_40【赠崔九载华】

刘长卿

怜君一见一悲歌，岁岁无如老去何。
白屋渐看秋草没，青云莫道故人多。

卷_41【同崔载华赠日本聘使】

刘长卿

怜君异域朝周远，积水连天何处通。
遥指来从初日外，始知更有扶桑东。

卷_42【送建州陆使君】

刘长卿

汉庭初拜建安侯，天子临轩寄所忧。
从此向南无限路，双旌已去水悠悠。

· 全唐诗 ·

卷_43【送秦侍御外甥张篆之福州谒鲍大夫，秦侍御与大夫有旧】

刘长卿

万里闽中去渺然，孤舟水上入寒烟。
辕门拜首儒衣弊，貌似牢之岂不怜。

卷_44【闻奉迎皇太后使沈判官至，因有此作】

刘长卿

长乐宫人扫落花，君王正候五云车。
万方臣妾同瞻望，疑在曾城阿母家。

卷_45【送刘萱之道州谒崔大夫】

刘长卿

沅水悠悠湘水春，临歧南望一沾巾。
信陵门下三千客，君到长沙见几人。

· 全唐诗 ·

卷_46【过郑山人所居】

刘长卿

寂寂孤莺啼杏园，寥寥一犬吠桃源。
落花芳草无寻处，万壑千峰独闭门。

卷_47【奉送贺若郎中贼退后之杭州】

刘长卿

江上初收战马尘，莺声柳色待行春。
双旌谁道来何暮，万井如今有几人。

卷_48【瓜洲驿重送梁郎中赴吉州】

刘长卿

渺渺云山去几重，依依独听广陵钟。
明朝借问南来客，五马双旌何处逢。

· 全唐诗 ·

卷_49【奉使鄂渚至乌江道中作】

刘长卿

沧洲不复恋鱼竿，白发那堪戴铁冠。
客路向南何处是，芦花千里雪漫漫。

卷_50【新息道中作】

刘长卿

萧条独向汝南行，客路多逢汉骑营。
古木苍苍离乱后，几家同住一孤城。

卷_51【春日宴魏万成湘水亭】

刘长卿

何年家住此江滨，几度门前北渚春。
白发乱生相顾老，黄莺自语岂知人。

· 全唐诗 ·

卷_52【重送道标上人】

刘长卿

衡阳千里去人稀，遥逐孤云入翠微。
春草青青新覆地，深山无路若为归。

卷_53【送李判官之润州行营】

刘长卿

万里辞家事鼓鼙，金陵驿路楚云西。
江春不肯留归客，草色青青送马蹄。

卷_54【将赴南巴，至馀干别李十二】

刘长卿

江上花催问礼人，鄱阳莺报越乡春。
谁怜此别悲欢异，万里青山送逐臣。

· 全唐诗 ·

卷_55【时平后春日思归】

刘长卿

一尉何曾及布衣，时平却忆卧柴扉。
故园柳色催南客，春水桃花待北归。

卷_56【送陶十赴杭州摄掾】

刘长卿

莫叹江城一掾卑，沧洲未是阻心期。
浙中山色千万状，门外潮声朝暮时。

卷_57【使还，七里濑上逢薛承规赴江西贬官】

刘长卿

迁客归人醉晚寒，孤舟暂泊子陵滩。
怜君更去三千里，落日青山江上看。

· 全唐诗 ·

卷_58【使回赴苏州道中作】

刘长卿

春风何事远相催，路尽天涯始却回。
万里无人空楚水，孤帆送客到鱼台。

卷_59【昭阳曲】

刘长卿

昨夜承恩宿未央，罗衣犹带御衣香。
芙蓉帐小云屏暗，杨柳风多水殿凉。

卷_60【罪所留系，每夜闻长洲军笛声】

刘长卿

白日浮云闭不开，黄沙谁问冶长猜。
只怜横笛关山月，知处愁人夜夜来。

· 全唐诗 ·

卷_61【赠微上人】

刘长卿

禅门来往翠微间，万里千峰在剡山。
何时共到天台里，身与浮云处处闲。

卷_62【东湖送朱逸人归】

刘长卿

山色湖光并在东，扁舟归去有樵风。
莫道野人无外事，开田凿井白云中。

卷_63【舟中送李十八（一作送僧）】

刘长卿

释子身心无有分，独将衣钵去人群。
相思晚望西林寺，唯有钟声出白云。

· 全唐诗 ·

卷_64【送李穆归淮南】

刘长卿

扬州春草新年绿，未去先愁去不归。
淮水问君来早晚，老人偏畏过芳菲。

卷_65【晚春归山居，题窗前竹（一作钱起：暮春归故山草堂诗）】

刘长卿

溪上残春黄鸟稀，辛夷花尽杏花飞。
始怜幽竹山窗下，不改清阴待我归。

· 全唐诗 ·

第一百五十一卷

卷_1【送卢侍御赴河北】

刘长卿

谪居为别倍伤情，何事从戎独远行。千里按图收故地，
三军罢战及春耕。江天渺渺鸿初去，漳水悠悠草欲生。
莫学仲连逃海上，田单空愧取聊城。

卷_2【送子婿崔真父归长城】

刘长卿

送君卮酒不成欢，幼女辞家事伯鸾。桃叶宜人诚可咏，
柳花如雪若为看。心怜稚齿鸣环去，身愧衰颜对玉难。
惆怅暮帆何处落，青山无限水漫漫。

· 全唐诗 ·

卷_3【送陆澧仓曹西上】

刘长卿

长安此去欲何依，先达谁当荐陆机。日下凤翔双阙迥，
雪中人去二陵稀。舟从故里难移棹，家住寒塘独掩扉。
临水自伤流落久，赠君空有泪沾衣。

卷_4【送柳使君赴袁州】

刘长卿

宜阳出守新恩至，京口因家始愿违。五柳闭门高士去，
三苗按节远人归。月明江路闻猿断，花暗山城见吏稀。
惟有郡斋窗里岫，朝朝空对谢玄晖。

卷_5【戏题赠二小男】

刘长卿

异乡流落频生子，几许悲欢并在身。欲并老容羞白发，
每看儿戏忆青春。未知门户谁堪主，且免琴书别与人。
何幸暮年方有后，举家相对却沾巾。

· 全唐诗 ·

卷_6【谪官后卧病官舍，简贺兰侍郎（一作贬睦州祖庸见赠）】

刘长卿

青春衣绣共称宜，白首垂丝恨不遗。江上几回今夜月，
镜中无复少年时。生还北阙谁相引，老向南邦众所悲。
岁岁任他芳草绿，长沙未有定归期。

卷_7【岁日见新历，因寄都官裴郎中】

刘长卿

青阳振蛰初颁历，白首衔冤欲问天。绛老更能经几岁，
贾生何事又三年。愁占蓍草终难决，病对椒花倍自怜。
若道平分四时气，南枝为底发春偏。

卷_8【江州重别薛六、柳八二员外】

刘长卿

生涯岂料承优诏，世事空知学醉歌。江上月明胡雁过，
淮南木落楚山多。寄身且喜沧洲近，顾影无如白发何。
今日龙钟人共弃，愧君犹遣慎风波。

· 全唐诗 ·

卷_9【青溪口送人归岳州】

刘长卿

洞庭何处雁南飞，江蓼苍苍客去稀。帆带夕阳千里没，
天连秋水一人归。黄花浥露开沙岸，白鸟衔鱼上钓矶。
歧路相逢无可赠，老年空有泪沾衣。

卷_10【送灵澈上人还越中】

刘长卿

禅客无心杖锡还，沃洲深处草堂闲。身随敝屣经残雪，
手绽寒衣入旧山。独向青溪依树下，空留白日在人间。
那堪别后长相忆，云木苍苍但闭关。

卷_11【送耿拾遗归上都】

刘长卿

若为天畔独归秦，对水看山欲暮春。穷海别离无限路，
隔河征战几归人。长安万里传双泪，建德千峰寄一身。
想到邮亭愁驻马，不堪西望见风尘。

· 全唐诗 ·

卷_12【和樊使君登润州城楼】

刘长卿

山城迢递敞高楼，露冕吹铙居上头。春草连天随北望，
夕阳浮水共东流。江田漠漠全吴地，野树苍苍故蒋州。
王粲尚为南郡客，别来何处更销忧。

卷_13【钱王相公出牧括州】

刘长卿

缙云讵比长沙远，出牧犹承明主恩。城对寒山开画戟，
路飞秋叶转朱轡。江潮淼淼连天望，旌旆悠悠上岭翻。
萧索庭槐空闭閤，旧人谁到翟公门。

卷_14【题灵祐和尚故居】

刘长卿

叹逝翻悲有此身，禅房寂寞见流尘。多时行径空秋草，
几日浮生哭故人。风竹自吟遥入磬，雨花随泪共沾巾。
残经窗下依然在，忆得山中问许询。

· 全唐诗 ·

卷_15【寻龙井杨老】

刘长卿

柴门草舍绝风尘，空谷耕田学子真。泉咽恐劳经陇底，
山深不觉有秦人。手栽松树苍苍老，身卧桃园寂寂春。
唯有胡麻当鸡黍，白云来往未嫌贫。

卷_16【见故人李均所借古镜，恨其未获归府，斯人已亡，怆然有作】

刘长卿

故人留镜无归处，今日怀君试暂窥。岁久岂堪尘自入，
夜长应待月相随。空怜琼树曾临匣，犹见菱花独映池。
所恨平生还不早，如今始挂陇头枝。

卷_17【闻虞沔州有替，将归上都，登汉东城寄赠】

刘长卿

淮南摇落客心悲，湓水悠悠怨别离。早雁初辞旧关塞，
秋风先入古城池。腰章建隼皇恩赐，露冕临人白发垂。
惆怅恨君先我去，汉阳耆老忆旌麾。

· 全唐诗 ·

卷_18【献淮宁军节度使李相公】

刘长卿

建牙吹角不闻喧，三十登坛众所尊。家散万金酬士死，
身留一剑答君恩。渔阳老将多回席，鲁国诸生半在门。
白马翩翩春草细，郊原西去猎平原。

卷_19【观校猎，上淮西相公】

刘长卿

龙骧校猎邵陵东，野火初烧楚泽空。师事黄公千战后，
身骑白马万人中。笳随晚吹吟边草，箭没寒云落塞鸿。
三十拥旄谁不羨，周郎少小立奇功。

卷_20【送皇甫曾赴上都】

刘长卿

东游久与故人违，西去荒凉旧路微。秋草不生三径处，
行人独向五陵归。离心日远如流水，回首川长共落晖。
楚客岂劳伤此别，沧江欲暮自沾衣。

· 全唐诗 ·

卷_21【送李录事兄归襄邓】

刘长卿

十年多难与君同，几处移家逐转蓬。白首相逢征战后，
青春已过乱离中。行人杳杳看西月，归马萧萧向北风。
汉水楚云千万里，天涯此别恨无穷。

卷_22【汉阳献李相公】

刘长卿

退身高卧楚城幽，独掩闲门汉水头。春草雨中行径没，
暮山江上卷帘愁。几人犹忆孙弘阁，百口同乘范蠡舟。
早晚却还丞相印，十年空被白云留。

卷_23【长沙过贾谊宅】

刘长卿

三年谪宦此栖迟，万古惟留楚客悲。秋草独寻人去后，
寒林空见日斜时。汉文有道恩犹薄，湘水无情吊岂知。
寂寂江山摇落处，怜君何事到天涯。

· 全唐诗 ·

卷_24【奉酬辛大夫喜湖南腊月连日降雪见示之作】

刘长卿

长沙耆旧拜旌麾，喜见江潭积雪时。柳絮三冬先北地，
梅花一夜遍南枝。初开窗阁寒光满，欲掩军城暮色迟。
闾里何人不相庆，万家同唱郢中词。

卷_25【登馀干古县城】

刘长卿

孤城上与白云齐，万古荒凉楚水西。官舍已空秋草绿，
女墙犹在夜乌啼。平江渺渺来人远，落日亭亭向客低。
沙鸟不知陵谷变，朝飞暮去弋阳溪。

卷_26【将赴岭外，留题萧寺远公院（寺即梁朝萧内史
创）】

刘长卿

竹房遥闭上方幽，苔径苍苍访昔游。内史旧山空日暮，
南朝古木向人秋。天香月色同僧室，叶落猿啼傍客舟。
此去播迁明主意，白云何事欲相留。

· 全唐诗 ·

卷_27【初闻贬谪，续喜量移，登干越亭赠郑校书】

刘长卿

青青草色满江洲，万里伤心水自流。越鸟岂知南国远，
江花独向北人愁。生涯已逐沧浪去，冤气初逢浣汗收。
何事还邀迁客醉，春风日夜待归舟。

卷_28【北归入至德州界，偶逢洛阳邻家李光宰】

刘长卿

生涯心事已蹉跎，旧路依然此重过。近北始知黄叶落，
向南空见白云多。炎州日日人将老，寒渚年年水自波。
华发相逢俱若是，故园秋草复如何。

卷_29【自江西归至旧任官舍，赠袁赞府（时经刘展平后）】

刘长卿

却见同官喜复悲，此生何幸有归期。空庭客至逢摇落，
旧邑人稀经乱离。湘路来过回雁处，江城卧听捣衣时。
南方风土劳君问，贾谊长沙岂不知。

· 全唐诗 ·

卷_30【赴南中题褚少府湖上亭子（一作李嘉祐诗）】

刘长卿

种田东郭傍春陂，万事无情把钓丝。绿竹放侵行径里，
青山常对卷帘时。纷纷花落门空闭，寂寂莺啼日更迟。
从此别君千万里，白云流水忆佳期。

卷_31【上巳日越中与鲍侍郎泛舟耶溪】

刘长卿

兰桡漫转傍汀沙，应接云峰到若耶。旧浦满来移渡口，
垂杨深处有人家。永和春色千年在，曲水乡心万里赊。
君见渔船时借问，前洲几路入烟花。

卷_32【双峰下哭故人李宥】

刘长卿

怜君孤垄寄双峰，埋骨穷泉复几重。白露空沾九原草，
青山犹闭数株松。图书经乱知何在，妻子因贫失所从。
惆怅东皋却归去，人间无处更相逢。

· 全唐诗 ·

卷_33【使次安陆寄友人】

刘长卿

新年草色远萋萋，久客将归失路蹊。暮雨不知湓口处，
春风只到穆陵西。孤城尽日空花落，三户无人自鸟啼。
君在江南相忆否，门前五柳几枝低。

卷_34【哭陈歙州】

刘长卿

千秋万古葬平原，素业清风及子孙。旅棹归程伤道路，
举家行哭向田园。空山寂寂开新垄，乔木苍苍掩旧门。
儒行公才竟何在，独怜棠树一枝存。

卷_35【酬屈突陕】

刘长卿

落叶纷纷满四邻，萧条环堵绝风尘。乡看秋草归无路，
家对寒江病且贫。藜杖懒迎征骑客，菊花能醉去官人。
怜君计画谁知者，但见蓬蒿空没身。

· 全唐诗 ·

卷_36【送惠法师游天台，因怀智大师故居】

刘长卿

翠屏瀑水知何在，鸟道猿啼过几重。落日独摇金策去，
深山谁向石桥逢。定攀岩下丛生桂，欲买云中若个峰。
忆想东林禅诵处，寂寥惟听旧时钟。

卷_37【自夏口至鸚鵡洲，夕望岳阳，寄源中丞】

刘长卿

汀洲无浪复无烟，楚客相思益渺然。汉口夕阳斜渡鸟，
洞庭秋水远连天。孤城背岭寒吹角，独戍临江夜泊船。
贾谊上书忧汉室，长沙谪去古今怜。

卷_38【送侯中丞流康州】

刘长卿

长江极目带枫林，匹马孤云不可寻。迁播共知臣道枉，
猜谗却为主恩深。辕门画角三军思，驿路青山万里心。
北阙九重谁许屈，独看湘水泪沾襟。

· 全唐诗 ·

卷_39【别严士元（一作李嘉祐诗）】

刘长卿

春风倚棹阖闾城，水国春寒阴复晴。细雨湿衣看不见，
闲花落地听无声。日斜江上孤帆影，草绿湖南万里情。
东道若逢相识问，青袍今日误儒生。

卷_40【避地江东，留别淮南使院诸公】

刘长卿

长安路绝鸟飞通，万里孤云西复东。旧业已应成茂草，
馀生只是任飘蓬。何辞向物开秦镜，却使他人得楚弓。
此去行持一竿竹，等闲将狎钓渔翁。

卷_41【罪所上御史惟则】

刘长卿

误因微禄滞南昌，幽系圜扉昼夜长。黄鹤翅垂同燕雀，
青松心在任风霜。斗间谁与看冤气，盆下无由见太阳。
贤达不能同感激，更于何处问苍苍。

· 全唐诗 ·

卷_42【送台州李使君，兼寄题国清寺】

刘长卿

露冕新承明主恩，山城别是武陵源。花间五马时行县，
山外千峰常在门。晴江洲渚带春草，古寺杉松深暮猿。
知到应真飞锡处，因君一想已忘言。

卷_43【狱中闻收东京有赦】

刘长卿

传闻阙下降丝纶，为报关东灭虏尘。壮志已怜成白首，
馀生犹待发青春。风霜何事偏伤物，天地无情亦爱人。
持法不须张密网，恩波自解惜枯鳞。

卷_44【温汤客舍】

刘长卿

冬狩温泉岁欲阑，宫城佳气晚宜看。汤熏仗里千旗暖，
雪照山边万井寒。君门献赋谁相达，客舍无钱辄自安。
且喜礼闈秦镜在，还将妍丑付春官。

· 全唐诗 ·

卷_45【送孙逸归庐山（得帆字）】

刘长卿

炉峰绝顶楚云衔，楚客东归栖此岩。彭蠡湖边香橘柚，
浔阳郭外暗枫杉。青山不断三湘道，飞鸟空随万里帆。
常爱此中多胜事，新诗他日伫开缄。

卷_46【送马秀才落第归江南】

刘长卿

南客怀归乡梦频，东门怅别柳条新。殷勤斗酒城阴暮，
荡漾孤舟楚水春。湘竹旧斑思帝子，江蓠初绿怨骚人。
怜君此去未得意，陌上愁看泪满巾。

卷_47【送常十九归嵩少故林】

刘长卿

迢迢此恨杳无涯，楚泽嵩丘千里赊。歧路别时惊一叶，
云林归处忆三花。秋天苍翠寒飞雁，古堞萧条晚噪鸦。
他日山中逢胜事，桃源洞里几人家。

· 全唐诗 ·

卷_48【送宇文迁明府赴洪州张观察追摄丰城令】

刘长卿

送君不复远为心，余亦扁舟湘水阴。路逐山光何处尽，
春随草色向南深。陈蕃待客应悬榻，宓贱之官独抱琴。
倘见主人论谪宦，尔来空有白头吟。

卷_49【送李将军（一作送开府侄随故李使君旅亲却赴上都）】

刘长卿

征西诸将一如君，报德谁能不顾勋。身逐塞鸿来万里，
手披荒草看孤坟。擒生绝漠经胡雪，怀旧长沙哭楚云。
归去萧条灞陵上，几人看葬李将军。

卷_50【西陵寄一上人】

刘长卿

东山访道成开士，南渡隋阳作本师。了义惠心能善诱，
吴风越俗罢淫祠。室中时见天人命，物外长悬海岳期。
多谢清言异玄度，悬河高论有谁持。

· 全唐诗 ·

卷_51【赋得（一作皇甫冉诗，题作春思）】

刘长卿

莺啼燕语报新年，马邑龙堆路几千。家住层城临汉苑，
心随明月到胡天。机中锦字论长恨，楼上花枝笑独眠。
为问元戎窦车骑，何时返旆勒燕然。

卷_52【三月李明府后亭泛舟（一作皇甫冉诗）】

刘长卿

江南风景复如何，闻道新亭更欲过。处处纫兰春浦渌，
萋萋籍草远山多。壶觞须就陶彭泽，时俗犹传晋永和。
更待持桡徐转去，微风落日水增波。

卷_53【喜朱拾遗承恩拜命赴任上都】

刘长卿

诏书征拜脱荷裳，身去东山闭草堂。阊阖九天通奏籍，
华亭一鹤在朝行。沧洲离别风烟远，青琐幽深漏刻长。
今日却回垂钓处，海鸥相见已高翔。

· 全唐诗 ·

卷_54【鄜上送韦司士归上都旧业（司士即郑公之孙，
顷客于鄜上）】

刘长卿

前朝旧业想遗尘，今日他乡独尔身。鄜地国除为过客，
杜陵家在有何人。苍苔白露生三径，古木寒蝉满四邻。
西去茫茫问归路，关河渐近泪盈巾。

卷_55【感怀】

刘长卿

秋风落叶正堪悲，黄菊残花欲待谁。水近偏逢寒气早，
山深常见日光迟。愁中卜命看周易，梦里招魂读楚词。
自笑不如湘浦雁，飞来即是北归时。

卷_56【送杨於陵归宋汴州别业】

刘长卿

半山溪雨带斜晖，向水残花映客衣。旅食嗟余当岁晚，
能文似汝少年稀。新河柳色千株暗，故国云帆万里归。
离乱要知君到处，寄书须及雁南飞。

· 全唐诗 ·

卷_57【送崔使君赴寿州】

刘长卿

列郡专城分国忧，彤幃皂盖古诸侯。仲华遇主年犹少，
公瑾论功位已酬。草色青青迎建隼，蝉声处处杂鸣驺。
千里相思如可见，淮南木叶正惊秋。

卷_58【上阳宫望幸】

刘长卿

玉辇西巡久未还，春光犹入上阳间。万木长承新雨露，
千门空对旧河山。深花寂寂宫城闭，细草青青御路闲。
独见彩云飞不尽，只应来去候龙颜。

卷_59【过裴舍人故居】

刘长卿

惨惨天寒独掩扃，纷纷黄叶满空庭。孤坟何处依山木，
百口无家学水萍。篱花犹及重阳发，邻笛那堪落日听。
书幌无人长不卷，秋来芳草自为萤。

· 全唐诗 ·

卷_60【登松江驿楼北望故园】

刘长卿

泪尽江楼北望归，田园已陷百重围。平芜万里无人去，
落日千山空鸟飞。孤舟漾漾寒潮小，极浦苍苍远树微。
白鸥渔父徒相待，未扫欃枪懒息机。

卷_61【秋夜有怀高三十五適，兼呈空上人（一作皇甫冉诗）】

刘长卿

晚节逢君趣道深，结茅栽树近东林。吾师几度曾摩顶，
高士何年遂发心。北渚三更闻过雁，西城万里动寒砧。
不见支公与玄度，相思拥膝坐长吟。

卷_62【送孔巢父赴河南军（一作皇甫冉诗）】

刘长卿

江南相送隔烟波，况复新秋一雁过。闻道全军征北虏，
又言诗将会南河。边心冉冉乡人绝，寒色青青战马多。
共许陈琳工奏记，知君名行未蹉跎。

· 全唐诗 ·

卷_63【登润州万岁楼（一作皇甫冉诗）】

刘长卿

高楼独上思依依，极浦遥山合翠微。江客不堪频北望，
塞鸿何事又南飞。垂山古渡寒烟积，瓜步空洲远树稀。
闻道王师犹转战，更能谈笑解重围。

卷_64【江楼送太康郭主簿赴岭南】

刘长卿

对酒怜君安可论，当官爱士如平原。料钱用尽却为谤，
食客空多谁报恩。万里孤舟向南越，苍梧云中暮帆灭。
树色应无江北秋，天涯尚见淮阳月。驿路南随桂水流，
猿声不绝到炎州。青山落日那堪望，谁见思君江上楼。

卷_65【客舍喜郑三见寄】

刘长卿

客舍逢君未换衣，闭门愁见桃花飞。遥想故园今已尔，
家人应念行人归。寂寞垂杨映深曲，长安日暮灵台宿。
穷巷无人鸟雀闲，空庭新雨莓苔绿。北中分与故交疏，

· 全唐诗 ·

何幸仍回长者车，十年未称平生意，好得辛勤谩读书。

卷_66【送贾三北游】

刘长卿

贾生未达犹窘迫，身驰匹马邯郸陌。片云郊外遥送人，
斗酒城边暮留客。顾予他日仰时髦，不堪此别相思劳。
雨色新添漳水绿，夕阳远照苏门高。把袂相看衣共缁，
穷愁只是惜良时。亦知到处逢下榻，莫滞秋风西上期。

卷_67【齐一和尚影堂】

刘长卿

一公住世忘世纷，暂来复去谁能分。身寄虚空如过客，
心将生灭是浮云。萧散浮云往不还，凄凉遗教歿仍传。
旧地愁看双树在，空堂只是一灯悬。一灯长照恒河沙，
双树犹落诸天花。天花寂寂香深殿，苔藓苍苍闕虚院。
昔余精念访禅扉，常接微言清道机。今来寂寞无所得，
唯共门人泪满衣。

· 全唐诗 ·

卷_68【颍川留别司仓李万】

刘长卿

故人早负干将器，谁言未展平生意。想君畴昔高步时，
肯料如今折腰事。且知投刃皆若虚，日挥案牍常有馀。
槐暗公庭趋小吏，荷香陂水脍鲈鱼。客里相逢款话深，
如何歧路剩沾襟。白云西上催归念，颍水东流是别心。
落日征骖随去尘，含情挥手背城闉。已恨良时空此别，
不堪秋草更愁人。

卷_69【听笛歌留别郑协律】

刘长卿

旧游怜我长沙谪，载酒沙头送迁客。天涯望月自沾衣，
江上何人复吹笛。横笛能令孤客愁，渌波淡淡如不流。
商声寥亮羽声苦，江天寂历江枫秋。静听关山闻一叫，
三湘月色悲猿啸。又吹杨柳激繁音，千里春色伤人心。
随风飘向何处落，唯见曲尽平湖深。明发与君离别后，
马上一声堪白首。

· 全唐诗 ·

卷_70【时平后送范伦归安州】

刘长卿

昨闻战罢图麟阁，破虏收兵卷戎幕。沧海初看汉月明，
紫微已见胡星落。忆昔扁舟此南渡，荆棘烟尘满归路。
与君携手姑苏台，望乡一日登几回。白云飞鸟去寂寞，
吴山楚岫空崔嵬。事往时平还旧丘，青青春草近家愁。
洛阳举目今谁在，颍水无情应自流。吴苑西人去欲稀，
留连一日空知非。江潭岁尽愁不尽，鸿雁春归身未归。
万里遥悬帝乡忆，五年空带风尘色。却到长安逢故人，
不道姓名应不识。

卷_71【小鸟篇，上裴尹】

刘长卿

藩篱小鸟何甚微，翩翩日夕空此飞。只缘六翮不自致，
长似孤云无所依。西城黯黯斜晖落，众鸟纷纷皆有托。
独立虽轻燕雀群，孤飞还惧鹰鹯搏。自怜天上青云路，
吊影徘徊独愁暮。衔花纵有报恩时，择木谁容托身处。
岁月蹉跎飞不进，羽毛憔悴何人问。绕树空随乌鹊惊，
巢林只有鹪鹩分。主人庭中荫乔木，爱此清阴欲栖宿。
少年挟弹遥相猜，遂使惊飞往复回。不辞奋翼向君去，
唯怕金丸随后来。

· 全唐诗 ·

卷_72【登吴古城歌】

刘长卿

登古城兮思古人，感贤达兮同埃尘。望平原兮寄远目，
叹姑苏兮聚麋鹿。黄池高会事未终，沧海横流人荡覆。
伍员杀身谁不冤，竟看墓树如所言。越王尝胆安可敌，
远取石田何所益。一朝空谢会稽人，万古犹伤甬东客。
黍离离兮城坡陀，牛羊践兮牧竖歌。野无人兮秋草绿，
园为墟兮古木多。白杨萧萧悲故柯，黄雀啾啾争晚禾。
荒阡断兮谁重过，孤舟逝兮愁若何。天寒日暮江枫落，
叶去辞风水自波。

卷_73【疲兵篇】

刘长卿

骄虏乘秋下蓟门，阴山日夕烟尘昏。三军疲马力已尽，
百战残兵功未论。阵云泱泱屯塞北，羽书纷纷来不息。
孤城望处增断肠，折剑看时可沾臆。元戎日夕且歌舞，
不念关山久辛苦。自矜倚剑气凌云，却笑闻笳泪如雨。
万里飘飘空此身，十年征战老胡尘。赤心报国无片赏，
白首还家有几亲。朔风萧萧动枯草，旌旗猎猎榆关道。
汉月何曾照客心，胡笳只解催人老。军前仍欲破重围，
闺里犹应愁未归。小妇十年啼夜织，行人九月忆寒衣。

· 全唐诗 ·

饮马湟河晚更清，行吹羌笛远归营。只恨汉家多苦战，
徒遗金镞满长城。

卷_74【新安送陆澧归江阴】

刘长卿

新安路，人来去。早潮复晚潮，明日知何处。
潮水无情亦解归，自怜长在新安住。

卷_75【弄白鸥歌】

刘长卿

泛泛江上鸥，毛衣皓如雪。朝飞潇湘水，夜宿洞庭月。
归客正夷犹，爱此沧江闲白鸥。

卷_76【长沙赠衡岳祝融峰般若禅师】

刘长卿

般若公，般若公，负钵何时下祝融。归路却看飞鸟外，
禅房空掩白云中。桂花寥寥闲自落，流水无心西复东。

· 全唐诗 ·

卷_77【赠湘南渔父】

刘长卿

问君何所适，暮暮逢烟水。独与不系舟，往来楚云里。
钓鱼非一岁，终日只如此。日落江清桂楫迟，
纤鳞百尺深可窥。沈钩垂饵不在得，白首沧浪空自知。

卷_78【明月湾寻贺九不遇】

刘长卿

楚水日夜绿，傍江春草滋。青青遥满目，万里伤心归。
故人川上复何之，明月湾南空所思。故人不在明月在，
谁见孤舟来去时。

卷_79【题曲阿三昧王佛殿前孤石】

刘长卿

孤石自何处，对之疑旧游。氛氲岷首夕，苍翠剡中秋。
迥出群峰当殿前，雪山灵鹫惭贞坚。一片孤云长不去，
莓苔古色空苍然。

· 全唐诗 ·

卷_80【送友人东归】

刘长卿

对酒灞亭暮，相看愁自深。河边草已绿，此别难为心。
关路迢迢匹马归，垂杨寂寂数莺飞。怜君献策十馀载，
今日犹为一布衣。

卷_81【入桂渚次砂牛石穴】

刘长卿

扁舟傍归路，日暮潇湘深。湘水清见底，楚云淡无心。
片帆落桂渚，独夜依枫林。枫林月出猿声苦，
桂渚天寒桂花吐。此中无处不堪愁，江客相看泪如雨。

卷_82【严陵钓台，送李康成赴江东使】

刘长卿

潺湲子陵濑，仿佛如在目。七里人已非，千年水空绿。
新安江上孤帆远，应逐枫林万馀转。古台落日共萧条，
寒水无波更清浅。台上渔竿不复持，却令猿鸟向人悲。
滩声山翠至今在，迟尔行舟晚泊时。

· 全唐诗 ·

卷_83【送姨子弟往南郊】

刘长卿

一展慰久阔，寸心仍未伸。别时两童稚，及此俱成人。
那堪适会面，遽已悲分首。客路向楚云，河桥对衰柳。
送君匹马别河桥，汝南山郭寒萧条。今我单车复西上，
郎去灞陵转惆怅。何处共伤离别心，明月亭亭两乡望。

卷_84【铜雀台】

刘长卿

娇爱更何日，高台空数层。含啼映双袖，不忍看西陵。
漳河东流无复来，百花攀路为苍苔。青楼月夜长寂寞，
碧云日暮空徘徊。君不见邺中万事非昔时，
古人不在今人悲。春风不逐君王去，草色年年旧宫路。
宫中歌舞已浮云，空指行人往来处。

卷_85【王昭君歌】

刘长卿

自矜娇艳色，不顾丹青人。那知粉绘能相负，
却使容华翻误身。上马辞君嫁骄虏，玉颜对人啼不语。

· 全唐诗 ·

北风雁急浮云秋，万里独见黄河流。纤腰不复汉宫宠，
双蛾长向胡天愁。琵琶弦中苦调多，萧萧羌笛声相和。
谁怜一曲传乐府，能使千秋伤绮罗。

卷_86【送杜越江佐覲省往新安江】

刘长卿

去帆楚天外，望远愁复积。想见新安江，扁舟一行客。
清流数千丈，底下看白石。色混元气深，波连洞庭碧。
鸣榔去未已，前路行可觐。猿鸟悲啾啾，杉松雨声夕。
送君东赴归宁期，新安江水远相随。见说江中孤屿在，
此行应赋谢公诗。

卷_87【湘中忆归】

刘长卿

终日空理棹，经年犹别家。顷来行已远，弥觉天无涯。
白云意自深，沧海梦难隔。迢递万里帆，飘飘一行客。
独怜西江外，远寄风波里。平湖流楚天，孤雁渡湘水。
湘流澹澹空愁予，猿啼啾啾满南楚。扁舟泊处闻此声，
江客相看泪如雨。

· 全唐诗 ·

卷_88【送郭六侍从之武陵郡】

刘长卿

常爱武陵郡，羨君将远寻。空怜世界迫，孤负桃源心。
洛阳遥想桃源隔，野水闲流春自碧。花下常迷楚客船，
洞中时见秦人宅。落日相看斗酒前，送君南望但依然。
河梁马首随春草，江路猿声愁暮天。丈人别乘佐分忧，
才子趋庭兼胜游。澧浦荆门行可见，知君诗兴满沧洲。

卷_89【山鹧鸪歌（一作韦应物诗）】

刘长卿

山鹧鸪，长在此山吟古木。嘲哳相呼响空谷，
哀鸣万变如成曲。江南逐臣悲放逐，倚树听之心断续。
巴人峡里自闻猿，燕客水头空击筑。山鹧鸪，
一生不及双黄鹄。朝去秋田啄残粟，暮入寒林啸群族。
鸣相逐，啄残粟，食不足。青云杳杳无力飞，
白露苍苍抱枝宿。不知何事守空山，万壑千峰自愁独。

· 全唐诗 ·

卷_90【望龙山怀道士许法棱】

刘长卿

心惆怅，望龙山。云之际，鸟独还。悬崖绝壁几千丈，
绿萝袅袅不可攀。龙山高，谁能践。灵原中，苍翠晚。
岚烟瀑水如向人，终日迢迢空在眼。中有一人披霓裳，
诵经山顶飧琼浆。空林闲坐独焚香，真官列侍俨成行。
朝入青霄礼玉堂，夜扫白云眠石床。桃花洞里居人满，
桂树山中住日长，龙山高高遥相望。

卷_91【戏赠干越尼子歌】

刘长卿

鄱阳女子年十五，家本秦人今在楚。厌向春江空浣沙，
龙宫落发披袈裟。五年持戒长一食，至今犹自颜如花。
亭亭独立青莲下，忍草禅枝绕精舍。自用黄金买地居，
能嫌碧玉随人嫁。北客相逢疑姓秦，铅花抛却仍青春。
一花一竹如有意，不语不笑能留人。黄鹂欲栖白日暮，
天香未散经行处。却对香炉闲诵经，春泉漱玉寒泠泠。
云房寂寂夜钟后，吴音清切令人听。人听吴音歌一曲，
杳然如在诸天宿。谁堪世事更相牵，惆怅回船江水绿。

· 全唐诗 ·

卷_92【游四窗】

刘长卿

四明山绝奇，自古说登陆。苍崖倚天立，覆石如覆屋。
玲珑开户牖，落落明四目。箕星分南野，有斗挂檐北。
日月居东西，朝昏互出没。我来游其间，寄傲巾半幅。
白云本无心，悠然伴幽独。对此脱尘鞅，顿忘荣与辱。
长笑天地宽，仙风吹佩玉。

卷_93【和中丞出使恩命过终南别业】

刘长卿

不过林园久，多因宠遇偏。故山长寂寂，春草过年年。
花待朝衣间，云迎驿骑连。松萝深旧閤，樵木散闲田。
拜阙贪摇佩，看琴懒更弦。君恩催早入，已梦傅岩边。

卷_94【岳阳楼】

刘长卿

行尽清溪日已蹉，云容山影两嵯峨。楼前归客怨秋梦，
湖上美人疑夜歌。独坐高高风势急，平湖渺渺月明多。

· 全唐诗 ·

终期一艇载樵去，来往片帆愁白波。

卷_95【春望寄王涇阳】

刘长卿

清明别后雨晴时，极浦空顰一望眉。湖畔春山烟点点，
云中远树墨离离。依微水戍闻钲鼓，掩映沙村见酒旗。
风暖草长愁自醉，行吟无处寄相思。

卷_96【留辞】

刘长卿

南楚迢迢通汉口，西江淼淼去扬州。
春风已遣归心促，纵复芳菲不可留。

· 全唐诗 ·

第一百五十二卷

卷_1【题杼山癸亭得暮字（亭，陆鸿渐所创）】

颜真卿

杼山多幽绝，胜事盈跬步。前者虽登攀，淹留恨晨暮。
及兹纡胜引，曾是美无度。欵构三癸亭，实为陆生故。
高贤能创物，疏凿皆有趣。不越方丈间，居然云霄遇。
巍峨倚修岫，旷望临古渡。左右苔石攒，低昂桂枝蠹。
山僧狎猿狖，巢鸟来枳椇。俯视何楷台，傍瞻戴颙路。
迟回未能下，夕照明村树。

卷_2【谢陆处士杼山折青桂花见寄之什】

颜真卿

群子游杼山，山寒桂花白。绿萼含素萼，采折自逋客。
忽枉岩中诗，芳香润金石。全高南越蠹，岂谢东堂策。
会惬名山期，从君恣幽赜。

· 全唐诗 ·

卷_3【赠裴将军】

颜真卿

大君制六合，猛将清九垓。战马若龙虎，腾凌何壮哉。
将军临八荒，烜赫耀英材。剑舞若游电，随风萦且回。
登高望天山，白云正崔巍。入阵破骄虏，威名雄震雷。
一射百马倒，再射万夫开。匈奴不敢敌，相呼归去来。
功成报天子，可以画麟台。

卷_4【赠僧皎然】

颜真卿

秋意西山多，别岑萦左次。缮亭历三癸，趾趾邻什寺。
元化隐灵踪，始君启高致。诛榛养翘楚，鞭草理芳穗。
俯砌披水容，逼天扫峰翠。境新耳目换，物远风尘异。
倚石忘世情，援云得真意。嘉林幸勿剪，禅侣欣可庇。
卫法大臣过，佐游群英萃。龙池护清澈，虎节到深邃。
徒想嵯峨期，于今没遗记。

· 全唐诗 ·

卷_5【咏陶渊明】

颜真卿

张良思报韩，龚胜耻事新。狙击不肯就，舍生悲缙绅。
呜呼陶渊明，奕叶为晋臣。自以公相后，每怀宗国屯。
题诗庚子岁，自谓羲皇人。手持山海经，头戴漉酒巾。
兴逐孤云外，心随还鸟泯。

卷_6【三言拟五杂组二首】

颜真卿

五杂组，绣与锦。往复还，兴又寝。不得已，病伏枕。

五杂组，甘咸醋。往复还，乌与兔。不得已，韶光度。

卷_7【使过瑶台寺，有怀圆寂上人】

颜真卿

上人居此寺，不出三十年。万法元无著，一心唯趣禅。
忽纡尘外轸，远访区中缘。及尔不复见，支提犹岌然。

· 全唐诗 ·

卷_8【登平望桥下作】

颜真卿

登桥试长望，望极与天平。际海蒹葭色，终朝凫雁声。
近山犹仿佛，远水忽微明。更览诸公作，知高题柱名。

卷_9【刻清远道士诗，因而继作】

颜真卿

不到东西寺，于今五十春。揭来从旧赏，林壑宛相亲。
吴子多藏日，秦王厌胜辰。剑池穿万仞，盘石坐千人。
金气腾为虎，琴台化若神。登坛仰生一，舍宅叹珣珉。
中岭分双树，回峦绝四邻。窥临江海接，崇饰四时新。
客有神仙者，于兹雅丽陈。名高清远峡，文聚斗牛津。
迹异心宁间，声同质岂均。悠然千载后，知我揖光尘。

· 全唐诗 ·

第一百五十三卷

卷_1【杂诗六首】

李华

黄钟叩元音，律吕更循环。邪气悖正声，郑卫生其间。
典乐忽涓微，波浪与天浑。嘈嘈鸱枭动，好鸟徒绵蛮。
王吉归乡里，甘心长闭关。

玄黄与丹青，五气之正色。圣人端其源，上下皆有则。
齐侯好紫衣，魏帝妇人饰。女奴厌金翠，倾海未满臆。
何忍严子陵，羊裘死荆棘。

甘酸不私人，元和运五行。生人受其用，味正心亦平。
爪牙相践伤，日与性命争。圣人不能绝，钻燧与炮烹。
嗜欲乘此炽，百金资一倾。正销神耗衰，邪胜体充盈。
颜子有馀乐，瓢中寒水清。

阴魄沦宇宙，太阳假其明。臣道不敢专，由此见亏盈。
未闻东菑稼，一气嘉谷成。上天降寒暑，地利乃可生。
葛藟附柔木，繁阴蔽曾原。风霜摧枝干，不复庇本根。
女萝依松柏，然后得长存。

· 全唐诗 ·

孔光尊董贤，胡广惭李固。儒风冠天下，而乃败王度。
绛侯与博陆，忠朴受遗顾。求名不考实，文弊反成蠹。

结交得书生，书生钝且直。争权复争利，终不得其力。
我逢纵横者，是我牙与翼。相旋如疾风，并命趋紫极。
奔车得停轨，风火何相逼。仁义岂有常，肝胆反为贼。
勿嫌书生直，钝直深可忆。

卷_2【咏史十一首】

李华

昂藏獬豸兽，出自太平年。乱代乃潜伏，纵人为祸愆。
尝闻断马剑，每壮朱云贤。身死名不灭，寒风吹墓田。
精灵如有在，幽愤满松烟。

汉皇修雅乐，乘舆临太学。三老与五更，天王亲割牲。
一人调风俗，万国和且平。单于骤款塞，武库欲销兵。
文物此朝盛，君臣何穆清。至今墟坛下，如有箫韶声。

巢许在嵩颍，陶唐不得臣。九州尚洗耳，一命安能亲。
绵邈数千祀，丘中谁隐沦。朝游公卿府，夕是山林人。
蒲帛扬侧陋，薜萝为缙绅。九重念入梦，三事思降神。
且设庭中燎，宁窥泉下鳞。

汉时征百粤，杨仆将楼船。幕府功未立，江湖已骚然。

· 全唐诗 ·

岛夷非敢乱，政暴地仍偏。得罪因怀璧，防身辄控弦。
三军求裂土，万里讵闻天。魏阙心犹在，旗门首已悬。
如何得良吏，一为制方圆。

秦灭汉帝兴，南山有遗老。危冠揖万乘，幸得厌征讨。
当君逐鹿时，臣等已枯槁。宁知市朝变，但觉林泉好。
高卧三十年，相看成四皓。帝言翁甚善，见顾何不早。
咸称太子仁，重义亦尊道。侧闻骊姬事，申生不自保。
暂出商山云，谒来趋洒扫。东宫成羽翼，楚舞伤怀抱。
后代无其人，戾园满秋草。

日照昆仑上，羽人披羽衣。乘龙驾云雾，欲往心无违。
此山在西北，乃是神仙国。灵气皆自然，求之不可得。
何为汉武帝，精思遍群山。糜费巨万计，宫车终不还。
苍苍茂陵树，足以戒人间。
天生忠与义，本以佐雍熙。何意李司隶，而当昏乱时。
古坟襄城野，斜径横秋陂。况不禁樵采，茅莎无子遗。
高标尚可仰，精爽今何之。一忤中常侍，衔冤谁见知。
尝观党锢传，抚卷不胜悲。

文侯耽郑卫，一听一忘餐。白雪燕姬舞，朱弦赵女弹。
淫声流不返，悵荡日无端。献岁受朝时，鸣钟宴百官。
两床陈管磬，九奏殊未阑。对此唯恐卧，更能整衣冠。

蜀主相诸葛，功高名亦尊。驱驰千万众，怒目瞰中原。
曹伯任公孙，国亡身不存。社宫久芜没，白雁犹飞翻。
勿言君臣合，可以济黎元。为蜀谅不易，如曹难复论。

· 全唐诗 ·

六国韩最弱，末年尤畏秦。郑生为韩计，且欲疲秦人。
利物可分社，原情堪灭身。咸阳古城下，万顷稻苗新。

沂水春可涉，泮宫映杨叶。丽色异人间，珊珊摇珮环。
展禽恒独处，深巷生禾黍。城上飞海云，城中暗春雨。
适来鸣珮者，复是谁家女。泥沾珠缀履，雨湿翠毛簪。
电影开莲脸，雷声飞蕙心。自言沂水曲，采萍兼采芣。
归径虽可寻，天阴光景促。怜君贞且独，愿许君家宿。
徒劳惜衾枕，了不顾双蛾。艳质诚可重，淫风如礼何。
周王惑褒姒，城阙成陂陀。

卷_3【云母泉诗】

李华

晨登玄石岭，岭上寒松声。朗日风雨霁，高秋天地清。
山门开古寺，石窦含纯精。洞彻净金界，夤缘流玉英。
泽药滋畦茂，气染茶瓯馨。饮液尽眉寿，餐和皆体平。
琼浆驻容发，甘露莹心灵。岱谷谢巧妙，匡山徒有名。
愿言构蓬茆，荷锄引泠泠。访道出人世，招贤依福庭。
此心不能已，寤寐见吾兄。曾结颖阳契，穷年无所成。
东西同放逐，蛇豕尚纵横。江汉阻携手，天涯万里情。
恩光起憔悴，西上谒承明。秋色变江树，相思纷以盈。
猿啼巴丘戍，月上武陵城。共恨川路永，无由会友生。
云泉不可忘，何日遂躬耕。

· 全唐诗 ·

卷_4【寄赵七侍御】

李华

摇桨曙江流，江清山复重。心惬赏未足，川迥失前峰。
凌滩出极浦，旷若天池通。君阳青嵯峨，开拆混元中。
九潭鱼龙窟，仙成羽人宫。阴奥潜鬼物，精光动烟空。
玄猿啼深茏，白鸟戏葱蒙。飞湍鸣金石，激溜鼓雷风。
雨濯万木鲜，霞照千山浓。草闲长馀绿，花静落幽红。
渚烟见晨钓，山月闻夜舂。覆溪窈窕波，涵石淘溶溶。
丹丘忽聚散，素壁相奔冲。白日破昏霭，灵山出其东。
势排昊苍上，气压吴越雄。回头望云卿，此恨发吾衷。
昔日萧邵游，四人才成童。属词慕孔门，入仕希上公。
纬卿陷非罪，折我昆吾锋。茂挺独先觉，拔身渡京虹。
斯人谢明代，百代坠鹓鸿。世故坠横流，与君哀路穷。
相顾无死节，蒙恩逐殊封。天波洗其瑕，朱衣备朝容。
一别凡十年，岂期复相从。馀生得携手，遗此两孱翁。
群迁失莺羽，后凋惜长松。衰旅难重别，凄凄满心胸。
遇胜悲独游，贪奇怅孤逢。禽尚彼何人，胡为束樊笼。
吾师度门教，投弁蹑遐踪。

卷_5【仙游寺（有龙潭穴、弄玉祠）】

李华

舍事入樵径，云木深谷口。万壑移晦明，千峰转前后。

· 全唐诗 ·

嶷然龙潭上，石势若奔走。开拆秋天光，崩腾夏雷吼。
灵溪自兹去，纡直互纷纠。听声静复喧，望色无更有。
冥冥翠微下，高殿映杉柳。滴滴洞穴中，悬泉响相扣。
昔时秦王女，羽化年代久。日暮松风来，箫声生左右。
早窥神仙策，愿结芝朮友。安得羡门方，青囊系吾肘。

卷_6【春游吟】

李华

初春遍芳甸，千里蔼盈瞩。美人摘新英，步步玩春绿。
所思杳何处，宛在吴江曲。
可怜不得共芳菲，日暮归来泪满衣。

卷_7【长门怨】

李华

弱体鸳鸯荐，啼妆翡翠衾。鸦鸣秋殿晓，人静禁门深。
每忆椒房宠，那堪永巷阴。自惊罗带缓，非复旧来心。

· 全唐诗 ·

卷_8【奉使朔方，赠郭都护】

李华

绝塞临光禄，孤营佐贰师。铁衣山月冷，金鼓朔风悲。
都护征兵日，将军破虏时。扬鞭玉关道，回首望旌旗。

卷_9【尚书都堂瓦松】

李华

华省秘仙踪，高堂露瓦松。叶因春后长，花为雨来浓。
影混鸳鸯色，光含翡翠容。天然斯所寄，地势太无从。
接栋临双阙，连薨近九重。宁知深涧底，霜雪岁兼封。

卷_10【海上生明月（科试）】

李华

皎皎秋中月，团团海上生。影开金镜满，轮抱玉壶清。
渐出三山岫，将凌一汉横。素娥尝药去，乌鹊绕枝惊。
照水光偏白，浮云色最明。此时尧砌下，蓂莢自将荣。

· 全唐诗 ·

卷_11【晚日湖上寄所思】

李华

与君为近别，不啻远相思。落日平湖上，看山对此时。

卷_12【寄从弟】

李华

眼病身亦病，浮生已半空。迢迢千里月，应与惠连同。

卷_13【奉寄彭城公】

李华

公子三千客，人人愿报恩。应怜抱关者，贫病老夷门。

卷_14【春行寄兴】

李华

宜阳城下草萋萋，涧水东流复向西。

· 全唐诗 ·

芳树无人花自落，春山一路鸟空啼。

· 全唐诗 ·

第一百五十四卷

卷_1【江有枫一篇十章】

萧颖士

江有枫，其叶蒙蒙。我友自东，于以游从。

山有槭，其叶漠漠。我友徂北，于以休息。

想彼槭矣，亦类其枫。矧伊怀人，而忘其东。

东可游矣，会之丘矣。于山于水，于庙于寺，
于亭于里，君子游焉。于以宴喜，其乐亶亶。

粤东可居，彼吴之墟。有田有庭，有朋有书，
有莼有鱼，君子居焉。惟以宴醑，其乐徐徐。

我朋在矣，彼陆之子。如松如杞，淑问不已。

我友于征，彼郑之子。如琇如英，德音孔明。

我思震泽，菱芡幕幕。寤寐如觌，我思剡溪。

· 全唐诗 ·

杉筱萋萋，寤寐无迷。

有鸟有鸟，粤鸥与鹭。浮湍戏渚，皓然洁素，
忘其猜妒。彼何人斯，曾足伤惧。

此惧惟何，惧置于罗。彼骄者子，谗言孔多。
我闻先师，体命委和。公伯之愬，则如予何。
怅然山河，惟以啸歌，其忧也哉。

卷_2【菊荣一篇五章】

萧颖士

采采者菊，芬其荣斯。紫英黄萼，照灼丹墀。恺悌君子，
佩服攸宜。王国是维，大君是毗。贻尔子孙，百禄萃之。

采采者菊，于邑之城。旧根新茎，布叶垂英。彼美淑人，
应家之祯。有弦既鸣，我政则平。宜尔栋崇，必复其庆。

采采者菊，于邦之府。阴槐翳柳，迥楹近宇。彼劳者子，
喧卑是处。慨其莫知，蕴结谁语。企彼高人，色斯遐举。

采采者菊，于宾之馆。既低其枝，又弱其干。有斐君子，
是焉披玩。良辰旨酒，宴饮无算。怆其仳别，终然永叹。
岁方晏矣，霜露残促。谁其荣斯，有英者菊。岂微春华，
懿此贞色。人之侮我，混于薪棘。诗人有言，好是正直。

· 全唐诗 ·

卷_3【凉雨一章】

萧颖士

习习凉风，泠泠浮飙。君子乐胥，于其宾僚。有女斯夭，
式歌且谣。欲言终宥，惟以招邀。于胥乐兮。

卷_4【有竹一篇七章】

萧颖士

有竹斯竿，于阁之前。君子秉心，惟其贞坚兮。

有竿斯竹，于阁之侧。君子秉操，惟其正直兮。

彼蔚者竹，萧其森矣。有开者阁，宛其深矣。
回檐幽砌，如翼如齿。

冬之宵，霰雪斯瀼。我有金炉，熏其以馥。

夏之日，炎景斯郁。我有珍簟，凄其以栗。

彼纷者务，体其豫矣。有旨者酒，欢其且矣。
友僚萃止，跼蹐载靴。

· 全唐诗 ·

彼美公之姓兮，那欵应积庆兮，期子惟去之柄兮。

卷_5【江有归舟三章】

萧颖士

江有归舟，亦乱其流。之子言旋，嘉名孔修。
扬于王庭，允焯其休。

舟既归止，人亦荣止。兄矣弟矣，孝斯践矣。
称觴燕喜，于謁于祀。

彼游惟帆，匪风不扬。有彬伊父，匪学不彰。
予其怀而，勉尔无忘。

卷_6【过河滨，和文学张志尹】

萧颖士

隆古日以远，举世丧其淳。慷慨怀黄虞，化理何由臻。
步出城西门，裴回见河滨。当其侧陋时，河水清且潏。
沧桑一以变，莽然翳荆榛。至化无苦窳，宇宙将陶甄。
太息感悲泉，人往迹未湮。瑟瑟寒原暮，冷风吹衣巾。
顾我譾劣质，希圣杳无因。且尽登临意，斗酒欢相亲。

· 全唐诗 ·

卷_7【舟中遇陆棣兄西归，数日得广陵二三子书，知
迟晚次沙埭西岸作】

萧颖士

林鸟遥岸鸣，早知东方曙。波上风雨歇，舟人叫将去。
苍苍前洲日，的的回沙鹭。水气清晓阴，滩声隐川雾。
旧山劳魂想，忆人阻洄溯。信宿千里馀，佳期曷由遇。
前程入楚乡，弭棹问维扬。但见土音异，始知程路长。
寥寥晚空静，漫漫风淮凉。云景信可美，风潮殊未央。
故人江皋上，永日念容光。中路枉尺书，谓余琼树芳。
深期结晤语，竟夕恨相望。冀愿崇朝霁，吾其一苇航。

卷_8【重阳日陪元鲁山德秀登北城，瞩对新霁，因以
赠别】

萧颖士

山县绕古堞，悠悠快登望。雨馀秋天高，目尽无隐状。
绵连湓川回，杳渺鸦路深。彭泽兴不浅，临风动归心。
赖兹琴堂暇，傲睨倾菊酒。人和岁已登，从政复何有。
远山十里碧，一道衔长云。青霞半落日，混合疑晴曛。
渐闻惊栖羽，坐叹清夜月。中欢怆有违，行子念明发。
仅能泯宠辱，未免伤别离。江湖不可忘，风雨劳相思。
明时当盛才，短伎安所设。何日谢百里，从君汉之漭。

· 全唐诗 ·

卷_9【留别二三子，得韵字】

萧颖士

二纪尚雌伏，徒然忝先进。英英尔众贤，名实郁双振。
残春惜将别，清洛行不近。相与爱后时，无令孤逸韵。

卷_10【仰答韦司业垂访五首】

萧颖士

呦呦食苹鹿，常饮清泠川。但悦丰草美，宁知牢饕鲜。
主人有幽意，将以充林泉。罗网幸免伤，蒙君复羁牵。
高堂列众宾，广座鸣清弦。俯仰转惊惕，裴回独忧煎。
缅怀云岩路，欲往无由缘。物各有所好，违之伤自然。

神龟在南国，缅邈湘川阴。游止莲叶上，岁时嘉树林。
毒虫且不近，斤斧何由寻。错落负奇文，荧煌耀丹金。
江山万里馀，淮海阻且深。独保贞素质，不为寒暑侵。
一逢盛明代，应见通灵心。

晋代有儒臣，当年富词藻。立言寄青史，将以赞王道。
辽落缅岁时，辛勤历江岛。且言风波倦，探涉岂为宝。
不遇庾征西，云谁展怀抱。士贫乏知己，安得成所好。

· 全唐诗 ·

彭阳昔游说，愿谒南郢都。王果尚未达，况从夷节谟。
岂知晋叔向，无罪婴囚拘。临难俟解纷，独知祁大夫。
举雎且不弃，何必论亲疏。夫子觉者也，其能遗我乎。

关西一公子，年貌独青春。被褐来上京，翳然声未振。
中郎何为者，倒屣惊座宾。词赋岂不佳，盛名亦相因。
为君奏此曲，此曲多苦辛。千载不可诬，孰言今无人。

卷_11【答邹象先】

萧颖士

桂枝常共擢，茅茨冀同荐。一命何阻修，载驰各川县。
壮图悲岁月，明代耻贫贱。回首无津梁，只令二毛变。

卷_12【蒙山作】

萧颖士

东蒙镇海沂，合沓馀百里。清秋净氛霭，崖崿隐天起。
于役劳往还，息徒暂攀跻。将穷绝迹处，偶得冥心理。
云气杂虹霓，松声乱风水。微明绿林际，杳窅丹洞里。
仙鸟时可闻，羽人邈难视。此焉多深邃，贤达昔所止。
子尚捐俗纷，季随躋遐轨。蕴真道弥旷，怀古情未已。
白鹿凡几游，黄精复奚似。顾予尚牵缠，家业重书史。

· 全唐诗 ·

少学务从师，壮年贵趋仕。方驰桂林誉，未暇桃源美。
岁暮期再寻，幽哉羡门子。

卷_13【早春过七岭，寄题硤石裴丞厅壁】

萧颖士

出硤寄趣少，晚行偏忆君。依然向来处，官路溪边云。
兹路岂不剧，能无俗累纷。槐阴永未合，泉声细犹闻。
弥叹春罢酒，牵卑从此分。登高望城入，斜影半风薰。

卷_14【送张翥下第归江东】

萧颖士

俱飞仍失路，彩服迓清波。地积东南美，朝遗甲乙科。
客愁千里别，春色五湖多。明日旧山去，其如相望何。

卷_15【越江秋曙】

萧颖士

扁舟东路远，晓月下江濆。潏潏信潮上，苍茫孤屿分。
林声寒动叶，水气曙连云。暝日浪中出，榜歌天际闻。

· 全唐诗 ·

伯鸾常去国，安道惜离群。延首剡溪近，咏言怀数君。

卷_16【山庄月夜作】

萧颖士

献书嗟弃置，疲拙归田园。且事计然策，将符公冶言。
桑榆清暮景，鸡犬应遥村。蚕罢里閭晏，麦秋田野喧。
涧声连枕簟，峰势入阶轩。未奏东山妓，先倾北海尊。
陇瓜香早熟，庭果落初繁。更惬野人意，农谈朝竟昏。

· 全唐诗 ·

第一百五十五卷

卷_1【古意】

崔曙

绿笋总成竹，红花亦成子。能当此时好，独自幽闺里。
夜夜苦更长，愁来不如死。

卷_2【宿大通和尚塔，敬赠如上人，兼呈常、孙二山人】

崔曙

支公已寂灭，影塔山上古。更有真僧来，道场救诸苦。
一承微妙法，寓宿清净土。身心能自观，色相了无取。
森森松映月，漠漠云近户。岭外飞电明，夜来前山雨。
然灯见栖鸽，作礼闻信鼓。晓霁南轩开，秋华净天宇。
愿言出世尘，谢尔申及甫。

· 全唐诗 ·

卷_3【送薛据之宋州】

崔曙

无媒嗟失路，有道亦乘流。客处不堪别，异乡应共愁。
我生早孤贱，沦落居此州。风土至今忆，山河皆昔游。
一从文章事，两京春复秋。君去问相识，几人今白头。

卷_4【山下晚晴】

崔曙

寥寥远天净，溪路何空濛。斜光照疏雨，秋气生白虹。
云尽山色暝，萧条西北风。故林归宿处，一叶下梧桐。

卷_5【颍阳东溪怀古】

崔曙

灵溪氛雾歇，皎镜清心颜。空色不映水，秋声多在山。
世人久疏旷，万物皆自闲。白鹭寒更浴，孤云晴未还。
昔时让王者，此地闭玄关。无以躋高步，凄凉岑壑间。

· 全唐诗 ·

卷_6【早发交崖山还太室作】

崔曙

东林气微白，寒鸟急高翔。吾亦自兹去，北山归草堂。
仲冬正三五，日月遥相望。萧萧过颖上，矐矐辨少阳。
川冰生积雪，野火出枯桑。独往路难尽，穷阴人易伤。
伤此无衣客，如何蒙雪霜。

卷_7【奉试明堂火珠】

崔曙

正位开重屋，凌空出火珠。夜来双月满，曙后一星孤。
天净光难灭，云生望欲无。遥知太平代，国宝在名都。

卷_8【途中晓发】

崔曙

晓雾长风里，劳歌赴远期。云轻归海疾，月满下山迟。
旅望因高尽，乡心遇物悲。故林遥不见，况在落花时。

· 全唐诗 ·

卷_9【缙山庙】

崔曙

遗庙宿阴阴，孤峰映绿林。步随仙路远，意入道门深。
涧水流年月，山云变古今。只闻风竹里，犹有凤笙音。

卷_10【同诸公谒启母祠】

崔曙

闕宫凌紫微，芳草闭闲扉。帝子复何在，王孙游不归。
春风鸣玉佩，暮雨拂灵衣。岂但湘江口，能令怀二妃。

卷_11【九日登望仙台，呈刘明府容】

崔曙

汉文皇帝有高台，此日登临曙色开。三晋云山皆北向，
二陵风雨自东来。关门令尹谁能识，河上仙翁去不回。
且欲近寻彭泽宰，陶然共醉菊花杯。

· 全唐诗 ·

卷_12【奉酬中书相公至日圆丘摄事，合于中书后阁宿斋，移止于集贤院，叙怀见寄之作】

崔曙

典籍开书府，恩荣避鼎司。郊丘资有事，斋戒守无为。
宿雾蒙琼树，馀香覆玉墀。进经逢乙夜，展礼值明时。
勋共山河列，名同竹帛垂。年年佐尧舜，相与致雍熙。

卷_13【登水门楼，见亡友张贞期题望黄河诗，因以感兴】

崔曙

吾友东南美，昔闻登此楼。人随川上逝，书向壁中留。
严子好真隐，谢公耽远游。清风初作颂，暇日复销忧。
时与文字古，迹将山水幽。已孤苍生望，空见黄河流。
流落年将晚，悲凉物已秋。天高不可问，掩泣赴行舟。

卷_14【对雨送郑陵】

崔曙

别愁复经雨，别泪还如霰。寄心海上云，千里常相见。

· 全唐诗 ·

卷_15【嵩山寻冯炼师不遇】

崔曙

青溪访道凌烟曙，王子仙成已飞去。
更值空山雷雨时，云林薄暮归何处。

· 全唐诗 ·

第一百五十六卷

卷_1【赠唐祖二子】

王翰

鸿飞遵枉渚，鹿鸣思故群。物情尚劳爱，况乃予别君。
别时花始发，别后兰再薰。瑶觞滋白露，宝瑟凝凉氛。
裴徊北林月，怅望南山云。云月渺千里，音徽不可闻。

卷_2【飞燕篇】

王翰

孝成皇帝本娇奢，行幸平阳公主家。可怜女儿三五许，
丰茸惜是一园花。歌舞向来人不贵，一旦逢君感君意。
君心见赏不见忘，姊妹双飞入紫房。紫房彩女不得见，
专荣固宠昭阳殿。红妆宝镜珊瑚台，青琐银簧云母扇。
日夕风传歌舞声，只扰长信忧人情。长信忧人气欲绝，
君王歌吹终不歇。朝弄琼箫下彩云，夜踏金梯上明月。
明月薄蚀阳精昏，嫉妒倾城惑至尊。已见白虹横紫极，
复闻飞燕啄皇孙。皇孙不死燕啄折，女弟一朝如火绝。

· 全唐诗 ·

明明天子咸戒之，赫赫宗周褒姒灭。古来贤圣叹狐裘，
一国荒淫万国羞。安得上方断马剑，斩取朱门公子头。

卷_3【饮马长城窟行（一作古长城吟）】

王翰

长安少年无远图，一生惟羡执金吾。麒麟前殿拜天子，
走马西击长城胡。胡沙猎猎吹人面，汉虏相逢不相见。
遥闻鼙鼓动地来，传道单于夜犹战。此时顾恩宁顾身，
为君一行摧万人。壮士挥戈回白日，单于溅血染朱轮。
归来饮马长城窟，长城道傍多白骨。问之耆老何代人，
云是秦王筑城卒。黄昏塞北无人烟，鬼哭啾啾声沸天。
无罪见诛功不赏，孤魂流落此城边。当昔秦王按剑起，
诸侯膝行不敢视。富国强兵二十年，筑怨兴徭九千里。
秦王筑城何太愚，天实亡秦非北胡。一朝祸起萧墙内，
渭水咸阳不复都。

卷_4【赋得明星玉女坛，送廉察尉华阴】

王翰

洪河之南曰秦镇，发地削成五千仞。三峰离地皆倚天，
唯独中峰特修峻。上有明星玉女祠，祠坛高眇路逶迤。
三十六梯入河汉，樵人往往见蛾眉。蛾眉婵娟又宜笑，

· 全唐诗 ·

一见樵人下灵庙。仙车欲驾五云飞，香扇斜开九华照。
含情迟伫惜韶年，愿侍君边复中旋。江妃玉佩留为念，
嬴女银箫空自怜。仙俗途殊两情遽，感君无尽辞君去。
遥见明星是妾家，风飘雪散不知处。故人家在西长安，
卖药往来投此山。彩云荡漾不可见，绿萝蒙茸鸟绵蛮。
欲求玉女长生法，日夜烧香应自还。

卷_5【春女行】

王翰

紫台穹跨连绿波，红轩铅匣垂纤罗。中有一人金作面，
隔幌玲珑遥可见。忽闻黄鸟鸣且悲，镜边含笑著春衣。
罗袖婵娟似无力，行拾落花比容色。落花一度无再春，
人生作乐须及辰。君不见楚王台上红颜子，今日皆成
狐兔尘。

卷_6【古蛾眉怨】

王翰

君不见宜春苑中九华殿，飞阁连连直如发。
白日全含朱鸟窗，流云半入苍龙阙。宫中彩女夜无事，
学凤吹箫弄清越。珠帘北卷待凉风，绣户南开向明月。
忽闻天子忆蛾眉，宝凤衔花揲两螭。传声走马开金屋，

· 全唐诗 ·

夹路鸣环上玉墀。长乐彤庭宴华寝，三千美人曳花锦。
灯前含笑更罗衣，帐里承恩荐瑶枕。不意君心半路回，
求仙别作望仙台。琳琅禁闥遥相忆，紫翠岩房昼不开。
欲向人间种桃实，先从海底觅蓬莱。蓬莱可求不可上，
孤舟缥缈知何往。黄金作盘铜作茎，青天白露掌中擎。
王母嫣然感君意，云车羽旆欲相迎。飞廉观前空怨慕，
少君何事须相误。一朝埋没茂陵田，贱妾蛾眉不重顾。
宫车晚出向南山，仙卫逶迤去不还。朝晡泣对麒麟树，
树下苍苔日渐斑。人生百年夜将半，对酒长歌莫长叹。
情知白日不可私，一死一生何足算。

卷_7【子夜春歌】

王翰

春气满林香，春游不可忘。落花吹欲尽，垂柳折还长。
桑女淮南曲，金鞍塞北装。行行小垂手，日暮渭川阳。

卷_8【奉和圣制同二相已下群官乐游园宴】

王翰

未极人心畅，如何帝道明。仍嫌酺宴促，复宠乐游行。
陆海披珍藏，天河直斗城。四关青霭合，数处白云生。
饴饌调元气，歌钟溢雅声。空惭尧舜日，至德杳难名。

· 全唐诗 ·

卷_9【奉和圣制送张说上集贤学士赐宴，得筵字】

王翰

东堂起集贤，贵得从神仙。首命台阶老，将崇御府员。
送人锵玉佩，中使拂琼筵。和乐薰风解，湛恩时雨连。
长材成磊落，短翮强翩跹。徒仰蓬莱地，何阶不让缘。

卷_10【奉和圣制送张尚书巡边】

王翰

紫绶尚书印，朱戟丞相车。登朝身许国，出阊将辞家。
不惮炎蒸苦，亲尝走集谿。选徒军有政，誓卒尔无哗。
帝乐风初起，王城日半斜。宠行流圣作，寅饩照台华。
骑历河南树，旌摇塞北沙。荣怀应尽服，严杀已先加。
业峻灵祇保，功成道路嗟。宁如凿空使，远致石榴花。

卷_11【凉州词二首】

王翰

葡萄美酒夜光杯，欲饮琵琶马上催。
醉卧沙场君莫笑，古来征战几人回。

· 全唐诗 ·

秦中花鸟已应阑，塞外风沙犹自寒。
夜听胡笳折杨柳，教人意气忆长安。

卷_12【春日归思】

王翰

杨柳青青杏发花，年光误客转思家。
不知湖上菱歌女，几个春舟在若耶。

卷_13【观蛮童为伎之作】

王翰

长裙锦带还留客，广额青娥亦效颦。
共惜不成金谷妓，虚令看杀玉车人。

· 全唐诗 ·

第一百五十七卷

卷_1【古别离】

孟云卿

朝日上高台，离人怨秋草。但见万里天，不见万里道。
君行本遥远，苦乐良难保。宿昔梦同衾，忧心常倾倒。
含酸欲谁诉，展转伤怀抱。结发年已迟，征行去何早。
寒暄有时谢，憔悴难再好。人皆算年寿，死者何曾老。
少壮无见期，水深风浩浩。

卷_2【今别离（一作别离曲）】

孟云卿

结发生别离，相思复相保。如何日已久，五变庭中草。
渺渺大海途，悠悠吴江岛。但恐不出门，出门无远道。
远道行既难，家贫衣复单。严风吹积雪，晨起鼻何酸。
人生各有志，岂不怀所安。分明天上日，生死愿同欢。

· 全唐诗 ·

卷_3【悲哉行】

孟云卿

孤儿去慈亲，远客丧主人。莫吟苦辛曲，此曲谁忍闻。
可闻不可说，去去无期别。行人念前程，不待参辰没。
朝亦常苦饥，暮亦常苦饥。飘飘万余里，贫贱多是非。
少年莫远游，远游多不归。

卷_4【行行且游猎篇】

孟云卿

少年多武力，勇气冠幽州。何以纵心赏，马啼春草头。
迟迟平原上，狐兔奔林丘。猛虎忽前逝，俊鹰连下鞲。
俯身逐南北，轻捷固难俦。所发无不中，失之如我雠。
岂唯务驰骋，猗尔暴田畴。残杀非不痛，古来良有由。

卷_5【古挽歌】

孟云卿

草草闾巷喧，涂车俨成位。冥冥何所须，尽我生人意。
北邙路非远，此别终天地。临穴频抚棺，至哀反无泪。

· 全唐诗 ·

尔形未衰老，尔息才童稚。骨肉安可离，皇天若容易。
房帷即灵帐，庭宇为哀次。薤露歌若斯，人生尽如寄。

卷_6【放歌行】

孟云卿

吾观天地图，世界亦可小。落落大海中，飘浮数洲岛。
贤愚与蚁虱，一种同草草。地脉日夜流，天衣有时扫。
东山谒居士，了我生死道。目见难噬脐，心通可亲脑。
轩皇竟磨灭，周孔亦衰老。永谢当时人，吾将宝非宝。

卷_7【伤怀赠故人】

孟云卿

稍稍晨鸟翔，渐渐草上霜。人生早罹苦，寿命恐不长。
二十学已成，三十名不彰。岂无同门友，贵贱易中肠。
驱马行万里，悠悠过帝乡。幸因弦歌末，得上君子堂。
众乐互喧奏，独子备笙簧。坐中无知音，安得神扬扬。
愿因高风起，上感白日光。

· 全唐诗 ·

卷_8【邺城怀古】

孟云卿

朝发淇水南，将寻北燕路。魏家旧城阙，寥落无人住。
伊昔天地屯，曹公独中据。群臣将北面，白日忽西暮。
三台竟寂寞，万事良难固。雄图安在哉，衰草沾霜露。
崔嵬长河北，尚见应刘墓。古树藏龙蛇，荒茅伏狐兔。
永怀故池馆，数子连章句。逸兴驱山河，雄词变云雾。
我行睹遗迹，精爽如可遇。斗酒将酹君，悲风白杨树。

卷_9【伤情】

孟云卿

为长心易忧，早孤意常伤。出门先踌躇，入户亦彷徨。
此生一何苦，前事安可忘。兄弟先我没，孤幼盈我傍。
旧居近东南，河水新为梁。松柏今在兹，安忍思故乡。
四时与日月，万物各有常。秋风已一起，草木无不霜。
行行当自勉，不忍再思量。

卷_10【伤时二首（一作宋郊）】

孟云卿

徘徊宋郊上，不睹平生亲。独立正伤心，悲风来孟津。

· 全唐诗 ·

大方载群物，先死有常伦。虎豹不相食，哀哉人食人。
岂伊逢世运，天道亮云云。

太空流素月，三王何明明。光耀侵白日，贤愚迷至精。
四时更变化，天道有亏盈。常恐今夜没，须臾还复生。

卷_11【田园观雨兼晴后作】

孟云卿

贫贱少情欲，借荒种南陂。我非老农圃，安得良土宜。
秋成不廉俭，岁馀多馁饥。顾视仓廩间，有粮不成炊。
晨登南园上，暮歇清蝉悲。早苗既芄芄，晚田尚离离。
五行孰堪废，万物当及时。贤哉数夫子，开翅慎勿迟。

卷_12【汴河阻风】

孟云卿

清晨自梁宋，挂席之楚荆。出浦风渐恶，傍滩舟欲横。
大河喷东注，群动皆窅冥。白雾鱼龙气，黑云牛马形。
苍茫迷所适，危安惧暂宁。信此天地内，孰为身命轻。
丈夫苟未达，所向须存诚。前路舍舟去，东南仍晓晴。

· 全唐诗 ·

卷_13【行路难】

孟云卿

君不见高山万仞连苍旻，天长地久成埃尘。
君不见长松百尺多劲节，狂风暴雨终摧折。
古今何世无圣贤，吾爱伯阳真乃天。金堂玉阙朝群仙，
拍手东海成桑田。海中之水慎勿枯，乌鸢啄蚌伤明珠。
行路难，艰险莫踟蹰。

卷_14【途中寄友人】

孟云卿

昔时闻远路，谓是等闲行。及到求人地，始知为客情。
事将公道背，尘绕马蹄生。倘使长如此，便堪休去程。

卷_15【寒食】

孟云卿

二月江南花满枝，他乡寒食远堪悲。
贫居往往无烟火，不独明朝为子推。

· 全唐诗 ·

卷_16【新安江上寄处士】

孟云卿

深潭与浅滩，万转出新安。人远禽鱼静，山空水木寒。
啸起青蘋末，吟瞩白云端。即事遂幽赏，何必挂儒冠。

卷_17【句】

孟云卿

群物归大化，六龙颓西荒。（《感怀》）

安知浮云外，日月不运行。（苦雨。见张为《主客图》）

· 全唐诗 ·

第一百五十八卷

卷_1【闻笛】

张巡

岌嶢试一临，虏骑附城阴。不辨风尘色，安知天地心。
营开边月近，战苦阵云深。旦夕更楼上，遥闻横笛音。

卷_2【守睢阳作】

张巡

接战春来苦，孤城日渐危。合围侔月晕，分守若鱼丽。
屡厌黄尘起，时将白羽挥。裹疮犹出阵，饮血更登陴。
忠信应难敌，坚贞谅不移。无人报天子，心计欲何施。

卷_3【题衡阳泗州寺】

张抃

一水悠悠百粤通，片帆无奈信秋风。几层峡浪寒春月，

· 全唐诗 ·

尽日江天雨打篷。漂泊渐摇青草外，乡关谁念雪园东。
未知今夜依何处，一点渔灯出苇丛。

卷_4【古意二首】

贺兰进明

秦庭初指鹿，群盗满山东。忤意皆诛死，所言谁肯忠。
武关犹未启，兵入望夷宫。为崇非泾水，人君道自穷。

崇兰生涧底，香气满幽林。采采欲为赠，何人是同心。
日暮徒盈把，裴回忧思深。慨然纫杂佩，重奏丘中琴。

卷_5【行路难五首】

贺兰进明

君不见岩下井，百尺不及泉。君不见山上苗，
数寸凌云烟。人生赋命亦如此，何苦太息自忧煎。
但愿亲友长含笑，相逢不乏杖头钱。寒夜邀欢须秉烛，
岂得常思花柳年。

君不见门前柳，荣耀暂时萧索久。君不见陌上花，
狂风吹去落谁家。邻家思妇见之叹，蓬首不梳心历乱。
盛年夫婿长别离，岁暮相逢色已换。

· 全唐诗 ·

君不见芳树枝，春花落尽蜂不窥。君不见梁上泥，
秋风始高燕不栖。荡子从军事征战，蛾眉婵娟守空闺。
独宿自然堪下泪，况复时间乌夜啼。

君不见云中月，暂盈还复缺。君不见林下风，
声远意难穷。亲故平生或聚散，欢娱未尽尊酒空。
叹息青青陵上柏，岁寒能有几人同。

君不见东流水，一去无穷已。君不见西郊云，
日夕空氛氲。群雁裴回不能去，一雁悲鸣复失群。
人生结交在终始，莫以升沈中路分。

卷_6【夜渡江】

阎丘晓

舟人自相报，落日下芳潭。夜火连淮市，春风满客帆。
水穷沧海畔，路尽小山南。且喜乡园近，言荣意未甘。

卷_7【奉和刘采访缙云南岭作】

庾光先

百越城池枕海圻，永嘉山水复相依。悬萝弱筱垂清浅，
宿雨朝暾和翠微。鸟讶山经传不尽，花随月令数仍稀。

· 全唐诗 ·

幸陪谢客题诗句，谁与王孙此地归。

卷_8【思归寄东林澈上人】

韦丹

王事纷纷无暇日，浮生冉冉只如云。
已为平子归休计，五老岩前必共闻。

卷_9【答澈公】

韦丹

空山泉落松窗静，闲地草生春日迟。
白发渐多身未退，依依常在永禅师。

卷_10【洛出书】

萧昕

海内昔凋瘵，天网斯淳漓。龟灵启圣图，龙马负书出。
大哉明德盛，远矣彝伦秩。地敷作义功，人免为鱼恤。
既彰千国理，岂止百川溢。永赖至于今，畴庸未云毕。

· 全唐诗 ·

卷_11【临风舒锦】

萧昕

丽锦匹云终，檐檐展向风。花开翻覆翠，色乱动摇红。
缕散悠扬里，文回照灼中。低垂疑步障，吹起作晴虹。
既与丘迟梦，深知卓氏功。还乡将制服，从此表亨通。

卷_12【东皇太一词】

李希仲

吉日初斋戒，灵巫穆上皇。焚香布瑶席，鸣佩奠椒浆。
缓舞花飞满，清歌水去长。回波送神曲，云雨满潇湘。

卷_13【蓟北行二首】

李希仲

旄头有精芒，胡骑猎秋草。羽檄南渡河，边庭用兵早。
汉家爱征战，宿将今已老。辛苦羽林儿，从戎榆关道。

一身救边速，烽火通蓟门。前军飞鸟断，格斗尘沙昏。
寒日鼓声急，单于夜将奔。当须徇忠义，身死报国恩。

· 全唐诗 ·

卷_14【送妻】

杨志坚

平生志业在琴诗，头上如今有二丝。渔父尚知溪谷暗，
山妻不信出身迟。荆钗任意撩新鬓，明镜从他别画眉。
今日便同行路客，相逢即是下山时。

· 全唐诗 ·

第一百五十九卷

卷_1【从张丞相游南纪城猎，戏赠裴迪张参军】

孟浩然

从禽非吾乐，不好云梦田。岁暮登城望，偏令乡思悬。
公卿有几几，车骑何翩翩。世禄金张贵，官曹幕府贤。
顺时行杀气，飞刃争割鲜。十里届宾馆，征声匝妓筵。
高标回落日，平楚散芳烟。何意狂歌客，从公亦在旃。

卷_2【登江中孤屿，赠白云先生王迥】

孟浩然

悠悠清江水，水落沙屿出。回潭石下深，绿筱岸傍密。
鲛人潜不见，渔父歌自逸。忆与君别时，泛舟如昨日。
夕阳开返照，中坐兴非一。南望鹿门山，归来恨如失。

· 全唐诗 ·

卷_3【晚春卧病寄张八】

孟浩然

南陌春将晚，北窗犹卧病。林园久不游，草木一何盛。
狭逢花障迷，闲庭竹扫净。翠羽戏兰苔，赭鳞动荷柄。
念我平生好，江乡远从政。云山阻梦思，衾枕劳歌咏。
歌咏复何为，同心恨别离。世途皆自媚，流俗寡相知。
贾谊才空逸，安仁鬓欲丝。遥情每东注，奔晷复西驰。
常恐填沟壑，无由振羽仪。穷通若有命，欲向论中推。

卷_4【秋登兰山寄张五】

孟浩然

北山白云里，隐者自怡悦。相望试登高，心飞逐鸟灭。
愁因薄暮起，兴是清秋发。时见归村人，沙行渡头歇。
天边树若荠，江畔舟如月。何当载酒来，共醉重阳节。

卷_5【入峡寄弟】

孟浩然

吾昔与尔辈，读书常闭门。未尝冒湍险，岂顾垂堂言。

· 全唐诗 ·

自此历江湖，辛勤难具论。往来行旅弊，开凿禹功存。
壁立千峰峻，潏流万壑奔。我来凡几宿，无夕不闻猿。
浦上摇归恋，舟中失梦魂。泪沾明月峡，心断鹧鸪原。
离阔星难聚，秋深露已繁。因君下南楚，书此示乡园。

卷_6【湖中旅泊，寄阎九司户防】

孟浩然

桂水通百越，扁舟期晓发。荆云蔽三巴，夕望不见家。
襄王梦行雨，才子谪长沙。长沙饶瘴疠，胡为苦留滞。
久别思款颜，承欢怀接袂。接袂杳无由，徒增旅泊愁。
清猿不可听，沿月下湘流。

卷_7【大堤行寄万七】

孟浩然

大堤行乐处，车马相驰突。岁岁春草生，踏青二三月。
王孙挟珠弹，游女矜罗袜。携手今莫同，江花为谁发。

· 全唐诗 ·

卷_8【仲夏归汉南园，寄京邑耆旧】

孟浩然

尝读高士传，最嘉陶征君。日耽田园趣，自谓羲皇人。
予复何为者，栖栖徒问津。中年废丘壑，上国旅风尘。
忠欲事明主，孝思侍老亲。归来当炎夏，耕稼不及春。
扇枕北窗下，采芝南涧滨。因声谢同列，吾慕颍阳真。

卷_9【题云门山，寄越府包户曹、徐起居】

孟浩然

我行适诸越，梦寐怀所欢。久负独往愿，今来恣游盘。
台岭践磴石，耶溪溯林湍。舍舟入香界，登阁憩旃檀。
晴山秦望近，春水镜湖宽。远怀伫应接，卑位徒劳安。
白云日夕滞，沧海去来观。故国眇天末，良朋在朝端。
迟尔同携手，何时方挂冠。

卷_10【宿扬子津，寄润州长山刘隐士】

孟浩然

所思在建业，欲往大江深。日夕望京口，烟波愁我心。

· 全唐诗 ·

心驰茅山洞，目极枫树林。不见少微星，星霜劳夜吟。

卷_11【书怀贻京邑同好】

孟浩然

维先自邹鲁，家世重儒风。诗礼袭遗训，趋庭沾末躬。
昼夜常自强，词翰颇亦工。三十既成立，嗟吁命不通。
慈亲向羸老，喜惧在深衷。甘脆朝不足，箪瓢夕屡空。
执鞭慕夫子，捧檄怀毛公。感激遂弹冠，安能守固穷。
当途诉知己，投刺匪求蒙。秦楚邈离异，翻飞何日同。

卷_12【还山贻湛法师】

孟浩然

幼闻无生理，常欲观此身。心迹罕兼遂，崎岖多在尘。
晚途归旧壑，偶与支公邻。导以微妙法，结为清净因。
烦恼业顿舍，山林情转殷。朝来问疑义，夕话得清真。
墨妙称古绝，词华惊世人。禅房闭虚静，花药连冬春。
平石藉琴砚，落泉洒衣巾。欲知冥灭意，朝夕海鸥驯。

· 全唐诗 ·

卷_13【夏日南亭怀辛大】

孟浩然

山光忽西落，池月渐东上。散发乘夕凉，开轩卧闲敞。
荷风送香气，竹露滴清响。欲取鸣琴弹，恨无知音赏。
感此怀故人，中宵劳梦想。

卷_14【秋宵月下有怀】

孟浩然

秋空明月悬，光彩露沾湿。惊鹊栖未定，飞萤卷帘入。
庭槐寒影疏，邻杵夜声急。佳期旷何许，望望空伫立。

卷_15【将适天台，留别临安李主簿】

孟浩然

枳棘君尚栖，匏瓜吾岂系。念离当夏首，漂泊指炎裔。
江海非堕游，田园失归计。定山既早发，渔浦亦宵济。
泛泛随波澜，行行任舳舻。故林日已远，群木坐成翳。
羽人在丹丘，吾亦从此逝。

· 全唐诗 ·

卷_16【送丁大凤进士赴举，呈张九龄】

孟浩然

吾观鸛鷟赋，君负王佐才。惜无金张援，十上空归来。
弃置乡园老，翻飞羽翼摧。故人今在位，岐路莫迟回。

卷_17【送吴悦游韶阳】

孟浩然

五色怜凤雏，南飞适鸛鵒。楚人不相识，何处求椅梧。
去去日千里，茫茫天一隅。安能与斥鷃，决起但枪榆。

卷_18【适越留别谯县张主簿、申屠少府】

孟浩然

朝乘汴河流，夕次谯县界。幸值西风吹，得与故人会。
君学梅福隐，余从伯鸾迈。别后能相思，浮云在吴会。

· 全唐诗 ·

卷_19【送陈七赴西军】

孟浩然

吾观非常者，碌碌在目前。君负鸿鹄志，蹉跎书剑年。
一闻边烽动，万里忽争先。余亦赴京国，何当献凯还。

卷_20【送从弟邕下第后寻会稽】

孟浩然

疾风吹征帆，倏尔向空没。千里在俄顷，三江坐超忽。
向来共欢娱，日夕成楚越。落羽更分飞，谁能不惊骨。

卷_21【送辛大之鄂渚不及】

孟浩然

送君不相见，日暮独愁绪。江上空裴回，天边迷处所。
郡邑经樊邓，山河入嵩汝。蒲轮去渐遥，石径徒延伫。

· 全唐诗 ·

卷_22【江上别流人】

孟浩然

以我越乡客，逢君谪居者。分飞黄鹤楼，流落苍梧野。
驿使乘云去，征帆沿溜下。不知从此分，还袂何时把。

卷_23【宴包二融宅】

孟浩然

闲居枕清洛，左右接大野。门庭无杂宾，车辙多长者。
是时方盛夏，风物自潇洒。五日休沐归，相携竹林下。
开襟成欢趣，对酒不能罢。烟暝栖鸟迷，余将归白社。

卷_24【与王昌龄宴王道士房】

孟浩然

归来卧青山，常梦游清都。漆园有傲吏，惠好在招呼。
书幌神仙篆，画屏山海图。酌霞复对此，宛似入蓬壶。

· 全唐诗 ·

卷_25【襄阳公宅饮】

孟浩然

窈窕夕阳佳，丰茸春色好。欲觅淹留处，无过狭斜道。
绮席卷龙须，香杯浮玛瑙。北林积修树，南池生别岛。
手拨金翠花，心迷玉红草。谈笑光六义，发论明三倒。
座非陈子惊，门还魏公扫。荣辱应无间，欢娱当共保。

卷_26【寻香山湛上人】

孟浩然

朝游访名山，山远在空翠。氛氲亘百里，日入行始至。
杖策寻故人，解鞭暂停骑。石门殊豁险，篁径转森邃。
法侣欣相逢，清谈晓不寐。平生慕真隐，累日探奇异。
野老朝入田，山僧暮归寺。松泉多逸响，苔壁饶古意。
谷口闻钟声，林端识香气。愿言投此山，身世两相弃。

卷_27【云门寺西六七里，闻符公兰若最幽，与薛八同往】

孟浩然

谓予独迷方，逢子亦在野。结交指松柏，问法寻兰若。

· 全唐诗 ·

小溪劣容舟，怪石屡惊马。所居最幽绝，所住皆静者。
云簇兴座隅，天空落阶下。上人亦何闻，尘念都已舍。
四禅合真如，一切是虚假。愿承甘露润，喜得惠风洒。
依止托山门，谁能效丘也。

卷_28【宿天台桐柏观】

孟浩然

海行信风帆，夕宿逗云岛。缅寻沧洲趣，近爱赤城好。
扪萝亦践苔，辍棹恣探讨。息阴憩桐柏，采秀弄芝草。
鹤唳清露垂，鸡鸣信潮早。愿言解缨绂，从此去烦恼。
高步凌四明，玄踪得三老。纷吾远游意，学彼长生道。
日夕望三山，云涛空浩浩。

卷_29【岷潭作】

孟浩然

石潭傍隈隩，沙岸晓夤缘。试垂竹竿钓，果得槎头鳊。
美人骋金错，纤手脍红鲜。因谢陆内史，莼羹何足传。

· 全唐诗 ·

卷_30【题终南翠微寺空上人房】

孟浩然

翠微终南里，雨后宜返照。闭关久沈冥，杖策一登眺。
遂造幽人室，始知静者妙。儒道虽异门，云林颇同调。
两心相喜得，毕景共谈笑。暝还高窗眠，时见远山烧。
缅怀赤城标，更忆临海峤。风泉有清音，何必苏门啸。

卷_31【初春汉中漾舟】

孟浩然

羊公岷山下，神女汉皋曲。雪罢冰复开，春潭千丈绿。
轻舟恣来往，探玩无厌足。波影摇妓钗，沙光逐人目。
倾杯鱼鸟醉，联句莺花续。良会难再逢，日入须秉烛。

卷_32【宿业师山房，期丁大不至】

孟浩然

夕阳度西岭，群壑倏已暝。松月生夜凉，风泉满清听。
樵人归欲尽，烟鸟栖初定。之子期宿来，孤琴候萝径。

· 全唐诗 ·

卷_33【耶溪泛舟】

孟浩然

落景馀清辉，轻桡弄溪渚。澄明爱水物，临泛何容与。
白首垂钓翁，新妆浣纱女。相看似相识，脉脉不得语。

卷_34【彭蠡湖中望庐山】

孟浩然

太虚生月晕，舟子知天风。挂席候明发，眇漫平湖中。
中流见匡阜，势压九江雄。黯黯容雾色，崢嶸当晓空。
香炉初上日，瀑布喷成虹。久欲追尚子，况兹怀远公。
我来限于役，未暇息微躬。淮海途将半，星霜岁欲穷。
寄言岩栖者，毕趣当来同。

卷_35【登鹿门山】

孟浩然

清晓因兴来，乘流越江岷。沙禽近方识，浦树遥莫辨。
渐至鹿门山，山明翠微浅。岩潭多屈曲，舟楫屡回转。
昔闻庞德公，采药遂不返。金涧饵芝朮，石床卧苔藓。

· 全唐诗 ·

纷吾感耆旧，结揽事攀践。隐迹今尚存，高风邈已远。
白云何时去，丹桂空偃蹇。探讨意未穷，回艇夕阳晚。

卷_36【游明禅师西兰若】

孟浩然

西山多奇状，秀出倚前楹。停午收彩翠，夕阳照分明。
吾师住其下，禅坐证无生。结庐就嵌窟，剪茗通往行。
谈空对樵叟，授法与山精。日暮方辞去，田园归冶城。

卷_37【登望楚山最高顶】

孟浩然

山水观形胜，襄阳美会稽。最高唯望楚，曾未一攀跻。
石壁疑削成，众山比全低。晴明试登陟，目极无端倪。
云梦掌中小，武陵花处迷。暝还归骑下，萝月映深溪。

卷_38【疾愈过龙泉寺精舍，呈易、业二公】

孟浩然

停午闻山钟，起行散愁疾。寻林采芝去，转谷松翠密。

· 全唐诗 ·

傍见精舍开，长廊饭僧毕。石渠流雪水，金子耀霜橘。
竹房思旧游，过憩终永日。入洞窥石髓，傍崖采蜂蜜。
日暮辞远公，虎溪相送出。

卷_39【万山潭作】

孟浩然

垂钓坐盘石，水清心亦闲。鱼行潭树下，猿挂岛藤间。
游女昔解佩，传闻于此山。求之不可得，沿月棹歌还。

卷_40【与黄侍御北津泛舟】

孟浩然

津无蛟龙患，日夕常安流。本欲避骢马，何如同鷁舟。
岂伊今日幸，曾是昔年游。莫奏琴中鹤，且随波上鸥。
堤缘九里郭，山面百城楼。自顾躬耕者，才非管乐俦。
闻君荐草泽，从此泛沧洲。

卷_41【洗然弟竹亭】

孟浩然

吾与二三子，平生结交深。俱怀鸿鹄志，昔有鹓鷖心。

· 全唐诗 ·

逸气假毫翰，清风在竹林。达是酒中趣，琴上偶然音。

卷_42【山中逢道士云公】

孟浩然

春馀草木繁，耕种满田园。酌酒聊自劝，农夫安与言。
忽闻荆山子，时出桃花源。采樵过北谷，卖药来西村。
村烟日云夕，榛路有归客。杖策前相逢，依然是畴昔。
邂逅欢觐止，殷勤叙离隔。谓予搏扶桑，轻举振六翮。
奈何偶昌运，独见遗草泽。既笑接舆狂，仍怜孔丘厄。
物情趋势利，吾道贵闲寂。偃息西山下，门庭罕人迹。
何时还清溪，从尔炼丹液。

卷_43【越中逢天台太乙子】

孟浩然

仙穴逢羽人，停舫向前拜。问余涉风水，何处远行迈。
登陆寻天台，顺流下吴会。兹山夙所尚，安得问灵怪。
上逼青天高，俯临沧海大。鸡鸣见日出，常觐仙人旆。
往来赤城中，逍遥白云外。莓苔异人间，瀑布当空界。
福庭长自然，华顶旧称最。永此从之游，何当济所届。

· 全唐诗 ·

卷_44【家园卧疾，毕太祝曜见寻】

孟浩然

伏枕旧游旷，笙簧劳梦思。平生重交结，迨此令人疑。
冰室无暖气，炎云空赫曦。隙驹不暂驻，日听凉蝉悲。
壮图哀未立，斑白恨吾衰。夫子自南楚，缅怀嵩汝期。
顾予衡茅下，兼致稟物资。脱分趋庭礼，殷勤伐木诗。
脱君车前鞅，设我园中葵。斗酒须寒兴，明朝难重持。

卷_45【白云先生王迥见访】

孟浩然

闲归日无事，云卧昼不起。有客款柴扉，白云巢居子。
居闲好芝朮，采药来城市。家在鹿门山，常游涧泽水。
手持白羽扇，脚步青芒履。闻道鹤书征，临流还洗耳。

卷_46【田园作】

孟浩然

弊庐隔尘喧，惟先养恬素。卜邻近三径，植果盈千树。
粤余任推迁，三十犹未遇。书剑时将晚，丘园日已暮。

· 全唐诗 ·

晨兴自多怀，昼坐常寡悟。冲天羡鸿鹄，争食羞鸡鹜。
望断金马门，劳歌采樵路。乡曲无知己，朝端乏亲故。
谁能为扬雄，一荐甘泉赋。

卷_47【采樵作】

孟浩然

采樵人深山，山深树重叠。桥崩卧槎拥，路险垂藤接。
日落伴将稀，山风拂萝衣。长歌负轻策，平野望烟归。

卷_48【自浔阳泛舟经明海】

孟浩然

大江分九流，淼淼成水乡。舟子乘利涉，往来至浔阳。
因之泛五湖，流浪经三湘。观涛壮枚发，吊屈痛沉湘。
魏阙心恒在，金门诏不忘。遥怜上林雁，冰泮也回翔。

卷_49【早发渔浦潭】

孟浩然

东旭早光芒，渚禽已惊聒。卧闻渔浦口，桡声暗相拨。

· 全唐诗 ·

日出气象分，始知江湖阔。美人常晏起，照影弄流沫。
饮水畏惊猿，祭鱼时见獭。舟行自无闷，况值晴景豁。

卷_50【经七里滩】

孟浩然

予奉垂堂诫，千金非所轻。为多山水乐，频作泛舟行。
五岳追向子，三湘吊屈平。湖经洞庭阔，江入新安清。
复闻严陵濑，乃在兹湍路。叠障数百里，沿洄非一趣。
彩翠相氛氲，别流乱奔注。钓矶平可坐，苔磴滑难步。
猿饮石下潭，鸟还日边树。观奇恨来晚，倚棹惜将暮。
挥手弄潺湲，从兹洗尘虑。

卷_51【岁暮海上作】

孟浩然

仲尼既云歿，余亦浮于海。昏见斗柄回，方知岁星改。
虚舟任所适，垂钓非有待。为问乘槎人，沧洲复谁在。

· 全唐诗 ·

卷_52【南归阻雪】

孟浩然

我行滞宛许，日夕望京豫。旷野莽茫茫，乡山在何处。
孤烟村际起，归雁天边去。积雪覆平皋，饥鹰捉寒兔。
少年弄文墨，属意在章句。十上耻还家，裴回守归路。

卷_53【听郑五愔弹琴】

孟浩然

阮籍推名饮，清风满竹林。半酣下衫袖，拂拭龙唇琴。
一杯弹一曲，不觉夕阳沉。予意在山水，闻之谐夙心。

卷_54【同张明府清镜叹】

孟浩然

妾有盘龙镜，清光常昼发。自从生尘埃，有若雾中月。
愁来试取照，坐叹生白发。寄语边塞人，如何久离别。

· 全唐诗 ·

卷_55【庭橘】

孟浩然

明发览群物，万木何阴森。凝霜渐渐水，庭橘似悬金。
女伴争攀摘，摘窥碍叶深。并生怜共蒂，相示感同心。
骨刺红罗被，香黏翠羽簪。擎来玉盘里，全胜在幽林。

卷_56【早梅】

孟浩然

园中有早梅，年例犯寒开。少妇曾攀折，将归插镜台。
犹言看不足，更欲剪刀裁。

卷_57【清明即事】

孟浩然

帝里重清明，人心自愁思。车声上路合，柳色东城翠。
花落草齐生，莺飞蝶双戏。空堂坐相忆，酌茗聊代醉。

· 全唐诗 ·

卷_58【和卢明府送郑十三还京兼寄之什】

孟浩然

昔时风景登临地，今日衣冠送别筵。醉坐自倾彭泽酒，
思归长望白云天。洞庭一叶惊秋早，瀟落空嗟滞江岛。
寄语朝廷当世人，何时重见长安道。

卷_59【高阳池送朱二】

孟浩然

当昔襄阳雄盛时，山公常醉习家池。池边钓女日相随，
妆成照影竞来窥。澄波澹澹芙蓉发，绿岸毵毵杨柳垂。
一朝物变人亦非，四面荒凉人径稀。意气豪华何处在，
空馀草露湿罗衣。此地朝来饯行者，翻向此中牧征马。
征马分飞日渐斜，见此空为人所嗟。殷勤为访桃源路，
予亦归来松子家。

卷_60【鸚鵡洲送王九之江左】

孟浩然

昔登江上黄鹤楼，遥爱江中鸚鵡洲。洲势逶迤绕碧流，

· 全唐诗 ·

鸳鸯鸂鶒满滩头。滩头日落沙碛长，金沙熠熠动飙光。
舟人牵锦缆，浣女结罗裳。月明全见芦花白，
风起遥闻杜若香。君行采采莫相忘。

卷_61【送王七尉松滋，得阳台云】

孟浩然

君不见巫山神女作行云，霏红沓翠晓氛氲。
婵娟流入楚王梦，倏忽还随零雨分。空中飞去复飞来，
朝朝暮暮下阳台。愁君此去为仙尉，便逐行云去不回。

卷_62【夜归鹿门山歌】

孟浩然

山寺钟鸣昼已昏，渔梁渡头争渡喧。人随沙路向江村，
余亦乘舟归鹿门。鹿门月照开烟树，忽到庞公栖隐处。
岩扉松径长寂寥，惟有幽人夜来去。

卷_63【长乐宫】

孟浩然

秦城旧来称窈窕，汉家更衣应不少。红粉邀君在何处，

· 全唐诗 ·

青楼苦夜长难晓。长乐宫中钟暗来，可怜歌舞惯相催。
欢娱此事今寂寞，惟有年年陵树哀。

卷_64【示孟郊】

孟浩然

蔓草蔽极野，兰芝结孤根。众音何其繁，伯牙独不喧。
当时高深意，举世无能分。钟期一见知，山水千秋闻。
尔其保静节，薄俗徒云云。

· 全唐诗 ·

第一百六十卷

卷_1【和张丞相春朝对雪】

孟浩然

迎气当春至，承恩喜雪来。润从河汉下，花逼艳阳开。
不睹丰年瑞，焉知燮理才。撒盐如可拟，愿糝和羹梅。

卷_2【和张明府登鹿门作】

孟浩然

忽示登高作，能宽旅寓情。弦歌既多暇，山水思微清。
草得风光动，虹因雨气成。谬承巴里和，非敢应同声。

卷_3【和张二自穰县还途中遇雪】

孟浩然

风吹沙海雪，渐作柳园春。宛转随香骑，轻盈伴玉人。

· 全唐诗 ·

歌疑郢中客，态比洛川神。今日南归楚，双飞似入秦。

卷_4【和贾主簿并九日登岷山】

孟浩然

楚万重阳日，群公赏宴来。共乘休沐暇，同醉菊花杯。
逸思高秋发，欢情落景催。国人咸寡和，遥愧洛阳才。

卷_5【望洞庭湖，赠张丞相（一作临洞庭）】

孟浩然

八月湖水平，涵虚混太清。气蒸云梦泽，波撼岳阳城。
欲济无舟楫，端居耻圣明。坐观垂钓者，空有羡鱼情。

卷_6【赠道士参寥】

孟浩然

蜀琴久不弄，玉匣细尘生。丝脆弦将断，金徽色尚荣。
知音徒自惜，聒俗本相轻。不遇钟期听，谁知鸾凤声。

· 全唐诗 ·

卷_7【京还赠张（一作王）维】

孟浩然

拂衣何处去，高枕南山南。欲徇五斗禄，其如七不堪。
早朝非晚起，束带异抽簪。因向智者说，游鱼思旧潭。

卷_8【题李十四庄，兼赠綦毋校书】

孟浩然

闻君息阴地，东郭柳林间。左右瀍涧水，门庭缑氏山。
抱琴来取醉，垂钓坐乘闲。归客莫相待，寻源殊未还。

卷_9【九日龙沙作，寄刘大昉虚】

孟浩然

龙沙豫章北，九日挂帆过。风俗因时见，湖山发兴多。
客中谁送酒，棹里自成歌。歌竟乘流去，滔滔任夕波。

· 全唐诗 ·

卷_10【寄赵正字】

孟浩然

正字芸香阁，幽人竹素园。经过宛如昨，归卧寂无喧。
高鸟能择木，羝羊漫触藩。物情今已见，从此愿忘言。

卷_11【洞庭湖寄阎九】

孟浩然

洞庭秋正阔，余欲泛归船。莫辨荆吴地，唯馀水共天。
渺瀰江树没，合沓海潮连。迟尔为舟楫，相将济巨川。

卷_12【秦中感秋，寄远上人（一作崔国辅诗）】

孟浩然

一丘常欲卧，三径苦无资。北土非吾愿，东林怀我师。
黄金然桂尽，壮志逐年衰。日夕凉风至，闻蝉但益悲。

· 全唐诗 ·

卷_13【宿永嘉江，寄山阴崔少府国辅】

孟浩然

我行穷水国，君使入京华。相去日千里，孤帆天一涯。
卧闻海潮至，起视江月斜。借问同舟客，何时到永嘉。

卷_14【上巳洛中寄王九迥（一作王迥十九）】

孟浩然

卜洛成周地，浮杯上巳筵。斗鸡寒食下，走马射堂前。
垂柳金堤合，平沙翠幕连。不知王逸少，何处会群贤。

卷_15【闻裴侍御朐自襄州司户除豫州司户，因以投寄】

孟浩然

故人荆府掾，尚有柏台威。移职自樊衍，芳声闻帝畿。
昔余卧林巷，载酒过柴扉。松菊无时赏，乡园欲懒归。

· 全唐诗 ·

卷_16【江上寄山阴崔少府国辅】

孟浩然

春堤杨柳发，忆与故人期。草木本无意，荣枯自有时。
山阴定远近，江上日相思。不及兰亭会，空吟祓禊诗。

卷_17【夜泊庐江，闻故人在东寺，以诗寄之】

孟浩然

江路经庐阜，松门入虎溪。闻君寻寂乐，清夜宿招提。
石镜山精怯，禅枝怖鸽栖。一灯如悟道，为照客心迷。

卷_18【宿桐庐江，寄广陵旧游】

孟浩然

山暝闻猿愁，沧江急夜流。风鸣两岸叶，月照一孤舟。
建德非吾土，维扬忆旧游。还将两行泪，遥寄海西头。

· 全唐诗 ·

卷_19【南还舟中寄袁太祝】

孟浩然

沿溯非便习，风波厌苦辛。忽闻迁谷鸟，来报五陵春。
岭北回征帆，巴东问故人。桃源何处是，游子正迷津。

卷_20【东陂遇雨，率尔贻谢南池】

孟浩然

田家春事起，丁壮就东陂。殷殷雷声作，森森雨足垂。
海虹晴始见，河柳润初移。予意在耕凿，因君问土宜。

卷_21【行至汝坟寄卢征君】

孟浩然

行乏憩予驾，依然见汝坟。洛川方罢雪，嵩嶂有残云。
曳曳半空里，明明五色分。聊题一时兴，因寄卢征君。

· 全唐诗 ·

卷_22【寄天台道士】

孟浩然

海上求仙客，三山望几时。焚香宿华顶，裊露采灵芝。
屡蹑莓苔滑，将寻汗漫期。倘因松子去，长与世人辞。

卷_23【唐城馆中早发，寄杨使君】

孟浩然

犯霜驱晓驾，数里见唐城。旅馆归心逼，荒村客思盈。
访人留后信，策蹇赴前程。欲识离魂断，长空听雁声。

卷_24【涧南即事，贻皎上人】

孟浩然

弊庐在郭外，素产惟田园。左右林野旷，不闻朝市喧。
钓竿垂北涧，樵唱入南轩。书取幽栖事，将寻静者论。

· 全唐诗 ·

卷_25【重酬李少府见赠】

孟浩然

养疾衡檐下，由来浩气真。五行将禁火，十步任寻春。
致敬惟桑梓，邀欢即主人。回看后凋色，青翠有松筠。

卷_26【九日怀襄阳】

孟浩然

去国似如昨，倏然经杪秋。岷山不可见，风景令人愁。
谁采篱下菊，应闲池上楼。宜城多美酒，归与葛强游。

卷_27【初出关旅亭夜坐，怀王大校书】

孟浩然

向夕槐烟起，葱茏池馆曛。客中无偶坐，关外惜离群。
烛至萤光灭，荷枯雨滴闻。永怀芸阁友，寂寞滞扬云。

· 全唐诗 ·

卷_28【人日登南阳驿门亭子，怀汉川诸友】

孟浩然

朝来登陟处，不似艳阳时。异县殊风物，羁怀多所思。
剪花惊岁早，看柳讶春迟。未有南飞雁，裁书欲寄谁。

卷_29【早寒江上有怀（一作江上思归）】

孟浩然

木落雁南度，北风江上寒。我家襄水上，遥隔楚云端。
乡泪客中尽，孤帆天际看。迷津欲有问，平海夕漫漫。

卷_30【闲园怀苏子】

孟浩然

林园虽少事，幽独自多违。向夕开帘坐，庭阴落景微。
鸟过烟树宿，萤傍水轩飞。感念同怀子，京华去不归。

· 全唐诗 ·

卷_31【同卢明府饯张郎中除义王府司马海园作】

孟浩然

上国山河列，贤王邸第开。故人分职去，潘令宠行来。
冠盖趋梁苑，江湖失楚材。豫愁轩骑动，宾客散池台。

卷_32【送张子容进士赴举】

孟浩然

夕曛山照灭，送客出柴门。惆怅野中别，殷勤岐路言。
茂林予偃息，乔木尔飞翻。无使谷风诮，须令友道存。

卷_33【送张参明经举，兼向泾州觐省】

孟浩然

十五彩衣年，承欢慈母前。孝廉因岁贡，怀橘向秦川。
四座推文举，中郎许仲宣。泛舟江上别，谁不仰神仙。

· 全唐诗 ·

卷_34【送张祥之房陵】

孟浩然

我家南渡头，惯习野人舟。日夕弄清浅，林湍逆上流。
山河据形胜，天地生豪酋。君意在利往，知音期自投。

卷_35【送吴宣从事（一作送苏六从军）】

孟浩然

才有幕中士，宁无塞上勋。汉兵将灭虏，王粲始从军。
旌旆边庭去，山川地脉分。平生一匕首，感激赠夫君。

卷_36【送桓子之郢成礼】

孟浩然

闻君驰彩骑，躞蹀指南荆。为结潘杨好，言过鄢郢城。
漂梅诗有赠，羔雁礼将行。今夜神仙女，应来感梦情。

· 全唐诗 ·

卷_37【留别王侍御维】

孟浩然

寂寂竟何待，朝朝空自归。欲寻芳草去，惜与故人违。
当路谁相假，知音世所稀。只应守寂寞，还掩故园扉。

卷_38【早春润州送从弟还乡】

孟浩然

兄弟游吴国，庭闱恋楚关。已多新岁感，更饯白眉还。
归泛西江水，离筵北固山。乡园欲有赠，梅柳著先攀。

卷_39【岷山饯房琯、崔宗之】

孟浩然

贵贱平生隔，轩车是日来。青阳一觐止，云路豁然开。
祖道衣冠列，分亭驿骑催。方期九日聚，还待二星回。

· 全唐诗 ·

卷_40【送谢录事之越】

孟浩然

清旦江天迥，凉风西北吹。白云向吴会，征帆亦相随。
想到耶溪日，应探禹穴奇。仙书倘相示，予在此山陲。

卷_41【洛中送奚三还扬州】

孟浩然

水国无际，舟行共使风。羡君从此去，朝夕见乡中。
予亦离家久，南归恨不同。音书若有问，江上会相逢。

卷_42【送告八从军】

孟浩然

男儿一片气，何必五车书。好勇方过我，多才便起予。
运筹将入幕，养拙就闲居。正待功名遂，从君继两疏。

· 全唐诗 ·

卷_43【送元公之鄂渚，寻观主张骖鸾】

孟浩然

桃花春水涨，之子忽乘流。岘首辞蛟浦，江中问鹤楼。
赠君青竹杖，送尔白蘋洲。应是神仙子，相期汗漫游。

卷_44【送王五昆季省覲】

孟浩然

公子恋庭闱，劳歌涉海涯。水乘舟楫去，亲望老莱归。
斜日催乌鸟，清江照彩衣。平生急难意，遥仰鹄鸱飞。

卷_45【送崔遏】

孟浩然

片玉来夸楚，治中作主人。江山增润色，词赋动阳春。
别馆当虚敞，离情任吐伸。因声两京旧，谁念卧漳滨。

· 全唐诗 ·

卷_46【送卢少府使入秦】

孟浩然

楚关望秦国，相去千里馀。州县勤王事，山河转使车。
祖筵江上列，离恨别前书。愿及芳年赏，娇莺二月初。

卷_47【送袁十岭南寻弟】

孟浩然

早闻牛渚咏，今见鹄鵠心。羽翼嗟零落，悲鸣别故林。
苍梧白云远，烟水洞庭深。万里独飞去，南风迟尔音。

卷_48【永嘉别张子容】

孟浩然

旧国余归楚，新年子北征。挂帆愁海路，分手恋朋情。
日夕故园意，汀洲春草生。何时一杯酒，重与季鹰倾。

· 全唐诗 ·

卷_49【东京留别诸公（一题作京还别新丰诸友）】

孟浩然

吾道昧所适，驱车还向东。主人开旧馆，留客醉新丰。
树绕温泉绿，尘遮晚日红。拂衣从此去，高步蹑华嵩。

卷_50【送袁太祝尉豫章】

孟浩然

何幸遇休明，观光来上京。相逢武陵客，独送豫章行。
随牒牵黄绶，离群会墨卿。江南佳丽地，山水旧难名。

卷_51【都下送辛大之鄂】

孟浩然

南国辛居士，言归旧竹林。未逢调鼎用，徒有济川心。
予亦忘机者，田园在汉阴。因君故乡去，遥寄式微吟。

· 全唐诗 ·

卷_52【送席大】

孟浩然

惜尔怀其宝，迷邦倦客游。江山历全楚，河洛越成周。
道路疲千里，乡园老一丘。知君命不偶，同病亦同忧。

卷_53【送贾升主簿之荆府】

孟浩然

奉使推能者，勤王不暂闲。观风随按察，乘骑度荆关。
送别登何处，开筵旧岷山。征轩明日远，空望郢门间。

卷_54【送王大校书】

孟浩然

导漾自嶓冢，东流为汉川。维桑君有意，解缆我开筵。
云雨从兹别，林端意渺然。尺书能不吝，时望鲤鱼传。

· 全唐诗 ·

卷_55【游江西留别富阳裴、刘二少府】

孟浩然

西上游江西，临流恨解携。千山叠成嶂，万水泻为溪。
石浅流难溯，藤长险易跻。谁怜问津者，岁晏此中迷。

卷_56【广陵别薛八（一题作送友东归）】

孟浩然

士有不得志，栖栖吴楚间。广陵相遇罢，彭蠡泛舟还。
橈出江中树，波连海上山。风帆明日远，何处更追攀。

卷_57【送洗然弟进士举】

孟浩然

献策金门去，承欢彩服违。以吾一日长，念尔聚星稀。
昏定须温席，寒多未授衣。桂枝如已擢，早逐雁南飞。

· 全唐诗 ·

卷_58【崔明府宅夜观妓】

孟浩然

白日既云暮，朱颜亦已酡。画堂初点烛，金幌半垂罗。
长袖平阳曲，新声子夜歌。从来惯留客，兹夕为谁多。

卷_59【同卢明府早秋宴张郎中海亭】

孟浩然

侧听弦歌宰，文书游夏徒。故园欣赏竹，为邑幸来苏。
华省曾联事，仙舟复与俱。欲知临泛久，荷露渐成珠。

卷_60【卢明府早秋宴张郎中海园即事，得秋字（一作
卢象诗）】

孟浩然

邑有弦歌宰，翔鸾狎野鸥。眷言华省旧，暂拂海池游。
郁岛藏深竹，前溪对舞楼。更闻书即事，云物是清秋。

· 全唐诗 ·

卷_61【宴荣二山池（一题作宴荣山人池亭）】

孟浩然

甲第开金穴，荣期乐自多。
枥嘶支遁马，池养右军鹅。
竹引携琴入，花邀载酒过。
山公来取醉，时唱接离歌。

卷_43【夏日与崔二十一同集卫明府宅（一作宴卫明府宅遇北使）】

孟浩然

言避一时暑，池亭五月开。
喜逢金马客，同饮玉人杯。
舞鹤乘轩至，游鱼拥钓来。
座中殊未起，箫管莫相催。

卷_44【清明日宴梅道士房】

孟浩然

林卧愁春尽，开轩览物华。
忽逢青鸟使，邀入赤松家。
丹灶初开火，仙桃正落花。
童颜若可驻，何惜醉流霞。

· 全唐诗 ·

卷_45【寒夜张明府宅宴】

孟浩然

瑞雪初盈尺，寒宵始半更。列筵邀酒伴，刻烛限诗成。
香炭金炉暖，娇弦玉指清。醉来方欲卧，不觉晓鸡鸣。

卷_46【宴张别驾新斋】

孟浩然

世业传珪组，江城佐股肱。高斋征学问，虚薄滥先登。
讲论陪诸子，文章得旧朋。士元多赏激，衰病恨无能。

卷_47【与诸子登岷山】

孟浩然

人事有代谢，往来成古今。江山留胜迹，我辈复登临。
水落鱼梁浅，天寒梦泽深。羊公碑字在，读罢泪沾襟。

· 全唐诗 ·

卷_48【与杭州薛司户登樟亭楼作】

孟浩然

水楼一登眺，半出青林高。帘幕英僚敞，芳筵下客叨。
山藏伯禹穴，城压伍胥涛。今日观溟涨，垂纶学钓鳌。

卷_49【寻天台山】

孟浩然

吾友太乙子，餐霞卧赤城。欲寻华顶去，不惮恶溪名。
歇马凭云宿，扬帆截海行。高高翠微里，遥见石梁横。

卷_50【同曹三御史行泛湖归越】

孟浩然

秋入诗人意，巴歌和者稀。泛湖同逸旅，吟会是思归。
白简徒推荐，沧洲已拂衣。杳冥云外去，谁不羡鸿飞。

· 全唐诗 ·

卷_51【晚泊浔阳望庐山】

孟浩然

挂席几千里，名山都未逢。泊舟浔阳郭，始见香炉峰。
尝读远公传，永怀尘外踪。东林精舍近，日暮但闻钟。

卷_52【陪张丞相登嵩阳楼】

孟浩然

独步人何在，嵩阳有故楼。岁寒问耆旧，行县拥诸侯。
林莽北弥望，沮漳东会流。客中遇知己，无复越乡忧。

卷_53【武陵泛舟】

孟浩然

武陵川路狭，前棹入花林。莫测幽源里，仙家信几深。
水回青嶂合，云度绿溪阴。坐听闲猿啸，弥清尘外心。

· 全唐诗 ·

卷_54【与颜钱塘登障楼望潮作】

孟浩然

百里闻雷震，鸣弦暂辍弹。府中连骑出，江上待潮观。
照日秋云迥，浮天渤澥宽。惊涛来似雪，一坐凛生寒。

卷_55【姚开府山池】

孟浩然

主人新邸第，相国旧池台。馆是招贤辟，楼因教舞开。
轩车人已散，箫管凤初来。今日龙门下，谁知文举才。

卷_56【夏日浮舟过陈大水亭（一作浮舟过滕逸人别业）】

孟浩然

水亭凉气多，闲棹晚来过。涧影见松竹，潭香闻芰荷。
野童扶醉舞，山鸟助酣歌。幽赏未云遍，烟光奈夕何。

· 全唐诗 ·

卷_57【与白明府游江】

孟浩然

故人来自远，邑宰复初临。执手恨为别，同舟无异心。
沿洄洲渚趣，演漾弦歌音。谁识躬耕者，年年梁甫吟。

卷_58【游凤林寺西岭】

孟浩然

共喜年华好，来游水石间。烟容开远树，春色满幽山。
壶酒朋情洽，琴歌野兴闲。莫愁归路暝，招月伴人还。

卷_59【秋日陪李侍御渡松滋江】

孟浩然

南纪西江阔，皇华御史雄。截流宁假楫，挂席自生风。
僚案争攀鹢，鱼龙亦避骢。坐听白雪唱，翻入棹歌中。

· 全唐诗 ·

卷_60【陪独孤使君同与萧员外证登万山亭】

孟浩然

万山青嶂曲，千骑使君游。神女鸣环佩，仙郎接献酬。
遍观云梦野，自爱江城楼。何必东南守，空传沈隐侯。

卷_61【秋登张明府海亭】

孟浩然

海亭秋日望，委曲见江山。染翰聊题壁，倾壶一解颜。
歌逢彭泽令，归赏故园间。予亦将琴史，栖迟共取闲。

卷_62【临涣裴明府席遇张十一、房六】

孟浩然

河县柳林边，河桥晚泊船。文叨才子会，官喜故人连。
笑语同今夕，轻肥异往年。晨风理归棹，吴楚各依然。

· 全唐诗 ·

卷_63【梅道士水亭】

孟浩然

傲吏非凡吏，名流即道流。隐居不可见，高论莫能酬。
水接仙源近，山藏鬼谷幽。再来迷处所，花下问渔舟。

卷_64【游景空寺兰若】

孟浩然

龙象经行处，山腰度石关。屡迷青嶂合，时爱绿萝闲。
宴息花林下，高谈竹屿间。寥寥隔尘事，疑是入鸡山。

卷_65【陪李侍御访聪上人禅居（一作陪柏台友访聪上人）】

孟浩然

欣逢柏台友，共谒聪公禅。石室无人到，绳床见虎眠。
阴崖常抱雪，枯涧为生泉。出处虽云异，同欢在法筵。

· 全唐诗 ·

卷_66【游精思观回，王白云在后】

孟浩然

出谷未停午，到家日已曛。回瞻下山路，但见牛羊群。
樵子暗相失，草虫寒不闻。衡门犹未掩，伫立望夫君。

卷_67【夏日辨玉法师茅斋】

孟浩然

夏日茅斋里，无风坐亦凉。竹林深笋概，藤架引梢长。
燕觅巢窠处，蜂来造蜜房。物华皆可玩，花蕊四时芳。

卷_68【与张折冲游耆闍寺】

孟浩然

释子弥天秀，将军武库才。横行塞北尽，独步汉南来。
贝叶传金口，山楼作赋开。因君振嘉藻，江楚气雄哉。

· 全唐诗 ·

卷_69【游精思，题观主山房】

孟浩然

误入桃源里，初怜竹径深。方知仙子宅，未有世人寻。
舞鹤过闲砌，飞猿啸密林。渐通玄妙理，深得坐忘心。

卷_70【宿立公房】

孟浩然

支遁初求道，深公笑买山。何如石岩趣，自入户庭间。
苔涧春泉满，萝轩夜月闲。能令许玄度，吟卧不知还。

卷_71【寻陈逸人故居】

孟浩然

人事一朝尽，荒芜三径休。始闻漳浦卧，奄作岱宗游。
池水犹含墨，风云已落秋。今宵泉壑里，何处觅藏舟。

· 全唐诗 ·

卷_72【寻梅道士（一作寻梅道士张山人）】

孟浩然

彭泽先生柳，山阴道士鹅。我来从所好，停策汉阴多。
重以观鱼乐，因之鼓枻歌。崔徐迹未朽，千载揖清波。

卷_73【陪姚使君题惠上人房】

孟浩然

带雪梅初暖，含烟柳尚青。来窥童子偈，得听法王经。
会理知无我，观空厌有形。迷心应觉悟，客思未遑宁。

卷_74【晚春题远上人南亭】

孟浩然

给园支遁隐，虚寂养身和。春晚群木秀，间关黄鸟歌。
林栖居士竹，池养右军鹅。炎月北窗下，清风期再过。

· 全唐诗 ·

卷_75【题大禹寺义公禅房】

孟浩然

义公习禅处，结构依空林。户外一峰秀，阶前群壑深。
夕阳连雨足，空翠落庭阴。看取莲花净，应知不染心。

卷_76【寻白鹤岩张子容隐居】

孟浩然

白鹤青岩半，幽人有隐居。阶庭空水石，林壑罢樵渔。
岁月青松老，风霜苦竹疏。睹兹怀旧业，回策返吾庐。

卷_77【题融公兰若（一作题容山主兰若）】

孟浩然

精舍买金开，流泉绕砌回。芰荷薰讲席，松柏映香台。
法雨晴飞去，天花昼下来。谈玄殊未已，归骑夕阳催。

· 全唐诗 ·

卷_78【过景空寺故融公兰若（或作过潜上人旧房、悼正弘禅师）】

孟浩然

池上青莲宇，林间白马泉。故人成异物，过客独潜然。
既礼新松塔，还寻旧石筵。平生竹如意，犹挂草堂前。

卷_79【题张野人园庐】

孟浩然

与君园庐并，微尚颇亦同。耕钓方自逸，壶觞趣不空。
门无俗士驾，人有上皇风。何处先贤传，惟称庞德公。

卷_80【李少府与杨九再来】

孟浩然

弱岁早登龙，今来喜再逢。如何春月柳，犹忆岁寒松。
烟火临寒食，笙歌达曙钟。喧喧斗鸡道，行乐羨朋从。

· 全唐诗 ·

卷_81【寻张五回夜园作】

孟浩然

闻就庞公隐，移居近涧湖。兴来林是竹，归卧谷名愚。
挂席樵风便，开轩琴月孤。岁寒何用赏，霜落故园芜。

卷_82【裴司士、员司户见寻（一题作裴司士见访）】

孟浩然

府僚能枉驾，家酝复新开。落日池上酌，清风松下来。
厨人具鸡黍，稚子摘杨梅。谁道山公醉，犹能骑马回。

卷_83【春中喜王九相寻（一题作晚春）】

孟浩然

二月湖水清，家家春鸟鸣。林花扫更落，径草踏还生。
酒伴来相命，开尊共解酲。当杯已入手，歌妓莫停声。

· 全唐诗 ·

卷_84【李氏园林卧疾】

孟浩然

我爱陶家趣，园林无俗情。春雷百卉坼，寒食四邻清。
伏枕嗟公干，归山羨子平。年年白社客，空滞洛阳城。

卷_85【过故人庄】

孟浩然

故人具鸡黍，邀我至田家。绿树村边合，青山郭外斜。
开筵面场圃，把酒话桑麻。待到重阳日，还来就菊花。

卷_86【张七及辛大见寻南亭醉作（一作张七及辛大见访）】

孟浩然

山公能饮酒，居士好弹筝。世外交初得，林中契已并。
纳凉风飒至，逃暑日将倾。便就南亭里，馀尊惜解醒。

· 全唐诗 ·

卷_87【岁暮归南山（一题作归故园作，一作归终南山）】

孟浩然

北阙休上书，南山归敝庐。不才明主弃，多病故人疏。
白发催年老，青阳逼岁除。永怀愁不寐，松月夜窗虚。

卷_88【南山下与老圃期种瓜】

孟浩然

樵牧南山近，林间北郭赊。先人留素业，老圃作邻家。
不种千株橘，惟资五色瓜。邵平能就我，开径剪蓬麻。

卷_89【溯江至武昌】

孟浩然

家本洞湖上，岁时归思催。客心徒欲速，江路苦邅回。
残冻因风解，新正度腊开。行看武昌柳，仿佛映楼台。

· 全唐诗 ·

卷_90【舟中晓望】

孟浩然

挂席东南望，青山水国遥。
舳舻争利涉，来往接风潮。
问我今何去，天台访石桥。
坐看霞色晓，疑是赤城标。

卷_91【自洛之越】

孟浩然

皇皇三十载，书剑两无成。
山水寻吴越，风尘厌洛京。
扁舟泛湖海，长揖谢公卿。
且乐杯中物，谁论世上名。

卷_92【途中遇晴】

孟浩然

已失巴陵雨，犹逢蜀坂泥。
天开斜景遍，山出晚云低。
馀湿犹沾草，残流尚入溪。
今宵有明月，乡思远凄凄。

· 全唐诗 ·

卷_93【归至郢中】

孟浩然

远游经海峤，返棹归山阿。日夕见乔木，乡关在伐柯。
愁随江路尽，喜入郢门多。左右看桑土，依然即匪他。

卷_94【夕次蔡阳馆】

孟浩然

日暮马行疾，城荒人住稀。听歌知近楚，投馆忽如归。
鲁堰田畴广，章陵气色微。明朝拜嘉庆，须著老莱衣。

卷_95【他乡七夕】

孟浩然

他乡逢七夕，旅馆益羁愁。不见穿针妇，空怀故国楼。
绪风初减热，新月始临秋。谁忍窥河汉，迢迢问斗牛。

· 全唐诗 ·

卷_96【夜泊牛渚，趁薛八船不及】

孟浩然

星罗牛渚夕，风退鹢舟迟。浦溆尝同宿，烟波忽间之。
榜歌空里失，船火望中疑。明发泛潮海，茫茫何处期。

卷_97【晓入南山】

孟浩然

瘴气晓氛氲，南山复水云。鯢飞今始见，鸟坠旧来闻。
地接长沙近，江从汨渚分。贾生曾吊屈，予亦痛斯文。

卷_98【夜渡湘水（一作崔国辅诗）】

孟浩然

客舟贪利涉，暗里渡湘川。露气闻芳杜，歌声识采莲。
榜人投岸火，渔子宿潭烟。行侣时相问，浔阳何处边。

· 全唐诗 ·

卷_99【赴京途中遇雪】

孟浩然

迢递秦京道，苍茫岁暮天。穷阴连晦朔，积雪满山川。
落雁迷沙渚，饥乌集野田。客愁空伫立，不见有人烟。

卷_【途次望乡】

孟浩然

客行愁落日，乡思重相催。况在他山外，天寒夕鸟来。
雪深迷郢路，云暗失阳台。可叹凄惶子，高歌谁为媒。

卷_【永嘉上浦馆逢张八子容（一题作永嘉浦逢张子容客卿）】

孟浩然

逆旅相逢处，江村日暮时。众山遥对酒，孤屿共题诗。
廨宇邻蛟室，人烟接岛夷。乡园万馀里，失路一相悲。

· 全唐诗 ·

卷_【宿武阳即事（一作宿武阳川）】

孟浩然

川暗夕阳尽，孤舟泊岸初。岭猿相叫啸，潭嶂似空虚。
就枕灭明烛，扣舷闻夜渔。鸡鸣问何处，人物是秦馀。

卷_【渡扬子江】

孟浩然

桂楫中流望，京江两岸明。林开扬子驿，山出润州城。
海尽边阴静，江寒朔吹生。更闻枫叶下，淅沥度秋声。

卷_【田家元日】

孟浩然

昨夜斗回北，今朝岁起东。我年已强仕，无禄尚忧农。
桑野就耕父，荷锄随牧童。田家占气候，共说此年丰。

· 全唐诗 ·

卷_【九日，得新字】

孟浩然

初九未成旬，重阳即此晨。登高闻古事，载酒访幽人。
落帽恣欢饮，授衣同试新。茱萸正可佩，折取寄情亲。

卷_【除夜乐城逢张少府】

孟浩然

云海泛瓯闽，风潮泊岛滨。何知岁除夜，得见故乡亲。
余是乘槎客，君为失路人。平生复能几，一别十馀春。

卷_【岁除夜会乐城张少府宅】

孟浩然

畴昔通家好，相知无间然。续明催画烛，守岁接长筵。
旧曲梅花唱，新正柏酒传。客行随处乐，不见度年年。

· 全唐诗 ·

卷_【寒夜】

孟浩然

闺夕绮窗闭，佳人罢缝衣。理琴开宝匣，就枕卧重帏。
夜久灯花落，薰笼香气微。锦衾重自暖，遮莫晓霜飞。

卷_【赋得盈盈楼上女】

孟浩然

夫婿久离别，青楼空望归。妆成卷帘坐，愁思懒缝衣。
燕子家家入，杨花处处飞。空床难独守，谁为报金徽。

卷_【春意（一题作春怨）】

孟浩然

佳人能画眉，妆罢出帘帷。照水空自爱，折花将遗谁。
春情多艳逸，春意倍相思。愁心极杨柳，一种乱如丝。

· 全唐诗 ·

卷_【闺情】

孟浩然

一别隔炎凉，君衣忘短长。裁缝无处等，以意忖情量。
畏瘦疑伤窄，防寒更厚装。半啼封裹了，知欲寄谁将。

卷_【美人分香】

孟浩然

艳色本倾城，分香更有情。髻鬟垂欲解，眉黛拂能轻。
舞学平阳态，歌翻子夜声。春风狭斜道，含笑待逢迎。

卷_【伤岷山云表观主】

孟浩然

少小学书剑，秦吴多岁年。归来一登眺，陵谷尚依然。
岂意餐霞客，溘随朝露先。因之问閭里，把臂几人全。

· 全唐诗 ·

卷_【题梧州陈司马山斋（一作宋之问诗）】

孟浩然

南国无霜霰，连年对物华。青林暗换叶，红蕊亦开花。
春去无山鸟，秋来见海槎。流芳虽可悦，会自泣长沙。

卷_【岁除夜有怀（一题作除夜）】

孟浩然

迢递三巴路，羁危万里身。乱山残雪夜，孤烛异乡人。
渐与骨肉远，转于奴仆亲。那堪正飘泊，来日岁华新。

卷_【登安阳城楼】

孟浩然

县城南面汉江流，江涨开成南雍州。才子乘春来骋望，
群公暇日坐销忧。楼台晚映青山郭，罗绮晴骄绿水洲。
向夕波摇明月动，更疑神女弄珠游。

· 全唐诗 ·

卷_【登万岁楼】

孟浩然

万岁楼头望故乡，独令乡思更茫茫。天寒雁度堪垂泪，
日落猿啼欲断肠。曲引古堤临冻浦，斜分远岸近枯杨。
今朝偶见同袍友，却喜家书寄八行。

卷_【除夜有怀】

孟浩然

五更钟漏欲相催，四气推迁往复回。帐里残灯才去焰，
炉中香气尽成灰。渐看春逼芙蓉枕，顿觉寒销竹叶杯。
守岁家家应未卧，相思那得梦魂来。

卷_【春情】

孟浩然

青楼晓日珠帘映，红粉春妆宝镜催。已厌交欢怜枕席，
相将游戏绕池台。坐时衣带萦纤草，行即裙裾扫落梅。
更道明朝不当作，相期共斗管弦来。

· 全唐诗 ·

卷_【长安早春（一作张子容诗）】

孟浩然

关戍惟东井，城池起北辰。咸歌太平日，共乐建寅春。
雪尽青山树，冰开黑水滨。草迎金埒马，花伴玉楼人。
鸿渐看无数，莺歌听欲频。何当遂荣擢，归及柳条新。

卷_【荆门上张丞相】

孟浩然

共理分荆国，招贤愧不材。召南风更阐，丞相阁还开。
觐止欣眉睫，沉沦拔草莱。坐登徐孺榻，频接李膺杯。
始慰蝉鸣柳，俄看雪间梅。四时年籥尽，千里客程催。
日下瞻归翼，沙边厌曝鳃。伫闻宣室召，星象列三台。

卷_【陪张丞相登荆城楼，因寄蓟州张使君及浪泊
戍主刘家】

孟浩然

蓟门天北畔，铜柱日南端。出守声弥远，投荒法未宽。
侧身聊倚望，携手莫同欢。白璧无瑕玷，青松有岁寒。

· 全唐诗 ·

府中丞相阁，江上使君滩。兴尽回舟去，方知行路难。

卷_【陪张丞相祠紫盖山，途经玉泉寺】

孟浩然

望秩宣王命，斋心待漏行。青衿列胄子，从事有参卿。
五马寻归路，双林指化城。闻钟度门近，照胆玉泉清。
皂盖依松憩，缁徒拥锡迎。天宫上兜率，沙界豁迷明。
欲就终焉志，恭闻智者名。人随逝水没，波逐覆舟倾。
想像若在眼，周流空复情。谢公还欲卧，谁与济苍生。

卷_【陪张丞相自松滋江东泊渚宫】

孟浩然

放溜下松滋，登舟命楫师。讵忘经济日，不惮沍寒时。
洗帟岂独古，濯纓良在兹。政成人自理，机息鸟无疑。
云物凝孤屿，江山辨四维。晚来风稍急，冬至日行迟。
腊响惊云梦，渔歌激楚辞。渚宫何处是，川暝欲安之。

卷_【和张判官登万山亭，因赠洪府都督韩公】

孟浩然

韩公是襄士，日赏城西岑。结构意不浅，岩潭趣转深。

· 全唐诗 ·

皇华一动咏，荆国几谣吟。旧径兰勿剪，新堤柳欲阴。
砌傍馀怪石，沙上有闲禽。自牧豫章郡，空瞻枫树林。
因声寄流水，善听在知音。耆旧眇不接，崔徐无处寻。
物情多贵远，贤俊岂无今。迟尔长江暮，澄清一洗心。

卷_【和宋太史北楼新亭】

孟浩然

返耕意未遂，日夕登城隅。谁道山林近，坐为符竹拘。
丽谯非改作，轩槛是新图。远水自嶓冢，长云吞具区。
愿随江燕贺，羞逐府僚趋。欲识狂歌者，丘园一竖儒。

卷_【赠萧少府】

孟浩然

上德如流水，安仁道若山。闻君秉高节，而得奉清颜。
鸿渐升仪羽，牛刀列下班。处腴能不润，居剧体常闲。
去诈人无谄，除邪吏息奸。欲知清与洁，明月照澄湾。

· 全唐诗 ·

卷_【秦中苦雨思归，赠袁左丞、贺侍郎】

孟浩然

苦学三十载，闭门江汉阴。用贤遭圣日，羁旅属秋霖。
岂直昏垫苦，亦为权势沈。二毛催白发，百镒罄黄金。
泪忆岷山堕，愁怀湘水深。谢公积愤懣，庄舄空谣吟。
跃马非吾事，狎鸥宜我心。寄言当路者，去矣北山岑。

卷_【同张明府碧溪赠答】

孟浩然

别业闻新制，同声和者多。还看碧溪答，不羨绿珠歌。
自有阳台女，朝朝拾翠过。绮筵铺锦绣，妆牖闭藤萝。
秩满休闲日，春馀景气和。仙舄能作伴，罗袜共凌波。
曲岛寻花药，回潭折芰荷。更怜斜日照，红粉艳青娥。

卷_【久滞越中，贻谢南池、会稽贺少府】

孟浩然

陈平无产业，尼父倦东西。负郭昔云翳，问津今亦迷。
未能忘魏阙，空此滞秦稽。两见夏云起，再闻春鸟啼。

· 全唐诗 ·

怀仙梅福市，访旧若耶溪。圣主贤为宝，君何隐遁栖。

卷_【送韩使君除洪州都曹（韩公父常为襄州使）】

孟浩然

述职抚荆衡，分符袭宠荣。往来看拥传，前后赖专城。
勿翦棠犹在，波澄水更清。重推江汉理，旋改豫章行。
召父多遗爱，羊公有令名。衣冠列祖道，耆旧拥前旌。
岷首晨风送，江陵夜火迎。无才惭孺子，千里愧同声。

卷_【送莫甥兼诸昆弟从韩司马入西军】

孟浩然

念尔习诗礼，未曾违户庭。平生早偏露，万里更飘零。
坐弃三牲养，行观八阵形。饰装辞故里，谋策赴边庭。
壮志吞鸿鹄，遥心伴鹳鷖。所从文且武，不战自应宁。

卷_【岷山送萧员外之荆州】

孟浩然

岷山江岸曲，郢水郭门前。自古登临处，非今独黯然。

· 全唐诗 ·

亭楼明落照，井邑秀通川。涧竹生幽兴，林风入管弦。
再飞鹏激水，一举鹤冲天。伫立三荆使，看君驷马旋。

卷_【送王昌龄之岭南】

孟浩然

洞庭去远近，枫叶早惊秋。岘首羊公爱，长沙贾谊愁。
土毛无缟纈，乡味有槎头。已抱沈痼疾，更贻魑魅忧。
数年同笔砚，兹夕间衾裯。意气今何在，相思望斗牛。

卷_【岘山送张去非游巴东（一题作岘山亭送朱大）】

孟浩然

岘山南郭外，送别每登临。沙岸江村近，松门山寺深。
一言予有赠，三峡尔将寻。祖席宜城酒，征途云梦林。
蹉跎游子意，眷恋故人心。去矣勿淹滞，巴东猿夜吟。

卷_【奉先张明府休沐还乡，海亭宴集（探得阶字）】

孟浩然

自君理畿甸，予亦经江淮。万里书信断，数年云雨乖。

· 全唐诗 ·

归来休浣日，始得赏心谐。朱绂恩虽重，沧洲趣每怀。
树低新舞阁，山对旧书斋。何以发秋兴，阴虫鸣夜阶。

卷_【宴张记室宅】

孟浩然

甲第金张馆，门庭车骑多。家封汉阳郡，文会楚材过。
曲岛浮觴酌，前山入咏歌。妓堂花映发，书阁柳逶迤。
玉指调箏柱，金泥饰舞罗。宁知书剑者，岁月独蹉跎。

卷_【宴崔明府宅夜观妓】

孟浩然

画堂观妙妓，长夜正留宾。烛吐莲花艳，妆成桃李春。
髻鬟低舞席，衫袖掩歌唇。汗湿偏宜粉，罗轻讵著身。
调移箏柱促，欢会酒杯频。倘使曹王见，应嫌洛浦神。

卷_【卢明府九日岷山宴袁使君、张郎中、崔员外】

孟浩然

宇宙谁开辟，江山此郁盘。登临今古用，风俗岁时观。

· 全唐诗 ·

地理荆州分，天涯楚塞宽。百城今刺史，华省旧郎官。
共美重阳节，俱怀落帽欢。酒邀彭泽载，琴辍武城弹。
献寿先浮菊，寻幽或藉兰。烟虹铺藻翰，松竹挂衣冠。
叔子神如在，山公兴未阑。传闻骑马醉，还向习池看。

卷_【登龙兴寺阁】

孟浩然

阁道乘空出，披轩远目开。逶迤见江势，客至屡缘回。
兹郡何填委，遥山复几哉。苍苍皆草木，处处尽楼台。
骤雨一阳散，行舟四海来。鸟归馀兴远，周览更裴回。

卷_【登总持寺浮图】

孟浩然

半空跻宝塔，晴望尽京华。竹绕渭川遍，山连上苑斜。
四门开帝宅，阡陌俯人家。累劫从初地，为童忆聚沙。
一窥功德见，弥益道心加。坐觉诸天近，空香送落花。

· 全唐诗 ·

卷_【与崔二十一游镜湖，寄包、贺二公】

孟浩然

试览镜湖物，中流到底清。不知鲈鱼味，但识鸥鸟情。
帆得樵风送，春逢谷雨晴。将探夏禹穴，稍背越王城。
府掾有包子，文章推贺生。沧浪醉后唱，因此寄同声。

卷_【夜登孔伯昭南楼，时沈太清、朱升在座】

孟浩然

谁家无风月，此地有琴尊。山水会稽郡，诗书孔氏门。
再来值秋杪，高阁夜无喧。华烛罢然蜡，清弦方奏鹍。
沈生隐侯胤，朱子买臣孙。好我意不浅，登兹共话言。

卷_【陪卢明府泛舟回作】

孟浩然

百里行春返，清流逸兴多。鹢舟随雁泊，江火共星罗。
已救田家旱，仍医俗化讹。文章推后辈，风雅激颓波。
高岸迷陵谷，新声满棹歌。犹怜不才子，白首未登科。

· 全唐诗 ·

卷_【腊月八日于剡县石城寺礼拜】

孟浩然

石壁开金像，香山倚铁围。下生弥勒见，回向一心归。
竹柏禅庭古，楼台世界稀。夕岚增气色，馀照发光辉。
讲席邀谈柄，泉堂施浴衣。愿承功德水，从此濯尘机。

卷_【同独孤使君东斋作】

孟浩然

郎官旧华省，天子命分忧。襄土岁频旱，随车雨再流。
云阴自南楚，河润及东周。廨宇宜新霁，田家贺有秋。
竹间残照入，池上夕阳浮。寄谢东阳守，何如八咏楼。

卷_【同王九题就师山房】

孟浩然

晚憩支公室，故人逢右军。轩窗避炎暑，翰墨动新文。
竹蔽檐前日，雨随阶下云。周游清荫遍，吟卧夕阳曛。
江静棹歌歇，溪深樵语闻。归途未忍去，携手恋清芬。

· 全唐诗 ·

卷_【冬至后过吴、张二子檀溪别业】

孟浩然

卜筑因自然，檀溪不更穿。园庐二友接，水竹数家连。
直与南山对，非关选地偏。草堂时偃曝，兰棹日周旋。
外事情都远，中流性所便。闲垂太公钓，兴发子猷船。
余亦幽栖者，经过窃慕焉。梅花残腊月，柳色半春天。
鸟泊随阳雁，鱼藏缩项鳊。停杯问山简，何似习池边。

卷_【韩大使东斋会岳上人、诸学士】

孟浩然

郡守虚陈榻，林间召楚材。山川祈雨毕，云物喜晴开。
抗礼尊缝掖，临流揖渡杯。徒攀朱仲李，谁荐和羹梅。
翰墨缘情制，高深以意裁。沧洲趣不远，何必问蓬莱。

卷_【上巳日涧南园期王山人、陈七诸公不至】

孟浩然

摇艇候明发，花源弄晚春。在山怀绮季，临汉忆荀陈。
上巳期三月，浮杯兴十旬。坐歌空有待，行乐恨无邻。

· 全唐诗 ·

日晚兰亭北，烟开曲水滨。浴蚕逢姹女，采艾值幽人。
石壁堪题序，沙场好解绅。群公望不至，虚掷此芳晨。

卷_【齿坐呈山南诸隐】

孟浩然

习公有遗坐，高在白云陲。樵子不见识，山僧赏自知。
以余为好事，携手一来窥。竹露闲夜滴，松风清昼吹。
从来抱微尚，况复感前规。于此无奇策，苍生奚以为。

卷_【来闍黎新亭作】

孟浩然

八解禅林秀，三明给苑才。地偏香界远，心净水亭开。
傍险山查立，寻幽石径回。瑞花长自下，灵药岂须栽。
碧网交红树，清泉尽绿苔。戏鱼闻法聚，闲鸟诵经来。
弃象玄应悟，忘言理必该。静中何所得，吟咏也徒哉。

卷_【西山寻辛谿】

孟浩然

漾舟寻水便，因访故人居。落日清川里，谁言独羡鱼。

· 全唐诗 ·

石潭窥洞彻，沙岸历纡徐。竹屿见垂钓，茅斋闻读书。
款言忘景夕，清兴属凉初。回也一瓢饮，贤哉常晏如。

卷_【题长安主人壁】

孟浩然

久废南山田，叨陪东阁贤。欲随平子去，犹未献甘泉。
枕籍琴书满，褰帷远岫连。我来如昨日，庭树忽鸣蝉。
促织惊寒女，秋风感长年。授衣当九月，无褐竟谁怜。

卷_【行出东山望汉川（一题作行至汉川作）】

孟浩然

异县非吾土，连山尽绿篁。平田出郭少，盘坂入云长。
万壑归於汉，千峰划彼苍。猿声乱楚峡，人语带巴乡。
石上攒椒树，藤间缀蜜房。雪馀春未暖，岚解昼初阳。
征马疲登顿，归帆爱渺茫。坐欣沿溜下，信宿见维桑。

卷_【夜泊宣城界（一题作旅行欲泊宣州界）】

孟浩然

西塞沿江岛，南陵问驿楼。湖平津济阔，风止客帆收。

· 全唐诗 ·

去去怀前浦，茫茫泛夕流。石逢罗刹碍，山泊敬亭幽。
火识梅根冶，烟迷杨叶洲。离家复水宿，相伴赖沙鸥。

卷_【下赣石】

孟浩然

赣石三百里，沿洄千嶂间。沸声常活活，洑势亦潺潺。
跳沫鱼龙沸，垂藤猿狖攀。榜人苦奔峭，而我忘险艰。
放溜情弥惬，登舡目自闲。暝帆何处宿，遥指落星湾。

卷_【初年乐城馆中卧疾怀归作】

孟浩然

异县天隅僻，孤帆海畔过。往来乡信断，留滞客情多。
腊月闻雷震，东风感岁和。蛰虫惊户穴，巢鹊眄庭柯。
徒对芳尊酒，其如伏枕何。归屿理舟楫，江海正无波。

卷_【醉后赠马四】

孟浩然

四海重然诺，吾尝闻白眉。秦城游侠客，相得半酣时。

· 全唐诗 ·

卷_【赠王九】

孟浩然

日暮田家远，山中勿久淹。归人须早去，稚子望陶潜。

卷_【登岷山亭，寄晋陵张少府】

孟浩然

岷首风湍急，云帆若鸟飞。凭轩试一问，张翰欲来归。

卷_【送朱大入秦】

孟浩然

游人武陵去，宝剑直千金。分手脱相赠，平生一片心。

卷_【送友人之京】

孟浩然

君登青云去，予望青山归。云山从此别，泪湿薜萝衣。

· 全唐诗 ·

卷_【送张郎中迁京】

孟浩然

碧溪常共赏，朱邸忽迁荣。豫有相思意，闻君琴上声。

卷_【同张将蓊门观灯】

孟浩然

异俗非乡俗，新年改故年。蓊门看火树，疑是烛龙燃。

卷_【张郎中梅园中】

孟浩然

绮席铺兰杜，珠盘折芰荷。故园留不住，应是恋弦歌。

卷_【北涧泛舟】

孟浩然

北涧流恒满，浮舟触处通。沿洄自有趣，何必五湖中。

· 全唐诗 ·

卷_【春晓】

孟浩然

春眠不觉晓，处处闻啼鸟。夜来风雨声，花落知多少。

卷_【洛中访袁拾遗不遇】

孟浩然

洛阳访才子，江岭作流人。闻说梅花早，何如北地春。

卷_【寻菊花潭主人不遇】

孟浩然

行至菊花潭，村西日已斜。主人登高去，鸡犬空在家。

卷_【檀溪寻故人（一题作檀溪寻古）】

孟浩然

花伴成龙竹，池分跃马溪。田园人不见，疑向洞中栖。

· 全唐诗 ·

卷_【扬子津望京口】

孟浩然

北固临京口，夷山近海滨。江风白浪起，愁杀渡头人。

卷_【同储十二洛阳道中作】

孟浩然

珠弹繁华子，金羁游侠人。酒酣白日暮，走马入红尘。

卷_【初下浙江舟中口号】

孟浩然

八月观潮罢，三江越海浔。回瞻魏阙路，空复子牟心。

卷_【宿建德江】

孟浩然

移舟泊烟渚，日暮客愁新。野旷天低树，江清月近人。

· 全唐诗 ·

卷_【问舟子】

孟浩然

向夕问舟子，前程复几多。湾头正堪泊，淮里足风波。

卷_【戏题（一作戏赠主人）】

孟浩然

客醉眠未起，主人呼解醒。已言鸡黍熟，复道瓮头清。

卷_【凉州词】

孟浩然

浑成紫檀金屑文，作得琵琶声入云。
胡地迢迢三万里，那堪马上送明君。

异方之乐令人悲，羌笛胡笳不用吹。
坐看今夜关山月，思杀边城游侠儿。

· 全唐诗 ·

卷_【送新安张少府归秦中（一题作越中送人归秦中）】

孟浩然

试登秦岭望秦川，遥忆青门春可怜。
仲月送君从此去，瓜时须及邵平田。

卷_【送杜十四之江南（一题作送杜晃进士之东吴）】

孟浩然

荆吴相接水为乡，君去春江正淼茫。
日暮征帆何处泊，天涯一望断人肠。

卷_【渡浙江问舟中人（一题作济江问同舟人。一作崔国辅诗）】

孟浩然

潮落江平未有风，扁舟共济与君同。
时时引领望天末，何处青山是越中。

· 全唐诗 ·

卷_【初秋】

孟浩然

不觉初秋夜渐长，清风习习重凄凉。
炎炎暑退茅斋静，阶下丛莎有露光。

卷_【过融上人兰若】

孟浩然

山头禅室挂僧衣，窗外无人水鸟飞。
黄昏半在下山路，却听泉声恋翠微。

卷_【句】

孟浩然

微云淡河汉，疏雨滴梧桐。

逐逐怀良驭，萧萧顾乐鸣。（《省试骐驎长鸣》，诗见《丹阳集》）